


海南叢書第一種

正
海
合
集
上

後學楊慶鱣題

◀ 行印局書南海口海州瓊 ▶



邱 文 莊 公 集

邱海二公合集序

文莊、忠介、兩先生之有合集也。初梓於康熙戊子。則爲運使甘陵賈君棠。觀察關中焦君映漢。重刊於乾隆癸酉。則爲縣令關中黨君維世。蓋以兩先生生瓊臺海外。人品學業。卓冠前朝。重其人者。因其遺文而什襲之。而編摩之。時愈久而文愈昌。兩先生之所以不朽於後世者。其精氣足以綿之也。邱君士儼本年選拔士。即文莊之後裔。函合集入京。介吳學齋太史問序於余。余惟兩先生事業。炳於史冊。其文之蒐羅補輯。賈焦諸君。皆已言之。至流風餘韻之在瓊者。太史又所熟稔。凡此皆無待余之言之者也。按明史稱文莊。性褊隘。好面折人過。又稱忠介以剛爲主。行事不能無偏。蓋嘗論之。孔子曰。君子利而不同。又曰。不得中行而與之。必也狂狷乎。士大夫處世。不患不能諧俗。患無特立獨行之操。吾苟有得於己。見之真。而守之確矣。雖古之所謂聞人。吾不能借其緒餘之論。以沒吾之真也。雖世所謂大人。先生素稱君子者。吾不能捨吾之見。而徇其所是者是之。非者。非之也。

邱 文 莊 公 集

惟其然。故以之爲己。則不失性情之實。以之事君。則不致黨附之譏。以之垂示天下後世。則如日月之行。江漢之流之光且潔也。而時且譽之曰隘曰偏。則固所不辭矣。避偏與隘之名。而得鄉愿。不如受偏與隘之名。而得吾之眞。何則。觀人者。不當以一事一言觀之。亦視素所樹立何如耳。文莊列仕籍四十餘年。以寬天啓上心。忠厚變士習。生平得力。尤在續眞西山大學衍義補一書。其言曰。西山書主於理。而不出乎身家之外。故其義大而簡。濬書主於事。而有以包乎天地之大。故其義細而詳。又其對君之言曰。謹好尙。不惑於異端。節財用。不至於耗國。此豈無本之論哉。忠介自崛強學博。以至卿貳。直諫介節。孺婦皆知。而不知其自道。乃在嚴師戒一篇。其言曰。天與爾完節。而當完而心。毋疾中餒氣。毋矜能諱箴。毋外爲強舌。而內愧影衺。毋洵洵易操。而未流靡淫。毋質冕叁裳。媚恥於中襟。毋妻妾宮室。動念而自底陸沉。有一於此。不如鹿死之音。嗚呼。兩先生之立心如此。則又非惟其文之足重。而其文之所以久而彌章者。固在是歟。兩先生

集 公 莊 文 邸

立朝不同。操行亦不同。而其若合符節者有二焉。文莊少孤。忠介亦少孤。皆得賢母教以有成。及其歿也。文莊所居邸第極湫隘。廉介無餘貲。忠介則葛幃敝簞。至同官釀金爲歛。觀兩先生之身後。則其與於世也足以風矣。其發而爲言者。不亦可爲吉光之片羽。桂林之一枝哉。是爲序

皆乾隆四十二年歲次戊戌十月旣望賜進士出身誥授光祿大夫經筵講官協辦大學士吏部尙書教習庶吉士南蘭程景伊頓首拜撰

邱文莊公集

邱海二公合集序

原序

世稱文章爲經國大業。經國之文。其大者莫過于周官。蓋姬公身爲宰相。手自擘畫。見諸行事。筆之于書。以爲一代不刊之典。然其間亦多繁瑣冗雜。用之或苦。按而行之。必不能久遠而不廢。故說者以爲出于漢儒之僞筆。此雖未必然。乃後世之摹倣周官者。無一不敗。固其人非哉。要亦時勢難沿。即姬公之于三王。已有不合而待仰思者矣。況其下乎。三代以後。以經國之業爲文者。寥寥罕見。而相臣以文經國者。尤不多得。至昭代而有丘文莊公所著大學衍義補。于治國平天下之道。纖悉畢具。皆參酌前代折衷時宜。人主行其說。可以萬世而無弊。公又遭逢柄用。當熙洽之朝。言雖不必盡行。然而繡座之經綸。諸曹之展設。率不能出公所條列。蓋犁然炳然。眞爲經國之文。善得周官之遺意者矣。而其時又去國初未久。習尙渾樸。文取明白曉暢。不爲雕鏤剽竊以見奇。間取公他所爲詩文讀之。率春容恬適。意盡辭止。根本盛而枝葉衰。事情多而聲悅少。近擬金華烏傷。

遠追廬陵南豐。卽邇來以著作自命。雄視詞場者。或以臺閣體目公。而要之于修辭立誠。言近指遠。竟未能逾勝公也。自公後而臺閣之文。浸明浸昌。長沙、內江、華亭、新鄭、江陵。接踵繼起。近則吳門、太倉、東阿、晉江、南北兩山陰。皆斐然成一家言。遂令文章操柄。不在韋布。不在他曹。而在綸扉尺地。爲千載政事堂生色。而要之于博古綜今。明體適用。亦未能逾勝公也。蓋公起孤貧力學。旣選居中秘。復博極群書。經史百家。旁及醫卜老釋。無不覽觀。嘗彙朱子微言。做論語、作學的、稽世運升降治亂大端。與國統偏全。作世史正綱。皆有裨於學問經濟。與衍義補相表裏。至輔政日。又疏陳時政十餘萬言。論天變可畏。修省所宜先。皆鑿鑿中覈。孝陵十八年之治平。實自公啓之。經國大業。舍公將誰蒞哉。公嘗論我朝相業。于二楊多不滿。謂當其時。南交叛逆。軒龍易位。敕使西洋。權歸當侍。釀成土木之變。誰實爲之。然則公之自負實深。惟是衰暮登庸。設施未究。經濟之志。徒托之著述。而功業不無少讓。此余之所以爲公惜已。公詩文有

邱 文 莊 公 集

曾孫郭、槩男效光。已刻行於世。至玄孫爾毅爾諤重編合刻。來乞余序。余濫叨政地。于公不勝高山景行之仰。其爲文取明白曉暢。意頗與公同。至于博綜有用。則遠不及公。乃得以姓名附公牘末。亦云厚幸。鄭端簡稱公好議論上下千古。尤熟國家典故政事。可否反覆。與大臣言官爭是非。其風槩如此。今政歸六曹。權操臺省。輔臣緘默。充位而已。不能出半語。然則余之愧公。不獨文矣。不獨文矣。

賜進士出身光祿大夫柱國少師兼太子太師吏部尙書建極殿大學士知經筵日講制誥實錄玉牒總裁官後學福清葉向高撰

邱 文 莊 公 集

原
序

八

邱文莊公傳

閩中何喬遠撰

邱濬。字仲深。瓊山人。其先晉江人。元季有官瓊者。因家焉。祖普。性有陰德。爲良醫。濬幼孤。嗜書。或從市肆借讀。或從親友訪求假抄。聞有積書之家。必豫計內交。有遠涉數百里。轉洩至數十人。積久至三五年而後得者。甚至爲人所厭薄。厲聲色相拒。其顛篤如此。正統九年。鄉貢第一。卒業大學。祭酒蕭鎡深重之。景泰五年。試禮部。學士商輅閱策。意爲濬揭之。果然廷試。以貌寢。實二甲第一。首選翰林庶吉士。洗馬李紹指劉定之謂濬曰。主靜生長名邦。兼奉庭聞。固宜浩博。子海外孤生。安所師友。乃亦如是。濬以海外孤生。躋取清華。益讀未見書。究心本朝。文日名四方。既撤館。授翰林編修。天順以來。兩廣蠻賊猖獗。朝命總兵顏彪。都御史葉盛討之。不能平。憲宗初。使都督趙輔。叅政韓雍往代。濬記大學士李賢言兩廣蠻賊。自總兵顏彪行師無律。而我威始不振。自其縱兵擄掠。而民財始大屈。自其殺平民爲功。而人心始日離。賊徒始日盛。今用兵之策。大要有一。

曰逐，曰困，而已。逐在廣東，困在廣西。何言廣東賊當逐也。廣東故無賊。賊皆來自廣西，猺獞而居民從之。使其盡反巢穴，民無所從，莫煽以變。所以必逐也。何言廣西賊當困也。猺獞在峭嶺險峽中，雖有官軍百萬，亦無所能一鼓直抵而盡殲之也。所以必困也。今廣東十府，殘破者六，其地之相去，遠者或至千里。若逐之從一路，則敵之與我彼此相避，必難成功。必分爲四路。一路自廣州三江口，趨肇慶，歷四會封川等縣，泝流而上，至澄江。一路自肇慶之新興，過陽江，抵高州界，擣電白信宜，出茂名化州。繇間道徑岑溪等縣界。一路自籐縣，直泝北流江登陸。繇鬱林博白陸川出石城，抵電州，復自石城往廉州之靈山，下橫州江。一路自廣州之連州，經賀、縣出平樂。四路之兵，俱會潯州，窮探極追，且招且勦。此逐策也。廣西猺獞所在有之。惟潯州大籐峽，前臨河，後抵柳慶，左界昭梧，右接邕賁，中皆高山峻嶺，惟其蓄積有限，必資火種刀耕。其田盡在戶外，若進兵屯守，蹂其青苗，使出不得擄掠，退不得耕耨，弊之。不過一二年耳。春夏之交，蠻地大

邱文莊公集

瘴。今欲進兵。宜以七月。春夏退屯於潯州。既秋。復進軍士乃完。此困策也。夫今日賊徒。所以倍蓰於昔者。皆良民耳。彼平居輸賦供力。養兵奉吏。我保障賴之。寇旦夕來。焚蕩其室廬。戕賊其親屬。入城則閉不納。入山。又與賊遇。不幸見虜。姑且順從。冀湏臾無死。賊因而劫持虐用之。行使負擔。息使樵爨。攻城則驅以當矢石。反奔則棄以委官軍。民所僥倖不死。固心語曰。我豈從賊。不得已耳。他日賊平。故可輸賦供役如平居。忽聞大軍之來。喜若更生。乃及既至。真賊遁入山中。子不可得。不得已從賊者。盡甘心焉。輿言及此。真可傷憫。今之總帥。宜戒前事。召諭父老子弟。指誓天曰。使無疑顧。出榜招徠。許以自新。或與殺賊贖罪。然後良民可使不爲盜也。而又除去總兵等官。領去旗牌及挽弓報効等項名色。以絕其驕驕。加意撫綏廣平一府。以固其根本。獎諭服順之土官。使聽調遣。厚加犒賞。所得賊財。盡以與之。以結其心。嚴私鹽之禁。以爲賞勞之資。以足其欲。被虜軍民。自賊來者。或知其情勢。俾爲嚮導。以借其力。是欲報讐者。編爲義

兵使隨軍調遣。以壯其氣。如是而賊不破者。未之有也。賢善濬策。以轉聞。吐嘉納之。命錄示總兵巡撫。卒用破賊。九載秩滿。陞侍講。與修英宗實錄。成陞侍講學士。濬在講筵。雖貌不揚。而音吐洪暢。憲宗悅之。累進翰林院學士。國子監祭酒。加禮部侍郎。仍掌國子監事。濬慎取與。恬仕進。富於見聞。是非臧否。常與人各趨。又能以辦博濟其說。人莫敢難者。至於奏對。勅諭之文。引經證史。條達詳明。讀者知其有用之儒也。宋真德秀大學衍義。舊至修身齊家而止。濬更採集子史經傳有益治國平天下者。附以己見。爲百六十卷。凡例十二目。詳例百十九目。曰大學衍義補。又以成天下之務。易教先幾。更條四目。曰謹理欲之初。察事幾之萌。防奸邪之漸。炳治亂之朕。總而曰審幾微。自爲一卷。以首補誠意正心之要。孝宗嗣位。濬書適成。表上之。上深嘉悅。賜白金二十兩。紵絲二表裡。陞禮部尚書。掌詹事府事。命錄付書坊刊行。亡何命充副總裁官。修憲宗實錄。以老乞休。令朔望朝參。以終史事。四年實錄成。加太子太保。遂令兼文淵閣大學士。時年七

邱文莊公集

十一矣。三疏固辭。未疏言皇上處臣內閣。不許臣辭。念臣之壯也。亦欲有爲。今老矣。閣久歷多。始知天下事。思之非不爛然。但恐行時不如言時。人心不似我心。臣所進大學衍義補。平生精力盡在。倘聖明採一二於千百之中。見諸施行。雖不用臣。如實用臣。不許。既就位。復言禮經有之事君。先資其言。拜自獻其身以成其信。故君有責於其臣。臣有死於其言。是以伊尹幡然於數語。傅說嘉命夫二篇。管仲問答於齊桓。樂毅披寫於燕昭。韓信登壇而對。諸葛亮草廬而策。姚崇入相。而要臣之愚。上遠古人。若大學衍義補一書。臣所竭思盡忠。搜古鑿來。非如鄭康成之訓經義。泛濫無裨。王安石之假經言。紛更變亂。臣年踰七十。鍾鳴漏盡。明主不棄。進之內閣。是臣書遭逢之日也。臣請擇其要。綴爲奏章。次第上獻。乞下內閣二三儒臣。會同斟酌。擬詔施行。或有窒礙。姑留俟後。臣決不敢護短求勝。上曰。讓獻入告。大臣職也。卿究心當世久矣。所欲有言。其卽聞朕。明年上言。臣所進大學衍義補。條目甚多。然皆一代一時之事。若所謂經籍圖書。乃萬年百

世之事也。臣本書中有曰廣圖籍之儲者。臣竊惟圖籍所載。皆聖帝名王賢人君子精神心術之微。道德文章之懿。行義事功之大。天地山川人物風俗之所載。禮樂刑政制度文爲之所出。今賴知古。後賴知今者也。天地間物。雖珍奇異寶。失可復得。獨經籍者。宇宙精華。生人元氣。是以自古帝王。當務爲急。卽漢唐宋創業之君。始有天下。莫不先收圖籍。迨厥中世。稍有散闕。輒分行天下。懸賞購之。授官酬之。五代亂離。猶然不廢。高皇帝至正丙午年。首求遺書。旣平元都。得其館閣秘藏。又廣購於民間。沒入於罪籍。一時儲積。不減前代。太宗多事之秋。猶聚衆千百。纂集永樂大典。以備考究。今承平百年。中州無事。國家尙有餘力。采輯佛道。用備藏經。徧賜天下寺觀。雕以良梓。飾以文綾。儲以紫紅函匱。載以金碧輪藏。況此儒家經籍。如前所云。烏可惜日月之力。吝纖毫之費。使其放逸廢墮。夫民庶之家。遷徙不常。好尙不一。旣不能廣有所儲。卽儲亦不能久遠。所賴石渠蓬閣。積聚之多。收藏之密。肩鏑之固。類聚者有掌故之官。闕畧者有繕寫之

邱 文 莊 公 集

吏。損壞者有修補之工。散失者有購訪之令。然後不至涸爛斷絕。前代藏書之多。有至三十七萬卷者。今內閣書目。不能什一。數十年來。在內未聞考較。在外未聞購求。失今不治。後無及已。夫自古藏書不一所。漢有東觀蘭臺鴻都。唐有秘書監集賢書院。宋有崇文館秘書省諸處。我朝罷前代臺監館省之官。併其任於翰林院。院設典籍二員掌之。天下書籍。盡歸內府南京國子監雖設。典籍所掌。不過累朝頒降若舊鑄書木而已。失國家經籍圖書之儲。兩京皆有。永樂中。遣修選陳循於南京文淵閣自一部至百部以上。各取一部於北京。今請勅大學士等。將內閣見存書籍。計委學士以下。督同典籍等官一一彙若千部。部若干卷。木刻比較年月及委官各御識於其後。或有副餘分送一部於兩京國子監。仍勅南京內外守備大臣。會同禮部翰林院官。稽閱永樂中數有僅一本無副餘者。下國子監再行抄錄。他若內閣所無或不備者。錄付禮部。分行天下提學憲臣。榜示官吏軍民之家。與凡官府學校寺觀舖坊。令送所在有司謄寫校對。先後進呈。其藏書之

邱文莊公集

所。二在京師。一在南京。使一書而有數本。一本而有二處。復彷彿宋曝書。給酒食費之例。每歲三伏先期。奏請翰林院量委堂官一二員。偕僚屬同赴晒涼。畢事扁鐻。內外大小衙門。因事有欲稽考。必請上旨以爲常規。臣又惟高皇帝聖德神功。超越萬世。御極三十年。所有製作。多出宸衷。非若前代帝王假手詞臣之比。令頒行天下者。惟皇明祖訓大誥三篇。大誥武臣資世通訓四書而已。御製詩文。雖業編梓。天下臣民。常稀得見。至其編在內閣書目者。猶有御注洪範。御注尙文。御注道德經。文華寶鑑。昭錄外戚事鑑。存心錄。精誠錄。省躬錄。志戒錄。永鑑錄。忠義錄。爲政要錄。彭善輝惡錄。武臣鑑。醒貪簡要錄。務農技藝簡要錄。女戒務本訓諸書。是皆我聖祖心思之所運形。手澤之所沾溉。間或成於衆作。何不出於上裁至當。時儒臣所纂。則又有大明帝紀。皇明寶訓。大明寶訓。洪武聖政記。大明日曆等書。今盡藏內閣。天下臣民。無繇覩記。臣竊惟前代帝王。有我聖祖制作之一二者。其後人尙傳瓊瑛。布天下。示將來。宣大其名聲。我聖祖功德之

邱 文 莊 公 集

隆。萬世如見。即不假言語文字以傳。聖子神孫。繼述揄揚。故不容已。臣請發行鑄印。大頒中外。若其間繁不易舉。質難行遠者。請如洪武六年翰林院學士詹同宋鑑等。纂集日曆。以爲寶訓之例。倣唐人貞觀體製。撮綱分類。輯成一書。上而朝廷。用以資治。下而學校。用以教人。科舉用以取士。並行六經。偶盛五帝。亦不刊之典也。若列聖祖承致治之迹。惟賴實錄寶訓二書。今代經六帝。世盈十紀。巍乎煥然。昭哉可觀。既無金匱石室之具。又無名山副藏之制。惟內府內閣各儲一部而已。臣不識忌諱。一日有不測之故。出衆人所不慮。則一代治體要典文章之盛。未繇憑稽。後來秉史筆者。且求之草澤之中。訪之傳聞之外。真假莫辨。簡牘散亡。非但大功異政。不得紀載。而明君良臣。爲人蒙污。或亦有之矣。臣愚過計。欲乞於文淵閣旁。別建重樓一所。專累甄石。不用櫟棟。勅寫一部。藏以銅匱。皮樓上層。凡國家大事。文書玉牒之類皆附焉。其詔冊制誥勅書行禮儀注。若應制詩文。與夫前朝遺事。或諸雜錄。亦勅先後錄寫。盛於鐵匱。皮樓下層。而凡

內府衙門所藏文書。可爲異日纂修之備。及永樂以前文武官賂黃之類。亦皆附焉。則祖宗功德。傳以無疑。國家典章。俟之不惑。書奏。上嘉納之。時太監李廣漸進左道。親近用事。濬因言成化間。彗星三見。遍掃三垣。地震無慮五百六次。比年彗見天津。而地震無虛日。異鳥三鶻禁中。考諸經史。天變莫大彗。在二垣。三台尤重。地震莫大震在京師。邊防尤急。矧禽鳥動物。得氣之先。春秋書彗。在二地。地震五。飛禽二。蓋二百四十二年之間。今疊見二十五。六年之內。變不虛生。甚可畏也。陛下改元。歲在戊申。與太祖初元同符。宜體上天仁愛。念祖宗基業。修德以立本。清心以應務。僅好尙。節財賄。公任用。禁私謁。釐革庶政。盡復國初之舊。庶可回天變。消物異。因擬二十二事。曰佛道教可延福祚。曰修煉金丹可致長生。曰創建寺觀可植福田。曰印造經懺可冀利益。曰修齋設醮須豐盛。曰誦經持咒可禳度。曰崇重西僧求秘術。曰祀神可福佑。曰宴享品物須豐侈。曰匪頒賜賜如舊例。曰寶石可服玩。曰欲街市和買應用取直官府。曰求閒田爲己業。

邱 文 莊 公 集

曰差官於外織造措辦。曰獻珍異器希賞賜。曰宮室損壞湏改作。曰折糧備顏料。曰工作人勞苦希陞賞。曰所司使用乏人當額外增置。曰工巧人授以職。曰技藝襍流欲得文武要秩。曰無出身人欲於文武官常員銓註。皆請有言及。而以理折之。蓋廣所欲請於上。而潛先發者。疏幾萬餘言。上雖嘉納。未能行也。六年當考察天下朝覲官。潛請如唐虞三載考績黜陟之制。蓋亦循義補所言。於是吏部尙書王恕所奏黜者以上。旨留其二十之一。潛文時對人言。想行事不合祖宗朝典。故以風示。亡何太醫院判劉文泰訐恕。恕意潛致泰。遂求去。於是言者譁然攻潛。摘潛悼亡長思錄。戲劇五倫記。爲不經之作。上不問也。潛自少苦學。老而右目失明。在朝半疾病。屢求去。上令朔望朝奏。大風雨雪日。悉免朝以優之。最後悉免其朝奏。七年加少保兼太子太保改戶部尙書武英殿大學士。八年卒於位。訃聞。上輟朝。賜賻祭葬。贈特進左柱國太傅。諡文莊。遣行人護歸。官其孫楛尙寶司丞。潛仕四十餘年。自處如韋布。其卒也。家人治裝。圖書數萬卷而已。嘗考談

儒論、著作家、禮儀節。以補朱子家禮所未備。採朱子平生微言要義。倣魯論作朱子學的二十篇。謂朱子綱目。一重正統。而秦隋之末。有未可遽奪。漢唐之初。有未可遽予者。作世史正綱。濬兩與策士。及爲國子監祭酒。讖讖以文體、士行、訓人。斥險怪之詞。示中庸之道。士始不信。卒翕然服焉。濬弱冠論史。謂許衡仕元。無能改於其俗。雖不仕可也。聞者驚駭。子敦、沉默博記。善文章。早卒。敦子京。陰授中書舍人。仁愛好施。有其祖風。慈宙卒。正德初。復以曾孫郊繼其官。賜濬景賢。祠於鄉。配宋學士蘇軾。何喬新論嶺南人物。自唐張九齡、宋余靖、崔與之、及濬四人而已。郊亦有孝弟稱。

邱 文 莊 公 集

序

瓊海，爲東粵僻壤。自漢武始置郡。而反側無常。賈捐之猶有棄珠崖之議。是秦漢以前。風化所不及。文運所未開也。始宋崔清獻提刑來郡。獎廉劾貪。興利除害。著海土澄清錄。由是漸知禮化。蘇文忠謫居儋耳。黎子雲輩執經問道。姜君弼遠道從游。轍跡所至。過化存神。士風因之丕變。至若瓊海奔流。五峯聳峙。則又得山川之奇鐘毓秀。數千百年始篤生文莊丘公。忠介海公。爲一代大儒。千秋名世。迄今考其行。讀其書。莫不心儀神往。匪粵東一隅爲然也。文莊著有瓊臺類稿。及世史、世綱、諸書。忠介則平黎治河諸封事。及奏議、章疏。正言讜論。不一而足。大抵皆本天下之正氣。岳瀆之靈根。發爲道德文章。炳若日星。垂諸史冊。以繼往而開來者也。予分巡雷瓊。獲登二公之祠宇。訪其著作之富。得之簡編者。妄加校訂。去繁就簡。以資後學觀型。書成。聞太守賈公。亦留心茲選。過而質之。其鑒賞同。品次同。去取亦無不同。始歎予二人仕同地。學同道。好古有同心。而纂述有

邱 文 莊 公 集

序文

二二

同志也。及公陟嵯使。赴任五羊。言別海濱。予曰。公之守瓊。與予之巡瓊。無異轍也。公選二公之文。與予選二公之文。無異尙也。公今去瓊。則合集之刻。非予之任也乎。遂取公選。並予選者。叅校之。非敢以後人之筆。妄爲刪訂也。譬之珠玉然。合浦所得者皆珠也。不必有魚目之混。而必以照乘者爲寶。崑山所產者皆玉也。不必有碔砆之辨。而必以璠璵者爲珍。若此者何也。精而益取其精也。況曠世相感。文字神交者耶。噫。清獻文忠。宦瓊于二公之先。爲二公所取法。賈公與予。宦瓊于二公之後。而取法於二公。私淑之懷。亦竊比古人遺意。則合二公之集。壽之梨棗。公之同好。期無負咎于昔賢。貽譏于後哲。以表予二人宦瓊之蹟。暨平生景慕之私云爾。至于兩集原板。字句剝落。及遺失篇次者。未敢謬以己見。增補入選。不無滄海遺珠之歎。姑闕疑以俟后之君子。

皆

康熙四十七年歲次戊子新秋分巡雷瓊道按察使司副使加三級關中焦映漢謹序

邱 文 莊 公 集

序

嶺南人物。自唐宋迄今。後先蔚起。中間相業之盛。首推曲江張文獻九齡。南海梁文康儲。瓊山丘文莊濬。文質炳著。餘相弗若也。至其清風高節。正言直諫之盡臣。如增城崔清獻。與之番禺陳給諫諤。瓊山海忠介瑞。均有矯矯之操。赫赫之名。後之讀其書。思其人者。流風餘韻。庶幾見之。予生也晚。見聞弗廣。張、梁、崔、陳、諸公。皆有表見。垂諸國史。載在志乘者。僅於千秋金鑑、封藩詔草、劍閣題詞、大聲奏事、恍惚一斑、管窺止此矣。至若丘海二公。生平著述。如瓊臺彙稿、世史、世綱、平黎、治河、章奏、封事。日久簡編蠹蝕。有如汲冢周書。不可句讀者。雖全豹猶一斑也。曩者歲在戊寅。予奉命守瓊。下車問俗。謁二公祠像。徵求遺逸。廣詢博採。闕疑存信。刪繁輯要。合爲一書。鈔訂成帙。緘諸篋中。俟有道者正焉。閱七載乙酉。觀察焦公。分守茲土。撫綏之暇。讀書懷古。手不釋卷。取二公遺文編於次之。出以見示。中間刪補詳略。與予前鈔。若合符節。相視而笑。莫逆於

心。次年丁亥。予移視榷政。將赴廣州。焦公送之郊。握手言曰。丘海二公海外文獻也。作者觀者。旁叅而互訂者。均有同心焉。心同則理同。理同則事同。劄劄之役。當共荷之。予唯而別。至廣州乃鳩工焉。廣工工而材善也。焦公寄俸。使專任之。三月而竣。嗟夫。二公生不同時。事不同主。遇不同勢。其勳業之隆。氣節之高。文章風雅之盛。光于日星。章于雲漢。亘古迄今。互相輝映。無不同也。方諸前賢。相業清風。並垂不朽。焉有不同焉者哉。是役也。焦公倡之。予隨而和之。兢兢然惟亥豕魚魯之是慎。恐有負於二公者。負焦公也。將無同。

康熙四十七年戊子季秋兩廣運使甘陵後學賈棠拜書於榷署之退思堂

邱文莊公集

邱文莊公傳

閩中焦映漢撰

丘公諱濬。字仲深。號瓊臺。廣東瓊州府瓊山縣人。先世未詳。祖諱普。樂善好施。宣德甲寅歲。郡大祲。饑殍遍野。普捨地爲義塚。瘞枯掩骼。爲第一水橋等處。封塋壘壘。凡百餘所。每遇清明。必酒飯設奠。幽明德之。壽享期頤。論者咸謂陰德之報云。父諱傳。早卒。母李氏。守志食貧。顧復教誨。有孟母風。濬生有穎質。讀書過目成誦。甫六歲。能作五指山詩。矢口成章。夔異絕倫。識者知其國器。稍長。博觀羣籍。家乏儲書。出歷書肆。就座借閱。雖二教百家之言。靡不涉獵。退而載筆。無有遺義。年十七。習舉子業。下筆數千言。真草立就。儼若宿構。正統甲子。領鄉薦第一。入五策進呈。海內傳誦。兩試禮部。名居乙榜。乃留京師。讀書國學。祭酒蕭鏜深器重之。景泰辛未。告歸省母。所與厚者。咸贈以詩。編修岳正序而送之。甲戌復試禮部。學士商輅洗馬李紹爲考試官。閱卷至論策。意出濬手。及榜既放。果然。衆服二公之鑑云。廷試因策中。微觸時諱。置二甲第一。與孫賢、徐溥、

徐韓等及第出身。首選爲翰林院庶吉士。是科同榜。接踵樞要。以勳名顯者十餘人。濬其最也。尋被命同修寰宇通志。海南衛官軍苦遠調。濬奏免。專防海黎賊寇。上嘉納之。今至沿海衛所官軍。歲時祀之。憲宗嗣立。充經筵講官。成化元年。陞授侍講官。與修英廟實錄。二年成。進學士。官侍講經筵。尋丁內艱。服闋。復供原職。十二年。續修宋元綱目。陞翰林院學士。十六年。加禮部侍郎。掌國子監事。時士習文風。多以奇譎相高。熾不可遏。濬考試兩都士。凡怪詞險語。悉痛斥之。及爲祭酒。輒諄諄垂訓。自是文體復歸渾厚。士有虛慕道學者。或過爲詭異之行。微名干譽。因主考會試發策言之。務令士習趨於中正。掌太學十餘年。論者謂師道尊嚴。不愧李時勉云。先是以西山眞氏大學衍義。有資治道。旁採經傳子史中。有裨於治國平天下者。分門類輯。附以己見。名曰大學衍義補。凡一百六十卷。書成。進上稱旨。批答有曰鄉所纂書。考據精詳。論述該博。有補政治。朕甚嘉之。賜以金幣。進禮部尙書。掌詹事府事。書付書坊刊行。會修憲宗實錄。充總裁

邱文莊公集

官。弘治四年。三疏懇求致仕。不允。冬十月加陞文淵閣大學士。典機務五年。上治安疏。上善其言。七年。復三疏。固辭不允。秋八月。以陞少保兼武英殿大學士戶部尚書。八年春二月卒於官。年七十五歲。計聞。天子嗟悼。輟朝一日。贈寶鈔一萬貫。贈特進左柱國太傅。諡文莊。正德初。命孫崇宙崇蔭尚寶司丞。尋卒。復以曾孫郊襲其官。賜額祀於其鄉曰景賢祠。附宋學士蘇軾祠配祀。以風示天下。文臣恩眷之隆。近世未之有也。考明史溶自進大學衍義補。即蒙主眷。平生著述。有瓊臺類稿。世史正綱。家禮義節。朱子學的。並行於世。潛生平好論議上下千古。尤熟國家典故政事。可否反覆。與大臣言官諍論是非。雖未必一一中適。然不肯媵姍取悅。至其商榷往來事。時出意見。自高奇矯衆論。能以辯博濟其說。人莫能加。配享東坡。有以也。夫按名臣錄云。丘文莊公。穎悟絕倫。無書不讀。其爲己之學。見於朱子學的。經濟之學。見於大學衍義補。至於世史正綱。以明正統大義。家禮儀節。以扶世教大綱。國朝大臣。律己之嚴。理學之博。著述之富。無有出

邱 文 莊 公 集

其右者。又雙槐歲抄云。丘公生平不可及者三。自少至老。手不釋卷。其好學一也。詩文滿天下。絕不爲近倖作。其介慎二也。歷官四十年。俸祿所入。惟得指揮張淮一園而已。京師城東私第。始終不易。其廉靜三也。爲學以自得爲本。以循理爲要。嘗面責主事陳晟衣繡弔喪。又嘗勸門生謝遷王鏊二學士。讀書循理。至面檢修撰毛澄廷對策。多出小學史斷。全無自得。以故翰林後進多曠之者。閣老劉健嘗戲之曰。丘仲深有一屋散錢。只欠索子。文莊應之曰。劉希賢有一屋索子。只欠散錢。論者傳爲口實。至若陳白沙王三原之求退。或歸咎於文莊。蓋由文莊主考會試發策之言不無齟齬。以跡疑之。其太虛之微雲乎。光明廣大之體。固莫得而掩之矣。選丘海一公合集既成。海公已有傳矣。丘獨缺焉。因博稽前聞。廣詢輿論。近考郡志。遠參明史。編輯成文。聊補前缺。以備觀覽云爾。

重刊邱海二公合集序

古稱不朽者三。立言居其一。言之無關世道人心。不作焉可也。若德與功兼而發爲文章。必與孔孟心性之旨相發明。以云不朽。斯足貴矣。瓊郡隸粵。僻處一隅。而四面瀕海。地勢之奇特。甲於粵。全粵之門戶。又扼於瓊。巨浸迴環。一文之浩浩洋洋。滙衆流而朝宗正派也。五指中峙。一文之堂堂正正。俯衆山而壁立千仞也。有大手筆出。於是造物之靈異。遂揭而付之於人。究之其所憑依。其所自爲也。吾於瓊之文莊邱公。忠介海公。益信矣。二公相業風節。彪炳前明。史乘稱極盛已。文莊大學衍義補。集聖賢相傳之義。其大要歸諸審幾。海公自序其文云。出之吾心。本之性命。造化賦予於我。而我爲洩之。或於六經語孟有輔翼焉。二公爲文。本諸躬行心得。以期合乎聖賢之道。故章奏傳記。以及往來吟咏諸作。皆以有本之學。維繫乎人心世道也。二公兩集原板。日久剝落。前觀察焦公、太守賈公、刪補繁簡。合刻一篇。流傳海內。余慕二公之爲人。讀其書久矣。去秋恭承簡命來守是

邱文莊公集

重刊邱海二公合集序

三下

邦。獲拜謁祠象。公餘訪其遺書。頗多漫漶。邱裔萬邦等議重刊斯集。時張翰山太史奉諱在籍。力成其事。余因出所攜本。俾其裔校讐。而復其舊。夫景仰前賢。嘉惠來學。崇經術而厲氣節。端士習以成民風。守土者之責也。然而予滋愧矣。

嘉慶二十年歲次乙亥七月既望賜進士出身誥授中憲大夫知瓊州府事
前翰林院編修 武英殿提調 國史館文穎館纂修加三級記錄五次桂林後
學勳楣朱槩書於瓊州官署

特建丘文莊公祠記

莆田彭 鵬撰

公、有明一代文臣之宗也。相孝宗紹烈祖致太平。博洽古今。著述甚富。皆有裨於後世教。而衍義補一書自謹幾微至成功化。本未內外。罔不畢該。可以接賢聖之傳。可以贊帝王之治。實與西山真氏同爲大學功臣。乃僅準鄉先生社祭之義。從坡公共祀景賢。豈非闕典。余竊有慨於斯久矣。龍集辛巳。按事至瓊。謁其祠竦然曰。崇先賢。所以勵後學也。況公之文章事業。充足興起百世者乎。不專何崇。不崇何稱。庸已諸。因命雷瓊道黃副使等。移之爽塏。而更其規制。三祠並建。壯麗若一。至癸未季冬告成。旣宇旣庭。祀事有經。以彰哲軌。以翼休風。以砥頹俗。皆於是乎在。爰勒貞珉紀其由云。

邱 文 莊 公 集

祠
記

三
一

御祭文

弘治八年春三月初二日皇帝遣禮部尙書倪岳 諭祭於故光祿大夫少保兼太子太保戶部尙書武英殿大學士邱濬曰。惟卿早擢高科。歷事累朝。博學能文。名聞允昭。簡在朕心。置卿近密。入告謀猷。每多裨益。胡爲嬰疾。竟爾告終。爰念往勞。深惻予衷。特頒卹典。有贈有諡。給驛還喪。並賜葬祭。君臣義篤。終始克全。卿靈如在。其歆鑒焉。

十二日特贈諡奉天承運皇帝制曰。朕惟贊幹化機。必資考壽。許謀治道。須藉博聞。故旣優其請老之期。而復厚以卹終之典。故光祿大夫柱國少保兼太子太保戶部尙書武英殿大學士邱濬。海邦間氣。翰苑名流。績學群經。留心庶務。久居清秘。晚佐鈞衡。官八轉而至三孤。於今爲重。壽七旬而加五歲。在古尤稀。方深倚任之懷。弗聽歸休之請。踰年賜告。一旦云亡。天不懲遺。朕殊傷悼。茲特贈太傅加特進左柱國。諡文莊。於歲朝以爵。鄉以年。並繫一時之望。官有贈。行有諡。永

貽百世之榮。不朽者存。尙其祇服。

十四日皇帝遣禮部左侍郎徐瓊。

諭祭故光祿大夫柱國少保兼太

子太保戶部尙書武英殿大學士贈太傅特進左柱國諡文莊邱濬曰。卿

以文學。擢居重任。方切倚毗。遽云長逝。中心悼傷。其何能已。茲臨

三七。特用遣祭。卿靈不昧。庶其歆享。

邱文莊公集

跋

予讀邱文莊公集。有何君喬遠爲公傳云。公論史謂范仲淹。生事人也。料岳飛未必能恢復。取秦檜有功宋家未造。其說士人有信有訾。心竊訝之。朱子稱范文正爲宋名臣第一。攷文莊會試發策。略曰深於道者有一程朱子。達於治者有陸贄氏范仲淹氏。既推其達於治矣。又謂之生事乎。岳忠武朱仙鎮之捷。中原響應。金人已望風而靡。使無十二金牌之召。恢復可翹足待。况檜之奸邪。婦孺皆唾罵之。公爲有明一代文宗。何至紕繆若此。及讀集中岳王墓詩云。君王乃爾崇奸相。又題岳廟一闕。激昂感慨。情見乎詞。可以證其僞妄。當時必有故爲異論。託公名以誣之者。孔子曰不知言。無以知人。是安可以不辨乎。公平生學問。折衷於朱子。所輯大學衍義補一書。爲西山彌其闕略。在國子監。令士習趨於中正。力斥險怪之辭。比類叁觀。其誣固不待辨而自見。顧予旣辨之。爰亟取何傳節刪之。並識數語於後。以破士人之疑。且質之讀公書者。同治九年歲次庚午仲春月知瓊州府

跋

三五

邱文莊公集

事大梁後學馮端本謹跋

跋

三六

丘文莊公集目錄

卷之一

章奏

進大學衍義補奏

入閣辭任第二奏

壬子再乞休致奏

欲擇大學衍義補中要務上獻奏

請昧爽視朝奏

奏再乞免李興死彭程充軍

表

進大學衍義補表

擬賀耕籍田表

請建儲表一

入閣辭任第一奏

入閣辭任第三奏

乞儲養賢才奏

乞嚴禁宮人犯奏

乞免李興死彭程戍邊奏

擬進大明一統志表

進呈憲宗純皇帝實錄表

請建儲表二

目錄

邱 文 莊 公 集

目錄

請建儲表 三

二

卷之二

序

大學衍義補序

武溪集序

玉溪師傳錄序

尙約先生集序

應天府鄉試錄序

家禮儀節序

學の後序

贈曲靖蔡太守序

送劉端本知興化府序

張文獻公曲江集序

程子全書序

雲菴集序

廣州府志書序

會試錄序

世史正綱序

贈廉州邢知府序

送鍾太守詩序

贈瓊郡林同知序

卷之三

邱文莊公集

序

五一居士詩卷序

樂閒堂詩冊序

觀瀾閣卷序

忠愛祠詩序

海航詩卷序

心師軒詩序

江湖勝遊詩序

柏菴詩卷序

續溪項氏紹先詩冊序

送侍讀學士徐先生掌南京翰林院序

送林黃門使滿刺加國序

贈許寺丞序

贈董侍御考滿序

賀丘治中序

贈鄉友林廷賓南臺御史序

送山東張布政序

送張方伯入覲序

張方伯入覲詩序

贈湖廣楊大叅序

送雲南傅叅議序

送陝西楊叅議序

贈廣西江按察使詩序

目錄

三

邱文莊公集

目錄

四

送劉仗和提學浙江序

贈福建憲副何廷秀序

送憲副徐君赴廣東詩序

贈浙江謝僉事序

送惠州李知府序

送潮郡黃知府序

送武昌章知府序

送金華周知府序

送瓊郡葉知府序

贈瓊郡王太守序

卷之四

序

贈瓊郡陳同知序

送伍通判序

送傅推官序

贈潮州張推官序

送鄭鈞州序

贈新興賀知州序

贈儋州林知州序

送穎州高同知復任序

送膠州陳節判序

贈姚自明擢大興知縣序

贈段可久宰福山序

贈孟縣張知縣序

邱文莊公集

贈鄭陳留復任序

贈韓敬夫序

送清江管知縣序

送梁弘道教諭序

送鄉友馮元吉教諭序

送鄉友林茂才贛川府學訓導序

送太子少保禮部尙書涪陵劉公致仕

贈都憲彭公致政還嶺南序

歸田樂詩序

送蔣生歸省詩序

壽李希潤七十歲詩序

謝署正輓詩序

送莊瑩中赴秀水縣序

送梁景熙知蕭山縣序

贈如臯易知縣序

送容縣林知縣序

送鄭司訓序

送鄉友崔仲劉司訓序

送王繼甫南歸序

岐高人景詩序

壽廷陵先生七十歲詩序

壽吳餘慶詩序

贈段通判考滿序

送鄉友富川韋知縣序

邱 文 莊 公 集

目錄

六

丁守彝哀詩序

侯教諭哀詩序

卷之五

記

風州府學記

梧州府縣廟學記

瓊山縣學記

萬州遷學記

道南書院記

賜進士題名記

江都縣學進士題名記

餘姚縣學進士題名記

會通河土橋石碑記

紹興府新修水利記

瀛州橋記

唐丞相張文獻公開鑿大廈嶺碑陰記

廷祥寺浮圖記

重修杭州石屋寺記

天妃宮碑記

茅山復古堂記

莆田柯氏重修祠堂記

稽古軒記

邱 文 莊 公 集

卷之六

竹坡記

愛竹居記

世引堂記

栢庭記

牧菴記

野花亭記

南海亭岡黃氏祠堂記

闕下林氏孝友祠堂記

忠愛堂記

永思堂記

重恩堂記

存耕堂記

經訓堂記

甘節堂記

春和堂記

鍾秀堂記

思補堂記

冲和堂記

葑溪草堂記

東郭別墅記

半山亭記

松軒記

梅軒記

林軒記

目錄

邱 文 莊 公 集

目錄

八

博雅軒記

清風樓記

長樂居記

雲軒記

留耕亭記

進學齋記

雪筠記

南溪小隱記

蒙溪清隱記

可繼堂記

卷之七

記

東溪記

雁集瓊庠記

槐陰書屋記

願豐軒記

藏書石室記

學士莊記

錄

定興忠烈王平定交南錄

傳

集 公 莊 文 邱

毛宗吉傳

學拙先生傳

題跋

跋江山雪霽圖

書百牛圖後

跋虞山圖

離說

木說送沙文遠

卞和三獻玉說

字說

林奔宗敬字說

蔡國珍字說

蔣冕敬之字辭

孔侍郎傳

無逸子傳

書楊文貞公墨蹟後

書潘克寬十八學士圖

說舟送林宗敬

李時芳孟春名字說

韓儉克慎字說

馮顯子充字說

目錄

九

邱文莊公集

卷之八

目錄

雜著

貪泉對

書貪泉對後

鏡喻送李景修

考隸送張正夫

賦

石鍾山賦

別知己賦

懷鄉賦

南溟奇甸賦

頌

瑞菊頌

贊

瓊州郡侯徐公畫像贊

邢克寬畫像贊

彭學士畫像贊

許道中四像贊

李立之先生畫像贊

張汝弼畫贊

邱 文 莊 公 集

李時習畫像贊

蕭士高畫像贊

兄伯清先生贊

大司馬王公像贊

劉紹和祭酒先生畫像贊

謝大韶尙書像贊

梅峯先生贊

某處士贊

甘汝霖行樂像贊

韓敬夫遺贊像

自贊

程尙書像贊

西昌楊君像贊

無心石贊

墓誌銘

都察院左副都御史盛公墓誌銘

中順大夫都察院左僉都御史邢公墓誌銘

贈翰林院編修費公孺人朱氏墓誌銘

處士周公墓表

樂遊處士陸公墓表

桂林處士梁公墓誌銘

目錄

十一

邱 文 莊 公 集

目錄

十二

卷之九

神道碑

進階榮祿大夫兵部尙書致仕王公神道碑銘

都察院左僉都御史恭惠楊公神道碑銘

浙江按察司副使陶公神道碑銘

哀辭

陳莊靖公哀辭

蘭湖先生哀辭

彭處士哀辭

祭文

祭西昌蕭先生文

祭韓都御史文

祭周廷恭編修祭文

祭吏部侍郎楊公文

祭姚江戚編修文湍墓文

祭妻弟金鼎文

卷之十

邱 文 莊 公 集

五言古詩

古意 三首

過友人園居

擬古 四首

小景

雜詩 其三其四

送劉紹和還南京

兀坐有感

送蒲進士赴鉛山縣

題畫爲蕭考功作 二首

擬古樂府

採蓮曲 二首

對酒行

目錄

感興 其一

夜坐和曲江感遇詩韻 其四

秋興 其二

送廣東夏廉憲

秋懷 其二

劉章窗輓章

送鄭通判還襄陽 其二

聽琴爲柯狀元乃尊作 其一

題竹送高博士使高麗

搗衣曲

短歌行

十三

邱 文 莊 公 集

目錄

十四

花遊篇

登高丘而望遠海

浩浩歌

七言古詩

讀東坡詩

題李將軍四時行樂圖 四首

雲山清趣圖爲歐陽道人作

嚴子陵圖

丁卯過采石弔李白

送伍天錫

瓊林醉歸圖爲同年長垣李溥作

望雲祝壽圖

淮之水送淮安林馬判 三首

題林以善畫送王琚

竹庭爲袁秉中作

秋臆詩爲羊城義士袁鑑作

題友人陳汝諧璞墩

兵王墳

輓羅都御史

海屋添籌壽徐助教

題山水圖

蟬聽軒爲常州謝同知題

送張茂蘭黃自立二同年回南京

四友圖爲安成劉進士秩之父作

集 公 莊 文 邱

題李都督虎

題楊廷玉忠義

送嘉禾伍公矩歸桂林兼問訊海鹽張靖之

靈壽杖壽徐庶子乃尊

梅牕琴樂

赤壁圖

笠澤圖

彭澤圖

五言絕句

客中對月

題扇而小景寄鄉友

明圯曲 三首

明圯圖 其一 其二

閨怨

春江曲

秋風

征婦

春日即事

九日自懷

五言律詩

閒居雜詠

村行

目錄

十五

邱文莊公集

目錄

十六

村居

夜泊近漁舟有感

晚泊

夜到山莊

輓全州蔣隱君友人蔣良之父

書房四幅爲新河許生作二首

廬山瀑布

寄題金山寺

人日有懷

早朝二首

送人入蜀

都下逢友人問訊

題空上人方丈

秋日寄友

雨中有懷

秋晚答友人

送杜侍御出宰英德

洞庭圖

除夕 其一

偶成

過峽山飛來寺

客有談龍太初沙詩者或謂其無體無用因足成之

送謫宦者放還揚州

送友人涂景文下第歸五羊

集 公 莊 文 邱

送朱忱之弟

晚適

送梁叔方行人養病還嶺南其二

梅溪處士輓章

雨後過訪友人山居

感舊偶書

五言耕律

寄題南華寺大鑿禪師

六言

春日卽事

秋思

江行

即景

客牕三景次友人韻三首

廂房前有一檜樹夏熱向晚散堂閉門倚之而作頗有閒林之趣

七言絕句

過梅關題張丞相廟

題希夷長睡圖

春閨怨二首

古意二首

目錄

十七

邱 文 莊 公 集

目錄

十八

題小景

晚感

爲林學士題十二紅畫

送樊景瞻河南大叅其四

送馮副使士定之廣東憲臺其二其三其四

春寒

過某氏園亭有感

經舊遊有感

南行途中見北人

客中夜雨

題程彥實尙書晴州卷其一其三其九

題傅巖圖

寄題鈞臺

題墨梅

松月

題虞美人墓

春思

詠史其二

小景其二

寄題南華詩三首

七言律詩

五指叅天少時曾作瓊臺八景郡侯程公已刻之梓今不復存惟記其首一

邱 文 莊 公 集

章護錄於此

送趙公子還蜀

過沛縣弔張克勤

春日郊行

寄張煉師

多景樓

輓張處士

金陵卽事

寄題虎丘可中庭

辛未歲過揚州懷古

歲庚午來自金臺寓新河有金陵卽事之作明年復至因觀高槎軒詩不意

暗與之合有如剽竊然初實不知也用廣其意爲雜詩二首云

和李太白韻寄題金陵

和李子構都門春日韻二首

哭唐珊

舟中遇重九示同行友曾光啓

初讀書中秘與修天下志書東陳宣之

寄所知

南京給事中童志昂利李商隱無題詩韻南京諸公多和之意蓋有寓間出

目錄

十九

邱 文 莊 公 集

目 錄

二十

命予屬和予村學究也不能外題以爲詩姑詠史以復之四首

輓李克述先生之表叔

輓茅山隱者

送尙寶凌卿使交南

春日田園雜興其一共三其四

送王給事中使交南

聞人說海北事有感二首

病起寫懷

送陳緝熙修撰使高麗

分得都門曉日送彭閣老歸省

都城春日

秋興七首

舟次直沽簡彭彥實同寅

送蔣容卒業南雍

送王給事中使占城

送吳克恢南歸因東王用先生

輓羽士

郊行口占

蘇武歸朝圖

運籌亭爲韓都御史題

春興

和童志昂給事自蜀督軍還貶壽昌令留別韻

哭童大章庶子

過舊遊處有懷袁秉中

邱文莊公集

送祈至和郎中使高麗

和陽維新學士先子除夜高詠詩韻

輓沈時暘大叅之祖

輓淮安畢義士

送陳宗堯侍講署南京院事

題仙水

送李立之赴南京太常

輓劉員外

暨士輓章

秋日有懷

送畫竹屈生

謁文丞相廟用老杜蜀相韻

歲丙申六月伏雨中待朝偶成

得家書

九日次友韻

歲己亥正月十日大祀郊奉旨分獻中鎮

送顧延喘赴袁州太守

夢起偶書

送人遊嶺南

送張養正都憲巡撫宣府

楊叔獻哀輓

送董尙矩庶子頒詔朝鮮

思歸偶書

遊山寺寺僧攜卷求詩因次人韻

邱 文 莊 公 集

目錄

二二

退朝偶書

客有談及家林者偶成

重陽三首

江行

廻文

夜宿江館

集句

集唐句送魏孔淵御史謫判潼川

行路難

悼亡其二其二

歌行

竹林七賢歌

題山水

剡溪圖

詩餘

寄題岳王廟

秋思

江村

春日會友人梁氏圖遊賞

邱 文 莊 公 集

昔高棅軒作水龍吟詞詠紅竹予誦而喜之欲擬作一詞未有以啓其意

者適予友志昂奉常以松雪翁鈎勒竹卷求題故爲作此詞


和東坡韻題赤壁圖

題情慰奚原啓下第

邱文莊公集

目錄

二四



(印)

邱文莊公集卷之一

進大學衍義補奏



(南)

臣竊見宋儒真德秀所撰大學衍義四十三卷。於大學八條且能存微物致知之要。誠意正心之要。脩身之要。齊家之要。而於治國平天下之要闕焉。臣不揆愚陋。竊倣德秀凡例。採輯五經諸史百氏之言。補其闕略。以為治國平天下之要。立為十二目。曰正朝廷。曰正百官。曰固邦本。曰制國用。曰明禮樂。曰秩祭祀。曰崇教化。曰備規制。曰慎刑憲。曰嚴武備。曰柔遠方。曰成功化。又於各目之中。分為條件。凡一百十有九。共為書一百六十卷。補前書二卷。目錄二卷。總一百六十四卷。名之曰大學衍義補。所以補德秀前書之闕也。前書主於理。而不出乎身家之外。故其所衍之義大而簡。臣之此書主於事。而有以包乎天地之大。故所衍之義細而詳。其詳其簡。各惟其宜。若合二書言之。前書其體。此書其用也。今已繕寫完備。謹撰表文一

邱 文 莊 公 集

通。附寫卷首以進。伏念臣濬。遠方下士。叨冒朝廷厚祿。六轉官階。以至今官。一家溫飽二十餘年。今年近七旬。常恐一口委命九泉。有負國恩。無以爲報。幸天假之以年。以衰朽之餘。任師儒之職。無政務之擾。得以暇日。纂成此編。第以性質昏庸。學識迂僻。加以老耄精力衰憊。所見不能無偏。所纂不能無誤。然區區一念忠君愛國之誠。蓋有出於言語文字之外者。況臣所纂輯者。非臣之私意杜撰。無一而非古先聖賢經書史傳之前言往事也。叅以本朝之制。附以一得之愚。雖曰掇拾古人之緒餘。亦或有以裨助聖政之萬一。伏望皇上。寬其妄作之誅。察其願忠之意。於清閒之燕。時賜省覽。遇用人。則檢正百官之類。遇理財。則檢制國用之類。與凡臣庶有所建請。朝廷有所區處。各隨其事而檢其本類。則一類之中。條件之衆。必有古人之事。合於今時之宜者矣。於是審而擇之。酌古準今。因時制宜。以應天下之變。以成天下之務。而其大要。則尤在於審察其幾微之先焉。易曰。惟幾也。故能成天下之務。此臣妄意著書之本指也。臣之精力。盡於此書。

皇上親政之始。而繕寫適成。蓋有幸然也。冒昧進獻。不敢自謂其皆可用。備採於千百之中。用其一二。見於施行。以成治效。使臣平生竭力盡瘁報國之忠。得以少效其萬分之一。則臣學爲有用。而歿爲不朽矣。臣不勝懇悃願效之至。爲此謹具本親齋。以所撰大學衍義補書四套。計四十策。隨本上進。謹具題知。欽奉聖旨。覽卿所纂書。考據精詳。論述該博。有補於政治。朕甚嘉之。賞銀二千兩。紵絲二表裏。書謄副本。發福建布政司著書坊刊行。禮部知道。

入閣辭任第一奏

奏爲陳情乞恩辭任事。臣先以年踰七旬。三次具本陳情。乞恩休致。未蒙允許。臣祇奉詔旨。不敢固辭。扶病蒞事。少待來春河凍開時。再行陳乞。本年十月二十四日。吏部奉敕太子太保禮部尙書丘濬。着兼文淵閣大學士內閣辦事。欽此。欽遵。顧臣何人。敢膺此任。方臣雖壯之時。反躬自省。尙不敢受此重任。況當衰老之年。垂死之日。屢陳求退。反尋也。臣等之啓乃之

地。委以機務之重。力小任大。必至顛覆。當夫群賢布列之時。用此冠羸無用之老。朝野傳聞。莫不驚駭。臣聞年至七十。古人謂稀。居家則當傳於子。在官則當致其事。臣年至是。筋力既衰。精神益耗。事多健忘。轉首失記。舉措語言。動多差失。加以百病交攻。四肢疲倦頓困。纂修過用目力。遂致一目善盲。他人見之。雖若目光如故。其實昏朦。視物不辨黑白。行步不知重輕。拜起艱難。時忽傾跌。且稟賦素薄。脾胃怯弱。日所食米。不過半升。事務簡少。尚可支持。若當制要之任。食少事繁。勢不能久。凡臣所陳。舉皆實事。衆所共知。伏望皇上鑒愚臣之真情。特垂哀憫。使得保其殘生。念國家之大計。別加擇任。使不致於覆餗。收回成命。允臣所辭。非敢愛身。實恐誤國。不勝悚懼待罪之至。奉旨。卿歷任年深。茲特擢用。不允所辭。吏部知道。

入閣辭任第二奏

本年十月二十四日。欽蒙聖恩。命臣以本職兼文淵閣大學士內閣辦事。臣

邱 文 莊 公 集

已於二十五日具本控辭。欽奉聖旨。卿歷任年深。特茲擢用。不允所辭。欽此。欽遵。臣聞人臣竭誠盡忠以報國。必於少壯之時。強力之日。其力既足以有爲。其勢又足以有待。然後能謨謀參贊。以成一代之治。苟或時過。然後用之。則年既耄矣。力既衰矣。不幸而有疾疢加之。雖有可用之才。決爲之志。勢不可強。時不再來。雖有才智機巧。亦末如之何也已矣。仰惟我太宗皇帝。首擢儒臣七人入直內閣。預聞機務。自永樂初至今已七十餘人。是皆海內名流。有德有學之士。方其進用之初。率皆年力精壯。耳目聰明。積歷久而委任深。故能裨贊以成治功。如臣者生長荒陬。資稟庸下。纔知章句之末。非有適用之才。徒以積資累考。微幸至於極品。所任皆非要據之地。故能因循以至致事之期。今犬馬之齒。七十有一矣。年歲已去。病勢日加。無能爲之力。無可待之勢。古人所謂日暮途窮。鐘鳴漏盡之時也。臣所以不避嚴誅。懇求辭免。非是故爲矯激之行。舍曰欲之而必爲之辭以徼虛名。蓋反已內省。的然自知不足以當朝廷重任。恐誤國家之事。貢明主

邱 文 莊 公 集

之知。且內閣所辦之事。乃國家大制作。大政務。大典禮。雖專詞翰之職。實兼輔弼之任。眷顧之隆。恩典之厚。比諸庶僚。懸絕之甚。是蓋當代仕宦之階第一選也。領得第一流人物。然後可以當此任。苟加之迂疎衰朽之夫。非惟有玷名器。且將至於覆公餗矣。其所關係。非小小也。夫學而爲儒。得以所學爲聖明之用。處論思之地。近天日之光。此人生之至榮。儒者之大幸。惟恐無階而進。孰肯旣與而辭。況臣幼有志用世。於凡古今典章政務。無不畱心。竊恐一旦爲時。所用心有所不知。則事有所不可行者。以故逢人卽問。見事卽錄。校閱載籍。稽考制度。審究事體。蓄於心而筆於書。正以待夫朝廷萬一之用。今幸不爲聖明所棄。正臣竭誠盡心摠下。生所學以死報國之秋也。願乃屢行奏章以辭寵命。夫豈其木心哉。蓋時不待人。死期將近。雖欲陳力就列。不能也已。是以捧讀手敕。感激之極。不覺淚零。旣而自恨。自歎儒生薄命。一至於此。上負聖恩。下孤素志。輿言及此。中心惘然。伏望皇上察臣由衷之辭。實非虛僞之讓。憫其老病。賜以生還。不但免其職任。

且復放歸田里。臣不勝感戴天恩之至。奉旨。朝廷以卿學行老成。特加任用。所辭不允。

入閣辭任第三奏

本月二十四日。欽奉手敕命臣於內閣辦事。二十五日臣具本陳情辭免。未蒙愈允。二十七日。又具本辭。欽奉聖旨。朝廷以卿學行老成。特加任用。所辭不允。欽此。欽遵。臣按禮經讓之三也。象日月之三日而成魄也。古人辭讓。以二爲節。初辭爲禮辭。再辭爲固辭。三辭爲終辭。辭而至於三。必其情真意切。而有不容已者矣。臣嘗觀宋神宗朝。歐陽脩乞致仕章凡五。司馬光辭樞密副使凡六。上皆從其請。臣雖不敢上比古人。然脩與光。所事者神宗。是時專任王安石。創行新法。二人者與時不合。故欲辭退。臣幸遇皇上不世出之主。恭默思道。求賢圖治。非神宗之所能彷彿。而又羣臣利於朝。一時共事者。皆同寅協恭。無有異同。臣何故乃敢故違詔旨。而決欲求去哉。且臣歷官三十餘年。久循常調。皇上嗣登寶位之初。未經兩月。即超陞

爲禮部尙書學詹事府。臣進所纂大學衍義補。仰塵睿覽。厚加賜賚。又有考據精詳。論述該博。有補政治之褒命。下書坊刊行天下。旣而纂修憲宗皇帝實錄。命臣充副總裁。書未進呈。臣以年至七十。乞恩休致。又蒙聖恩。令臣朔望朝參。以終史事。史成之後。欽陞太子太保。三次上章乞歸田里。疊蒙聖旨勉留。而有年深學行老成。特茲畱用之諭。茲者特降內閣辦事敕。臣再上章辭免。俱蒙詔旨溫諭。未賜愈允。仰惟皇上臨御四年之間。所以惓惓於臣者如此。臣非木石。豈不知感。殺身以報。亦所甘心。良以禁秘論思密勿之地。天下治亂安危所係。非優老養疴之所也。臣學本空疎。實無定見。方年少氣銳之時。亦欲奮發有爲。今則閱世久而歷事多。始知天下之事。思之非不爛熟。但恐做時不似說時。人心不似我心。機務之來。苟非熟思而審處之。一言失當。或以貽四海之憂。一事誤處。或以爲無窮之害。然事務頭緒多端。章奏字畫細渺。有非老人心志摧頽。目力昏耗者之所能幹也。若不反已自揣。而冒昧以嘗試之。則是爲身家富貴之謀耳。國家事大。身家事

球 文 彙 公 集

小。豈敢以草木微渺之軀。當國家重大之任。臣委實衰老日甚一日。食少事煩。自知不久於人世。若使逐日午時趨朝。晡時方退。自量筋力。必不能支。設使真有益於明時。粉身碎骨。亦所不辭。臣實自知決無所補。恐有負皇上之所委任。誤國家之大事。妨天下之賢才。臣於嚴命。以死爲期。不敢祇受。臣竊原皇上所以用臣之意。九重清閑之燕。或嘗畱神於臣所進大學衍義補之書也。臣平生精力。盡在是書。苟有所見。皆不外此。萬一或爲聖明所取。每因一事。輒檢其類。采於十百之中。用其一二之見。則雖不用臣身。而用臣言。有勝於臣身見用而賜以高爵厚祿萬萬也。苟徒富貴其身。而捨棄其言。則是臣徒竊國家之名器。冒朝廷之恩典。以爲身家計。有臣如此。亦何用之。伏望聖慈將臣前後所陳情詞省覽。憫臣中心血誠。收回成命。聽臣以禮致仕。歸老丘園。歌詠太平。以爲聖世之全臣。屢犯天威。罪當萬死。不勝恐懼待罪之至。奉旨。朝廷用人。已有敕旨。卿當勉圖報稱。不許固辭。該部知道。

壬子再乞休致奏

臣先以右目喪明。左目又將昏暗。具奏陳情休致。欽奉聖旨。朕以軀文學老成。方隆委任。既有疾。宜善調理。不允休致。欽此。欽遵。臣俯伏捧誦。感極而繼之以泣。顧臣何人。叨此聖眷。有以見皇上求治之篤。待老之優。雖愚庸迂僻之臣。年已老耄。而猶畱自輔。疾已篤險。而不忍棄捐。天地生物之仁。堯舜願治之心也。奈臣疾勢已成。雖欲勉強調理。以仰副詔旨。但血氣既衰。藥力無効。恐終無平復之理。况臣所居之官。以討論著作爲職。然其所以討論著作者。必資目視之力。自力不明。將何以閱章奏。操筆墨。檢今制。考古典哉。且處禁秘之地。預機密之謀。代王言。總國政。非如在外諸司。凡有文書。可以使人代誦。令人具草也。一應事務。將以奏達於上。行移於衆也。事體關係爲甚大。機事不密則害成。一事失宜。將以貽四海之患。一言失理。或以取百世之譏。天下後世之人。必將有摘其瑕疵。陳其禍害。形之奏牘。著於簡冊。非但歸咎臣下之貪冒失職。且將謗及朝廷之任

邱文莊公集

用非人也。興言及此。則若臣之素無才德學術。而又老病廢疾。何可一朝冒居此地也哉。使臣但知爵祿可貴。恩典爲優。年既耄而不知休。疾已痼而不肯退。猶且垂首曳踵。力疾策衰。伴食隨行。因人成事。妨賢才之路。廢國家之事。皇上費高爵厚祿以榮養之。何益哉。臣考宋史歐陽修德學文章。冠絕當代。年六十五。神宗亦容其致仕。我英廟復辟之初。薛瑄人閣辦事。纔六閱月。爾年僅六十八。乞身之章。一陳即蒙愈允。夫古之大臣。名望如歐陽修。年未至而尙容其請老。今之大臣。行已如薛瑄。用未久而卽許其退休。君行其仁。臣行其義。上下交盡其道。古今以爲美談。臣無歐陽修文學百分之一。年比薛瑄加老四歲。而又陳乞之章屢上。年踰古禮致仕之期。身嬰醫書難療之疾。老病衰憊。舉動必須人爲扶翼。出入禁門不便。昏眊健忘。述作必須人爲檢討。掌管文書不得。且又去家萬里。隔越大海。一子早喪。身多病而心多憂。衆苦所叢。殘生無幾。伏望皇上哀臣孤苦。鑒臣誠懇。乞如薛瑄致仕事例。放歸田里。俾全晚節。臣謹瀝血誠以死爲請。干冒大威。

不勝恐懼願望之至。爲此具本。令義孫丘懷本齋赴通政司。具奏以聞。奉旨。朕擢卿重任。當勉圖盡職。豈可以目疾求退。今後凡大風雨雪。俱免早朝。該部知道。

乞儲養賢才奏

該禮部儀制司手本。爲儲養賢才事。開。具給事中涂旦建言。欲將新進士改庶吉士送翰林讀書。本部題准行。令臣等詳議歷科事例。徑自查照奏請施行。臣等看得選新進士。改庶吉士讀書翰林。自永樂二年爲始。自是以來。或間科一選。或連科屢選。或數科不選。或合三科同選。初無定限。每科選用。或內閣自選。或禮部選送。或會吏部同選。其所選士。或限年歲。或拘地方。或採譽望。或就於試卷中查取。或別出題考試。亦無定制。臣等竊惟自古帝王。皆以文章關乎氣運。而儲才於館閣以教養之。本朝所以儲養之者。進士及第三名之外。止有庶吉士一途。華國之文。輔世之佐。實有賴於斯焉。臣等愚見以爲天爲國家生育人才。以供一世之用。非獨此科有之。而

邱 文 莊 公 集

他科皆無也。然而或選或否。則有才者未必預選。而所選者未必皆才。若又拘於地方年歲。則是見成之才。或棄而不用。而所教者又未必皆成。臣請自今以後。立爲定制。一次開科。一次選用。待新進士分撥各衙門辦事之後。行文錄其平日所作文字。如論策詩賦序記箴銘雜著擬官評史之類。每人十五篇以上。限一月以裏赴禮部投獻。禮部閱視訖。編號封送翰林考訂。其中辭藻文理有可取者。按號行取禮部。該司仍將各人試卷記號糊名封送。照依天順八年事例。於午門裏東閣前出題考試。其所試之卷。與所投之文相稱。不係假手。卽取以預選。若其辭鈞棘而意詭僻者。不在所取。中間有年二十五以下者。果有過人資質。雖其平昔無有宿構文字。於此一月之間。有新製作五篇以上。亦許投獻送試。若果筆路疏通。其學可進。亦在備選之數。每科不必多選。所選不過二十人。每選不必多留。所留不過三五輩。如此則所選者。多是已成之才。目下有所論議。便堪供事。所留者多有過人之資。將來有所成就。必將名世。上有得人之實。下無

遺才之歎。預列者無徇私之弊。不預者息造言之謗。臣等皆出自此途。引進後賢。儲之館閣。以報國厚恩。乃其素願。謹具題請旨。

欲擇大學衍義補中要務上獻奏

臣聞禮經有云。事君必資其言。拜獻其身。以成其信。是故君有責於其臣。臣有死於其言。蓋謂自古大臣進用之始。必有先資之言。拜命即以言爲資。因言而以身爲獻。致其所獻之身。以爲君用。踐其所資之言。以效其信。言有不酬。君必責以踐其言。言有不從。臣必死以成其信。故曰君有責於其臣。臣有死於其言。此古昔明君賢相。所以交相孚契於初進之始。委任責成於既用之日。卒能踐其言。以成治功於久遠之後也。粵稽諸古。若伊尹獻猷幡然之數語。傳說受命對揚之三篇。管仲與齊桓問答之書。樂毅對燕昭命下之語。韓信登壇東向之對。諸葛草廬三顧之策。姚崇入相十可之請。是官資言於先。而成其信於後者也。之七人者。所遇之君。或創業以垂統。或繼體以守成。或成霸於一國。或偏安於一隅。君臣相契。皆能成治效於一

時。臣之蠢愚。雖不敢上比古人。然生當明盛之時。而遇大有爲之主。不以臣之迂疎衰朽。用之於久病垂老之餘。置之於論思密勿之地。有君如此。何忍負之。雖一息尙存。此志豈容少懈。徒以學術荒疎。年力衰邁。雖欲委身以爲獻。奈無嘉言以爲資。如或拜獻其身。不能成信。有所責焉。無以爲應。徒死無益也。是以上三封章。以老病爲辭。未蒙俞允。不得已而受命。願所謂資言獻身者。志不苟先定。而泛泛焉冒昧以嘗試之。豈能有所成哉。伏念臣先於皇上嗣登寶位之初。而以所著大學衍義補一書上進。凡古今治國平天下要道。莫不備載。而於國家今日急時之先務。尤縷縷焉。臣自幼殫力竭神以爲此書。及其編成。適際皇上訪落之始。不先不後。而又蒙聖恩獎諭。命有司梓行。不可謂無大幸也。臣不敢他有所陳請。即臣前所進大學衍義補一書。以爲先資之言。而直以臣一身自頂至踵。以爲九重之獻。蓋臣所進之書。非臣創爲之製。乃補宋儒真德秀所衍大學未盡之義也。鑿鑿乎皆古人已行之實事。而在今日。似亦有可行者。非若鄭康成之訓經義。泛濫

無益也。非是王安石之假經言。紛更變亂也。其中所載。雖皆前代之事。而於今日急先切要之務。尤加意焉。方臣進書時。掌書監無有政務。不得見之行事。猶可諉者。今則幸爲明主不棄。進之內閣深嚴之地。預聞機務。此政臣書遭逢施用之日也。如此而有所不行。則天下後世。將有辭以議臣。謂臣徒藉是書以爲榮進之階。非真誠有效用之實也。豈不遺終身之羞愧哉。矧臣年踰七十。鐘鳴漏盡。所餘無幾時。日暮途遠。所行不能到。汲汲焉及是時以圖之。猶恐遲矣。否則將有後時之悔。臣平生所見。不外此書。請擇書中所載切要之務。今日可行者。芟去繁文。摘出要語。叅會補綴。以爲奏章。酌量其先後。次序陸續上獻。乞經省覽。如有可行。特賜御札批下。會同內閣一二儒臣。斟酌處置。擬爲聖旨傳出該部施行。或有窒礙難行。或姑留以俟後時。或發下再加研審。亦望聖慈明示。其所以然之故。臣迂儒不通時務。不免泥古偏見。然決不敢護短求勝。果於必行。徒取一己虛名。以誤國家大事。臣冒干天聽。不勝戰慄恐懼之至。爲此謹具題知。伏候敕旨。奉

旨。卿欲有言。具奏來看。

乞嚴禁自宮人犯奏

先該禮部題稱。弘治五年二月二十三日。有私自淨身人康某等約有一千餘人。各持木棍。輒石。自長安左門。直至本部後門。擁塞街道。將尙書耿裕等四面邀截趕打。已蒙聖旨着錦衣衛將爲首的拏送本衛。好生打著問。今錦衣衛官。已拘將某等在官。供認明白。請旨發落。臣等竊惟自古帝王爲治。必防微杜漸。恐生禍階。今淨身人。敢於宮闕之前。聚衆至千。各持木石。趕打執政大臣。茲豈小變哉。考之史冊。自古所未有也。惟北魏時羽林軍士。以征西將軍張彞子仲瑀建言抑武人害彞父子。魏朝姑息。不窮治其罪。其臣高歡。素有異志。因此知其紀綱不振。歸而起兵。天下因之大亂。設使魏之君臣。稍有知識。痛懲其人。則紀綱立矣。奸雄自然帖服。豈至倡一時之亂。貽萬世之笑哉。且今千人之中。舉皆畿甸之產。又聞不止此也。此外尙有數十百人。村落之間。無處無有。若今將用此一起人。則彼同類之

邱 文 莊 公 集

已淨身者。接迹而來趨。未淨者聞風而傲傲。八郡之中。其民幾何。非徒不得其一身之用。并與其子孫皆不得其用矣。是豈太宗皇帝起山西無田之民。發天下爲事之吏。填實京畿。以壯固根本之意哉。今一人入內府。一家免差役。而又推及其親鄰。自此以後。京民免役者日多。應役者日少。若不痛爲禁止。日積日多。賦役積壓。平民何以克堪。且自漢罷肉刑之後。朝廷官府。不用宮刑。而閭里街市之間。乃擅自行。用自戕其身體。自絕其種類。而在天日之下。照臨所及之地。夫豈美事哉。夫人生有血肉之軀。有骨肉之親。孰不欲保其身。孰不欲延其類。此輩生太平之時。無天關之患。而甘爲此者。彼但見今內諸司侍從之臣。爲朝廷所任意。欲做傲彼。殊不思受異數者固多。而淹常調者亦不少。况其人遭家不造。不幸爲人所誣。緣事所係累。受朝廷罔極之恩。死中得生。以有今日。是以鞠躬盡瘁。一心王室。以報再生之恩。且皆以童稚之年。進入掖庭。不與外人交接。心純而志篤。間有一二年稍長者。或出於隱宮。或不得已顛撲。傷損所至。

邱 文 莊 公 集

非有所覬望而然也。非若此輩處心積慮。要叨富貴。然國家錢糧有限。職任有數。豈能一二皆如所願。一旦所願不遂。安知其不悔前失。而肆無忌憚哉。夫五刑之中。宮刑最重。大辟雖曰身首異處。然止於一身一時。而宮刑則上闕先傳。下絕後繼。非止一人一世而已也。伏觀皇明祖訓有曰。以後子孫做皇帝時。止守律與大誥。並不許用黥刺腓剗鬪割之刑。臣下敢有奏用此刑者。文武羣臣。即時劾奏。將犯人凌遲。全家處死。聖祖之訓。雖以天子受天之命。人臣稟君之命。亦不許用此不仁之刑。而彼小人處閭里之中。爲國臣民者。以刀鋸而戕朝廷之生靈。爲人子孫者。用非法而戕父母之遺體。果何心哉。伏望皇上體天地好生之德。憐小民蚩蠢之愚。遵太祖非用法用刑之戒。廣太宗填實京畿之政。不追咎其既往。惟限制其將來。嚴爲禁制。自今有自宮其子弟。罪其父母及其戶首。全家戍邊。鄰保知情。重加罰贖。其用力下手之人。許諸人首告。得實者給賞。以死罪人梟首示衆。被害之人。果年十五以下無知者。量畱備用。十五以上分送藩府。如有不服

使令。私自逃回者。罪坐引誘窩藏之人。經過地方官司。仍行各處巡檢司。嚴加盤詰。有提獲者考滿。得與軍囚一例陞用。臣叨以凡庸爲朝廷所任用。係國家大計。不敢緘默。爲此不恤後患。謹具題知。伏乞聖恩保護。使臣等不受張彝之禍。不勝大幸。

請昧爽視朝奏

仰惟皇上自卽位以來。一應朝儀。悉遵先朝故事。每日臨御有常時。臣下趨見有常候。七年于茲。有如一。凡內外臣庶。得於見聞者。莫不贊歎。以爲皇上孜孜圖治。有憂勤惕勵之心。有警戒相成之助。太平之治。計日可待。爰自今春以來。出朝間有晏時。然亦尋復如舊。近三月間。往往于卯末方出臨朝。鐘鼓之聲。一聞於外。莫不驚訝以爲皇上勤政。漸不及前。誠恐由是而傳之遠方。播之口舌。其爲聖政之累。誠非細故。臣謹按宋儒朱熹解詩之鷄鳴篇。有曰古之賢妃。御於君所。至於將旦之時。必告君曰。鷄既鳴矣。會朝之臣。旣已盈矣。欲令君早起而視朝也。蓋其夙興之時。心常恐晚。

故聞其似者而以爲眞。非其心警畏。不留於逸欲。何以能此。又嘗伏觀太宗皇帝。諭六部尙書。及近臣曰。朕每日四鼓遂興。衣冠靜坐。是時神清氣爽。則思四方之事。緩急之宜。必得其當。然後出付有司行之。朝退。未嘗輒入宮中。閱取四方奏牘。一一省覽。其有邊報及水旱等章。即付所司施行。誠慮天下之大。庶務之殷。豈可湏臾怠惰。一怠惰則百度弛矣。臣等謹錄如前。而又竊有見焉。夫自唐虞三代。歷漢唐宋。至于今日。率以味爽爲視朝之期。味爽者。欲明未明之時也。是時夜氣既定。且氣方清。物欲未雜於前。心地虛明於內。於是臨臣下。決機務。則是非易見。聽斷不惑。昔人所謂一日之計在於寅。誠非虛語也。伏願皇上諷詠先賢解詩之言。佩服聖祖諭臣之誥。每日常朝。率以味爽爲期。則政務不至廢弛。臣下知所遵守。解民庶驚訝之心。息遠近傳播之議。其於聖德所補非小。而太平之治。亦於是乎基焉。

乞免李興死彭程戍邊奏

某日欽蒙命太監某等與臣等。商議李興彭程之罪。備聞皇上所以審處二人之罪。委曲詳盡。超出衆議之表。綸音一出。凡在見聞。莫不驚竦畏服。竊惟本朝開國。至今百餘年矣。承平日久。上下因循。非但有司政務日弛。而祖宗法度。亦多廢棄。且如憲綱一書。專爲御史而設。今之爲御史者。非但不行其事。且又不看其書。稍有循理守法者。衆共非之。謂不稱職。習久成俗。以爲當然。其來也遠矣。今一旦忽然寘之于死。謫之以戍。知道理者。固謂朝廷設立御史。巡按一方。使彼振肅綱紀。以安黎庶。犯罪自有定律。用刑自有常法。因公而死。二人可也。今乃打死至十有三命。誅一懲百。亦不爲過。又春秋之義。爲尊者諱。愚頑小民。不識忌諱。尙有不恕。彼以進士發身。爲風憲官。疏陳時政。乃因先朝未流之弊。明白指言。罪不容誅矣。然天下之大。人民之衆。不能人人而曉諭之。固有不盡知其詳者矣。彼但見自來御史。陳言切練。嚴刑懲惡。以爲當然。又見法司所擬多官會議。罪皆不至死。必謂朝廷不欲御史盡職。不欲御史言事。傳之天下。所損非小。

然此猶一時之事爾。若夫書之史冊。乃千萬年之事。臣切觀自古作史者。寓褒貶於一字之間。凡書臣下有罪當死者。則曰誅。無罪不當死者。則曰殺。臣下有罪貶謫者。不書其官。無罪者。則書其官。蓋作史者。考核其人情罪。而爲之書法。今法司定其罪如此。多官會議又如此。衆人議論又如此。安知其後世秉史筆者。不據事而直書以殺哉。切惟自古帝王。有所行遣。不徒快一時之意。而必爲後世之慮。不徒懲一夫之惡。而必示萬人之戒。發雄斷於萎靡不振之餘。施仁恩於垂亡無救之地。此所以能鼓動一世之人心。以成不世之盛治。而傳萬世之美名者也。臣願皇上待法司具本復奏之日。着都察院堂上官。率領各道御史。押李興於奉天門下。遣司禮監太監傳旨宣諭。備述二人所以得罪之由。朝廷所以罪之之故。因而屈法申恩。如臣等初議免李興死。發極邊地。彭程或降雜職充吏。或除名爲民。仍敕吏部及都察院。今後選御史理刑。讀誦憲綱。必須通解。然後考選。其見任者。一應行事。俱要遵依憲綱。如此則一事之行。而衆善之。倘見聖明愛恤民命之仁。

見尊嚴宗廟之孝。申祖宗成憲於久廢之餘。舉風憲舊規於不振之後。全國家正大之體。革小人浮躁之風。

奏再乞免李興死彭程充軍

某日。欽奉命太監與臣等議。必欲寘李興于死。彭程充軍。臣等待罪內閣。凡遇事之有關於國家大體者。不敢不言。況此事非但於國體有損。而於聖德亦有累焉。臣等不言。則臣等之罪大矣。仰推皇上稟天縱非常之資。當春秋鼎盛之時。積功累仁。以立萬世之基。正在此時。然臨御五六年。誠敬未格於天心。屢有災異。德化未孚於天下。尙未安全。一旦忽有誅譴言官之命。傳之天下。非美事也。書之史冊。非嘉績也。臣等於此。若不極言。異時聖德益崇。閱世久而見事多。忽然感悟。追咎臣等不言。則雖萬死。無益矣。况臣等皆起自小官。而爲先帝所任用。以致顯榮。受恩深重。死無以報。若彭程之詆毀。果出其本心。臣等與之不共戴天之仇。臣等於李興。固無私狎。亦非有陰私隱惡。而畏其黨類攻發。若李興之獄。果出於被害者眷屬。

之訴冤。而不出於告訐。則二人之罪。皇上雖欲赦之。臣等固以執法死不奉詔矣。豈肯申救之哉。臣等所以切切爲之言者。據理之正。原彼之情。守祖宗之法。保宗社之福焉耳。

進大學衍義補表

伏以持世立教在六經。而撮其要於大學。明德新民有八目。而收其功於治平。舉德義而措之於事爲。酌古道而施之於今政。衍先儒之餘意。補聖治之極功。惟知罄獻芹之誠。罔暇顧續貂之誚。原夫一經十傳。乃聖人全體大用之書。分爲三綱八條。實學者脩己治人之要。章句既有以大明聖蘊。衍義又所以上格君心。書雖成於前朝。道則行於今代。惟太祖之建極。嘗大書於殿壁之間。暨列聖之紹基。屢聽講于經筵之上。既已致夫雍熙太和之治。一皆本乎躬行心得之餘。善推所爲者。固無俟乎盡言。欲全其功者。亦須補其闕略。竊觀衍義之四要。尙遺治平之二條。雖曰舉而措之爲無難。不若成而全之爲盡善。況有其體。則有其用。既成乎己。當成乎人。理固無一之

可遺。功豈有一之可闕。善法不能以徒舉。本末則貴乎兼該。每當繙閱之時。自起編削之念。顧一人之聞見有限。而天下之事體無窮。居一室而料度乎四方。據已私而折衷乎衆務。亦固知其不可。猶強爲其所難。是蓋一念區區報國之忠。抑亦平生孜孜爲學之志。是以頓忘下賤。僭傲前脩。豈不知妄擬非倫。竊亦欲薄陳所見。念惟天下之大。其本在於一身。人心之微。其用散於萬事。一物有一物之用。一方有一方之宜。所以化之者固本於身。所以處之者各有其道。事皆有理。必事事皆得其宜。人各有心。湏人人不拂所欲。欲使處之適當其可。必先講之務盡其詳。考古以證今。隨時而應用。積小以成其大。補偏以足其全。巨細精麤。而曲折周詳。前後左右。而均齊方正。于以衍治國平均天下之義。用以取格致誠正脩齊之功。舉本末而右始有終。合內外而無餘無欠。期必底于聖神功化之極。庶以見夫大學體用之全。體例悉準於前書。楷範用垂於後學。稽聖經。訂賢傳。剷取無遺。紀善行。述嘉言。蒐求罔棄。附以管中之所見。覲於目下之可行。俯竭涓塵之微。

邱 文 莊 公 集

仰裨海嶽之大。茲蓋伏遇皇帝陛下。睿智有臨。剛明不惑。學古訓而獲大道。慎儉德以懷永圖。蚤毓德於青宮。服膺大訓。時潛心於黃卷。玩味聖經。開導盡忠盡益之言。體驗極擴充之力。每躬行而實踐。恒日就以月將。仁孝之德。孚於宮闈。元良之聲。播於函夏。一日承天而踐祚。萬邦仰德以歸心。大志夙成。適符漢宣登極之歲。小恙求助。肇啓成周訪落之心。首深究於大猷。亟恢弘於至治。凡新政之大有建置。皆舊學之素所講明。擴充格致誠正之功。用臻脩齊治平之效。太平之治。端可計日而待也。臣濬下愚陋質。荒陬孤生。生世無寸長。頗留心於扶世。讀書有一得。輒妄意以養書。固非虞卿之窮愁。亦匪真氏之去位。猥以官居三品。慙厚祿以何裨。年近七旬。惜餘齡之無幾。一生仕宦。不出國門。六轉官階。皆司文墨。莫試滄政臨民之技。徒懷愛君憂國之心。竭平生之精力。始克成編。恐無用之陳言。終將覆瓿。幸際朝廷更化。中外肅清。總攬權綱。一新政務。儻得徹九重之聽。取以備乙夜之觀。采於千百之中。用其二三之策。未必無補於當世。亦或有

取於後人。民物於是乎一新。世道茲焉乎復古。好所好。惡所惡。一人永子育乎兆民。賢其賢。親其親。四海咸尊戴於萬世。臣于昌天威。無任激切屏營之至。

擬進大明一統志表

伏以並日月以照臨。千載啓大明之運。全天地所覆載。萬邦咸正統之歸。輿圖之廣。曠古所無。地志之成。於今爲盛。粵自三才定位。歷代迭興。封山濬川。舜肇十有二州之地。列爵分土。周會千八百國之君。迨夫嬴秦。始置郡縣。繼以劉漢。益拓土疆。自魏晉以來。由宋元而上。或閭位之弗齒。或霸業之偏安。或威令之阻行。或昏德之可厭。皆未有若我朝得國之正。闢地之大者也。德與地而兼廣。政與教以並行。南都吳。北都燕。立標準於四極。大爲府。小爲縣。總宴會於三司。藩府分封。並峙維城之固。衛所布列。廣宣禦侮之威。規制周嚴。氣勢聯屬。南踰銅柱。東越鯤波。盡入版圖之內。西亘金河。北彌狼望。率歸聲教之餘。殫九服於域中。通八荒於化外。奇敵黑

邱 文 莊 公 集

濮。遙候月以來賓。黃支朱鳶。畢占風而受吏。禹迹之所不至。章步之所未周。地無間於華夷。治獨超乎今古。不有盛製。曷彰丕圖。粵若帝王。受天命以建國。皆有載籍。志地理以貽謀。於虞有禹貢之書。在周有職方之典。方冊所載。若管氏地員。呂覽有始。百家之傳說不同。館閣所修。若元利郡縣。開寶圖經。一代之典章可考。寰宇記之作於宋。略而未明。大統志之述於元。泛而失實。肆我聖祖。嘗命儒臣。雖采錄之有餘。尙編輯之未既。時如有待。事豈偶然。恭惟皇帝陛下。聰明先物。神聖自天。膺歷數以在躬。收政權而獨運。光昭祖武。弘迓天休。凡聖賢經世之圖。咸留睿覽。於祖宗待成之志。尤軫宸衷。謂此輿地之書。關係甚大。特詔文學之士。纂述是司。授成命於九重。考遺編於千古。上自聖經賢傳。下及水志山經。發中秘之所藏。萃外史之遺掌。遍閱累朝之史。旁蒐百氏之言。與夫羽陵苑委奇文。汲家西陽逸典。玄詮梵藏。小說方言。靡不綱羅。舉皆蒐采。綴貫群籍。約爲成書。義類凡列。悉有據依。信疑是非。壹加訂正。首辨方州之城。次推星野之

分。建置有革有因。疆界或分或合。如水自源而徂委。如木由幹而分枝。山川形勝之殊。風俗物產之異。巨細不遺。公署學校之類。宮室闢梁之倫。古今俱載。留則民愛。去則民慕。宦蹟非循良不書。出而道行。處而道明。人物惟名賢是取。匪徒儒道。而二氏兼收。不獨華風。而四夷亦附。所以廣聖道之威容。示皇威于無外。比之前志。允謂全書。綱舉而目張。有倫有斐。事增而文省。不泛不疎。海內廣輪。如指掌而斯見。天下險易。不出戶而可知。自有地志。未之前聞。宜並聖經。垂之後代。此誠皇上繼志述事之孝。卓冠乎百王。高出乎千古者也。臣等章句腐儒。草茅賤士。叨蒙拔擢。豈能如楚左史之讀九丘。忝効編駒。竊自比晉司空之創六體。莫能稱詔。深虞玩愒之尤。幸覩就編。少助清閒之燕。書同文。車同軌。大一統而四海嚮方。天爲蓋。地爲輿。中兩間而萬世永賴。

擬賀耕籍田表

伏以王業萬年。即田功以弘治本。帝籍千畝。躬稼事以爲民先。當奉天踐祚

之初。舉敬天勤民之典。三推禮備。萬姓歡騰。恭惟皇帝陛下。寅紹貽謀。厲精圖治。亟監觀於成憲。思適駿於先聲。一日二日萬幾。方有所事之始。五推九推終畝。非無可耕之人。誠以國之大事在祀。人之生計惟農。神明顧歆于其誠。不于其物。民庶視効以其身。不以其言。用是率祖攸行。將以示民之法。于以致先祖之享。庶幾知小人之依。乃命禮官。式消吉日。農祥晨正。土脈春滋。即齊宮以潔心。歆嘉壇而舉趾。紺轅黛耜。循行於隴畝之間。綠耦朱絃。容與於阡陌之內。秉耒而幾於十壤。借力以終於庶人。索先農而享之。盛禮既舉。賜福酒以勞止。大惠均頒。希闡之典。創見于一時。務本之談。喧傳于萬口。臣叨班著位。幸際昌辰。駕芝車以臨甫田。親瞻玉粹。爲神倉以儲馨稷。載告寶成。繼周人載芟之詩。豐稷徧地。衍殷宗無逸之壽。平格自天。

進呈憲宗純皇帝實錄表

伏以皇圖有永。天開六葉之君。文化聿成。世享二紀之治。功德之敷遠既

邱 文 莊 公 集

大。典冊之紀述宜詳。上廣先猷。下垂後訓。成前人繼述之孝。慰萬姓愛戴之心。恭惟憲宗純皇帝。以上聖之資。居大寶之位。聖心仁孝。天表清明。廣運而文武聖神。剛健而中正純粹。承千年之大統。續五聖之洪圖。帝享四十一齡。雖寸陰而必競。君臨二十四載。無一日而不朝。尊治命而殉葬不以生人。承先志而任用惟其舊輔。曉朝慈極。無間於暑雨祁寒。日御經筵。不輟於隆冬盛夏。祭神而神如在。極仁孝誠敬之心。奉天而天不違。有感召交孚之妙。介福于聖母徽號。荐加。錫類逮臣民。隆恩均布。順而委曲以合禮。儼慈懿於山陵。孝以推廣其因心。復康定之位號。崇儒重道。稽古好文。輯文華大訓示元良。而萬邦以貞。成綱目續編明正統。而百王不易。恢張治具。寤寐英賢。治分理於六卿。不恃己長而自用法。一循於三尺。靡因喜怒以濫加。雖一嘖一笑。而必慎所施。恐匹夫匹婦之不獲其所。民或干紀。尋卽革心。寇或犯邊。俄聞捷報。民安吏職。時和歲豐。尤爲一代極盛之時。兼有列聖諸福之物。仁聲廣播。有血氣者。莫不尊親。哀詔遠頒。具衰經

邱 文 莊 公 集

者。如喪考妣。不有信史。曷彰聖功。紀載必有成書。顯揚是爲大孝。恭惟皇帝陛下。道協重華。孝思罔極。嚴羹墻之如見。著存不忘。躬歷數之攸歸。負荷是懼。亟鑒觀於成憲。思適駿于先聲。爰詔禮官。俾修實錄。別開史局。群集儒臣。發內府精微之秘藏。采銀臺出納之奏章。內而六曹百司之所掌。外而三司列郡之所陳。柄臣建請之事宜。諫輔論思之忠益。言無微而不錄。事非要則弗書。凡治體之所關。或風化之攸繫。著爲令申。播告司存。與夫禮法章程。功勳節義。人才進退。綱紀弛張。內自宮闈。外極邊鄙。政必究其沿革。事必備其始終。賢否決於衆論之同。是非公於天定之後。總國計於每歲之杪。述寶訓爲後世之讓。傳其信。不傳其疑。過於文。寧過於質。一存實事。盡削浮辭。立德立功立言。三者備矣。繫年繫月繫日。一以貫之。永爲不朽之傳。大著無前之績。臣某等寅奉綸音。愧無史學。方切抱弓之戚。遽叨載筆之榮。仰體宸衷。俯殫管見。立典五志。稽衆志以備書。作史三長。念一長之何有。況夫今制時政。無編不比前規。起居有注。懼有孤於委

任。幸得見其纂成。計日程功。閱歲深有慙於尸素。載言紀事。異時不無補於汗青。

請建儲表 弘治壬子

茲以皇天眷命。聖子誕生。人望所歸。天意攸屬。臣某等伏望皇上早頒冊命。正位儲官。以隆國本。以繫人心。以永皇明萬萬年無疆之休命。謹奉表陳請者。臣某誠懼誠忭。稽首頓首上言。伏以承天立極。當圖萬世之安。爲國建儲。用繫四海之望。惟天序之早定。則國勢以永寧。凡在照臨。孰不忻願。恭惟皇帝陛下。英明獨運。慈儉躬行。席六聖之重熙。荷三靈之孕祐。乾元一索。而得夫洊雷之震。軒龍首孕。而發爲前生之祥。爰錫絲綸。已騰忻聲於遐邇。尙虛七鬯。未定儲位於元良。臣等重惟帝王大孝。在繼體之得人。祖宗丕基。貴承祧之有後。上帝旣儲祥而委祉。兆民咸仰德以歸心。伏望皇上。斷自聖心。願乎輿議。思宗社之重。而豫爲建儲。念天下之大。而先於立本。當陽盛之嘉日。舉曠古之徽章。肇正青宮。肅頒顯冊。則神祇以之

邱 文 莊 公 集

安樂。社稷有所憑依。益堅盤石之宗。長作神人之主。

請建儲表二

伏以惟天惟祖宗。佑皇家克昌厥後。有民有社稷。定國本當在所先。粵惟震
長主器之資。實繼乾元統天之體。上以承九廟之宗祀。下以繫四海之人心。
屬此熙辰。宜行大禮。恭惟皇帝陛下。德協重華。仁覃庶類。兩宮燕翼。躬志
養以無違。百世蟬聯。貽孫謀而有永。治已弘矣。人無間然。凡諸政教之施。
率皆底績。乃獨元良之位。尙未正名。在皇上雖以幼沖爲辭。然聖嗣本以
生知爲德。矧居嫡而居長。亶克疑而克歧。天縱將聖之資。不以少長而異。
臣民體國之義。敢以煩瀆爲嫌。是以再竭悃誠。必祈聽允。伏望皇上奉率
前規。俯從衆志。順天心而與子。貳宸極以升儲。敷告大庭。誕揚丕號。正
天下之大本。致邦國之永貞。培翼隆基。播休聲於九有。登閔昌祚。綿寶歷
於萬年。

請建儲表三

卷之一 表

三六

伏以建儲非爲私親。蓋明萬世之統。主器在於長子。用繫四海之心。商書載以貞之文。厥惟舊矣。漢詔具早建之議。烏可後乎。不避煩瀆再三之嫌。仰希剛明主一之斷。照臨所逮。鼓舞攸同。恭惟皇帝陛下。學本誠明。仁均動植。契天心而克享。體祖德以靈承。神罔怨恫。物無違拒。是以三靈薦祉。九廟儲休。有開軒龍之祥。首協熊羆之兆。九重丹詔。方宣布於殿庭。一日驩聲。遽徧騰於海宇。前星呈瑞。萬目皆覩其揚輝。麗日重光。衆心咸冀其繼照。人情攸屬。天意允符。伏望皇上體天之心。順人之志。勿以臣下屢請爲瀆。勿以聖子尚幼爲辭。上以奉兩宮之權。下以愜萬民之望。特頒冊命。早建儲君。郊社宗祫皆于焉有所慶賴。華夷蠻貊。率於此得所依歸。邦本不搖。皇圖彌固。

丘文莊公集卷之二

大學衍義補序

臣惟大學一書。儒者全體大用之學也。原於一人之心。該夫萬事之理。而關係乎億兆人民之生。其本在乎身也。其則在乎家也。其功用極於天下之大也。聖人立之以爲教。人君本之以爲治。士子業之以爲學。而用以輔君。是蓋六經之總要。萬世之大典。二帝三王以來傳心經世之遺法也。孔子承帝王之傳。以開百世儒教之宗。其所以立教垂世之道。爲文二百有五言。凡夫上下古今百千萬年所以爲學爲教爲治之道。皆不外乎是。曾親受其教。既總述其言。又分釋其義。以爲大學一篇。漢儒雜之禮記中。至宋河南程顯兄弟始表章之。新安朱熹爲之章句。或問建安真德秀又剽取經傳子史之言以填實之。各因其言以推廣其義。名曰大學衍義。獻之時君。以端出治之本。以立爲治之則。將以垂之後世。以爲君天下者之律令格式也。然其所衍者。

邱 文 莊 公 集

止於格物致知誠意正心修身齊家。蓋卽人君所切近者而言。欲其舉此而措之於國天下耳。臣竊以謂儒者之學。有體有用。體雖本乎一理。用則散於萬事。要必析之極其精而不亂。然後合之盡其大而無餘。是以大學之先。旣舉其綱領之大。復列其條目之詳。而其條目之中。又各有條理節目者焉。其序不可亂。其功不可闕。闕其一功。則少其一事。欠其二節。而不足以成其用之大。而體之爲體。亦有所不全矣。然用之所以爲大者。非合衆小。又豈能以成之哉。是知大也者。小之積也。譬則網焉。網雖不止乎一目。然一目或解。則網有不張。譬則室焉。室雖不止乎一隅。然一隅或虧。則室有不具。此臣所以不揆愚陋。竊做眞氏所衍之義。而於齊家之下。又補以治國平天下之要也。其爲目凡十有二。曰正朝廷。其目六。曰正百官。其目十有一。曰內邦本。其目十有一。曰制國用。其目十有一。曰明禮樂。其目六。曰秩祭祀。其目七。曰敦教化。其目十有一。曰備規制。其目十有六。曰慎刑憲。其目十有四。曰嚴武備。其目十有六。曰馭邊方。其目九。曰成功化。其目一。先其本

邱 文 莊 公 集

而後末。由乎內以及外。而歸終於聖神功化之極。所以兼本末合內外以成夫全體大用之極功也。眞氏前書。本之身家以達之天下。臣爲此編。則又將以致夫治平之效。以收夫格致誠正修齊之功。因其餘而推廣之。補其畧以成其全。故題其書曰大學衍義補云。非敢竝駕前賢。以犯不韙之罪也。臣嘗讀眞氏之序。有曰爲人君者。不可以不知大學。爲人臣者。不可以不知大學。而繼之以爲人君而不知大學。無以清出治之源。爲人臣而不知大學。無以盡正君之法。是蓋就其本體而言爾。若卽其功用而究竟之。君臣所當知者。則固有在也。粵自古昔聖賢爲學之道。帝王爲治之序。皆必先知而後行。知之必明其義。行之必舉其要。是以欲行其要者。必先知其義。苟不知其義之所在。安能得其要而行之哉。故臣之此編。始而學之。則爲格物致知之方。終而行之。則爲治國平天下之要。宮闕高深。不出殿廷。而得以知夫邑里邊鄙之形狀。草澤幽遐。不履城闈。而得以知夫朝廷官府之政務。非獨舉其要。資出治者以御世撫民之具。亦所以明其義廣正君者。以輔世澤民

之術。譬之醫書。其前編則黃帝之素問。越人之難經。後編則張仲景金匱之論。孫思邈千金之方。一方可以療一證。隨其方以治其疾。惟所用之何如也。前書主於理。而此則主乎事。眞氏所述者。雖皆前言往事。而實專主於啓發當代之君。亦猶孔孟告魯衛齊梁之君。而因以垂後世之訓。臣之此編。校之前書。文雖不類。意則貫通。第文兼雅俗。事集儒吏。其意蓋主於衆人易曉。而今日可行所引之事。類多重複。所修之辭。不能雅馴。弗暇計也。臣遠方下士。叨官禁近。當先皇帝在御之日。首開經筵。即綴班行之末。親覩儒臣以眞氏之書進講。陛下毓德青宮。又見宮臣之執經者。日以是書進焉。臣於是時。蓋已有志於是。既而出教太學。暇日因採六經諸史百氏之言。彙輯十年。僅成此書。用以補眞氏之闕也。繕寫適完。而陛下嗣登大寶。蓋若有待焉者。臣學不足以適用。文不足以達意。偶因所見。而妄有所陳。區區一得之愚。固無足取。而惓惓一念之忠。讜爲聖明所不棄焉。未必無少補於初政之萬一。臣濬謹序

張文獻公曲江集序

古今說者咸曰唐相張文獻公。嶺南第一流人物也。嗟乎。公之人品。豈但超出嶺南而已哉。蓋自三代以至於唐。人材之盛。在江北。開元天寶以前。南士未有以科第顯者。而公首以道侔伊呂。科進未有以詞翰顯者。而公首掌制誥。內供奉未有以相業顯者。而公首相玄宗。公斃後四十餘年。浙士始有陸敬輿。閩士始有歐陽行周。又二百四十餘年。江西之士。始有歐陽永叔。王介甫諸人。起於易代之後。由是以觀。公非但超出嶺南。蓋以江南第一流人物也。公之風度先知。見重於玄宗。氣節功業。著在信史。播揚於天下後世。唐二百年賢相。前稱房杜。後稱姚宋。胡明仲謂姚非宋比。可與宋齊名者。公也。由是以觀。公又非但超出江南。乃有唐一代第一流人物也。然公聲名赫赫。在人口耳。非直以其相業在當時。且甚有文名。史稱其七歲知屬文。張說謂其爲後出詞人之冠。又與徐堅評其文如輕縑素練。實濟時用。柳宗元亦謂其能以此與兼著述。予生公六百餘年之後。慕公之爲人。

邱 文 莊 公 集

卷之二 序

六

童穉時。嘗得韶郡所刻金鑑錄讀之。灼知其僞。有志求公全集。刻梓以行世。自來京師游太學入官翰林。每遇藏書家。輒訪求之。竟不可得。蓋餘二十年矣。歲己丑。始得公曲江於集館閣羣書中。手自抄錄。僅成帙。聞先妣太宜人喪。因携南歸。期免喪後。自備梓刻之。道韶。適友人五羊涂君暉停郡。偶語及之。太守毗陵蘇君韞。謂公此集。乃韶之文獻。請畱刻郡齋。嗟乎。公之相業。世孰不知。其文則不盡知也。矧是集藏館閣中。舉世無由而見。苟非爲鄉後進者表而出之。天下後世。安知其終不泯泯也哉。是以不揆愚陋。僭書其首。

武溪集序

嶺南人物。首稱唐張文獻公。宋余襄公。二公皆韶人也。韶郡一水夾城。自瀧來者。曰武溪。瀟水。自庾嶺下。與武溪合。是爲曲江。張公旣以曲江名其集。余公之集。名以武溪。蓋有意以匹張與。余家嶺表極南之徼。自少有志慕二公之高風。每恨其文之不行於世。於張公文。僅其見羽扇感遇等數

邱文莊公集

篇。余公之文僅得其潮說及諸書判。蓋莫能覩其全也。求之天下。幾三十年。今與曲江集始竝得於館閣羣書中。昔孔子言。夏殷之禮。杞宋不足徵。徒以文獻不足之故。解者謂文典籍也。獻賢人也。二公之集之存。豈非嶺南文獻之足徵者乎。予嘗怪柳子厚謂嶺南山川之氣。獨鍾於物。不鍾於人。曾南豐氏亦謂越之道路。易於閩蜀。而人材不逮。其然。豈其然乎。夫人材莫大於相業。南士入相。在唐僅三二人。張公之後。有姜公輔劉瞻。皆嶺南人也。當是之時。南方之士。以功業顯。蓋未有或先之也。進士科興。江以南。士固有與者。然多在中葉公後。且終唐之世。未有得掄魁者。張公在開元時。已以道侔伊呂科進。而大中間開建之莫宣卿。亦已魁天下選矣。然則二子之言。果可信乎。史冊所載。嶺南人才。固若落落。然間有一二。亦必秉忠貞。礪名節。求其所謂考官佞倖者。蓋無有焉。世之人因二子之言。往往輕吾越產。子因序余公此集而發之。初得公集。手自抄錄。僅成帙。聞先太夫人喪。解官還家。携以過韶。韶郡太守蘇君韓。通判涂君璋。請置此刻

郡齋中。且求爲序。予旣免喪。乃書此。以引其前。非但序公文也。蓋公之文獻。以徵吾之言。且用以爲越之人士解嘲云。

程子全書序

程子全書者。二夫子平生著述。與其門人所輯錄者皆在焉。書以全名。則其採摭無遺。會粹歸一可知已。二天子生當有宋盛時。講明斯道。上接孔孟以來千載不傳之緒。方其存時。當世士大夫得其片言隻字以爲榮幸。而四方從游之士。挹其言論風旨。輒筆錄之。以爲儀範軌則也。然得其議論之文者。未必得其叙事之文。聞其性理之論者。未必聞其治道之論。今則盡在是焉。及二夫子旣沒之後。門人編集遺文。以爲文集。文公先生。又摭其聞見者。以爲遺書。後又採遺書之所未載者。以爲外書。世儒於此二書。或得此而遺彼。亦或有終身未嘗一見者。今則盡在是焉。叔子沒後。僅二十一年。宋社南遷。而河洛之學。隨之以南。北方之士。止傳蘇學。雖二夫子所生之鄉。亦未聞其人有爲程學者。元興數十年。江漢趙氏始傳而北。今則南

北混一。家傳其書。而人爲此學。但其微言輿論。多散見於傳註。或錯出於他書。未有會粹歸一若此者。今世學者獲觀此書之全。一何幸哉。此蓋南昌張廷祥編修。以所得舊本。屬其友劍江涂伯輔憲副俾刻梓。以垂天下後世者也。舊本文集十二卷。遺書二十五卷。遺文十二卷。附錄一卷。各自爲名。今憲副君乃以編修君之意。合而命之曰程子全書云。

玉溪師傳錄序

昔者聖人於易於書於詩於禮樂於春秋。贊之刪之定之修之。皆出自其手筆。既已成書矣。門弟子又卽其所見者所聞者所傳聞者。輯之以爲論語。則雜出衆人之手。不止一人一日也。後世讀其書。誦其詩者。不徒見其述作者爲然。而又於此得以驗夫聖人之平生出處言論行事。與所述作者。無不符合。眞信聖人非徒有是言也。而言無不可行焉。寥寥千載。此學不傳。朱夫子承周程之傳。以上接孔孟千載之緒。其所著述。於易有本義。於詩有集傳。於四書有集註章句。於資治通鑑有綱目。亦皆出自其手筆。而爲成

邱 文 莊 公 集

書矣。其門弟子。又編次其平日與門人問答之語。以爲語類。宛然孔氏家法也。然所以類而錄之者。有池本。有饒本。有續錄。雜出於衆手。其多至八十七家。其視孔門所論譌者。蓋十數倍焉。今去朱子時。餘三百年。于茲所謂八十七家者。皆列其氏。名于卷首。若廖德明氏。輔廣氏。李闔祖氏。葉賀孫氏。凡九十有二人。其九二十家之子孫。在今世者果誰何哉。大率朱門之士。閩產爲多。而在建郡者。則以玉溪童蜚卿氏爲巨擘。其錄在饒本。繫以庚戌所聞次爲十五。旣已編在語類大全。梓行于世。蜚卿諱伯羽。世居建郡玉溪之上。朱子嘗過其家。題其所居之室曰敬義。人因稱爲敬義先生。所著書有孝經衍義。又嘗錄其師說。以爲晦菴語錄。二書藏于家塾中。更兵火不存。其九世孫訓。徧加詢訪。始得語錄于鄉人家。然殘缺已過半矣。後以刻本語類大全相參校訂。補其缺畧。始克成編。因易其名曰玉溪師傳錄。茲以從子鄉貢進士欽會試來京師。命欽求予言以叙其始末。將刻諸梓。以傳于世。庶幾後之人知其家世文獻流傳之所自云。

邱文莊公集

雲菴集序

古之言文者。必與人俱。易之賁卦。以人文並言。茲六經言文之始。彖曰。文明以止。人文也。人與文合而爲一。後世言文者。歧而二之。故近世大儒。有以人論文。以文論人之說。其意蓋謂以人論文。若歐蘇之儔。顛顛焉似文名天下。以文論人。若司馬文正公。又名雖不及歐蘇。然心術正。倫紀厚。持守嚴。踐履實。積中發外。詞氣和平。非徒言之爲尙也。今觀五雲劉公雲菴集。殆亦近於涑水傳家集與。公世家廬陵。由永樂甲辰進士。擢歷中外。終刑部尙書。考其一生履歷。所居之官。率以刑名政務爲職。宜乎於鉛槧之習。辭采之華。有不暇及焉者。今其茲集。凡世所謂詩詞序記之類。諸體無不備焉。斯文也。以文論其人。而不區區於辭藝者與。公之子按察副使喬。出公是集。俾識一言。濬對大廷時。公爲讀卷官。得區區所對策。甚欲賞之舉首。爲當筆者所抑。不果。公於濬。不可謂不知己也。公易簣時。不及致一辭。奠一觴。直公多矣。今得附一名於公集末。豈非幸哉。雖然。濬於公之斯

文。深有慨焉。當我朝洪武永樂之盛。一時公卿大臣。類多能言之士。文質彬彬。何君子之多也。非獨職詞翰官館閣者爲然。凡布列中外。釐政務。理兵刑者。莫不皆然。馴至於宣德正統之間。亦多有之。公其一人也。公捐館舍。今餘十年矣。世求如公者。非獨其文不可多得。而人之如公者。蓋亦鮮焉。噫。可以觀世矣。

尙約先生集序

皇朝文獻。盛於江西。濬總角時。瓊多寓公。每聞其言。永樂以來。文物之盛。一時館閣儒紳。多吉郡人。而西昌爲尤盛。正統戊辰。濬試禮部下第。首見大司成蕭先生于大學。先生西昌人也。濬時雜諸生中季試。先生得所作。特召以見。且加獎勵。已巳之變。先生恒夜集諸生於燕居之堂。論及時事。輒憂形于色。濬時發一言。先生輒首肯。公卿間有詢及諸生者。先生必斥名以過譽。歲辛未。又試禮部。不利南歸。甲戌復來。先生已陞秩入內閣。參預大政。是歲濬叨登進士第。選入翰林。讀中秘書。又明年擢任史官。以諸

邱 文 莊 公 集

生厠迹門下。每有述作。先生見之。輒過爲稱許。因延譽公卿間。天順改元。先生南歸家居。歲甲申捐館舍。今二十又五年矣。仲子昉以膺貢來京師。得祔門司訓。將之任。以先生遺稿見屬爲序。嗚呼。先生不可得而見矣。今見其遺文。如侍先生左右。親睹其德容而聞警欬。然瞻思之頃。恍忽如在前後。而卒不可復見。方且嗚咽哀慕之不暇。又焉能爲之言哉。雖然天下士出先生門者多矣。今所餘無幾。而濬獨幸後死。又受知最深。所以永先生之傳於不朽者。其責實在濬焉。於是乎拭淚而序之曰。嗟乎。人生天地間。具形與氣。形動而爲威儀。氣出而爲言辭。人死則威儀隨形漸盡。惟言也者。宣於其心。發於其氣。著爲辭采。載爲簡冊。而長留於天地之間。千萬年而不朽焉。觀其迹。可以得其心。因其言。可以知其世。先生生於洪武。長於永樂。仕於宣德正統之間。而大用於景泰。是時氣化隆洽。人心淳樸。猶未至於澆漓。一時士夫制行立言。類以質直忠厚明白正大爲尙。而不爲睚眦側媚之態。浮誕奇崛之辭。先生真純篤之性。處和平之世。平生爲人。凡其

立心行已。澄官臨事。如其爲文。其人不可見已。見其文。如見其人然。濬起自遠方。一見先生。卽待以殊禮。所以開發成就之者。雖燕國公之於子壽。六一公之於子瞻。不是過也。濬雖不足上儗古人。而先生所以陶鑄後進者。方之二公。實無愧焉。先生之詩文。皆有爲而作。達意而止。質實之中。而有自然文彩。醇然其無滓。繹如其無類。淡乎其有餘味。得孔子從先進之意。噫。世無復斯人。亦無復斯文矣。先生諱鉉字孟勤。官至太子少師戶部尙書兼翰林院學士。既老。自號尙約居士云。

廣州府志書序

天下之山。皆原於西北。零散而聚。突起而爲嶺。天下之川。皆委於東南。流行而止。淳涵以爲海。廣南居嶺海之間。受天下山川之盡氣。氣盡於此。而重發泄之。故人物之得之也。獨異於他邦。其植物則郁然以馨。其動物則粲然以文。是皆他處之所未嘗有者。人也得其氣之專而純。則又樸而茂。秀而文。習氣淳直。而俗尙隨之。渾然天地間。纍然小堪輿也。則夫山川人物風俗

邱 文 莊 公 集

之紀。尤不可無志焉。廣郡地志。唐以前僅附於史。宋以後始有成書。然皆畧而未詳也。入皇朝以來。百年於茲。天地純全之氣。隨化機而南流。鍾於物者猶古也。鍾於人者則日新月盛。其聲明文物之美。殆與中州無異焉。中間雖不能無蘖茅之生。然不害其爲彌文極盛之會也。乃者都憲姑蘇韓公奉天子命來殿嶺南。嶺南地分東西兩道。而其都會實在於茲。兵戎財賦之用。咸於是邦乎仰。郡志之作。關係實大。爰責其成于知府鄱陽吳君中君乃禮。肇慶郡博王君文鳳。付以筆削之任。未及成書。而吳君去任。莆陽高君澄實來繼之。歷二良二千石而後。其書始成。先是吳君嘗以書屬予序。至是高君復以都憲公命趣成之。竊惟後天卦位。艮居東北。山之所起也。先天卦位。兌居東南。澤之所滯也。嶺爲山之支。海爲澤之委。是蓋天地間山川之奧區也。然其域最遠。其勢最下。是以天地盛大流行之氣。獨後至焉。至遲而發也緩。勢也亦理也。是以三代以前。茲地在荒服之外。至秦始入中國。是時也。南蠻之習未改也。椎結卉服之風未革也。持章甫而適茲。無所用

也。魏晉以後。中原多故。衣冠之族。多徙于南。與夫或宦或商。戀其土而不忍去。過化漸染。風俗丕變。歲異而月不同。今則絃誦之聲相聞矣。衣冠禮樂。斑斑然盛矣。北學於中國。與四方髦士相頡頏矣。策名天府。列官中外。其表表者。則又冠冕玉佩。立於殿陛之間。行道以濟時矣。朱文公有云。豈非天旋地轉。閩浙反爲天地之中。越與閩接壤。閩浙視古河洛。則百越其視古齊魯與。是志也。雖爲廣郡而作。凡嶺南十郡之事無不該焉。非但嶺南也。島夷之事。亦附見之。然則予之爲是序也。豈爲一郡志哉。

應天府鄉試錄序

聖天子思以人文化成天下。乃於嗣大歷服之初。建號以表年。詔告中外。明示意嚮所在。以風厲天下臣民而興起之。蓋將大闡六經之文。以成唐虞三代之治化也。倚歟休哉。體元之始。適際賓興賢能之歲。應天府尹臣弼。府丞臣洙。以考試官。請上以命侍講臣濬。編修臣華。臣等奉命惟謹。夙夜兼程以往。至則府中。先以禮聘教授臣鉉。教諭臣鏞。臣綸。臣昌。臣倫。訓導

邱 文 莊 公 集

臣孔昌。臣祥。臣燠。爲同考官八人者分主五經。而總其成於臣二人焉。臣弼躬任綱維提調之責。監臨而約束之者。則監察御史臣浩臣讓也。維時就試之士幾二千人。如故事三試之。得其文充焉蔚然。固多可採者。拘定制而不敢過。僅摘百二十五人焉。嗟乎人文之興。其盛一至此哉。非聖賢之道不言。非唐虞三代之事功不陳。其氣昌。其辭典。其道大以明。宛然遂古之人才。卓乎二代以前之議論。除漢以來。一切權謀功利之故習。蕩乎無餘矣。噫聖天子俄頃之化。其神且速有如是夫。即京畿以觀四方。繇今日以占後時。從可知矣。孟子曰豪傑之士。雖無文王猶興。夫古所謂豪傑者。無所待而猶興。矧諸士子皆畿甸之秀民。國學之俊造。平日以經爲學。以儒爲名。以豪傑自負。躬逢聖明在上。鼓舞而作興之如此其至。則其所以奮發興起者宜何如也。夫有其言也。必有其心。有其心也。又必有其行與事。其相率以善。相規以正。交相勉而互相資。進而與已用之賢。共成聖天子文明之化。俾六經之道。大昭于時。唐虞三代之治。復見于今日。庶不偉與。臣濬

祇奉明詔。考校爾諸士子。故於小錄之成。敬序諸首簡。而以豪傑之士待焉。諸士子其益思所以自振。毋貽主司以失言之羞。

會試錄序

我大祖高皇帝。建國之明年。卽開設學校。又明年詔開科取士。然甫行而亟罷。至於十有七年。士習旣成。始以今制試士。定爲一代之制。士各占一經。經必通。然後取之以試于政。自開國至今。百有八年。開科至今。九十有二年。而爲科者凡三十矣。今茲又當會試天下士。禮部臣以考試官請陛下。以命臣溥臣濬。且錫以內帑之幣。臣等受命。且感且懼。卽日陛辭往。滯事惟謹。故事登載貢士之氏名。及簡其文之尤異者。爲錄以傳。臣濬當殺其後。竊惟六經之道。始于伏羲畫卦。歷二帝三王之世。數千年至孔子而後其書始成。孔子沒。其微言與義幾絕。又歷漢唐宋千數百年之間。至朱子而後其義始明。凡歷幾朝代。經幾聖賢。然後聖經賢傳。復全於世。而我朝之興。首表章之。列聖相承。造士用人。純用是道。至於今日。益隆盛

備。橫經之師。遍於郡縣。執經之徒。溢于里巷。明經之士。布列中外。自有經術以來所未有也。爾諸士子。生當經學大明之時。業經而爲儒。學成而獲薦于鄉。今又登名是錄。將進對于天子之庭。以享有祿位。其尙毋忘其所學。必推而用之。以見於處已行事之間。爲臣則忠。爲子則孝。暴白儒者之效于天下。毋使世之議者。槩謂程文之士。大言無當也。苟問其所業。則曰吾易。吾書。吾詩。吾春秋。吾禮。而兼樂也。及考其所存所行。乃至無一事與所學相當者。嗚呼。爾其自幼至長。習于學校。而試于有司者。果何事。一旦施於有政。乃惟簿書法比是事。而略不及而平昔所學之經。何也。諸士子發軔仕途。茲其初也。謹於其初而預以問焉。俾知所戒。

家禮儀節序

禮之在天下。不可一日無也。中國所以異於殊方。人類所以異於禽獸。以其有禮也。禮其可一日無乎。成周以禮持世。上自王朝。以至於士庶人之家。莫不有其禮。秦火之厄。所餘無幾。漢魏以來。王朝郡國之禮。雖或有

邱 文 莊 公 集

所施行。而民庶之家。則蕩焉無餘矣。士夫之好禮者。在唐有孟詵。在宋有韓琦諸人。雖或有所著述。然皆略而未備。駁而未純。文公先生。因溫公書儀。參以程張二公之說。而爲家禮一書。實萬世人通行之典也。議者乃謂此書初成。爲人所竊去。雖文公亦未盡行。噫文公之身。動容周旋。無非禮者。方其存時。固無俟乎此書。今其既沒之後。有志欲行古禮者。舍此而何據哉。禮之在人家。如菽粟布帛然。不可斯湏無之。讀書以爲儒而不知行禮。猶農而無耜耜。工而無繩尺也。尙得爲農工哉。夫儒教所以不振者。異端亂之也。異端所以能肆行者。以儒者失禮之柄也。世之學儒者。徒知讀書而不能執禮。而吾禮之柄。遂爲異教所竊弄而不自覺。自吾儒失禮之柄。而彼因得以乘間。陰竊吾喪祭之土苴。以爲追薦禱禳之事。而世之士大夫。名能文章通經術者。亦且甘心隨其步趨。遵其約束。而不以爲非。無怪乎舉世之人。靡然從之。安以爲常也。世儒方嗷嗷然作爲文章。以攻擊異端爲事。噫吾家之禮。爲彼所竊去。而不知所以反求。顧欲以口舌爭之哉。失

其本矣。竊以爲家禮一書。誠闢邪說。正人心之本也。使天下之人。人誦此書。家行此禮。慎終有道。追遠有儀。則彼自息矣。儒道豈有不振也哉。然世之好議人者。已懵然於儀文節度之間。而忌人有爲也。聞有行禮者。則曰彼行某事。未合於禮。彼行某禮。有戾於古。甚者又曰彼行之不盡。何若我不行之之爲愈也。殊不思人之行禮。如其讀書然。讀書者未必皆能造於聖賢之域。然錯認金根爲金銀者。較之併與金銀不識者。果孰能哉。溶生遐方。自少有志於禮學。意謂海內文獻所在其於是禮。必能家行而人習之也。及出而北仕於中朝。然後知世之行是禮者。蓋亦鮮焉。詢其所以不行之故。咸曰禮文深奧。而其事未易以行也。是以不揆愚陋。竊取文公家禮本註。約爲儀節。而易以淺近之言。使人易曉而可行。將以均諸窮鄉淺學之士。若夫通都鉅邑明經學古之士。自當考文公全書。又由是而上進於古儀禮云。

世史正綱序

世史正綱。曷爲而作也。著世變也。紀事始也。其事則記乎其大者。其義則明夫統之正而已。董子曰。正其誼不謀其利。明其道不計其功。非道非義。功利雖大。弗取也。或曰自孔子作春秋之後。大事有呂氏之記。綱目有朱子之筆。奚用此爲哉。曰呂氏之記。記其大而或兼夫細也。朱子之筆。筆其正而或專其統也。愚惟錄其大而已。細小不屑及也。取其正而已。統否不暇計也。然則有所見乎。曰有。聖賢之書婉而正。學者之書顯而直。婉而正。所以待後世之賢人君子也。顯而直。所以曉當世之學生小子也。何則。人之生也。稟賦不齊。賢者知者恒少。而愚者不肖者恒多。聖賢之書。用意深而立例嚴。非賢人君子。不能知也。是以知之者恒鮮。愚爲此書。直述其事。顯明其義。使凡有目者所共覩。有耳者所共聞。竊知文義者。不待講明思索。皆可與知也。苟或因是而馴致夫賢人君子之地。則夫聖賢婉而正之書。亦可由此而得之矣。愚所以作書之意。有在於是。非敢立異以犯不韙之罪也。然則其宏綱大旨。果何在哉。曰在嚴中外之分。在立君臣之義。在原父子

邱 文 莊 公 集

之心。夫中外之分。其界限在疆域。中中外外。正也。中不中。外不外。則人類淆。世不可以不正也。君臣之義。其體統在朝廷。君君臣臣。正也。君不君。臣不臣。則人紀廢。國不可以不正也。父子之心。其傳序在世及。父子子。正也。父不父。子不子。則人道乖。家不可以不正也。本家以立國。正國以持世。而一歸於人心。道義之正。則人極以立。天地以位。人類不亂於禽獸。禽獸不敢以侵人。上天所以立君之意。聖人所以立教之心。或其在此乎。請言其詳。天位乎上者也。地位乎下者也。天地之所以生生者物也。物之動者有三焉。人也草木也禽獸也。天生人。而於人之中。命一人以爲君。以爲人類主。闡教以立人極。修政以安人生。然必其生安。然後其極可立也。彼其所以爲生人害。而使之不得安者。誰與。人類中之禽獸也。爲生人主。必正人類。必驅猛獸。使吾一世之民。各遂其生。而不罹其害焉。於是乎吾政行而教施。而世底乎雍熙泰和矣。是則君人者之責也。雖然。君之所以爲此者。非君之自爲也。承天之意也。能承天之意。則能受

邱 文 莊 公 集

天之命矣。受天命者。必奉天焉。奉天者。必大報天焉。君秉誠以事天。天垂象以示君。必致夫精禋感格之誠。必謹夫象緯災祥之故。如是。則天人合一。天不在天而在君矣。天之心。則仁愛人君。君之心。則仁愛生民。民之生也。性天之理以爲其心。形天之氣以爲其身。心有不明。君必明之。俾天之理不爲物所蔽。身有不安。君必安之。俾天之氣不爲物所戕。故凡其號令之頒。政事之施。教條之布。禮樂制度之具。刑賞征討之舉。無非以爲民而已。爲乎民。所以承乎天。承乎天。所以安其位也。然君於此。豈能以爲獨力爲之哉。亦由夫大小內外之臣。以爲之腹心股肱耳目牙爪焉耳。君總於上。臣分於下。彼此相資。遠近相維。階級相承。氣脈相通。各盡職以釐務。畢同心以奉上。君必死其社稷。臣必死其職事。本乎是以持世。由一世而十世。十世而百世。百世而千萬世。中必統夫外。外決不可干中國之統。君必統夫臣。臣決不可萌非分之望。男必統夫女。女決不可當陽剛之位。臣非有舜禹之聖。決不可以言禪。君非有桀紂之暴。決不可以言伐。君

邱 文 莊 公 集

雖不及太甲。臣非有伊尹之志。決不可以言放。非爲天吏。決不可與問罪之師。非奉天討。決不可清君側之惡。事雖至於無可奈何。非濟天惡。決不可用權宜之策。天冠天履之分必嚴。水木本源之心必篤。如是。則人義立矣。雖然。天下之本在國。國之本在家。家必正。而後國定。其本亂而未治者。否矣。是故父有天下。必授之於子。子居大位。必受之於父。父非真堯舜。子非真朱均。必不可以與舜禹。子非真武王。父非真西伯。必不可以舍伯邑考。隱攝相位不可也。宣傳繆位不可也。父之所予必子。心之所安。子之所承必父。心之所願。非的見夫大義之決。不可以行權。非真有夫必歸之誠。不可以言假。授受取與。必原其心。原其本心之初。於序必順。於理必正。於心必安。以此正名。以此定位。既定其位。必端其本。本之所以端者。身也。身不可以不脩。身之所以脩者。心也。心不可以不正。知其身心之所以必當脩而正者。學也。學不可以不講。講學以正心。正心以脩身。脩身以端其本。則夫婦于焉以有別。昆弟于焉以有序。諸父子焉以有善。諸舅

邱 文 莊 公 集

于焉以有義。族人戚屬莫不于焉以有禮。將見身正而令行。家和而福生。行乎上而效於下。篤其近而舉諸遠矣。是則大而一世。所以綱維之者。國也。中而一國。所以根本之者。家也。家則內和而外順。國則上令而下從。極夫一世之大。則華夏安乎中。殊甸衛乎邊。各止其所。而不相侵陵。則人之所以爲人者。相生相養。各盡其性。各全其命。一順於道義之正。而不徇於功利之私。是則所謂雍熙泰和之世也。人既得其所以爲人。物亦得其所以爲物。天由是而得以爲天。地由是而得以爲地。則人君中天地而立爲人物之主者。其責盡矣。上天立君之意。於是乎其無負。而聖賢所以著書立言。諄諄乎垂世立教者。亦於是乎不徒託之空言矣。區區一得之愚。偶有所見。而妄爲此書。始嬴秦庚辰之歲滅六國。訖于齊。世道之始變也。終皇明戊申之春。慧出掃於昂。天道之終定也。首尾凡一千六百二十有一年。書成。用僭書卷端。以示夫當世之學生小子。而後世之賢人君子。容或有以取之否乎。不敢必也。於是乎書以俟。

學的後序

學的曷爲而作。擬論語也。昔人僭擬論語。得罪聖門。曷爲效之。王通自著書。以已儼孔子。愚則采輯朱子語。而竊推之以繼孔子之後。非效通也。效曾子有子之門人也。豈謂僭哉。朱子之言天下後世。家傳而人誦之。何用此爲。朱子平生著述。多是闡明聖經賢傳之旨。未嘗自爲一書。此愚所以不接寡陋。而妄有所輯也。今所輯者。多經書傳註中語。學者既已熟聞之矣。而又贅之者何。此亦朱子輯近思錄。采程氏周易春秋傳文之意也。名以學的者何。學以聖人爲的。龜山楊子之言也。而朱夫子於中庸或問論中和位育處。亦以是爲言。喻學者之必志於爲聖賢。亦如射者之志於中的也。愚於九篇載之。不無意焉。自昔性理諸書。皆始於太極。今先下學者何。書爲初學者作也。論語編次無倫。今有次第者何。論語之書。成於衆賢之所記。而愚此書。則采朱子之成書故也。所謂次第者何。姑以首篇言之。人之爲學。必自下學人事始。下學則可以上達矣。是則儒者之學也。儒者之

邱 文 莊 公 集

學。學所以至乎聖人之道也。其要莫先於爲己爲人之辨。大學一書。爲己之學也。欲爲爲己之學。必先效法人。而後用功於己。其用功之要。程子所謂涵養類用敬。進學則在致知是也。以此立志用功。循序積累。則知與行偕進。心與理昭融。中外本末。隱顯精麤。一一周徧。是則儒者之學矣。古之學者始乎士。而終於聖人。不過下學上達而已矣。若通論一書。則首篇是其凡。第二篇三篇是其功用之要。是則程子兩語也。蓋今人既無小學工夫。湏必先於持敬。敬不可以不立。而理不可以不窮。彼夫四書五經。以及近世諸儒之書。窮理之具也。必欲窮理。而又不可不知理之所以名。故以字訓繼焉。既窮理矣。由是而治心。由是而治身。以之正倫理。成治功。以至於窮神知化。參天地。贊化育。而極其功用之全。是則所謂聖神之能事。學問之極功也。學者。下學人事。而至於上達天理。如此。豈非儒者全體大用之學乎。此四篇至九篇之大意也。其第十篇。倣論語之鄉黨。舉朱子平生言行出處。示學者以標的也。前十篇。固已備矣。而又續以後十篇者何。

邱 文 莊 公 集

上編如小學之內篇。下編則其外篇也。上編由事以達於理。下編則由理而敬之事。以進德言。一以成德言也。自昔先儒論敬。皆自內而之外。今而反之何。自學者言。使有下手處耳。窮理略於格物。而詳於讀書何。讀書亦格物之一事。今之學者。無師授而欲舍讀書以窮理。吾言其泛無歸宿矣。六經次第皆始易。次詩書春秋禮。而今先詩書禮而後及易春秋何。由淺以及深也。人倫次第。皆先君父而後夫婦長幼朋友。今以父子兄弟夫婦朋友君臣爲序何。由近以及遠也。上編旣言敬矣。而下編又專以仁義爲一篇何。孔門教人。以仁爲先。求仁之要。由禮而入。言禮則敬在其中矣。終篇序道統。載周程張四子贊。而不取邵焉何。黃直卿論朱子道統之所以傳。亦云由孟子而後。周程張子繼其絕而不及邵焉。其意蓋本諸此。非愚敢妄爲去取也。愚編此書成。恐或者不能無疑。竊觀勉齋先生作朱子行狀。擬答或人之疑於後。因效之書此于卷末。蓋志所見耳。非敢竊比大學中庸之或問也。觀者尙矜其志。而無備責云。

贈廉州邢知府序

嶺海之民極矣。而海以北三郡爲甚。就二郡論。而廉尤甚。乃成化戊子秋七月。朝廷從巡撫大臣言。推廉郡太守林君於臬司。俾巡海以北。而輯寧其人。乃以戶部主事宜山邢君直夫補其處。特賜璽書。而付以守禦撫安之任。命既下。凡嶺海人士寓京者。莫不歡忭嗟歎。以謂五六年前。蚤有此舉。則此方生靈。當不至於此極也。言而繼之以太息流涕者有之。或曰。廉郡得邢君固幸矣。而邢君以名進士。通朝籍。造屬地官。持心勵行。固不下于人。人之不必如君者。往往位通顯。得善地。君何辜乃得此殘破之區。洎此瘡痍之民。名雖二千石。實不及江南一小邑也。雖有才能。將安施乎。予曰。此正朝廷所以用邢君意也。夫居官于善地。雖以中人之才。苟有志焉。皆足以自見於時。惟夫勢之不可爲。力之不足以爲。用則無財。役則無民。於是而能起其廢。成其功。然後見其才之大過人耳。朝廷用邢君。而特有璽書之賜。其意或出諸此乎。雖然。於邢君茲行。而有以卜夫三郡治亂興衰之

機。夫有此天地。卽有此方域。有此方域。則有此人民。固未嘗一日有地而無民也。自峒夷搆禍以來。今踰十年矣。其人民死于寇。死于饑。死于疫。死于官軍。十無二三矣。失今不爲之所。吾恐數十年之後。併與所謂二三者亦盡矣。豈天道生生不息之意哉。夫天道三年一小變。十年一大變。窮則變。變則通。此方亂極而治。衰極而興。其在邪君茲行乎。君行矣。其尙體朝廷愛養元元之心。憫此困窮之殘民。食之飲之。衣之被之。胸如之保障之。休養生息之。肉其骨。翼其卵。父母妻子其血屬。隴畝其汙萊。棟宇其荆棘。使之復有生之樂。而重得爲太平之民。豈非君之大賜哉。夫然。則芳名美譽。與此方山川同其悠久矣。裴主事秉彝郡人也。喜郡得賢守。而鄉人將有蘇息之期。求予贈言。予家與廉鄰。於是邦有被髮纓冠之義。故亦喜而爲言如此云。

贈曲靖蔡太守序

成化五年春王正月。萬方會同。大明黜陟。乃去郡守之尤無良者。慎擇其

邱 文 莊 公 集

人以補其處。于是擢南寧府同知天台蔡君廷白。知雲南曲靖軍民府事。命既下。議者謂君以通練之才。處畿甸之間。當繁劇之任。尙不足以盡其用。今願置之遐方之域。山窮水絕之處。以臨夫侏儻鄙野之民。不亦枉其才邪。余曰不然。此政朝廷用人之深意也。今夫內地華民。禮義素明。風俗素淳。政化素行。苟得中才。因其俗而施之以新政。若因丘陵川澤以爲高卑。用力少也。若用健馬駕輕車。驅馳于康衢大道之中。無阻礙也。夫人能之。無俟於擇焉。若夫官選外之地。治鄙野之民。而使一旦施新政。以變其舊俗。曷以異于平地方覆一簣乎。範我馳驅於荆棘阨塞之間乎。用力多而齟齬難行也。必矣非慎擇其人。曷足以勝其任哉。雖然。孔子之聖。猶欲居九夷。而班史之傳循吏。亦詳載夫異俗之治。是故脩庠序之教於桂陽者。衛子產也。行嫁娶之禮於九真者。任公孫也。通商賈之貨於合浦者。孟伯周也。滇南之在今日。亦猶諸郡之在漢也。君誠不鄙夷曲墻之人。而以中國之治治之。聖之人化化之。異時之傳國史者。亦將大書特書。以著君之

治績。如班孟堅之於衛任諸公焉。君將之任。其鄉人官諸朝者。徵言贈行。而以屬予。特舉漢循吏之治異俗者。以爲君勉。

送鍾太守詩序

羊城詩人。在國初時。有孫仲衍黃庸之王彥舉李仲。此三四先生者。使生當唐盛時。當與韋蘇州柳柳州輩相頡頏。溫李而下。不論也。去今未遠。繼者已寥寥然。若今順德鍾君必華。亦豈多得者哉。君在學校時。已有詩名。及仕知賓沔二州。政聲與詩名。日氤氳乎著夫人之耳。韓子所謂性能而好者。蓋庶幾焉。余聞君名久而未及識。今以九年秩滿需選京師。始會君於寓所。目其容。偉如也。耳其言。溫如也。及出示所和晏鐸輯明盛時。格調不凡。音響清越。蓋有得于前諸公者。然後信所見。有過於所聞。而名下果無虛士也。居無何。拜命陞知廣右太平府事。將之任。道必過羊城。白晝錦衣。榮歸故里。或者豫喜以爲君榮。嗟乎。此淺之爲丈夫者。所以沾沾自足也。豈足爲君喜哉。余所以喜君者。以其益得推詩之用。以見之民治。使

邱 文 莊 公 集

民曉然而知詩在天地間。果非無益之空言。是則可喜耳。自三百篇後。詩之足以原人倫。美教化。通政治也。非一日矣。風雲月露。草木禽魚。作者日多。徒工無益。是以大雅君子不取焉。君子所取者。唐李杜。李杜而下。有韋柳二人者。皆郡守也。考其平生所作。住者往往在那齋燕集之際。因俗設禁之餘。聲習所加。自足成化。回觀衆作。真如丹砂空青。世外物寶。何益之有哉。君承鄉先正之後。得韋柳之位。廣詩之用。以導化邦人。感發其善心。宣導其湮鬱。以原人倫。以美教化。使太平之民。翕然太和。真有以稱其名焉。則天下後世稱守之能詩者。必歸焉。而與韋柳並傳於無窮也必矣。豈非有以爲鄉先正之光乎。君志廣。而才周於事。無所不能。而余獨以詩爲言者。舉其長。敘諸卷端。使人知求君於大。而區區所以眩俗者。不足道也。

送劉端本知興化府序

古端劉君端本。登天順庚辰進士第。擢尙書戶部主事。陞員外郎。進郎中。

邱 文 莊 公 集

歷官十有九年。始拜興化府知府。同年登第者。至是往往擢長方面。或佐都臺。而君乃始得一郡。所轄僅二縣。戶僅踰萬數。疆域人民。蠶可視江西南一堂縣。命旣下。朝士大夫。多爲君不平焉。鄉人在京者。來徵予言。且舉衆言以諭予。予惟興化。閩中文獻邦也。疆域雖狹。人民雖渺。而風俗素淳。文學素盛。仕宦之家素多。歲大比。登鄉書者。幾居八閩之半。會試南宮。中甲科者無虛榜。由乙科而分教天下者。在在而有。疆域不出數百里。而其人仕者。散見於千萬里之外。版圖僅餘萬戶。而其天民之秀。分布中外者。無慮數十百人。凡此。皆他郡所無者也。郡邑以人才多寡爲大小。風俗醇薄爲上下。而戶口之登耗不論焉。得郡於此而治之。亦得以行其所學矣乎。自予居京師。多與其賢豪游。頗知其民風士習之詳。所謂豪俠之徒。武斷於鄉曲者。無有也。鬪奪之家。豪植以爲強者。無有也。告訐之徒。理筆以健訟者。無有也。舞智之吏。構禍而枝害者。無有也。椎埋之盜。陰攘而公剽者。無有也。譽毀之言。巧言而醜詆者。無有也。暴悍之俗。好勇而

邱 文 莊 公 集

鬪狠者。無有也。宦家子弟。恃其父兄之勢。而公造請托者。無有也。倦游士夫。假以嘖笑之態。而詭辯阿悅者。無有也。於凡天下古今所謂不美之事。薄惡之俗。於茲郡咸無有焉。豈非善地乎。蒞善政。馭善民。而爲之師帥父母。豈非幸哉。雖然。予所聞者。前二十年之故也。風俗遷移。歲異而月不同。今日其尙然乎哉否耶。予不得而知也。君行矣。試以予言味之。果有如向所云云者乎。無也。雖然。君子盡其在己者而已。彼之有與無。政不必計也。使其有之。而吾之心。不可以不盡。盡之之道何如。平而已矣。何也。吾爲人之郡之守也。而吾之鄉亦有郡守焉。吾治人之郡之民也。而吾之家亦齊民焉。鄉也人之守吾郡治吾人也。其政之良與否。吾固嘗是之非之。今何怪乎人之是之非之於吾乎。反觀內省。彼是者之是。吾從而是之。益以勉。彼非者之非。吾從而非之。亟以改。如是。則得其平矣。孟子曰。君子平其政。予則以爲欲平其政。必先平其心。吾平其心。以平其政。彼之不平其心。反其是非之。實肆其毀譽之端。未必人人然也。必有平心之人

以平之。吾弗與知焉可也。君行矣。請以平之一言。以爲之官之贈。

贈瓊郡林同知序

予友天下士多矣。而尤厚於鄉人。鄉人中最相厚者。羊城則林宗敬也。宗敬弱冠領鄉薦。慨然有志當世。以爲今世仕者非進士科。不必得顯官。孳孳焉留心舉子業。於凡經史子集。苟可以資爲文者。罔不研究。而於三百五篇詩。用功尤深。歲甲戌初試南宮。得乙科。不屑就。丁丑再試。又如之。以至乎庚辰甲申丙戌三試皆然。乃喟然歎曰。吾之於學。未必不如人也。而進士卒不可得。豈非命耶。乃就選調。得瓊州府同知。予瓊人也。可幸得平生故人。以佐吾郡乎。況今主郡者清漳蔡公叔清。亦予友也。而今而後。吾知吾郡三州十邑之人。庶幾得所覆庇矣乎。而區區遠宦萬里外。垂白老親。亦將賴以慰安之。少寬其倚閭北望之思。是則一郡之人之幸。尤莫予幸之甚也。雖然。予固幸矣。然予一家之私。未必一郡人之公也。使吾郡之人。咸咨嗟怨望。而吾一家獨歡歡然有喜色。予心安乎。且予於宗敬。友誼

素篤。而予一日少長焉。則固兄視予矣。凡其之官或內或外。予皆不能無贈處之言。而況于吾郡乎。則其所以勸勉規儆之者。又不可以但同衆人也。請問宗教所以遠膝下。去鄉井。間關萬里外。歷十數年。以希朝命之樂也。果誰爲乎。亦曰。以行所志。榮所生而已。假使宗教一舉。即登高第。可以得五品官。位大夫乎。否也。得以畫錦還鄉。而慈闈以解其離憂乎。否也。得以佐大郡。臨吏民。以施其政教乎。否也。三者皆未必遠得也。今一登仕籍。即階穹秩。縷金以爲衣。縷銀以爲帶。便道還鄉。稱觴獻壽。母子兄弟。敘天倫之樂。以爲族姻閭里之榮。况所得者。大郡地方二千里。支郡三。而屬邑十。人民數十萬家。又當隣郡凋弊之秋。而獨富盛安樂如平時。出則飛高蓋。躍溟池。綠駿鳴騶。載道。前呵後擁。行者屏息道左。以俟其過。入則居黃堂。據高座。屬吏抱簿書魚貫以進。輿臺自卒。左右侍立。屏氣側耳。以聽其處分。回視彼之登甲科者。方且服事大僚。惴惴然逡巡却立。如新婦之事嚴舅姑。然一出詞。一吐氣。不敢少肆。果誰爲多哉。雖然。得之榮

邱 文 莊 公 集

既踰其限。則失之辱。殆有甚焉者矣。所以保守之。其道尤難。惟勤惟畏。其庶幾乎。蓋勤則無逸事。而上之人。不能目我以罷軟矣。畏則無肆心。而上之人不能名我以貪虐矣。而又守之以誠。濟之以斷。本之以仁恕。則在宗敬者。可以常保其榮。而在余者。亦得以常恃其幸矣。夫豈但一身之榮一家之幸而已哉。

邱文莊公集

卷之二 序

四十

丘文莊公集卷之三

五一居士詩卷序

昔歐陽子自號六一居士。蓋以已身均於五物之間而各一之以爲六也。今潮陽有盧先生者。亦自謂有筆墨紙硯各一與已爲五。而自號五一居士焉。得非聞歐陽子之風。而竊取其意與。歐陽一五物而爲六。人居物之間也。先生一四物而爲五。人資物以用也。人居物間。人與物猶殊也。物資人用。則物與人一矣。夫凡受形天地間。無非物也。物物也。人亦物也。人以一物而物於衆物之間。獨異而且靈。故天下之物。無一而不爲吾之所有。故以之而並兩儀。謂之三一可也。以之而並三光。謂之四一可也。以之而並八卦九疇。則又可以一其八與九矣。推而至於百千萬億。莫不皆然。豈但此四物五物而已哉。或者乃謂非吾所有。過矣。矧今所取之數。得天地之中數。河圖之中。五太極也。洛書之中。五皇極也。五之爲數。又合一二三四而成之。一

水也。一火也。三木也。四金也。五爲土而寓於四行之中。交相爲用。以成萬物。缺一不可也。人以一身而居筆墨紙硯之間。以運用之。以紀古今之事。以應天下之務。亦缺一不可也。先生之意。殆出諸此與。雖然。之四物。乃衆人之所同有者。而獨專之。可乎。蓋以人用物。衆人之所同。以已觀物。達者之妙契。當虛室生白之處。明牕棊几之間。召陶泓而來陳支。垣楮先生之腹。脫管城子之帽。發至理於心畫之微。托幽興於運運之末。得之於心。而應之於手。斯時也。人耶。物耶。混混然合而一矣。烏有所謂五哉。先生名昊。字懷廣。初爲潮郡司訓。今陞邯鄲教諭云。

樂閒堂詩冊序

東吳朱宗遠。以樂閒爲號。大理卿錢塘夏公季燾。旣爲之記。會其子永領京闈鄉薦。會試春官。以書來求予序。夫已有之。而後心契之。契之深。而後言之切。苟想像而強爲之言。雖言之。猶不言也。予叨官于朝。日在塵紛膠擾之中。求頃刻閒。不可得也。已非閒者。何以知閒之爲閒。閒且不知。

邱 文 莊 公 集

又烏知其爲樂哉。諾之久。而未有暫時閒暇之隙。矧以衰老思歸。有志未遂。其心戚戚然。恒不樂也。欲下筆。輒中止。曾不知閒所以閒。閒而又樂者。果何如也。雖然。閒樂之趣。雖未克以身享。而樂閒之理。則有可以意推者。夫人情之所惑者有七。惟樂爲適意。身之所享者非一。惟閒爲實用。適意於其所享用之實。以斯人也。享斯樂也。其諸異乎人之閒也與。何者。七情之中。其六者皆感物而動也。惟樂則生於吾之心。而適於吾之意焉。然人之樂也。有樂於功名者。有樂於貨利者。有樂於詞音者。有樂於聲色臭味者。有樂於林泉花木者。有樂於禪蛻仙真者。彼皆取之於外。資之於人。而於吾身心之實用。則未必皆真有所得焉。惟閒也。無所慕於外。無所資於人。實有之。實用之。休休然無虞。優優然有餘。油油然不拘。肢體我所有也。室廬我所有也。親屬我所有也。歲月我所有也。山川我所有也。天地我所有也。一日也。而兼兩日之適。一人也。而兼衆人之用。無所事而閒。隨所在而樂。斯人也。世豈多有哉。雖然。是閒也。天靳惜而不輕予

人。未易以得之也。有父母之養。不得也。有子孫之累。不得也。有職業之拘。不得也。有庸調之給。不得也。有一於此。閒且不可得。況得而樂之哉。蓋必有所不閒於其前。然後得以享其閒於其後。且宗遠自幼辛勤。承家業。持門戶。積久而成緒。至是一一皆如其意。上有益壯之親。康和而清健。下有元宗之子。穎敏而通達。甘旨之奉有餘。詩書之香不斷。內而心也。無意外之干。外而身也。無疾疹之蝕。意無嚮而不適。用無享而非實。一世之人。有宗遠此閒而不知樂者多矣。閒而能樂。此宗遠所以賢於人哉。予故推其意。代之言。以爲所居堂字。

觀瀾閣卷序

天下之奇觀。孰有過於水者乎。水生於天一。以成於地六。方其生也。其端甚微。及其成之之後。潛於地下則爲泉。流於地上則爲川。或爲窪池。或爲沼沚。或爲溝洫。或爲澗溪。大之爲江爲河。極其至也。則爲海焉。隨地勢以賦形。因天時而變態。非若山有一定之形。成於開闢之初。不可以移易。

邱 文 莊 公 集

也。是則水之爲物。中有至理存焉。而人之觀之也。何可以無術乎。孟子曰。觀水有術。必觀其瀾。瀾者。水之湍急處也。人能於是而觀之。則天下之物。所以竦人瞻視。而啓人心思者。孰有過於是哉。太醫院吏目劍川張伯威致事將歸田里。介其鄉人林徽京庠生。鐫其所謂觀瀾閣卷。求予爲之序。閣在所居之東南。蓋瞰溪流以爲屋也。閣以觀瀾爲名。其亦有得孟子之言矣乎。孟子之爲此言。蓋借水以形容道之有本也。言雖在於水。而意則不在於水。而伯威之取是義以名其閣也。其意亦猶是否乎。想當風清月白之秋。長空無雲。千里一碧。湛然明鏡之中。浴星斗而吐吞之。涵山樹而動盪之。亦可謂天下之奇觀者矣。雖然。未也。若夫油然而雲變色。歛然而風震撼。雷雨交作。魚龍沒出。激於石而爲嘈呖之聲。盪於沙而起洶湧之勢。盤而爲渦。旋而爲湍。揚波而鼓濤。噴沫而飛珠。夫如是。斯可以盡水之變。而天下之奇觀在是矣。伯威登是閣。而設或遇斯景焉。其尙繹予斯言。而有契乎其心矣乎。

忠愛祠詩序

汀郡推官王公歿於王事。郡人請于朝立祠祀焉。祠在郡治東臥龍山之麓。有司歲以五月二日行禮。公生忌辰也。方公歿時。郡之人無不大臨其喪次者。莫不哀之冀其更生。及其既久也。拜其祠下者。莫不慕之如其始死。其質實者。哀之慕之。各以其情。而能言者。又寓其哀慕之情於文辭之間。積久成帙。其家嗣翰林學士一夔。請予序其首。古人有言。盛德必百世祀。若公者。非所謂盛德者哉。然公之德之盛。非止忠愛二者。汀人以忠愛顏其祠。節其一惠耳。夫致身事君是之謂忠。盡心卹民是之謂愛。公初奉天子命來爲郡幕。政平德孚。九載如一日。六邑之民。合詞告借。藩臬以聞。陟司郡刑。寓忠愛之意於鞫訊之中。獄以屢空。民用是而不犯。在郡至是蓋十有八年矣。乃正統己巳春。隣郡沙尤盜起。侵軼郡境。旬月之間。聚衆數萬。郡人力不能支。遂嬰城自守。賊圍數重。樵蘇路絕。民嗷嗷以待盡。公欲發廩以濟。守執不可。公移牒以擅發罪自任。守從之。民得粟。守益堅。城

邱文莊公集

賴以完。賊退之後。言軍搜山澤。獲男婦避難者。誣以爲賊。公力辨之。民得生者四百餘人。旣而守將。又得汀民與賊交通者姓名。欲按籍行誅。公曰。民平日輸賦稅以供官軍。事出倉卒。官軍不能爲之衛。民不得已而從賊。非其本心。脅從罔治。古典也。守將不從。公力爭之。且取其簿籍火之。事遂已。所全活不可勝計。夏五月。賊又犯屬邑寧化。報至。衆曰。寧化素無備。而賊勢熾甚。非王推府不能禦之。不然。民皆塗炭矣。公毅然請行。統壯丁與賊戰于蓋洋者數十合。斬首數十級。降者三千餘人。越二日。復大戰于大陂。又破走之。賊勢大沮。公尅日搗其巢穴。平有日矣。不幸以疾卒于營。六邑之民。聞之如喪其父母然。手香燈。具衰絰者。接踵于道。嗚呼。公所謂盛德者非耶。德莫大于救人死于垂亡。出民生于旣死。公奉天子命以司刑。無事之時。旣免民死于箠楚之下。不幸而遇禍難。又能免民死於兵刃之餘。凡若此者。無非以愛君之民也。愛其民。即所以忠其君也。忠君而愛民。人臣之職。于是乎盡。而在夫人者。其德莫盛焉。盛德必百世祀。

況又以死勤事。合於祭法。是宜膺九重之寵命。享萬民之蒸嘗而無窮已也。一時士大夫哀之慕之。爲之詠歎歌頌。不一而足。是豈無徵之空言哉。是宜學士君爲之哀集以傳也。

海航詩卷序

進士陳君朝用起。復來自錫山。致其鄉人趙瀟廣洋之言曰。某宋宗室盛國公之裔。世居無錫之鴻山。幼承祖宗遺澤。兢兢戒謹。恒恐失墜。居臨大海。每見商船出沒其中。一日之間。阡危亡數矣。因念人能於安居無事之時。兢惕于心。恒若舟航之在海也。豈復有失墜乎。因以海航爲號。蓋用以自儆也。鄉人能詩者。多遺以詩。然未有序文以發揮其意。稔聞翰林丘太史名子之京師。幸爲丐一言以爲終身之戒可乎。君既至。首以見請。予惟天下之至險者川也。而川之大者尤險。然則天下之川之大。孰有過於海乎。是故聖人作易。示人以趨避之方。往往曰涉大川。川之大者。蓋言海也。觀易於需。於同人。於蠱。於大畜。於益。於渙。於中孚。於頤之上九。於未濟之六

三。皆曰利。於謙之初六。獨曰用。於訟四曰不利。於頤之六五。又曰不可。噫。人能明於利用言否之際。以之涉世。無難事矣。廣洋氏未嘗操巨艦以航海。而以航海名其居。且以自號。其殆有得于大易涉川之義也乎。則又不止于見危險而恐懼也。子以進士君之請。致一言以復之曰。廣洋氏乎。其尙以理爲航。以海視世。本諸理以涉世。世道危險。一吾理以涉之。揆諸理而曰利。曰用。則持吾誠敬之柁。張吾禮義之帆。揆諸理而有不利。有不可。則維吾纜於聖涯。下吾杙於道岸。

心師軒詩序

潮鄧陳衍于寬。一日過予。持一帙甚鉅。揖子謂。此衍所居心師軒卷也。相知者往往爲詩詠之。而翰林修撰安成劉公。旣爲某記之矣。未有序其首者。幸惠之以一言。予詰之曰。子之有心自師可也。何賴乎人之言。旣以求記。又欲求序乎。且心之在人。在內而不在外者也。爲主而不爲客者也。命物而不命於物者也。今謂心爲師。則是所以爲師者欲也。抑不知所以

師師者何物與。若曰以心師心。是有兩心矣。予不曉其所謂。又烏能爲之。言。願更求諸他。于寬持卷去。時日將夕。歸而坐諸軒間。四牕洞開無人。萬籟寂然無聲矣。歛容端視。至于夜半。俗氣消盡。萬慮闕泯。而清明之氣。澄澈光明。但覺靈臺之中。凜凜乎若嚴師在焉。德容尊嚴。冠服整肅。可敬可畏。警欬不聞。言動中節。可觀可法。琴瑟在前。不敢踰越。夏楚在側。不敢違犯。頓然一悟。然後知于寬所以名軒之意。有所自也。張子曰。正心之始。當以己心爲嚴師。其以是與。明日。于寬復來。因書所得者爲序畀之。俾書諸卷端。噫。于寬所得者。其亦與子同否乎。

江湖勝遊詩序

予友左吏部時翊持一卷示予。題曰江湖勝遊。將求諸名人詩。寓驢以贈其姻契。廖榮仲華者。首以序見屬。且曰。仲華以商游。而志不在商。蓋有慕乎司馬子長之游。假商以自名。實非商也。子曰。仲華志不在商。爾身庸非商耶。今天下之人。不爲商者寡矣。士之讀書。將以商祿。農之力作。將以商

食。而工。而隸。而釋氏。而老子之徒。孰非商乎。吾見天下之人不商其身。而商其志者。比比而然。今時翊顧謂仲華商而不志於商。可信乎哉。雖然。昔者太公望之釣也。方其坐於磻溪之上。持竿而垂綸。語人曰。吾志不在魚。以其迹觀之。人固莫之信也。然求其心。豈真爲魚者哉。吾意仲華之商。亦若是乎耳。試因時翊而問之。子之江湖之遊。西極乎岷峨。東盡于海。往來乎洞庭彭蠡震澤之間。覽其形勝。訪其人物。山之涯。水之澗。曾見夫坐釣而志不在釣者乎。斯人也。業與子異。而志與子同。有則必見之。儻見其人。幸以告吾。時翊傳轉以達之於其長。

栢菴詩卷序

客有菴居而環樹以栢者。因以栢菴自號。人亦以是稱之。環其居之人。稍能詩者。皆作詩歌詠之。旣而傳之郡城。郡城之人。名能詩者。繼歌詠之。又傳而至於京師。京師之人。每遇能詩者。亦往往爲之詠歌焉。積久成帙。得詩母慮數十百首。其子出以示予。求序。予得而誦之。乃爲之序曰。栢之

見於歌詠也多矣。在三百篇有曰。如松柏之茂。又曰。新甫之栢。其後騷人墨客。亦往往寄情于斯。然作者。間一二篇而止。未有若栢菴斯集之多且備如此。是蓋不栢其栢且人其栢。栢之於人。果若是班乎。夫人之於物。氣異而理同。人之生也。受命于天。物之生也。受命於地。受命于天。惟舜獨正也。受命于地。惟松栢獨正也。在冬夏青青。人而有取乎受命有常之物。意不在物。蓋在乎受命獨正之人也。受命獨正之人。非舜也與。子知客之意不在栢而在舜。然則曷以知其然。蓋栢之爲物。心堅而實。其充塞與。枝條而達。其文明與。子熟之。則馨香襲人。其立德升聞與。柯葉貫四時而不改易。其烈風雷雨弗迷與。然栢植物也。舜聖人也。擬栢以舜。倫乎。夫鳳儀。儀禽也。麟師。師獸也。古之人固常以方聖人。矧茲貞材。歲寒後凋。擬之聖人。奚爲不可。雖然。斯言也。非予之言也。南華生之言也。客姓李。名道。羊城人。隱而有德者也。其子名棨。鄉貢進士。今待試于春官云。

續溪項氏紹先詩册序

邱 交 莊 公 集

德輿邑治之南若千里。有地名續溪。邑鉅姓項氏世居焉。續溪距宋張忠定公所居吳園村不遠。張項世爲婚姻。家有項生森者。張出也。予教太學時。生爲太學生。穎然出倫類中。予已異之。又以其舅氏張公英。知吾府事。數侍講下。益知其爲人。暨予官內閣。生以舍選歷事都府。時天下無事。戎務清簡。得以暇日從事帖碑。予延之於家塾訓孤孫。以端其蒙養之初。且將葺矣。今係籍銓曹。將歸故鄉。溫習故業。以俟再試。臨行出二冊以示予。且曰。森高祖養默翁。嘗去家一里許。小茅山下。建屋數楹。即山名名之。以爲讀書之所。山前臨溪。又構重閣而以風泉名焉。一時名人多有題詠。久傾圯。詩文隨亦散失。森間於鄉先輩遺文中得其一二。慨然思欲復先業之舊。然顧瞻故址。薄於先塋。乃改建於家居巨山之下。其規制亦如先祖之舊。仍以舊扁扁焉。森來京師。徧于縉紳士大夫詩文。以昭先志。啓後人。積久成帙。敢希一言以弁其首。嗟乎。此正予所以延吾子訓孤孫之意也。陽城有言。夫學。所以學爲忠與孝也。孝本乎天性。存於人心。夫人有之。而

於父祖子孫。一氣相承。尤親切焉。孟子曰。不孝有二。無後爲大。有後矣。乃不克負荷。乃弗善繼述。有善義而不爲宣揚。有基業而不能保守。有之若無焉。不孝之罪。亦焉逃哉。是以古之孝子。既謹嗣續之傳。尤嚴義方之訓。良有以夫。生居予門下。讀書訓蒙之暇。未嘗一預外事。其身雖處京師。逆旅之中。而其心無一日而不在桑梓松楸之下。觀其於先世之故業遺文。起其廢於數世之後。播其美於衆賢之言。哀爲鉅帙。以遺後人。使其對手澤而永君子之澤。即心畫而推廣前人之心。世濟其美。寧有旣邪。所謂宣揚善義。保守基業之孝。生蓋有之。項氏可謂有後矣。他日必當大有所成就。不但已也。古人有言。以身教者從。區區所以托孤孫於吾子也。其將來必有所效法而興起也夫。

送侍讀學士徐先生掌南京翰林院序

先人有言。宰相有任責之憂。神仙無爵位之寵。旣都榮顯。又享清閒。惟學士然也。學士之職。在前代爲榮選。然所掌者。大封拜。大詔令。大制作之

邱 文 莊 公 集

外。下至于青詞齋文。口宣致語之類。無大關係者。皆俾爲之。殆無虛日。榮則榮矣。然謂之清閑則未也。較之他曹局。稍爲優爾。我朝之制。制誥詔敕之外。編纂講讀之餘。一切屏去浮文。凡前代所謂禱祈宴會之事。恒希有焉。其職務尤爲清以閑也。予友徐時庸先生。以翰林侍講擢拜侍讀學士。往掌南京院事。南京雖曰根本之地。然自文廟遷都之後。百官衆職。咸隨以北。凡諸司留務。比舊爲簡。而翰林殆甚焉。當崇儒右文之世。爲文學侍從之臣。據龍盤虎踞之盛。有金馬玉堂之榮。優游容與于廣內延閣之間。無簿書之煩。無應求之雜。印文生綠。寶篆凝香。纖塵不侵。衆竚俱闕。昔人所謂凌玉清。迦紫霄者。眞誠有之。豈但比方議擬之謂哉。先生行有日矣。子既詩以送之。其鄉人仕京者。又求文以贈。惟南京祖宗創業之地。而翰林之建首昉于此。而最先居是職者。景濂先生也。景濂先生際遇太祖高皇帝肇造人文。以開一代文明之治。蓋當代文宗也。今先生以文學之選。居肇基之地。繼大賢君子之後。幸無他務相侵擾。且多暇日而有餘力。所謂

鋪張宏休。揚厲偉績。緒前人之志。成一王之制。以詔方來。予不能無望焉。花磚日移。槐閣風清。支枕睡餘。日長無事。先生於此時試一思予言。

送林黃門使滿刺加國序

皇明之化。與天同遠。地所限者。舟以通之。凡在覆載之中。有血氣者。無不臣屬。非若前代但羈縻之。僅通貢賦而已。其四夷之首長皆受封爵于朝。有所更代。輒遣使請天子特遣近臣持節往封之。視內地藩翰焉。於乎。皇化一何盛且遠哉。且三代盛時。其疆域西不盡流沙。南不盡衡山。東不盡東海。北不盡恒山。地盡即止。漢始通西域。開西南夷。皆由陸以通。隋唐以來。航海之使始至。然皆自君長其國。未有受天子命者。有之。肇自今日。然多因其故而封之。惟滿刺加之有國。實我文皇帝始爲之開疆啓土者也。其地在中國西南大海之外。舊屬于暹羅斛國。永樂初命中貴駕巨艦自福唐之長樂五虎門。航大海西南行。抵林邑。又自林邑正南行八晝夜抵其地。由是而達西洋古里大國。分隸徧往支阿舟榜葛刺忽魯謨斯等處。逮其回也。

邱 文 莊 公 集

咸至于是聚齊焉。歲己丑。遣使封其酋爲王。建以爲國。自是凡易世。必請封于天朝。世以爲常。乃成化辛丑。其國王卒。子當嗣位。遣使臣備方物來請封。上命禮科給事中林榮仲仁爲正使。如故事持節以行。有日。衆以爲仲仁此行。乘長風。泛洪濤。經萬餘里外。眞所謂汗漫之游。天下之大觀者。咸賦詩壯之。謂予鄉先達不可以無言。昔司馬子長上會稽探禹穴。門九疑。歷吳楚之墟。齊魯之都。以觀其所謂名山大川者。歸而大肆厥辭。然所游不出九州之中。而猶大有所得如此。矧仲仁茲行。越中國之外境。所歷者。皆天下之絕縱詭觀者哉。予聞滿刺加之地。諸番之會也。凡海外諸夷。歲各齎其所有。于茲焉貿易。種類怪詭。物產珍異。其尤異者。距其境西南舟行約十餘日。有幹鞞國者。卽所謂溜山也。海水傾注。其名爲溜。水勢漸下。力不能勝。一芥舟行。誤入其中。卽沉下而無所底止。神仙家所謂蓬萊弱水。殆近是與。又去古里西南。舟行歷三閱月。有默加國者。卽所謂天方也。城中人物。大異于常。俗尙和美。民物繁富。而無貧苦者。物產

珍美。色色有之。罔有欠缺。且地無雨雪霜雹。惟夜露濃露。以滋物生。浮屠氏所謂極樂世界。似指是與。仲仁至彼諸番會集之地。誥封禮畢。宣布聖天子德威。徐觀其會通而詢察之。重譯其言。徧訪其俗。將必有瑰奇之見。詭異之聞。所以開廣其心胸。增益其志識者矣。嗚呼。天下事何所不有。惟不見耳。歸而尙歷歷以告我。

贈許寺丞序

元許文忠公之玄孫曰頤孟敬甫者。以名進士出知安平縣。九年秩最。陞太僕寺丞。蓋異數也。其鄉友秋官副郎劉宗瀾。徵予賀言。甚矣。名賢之難爲後也。何也。蓋閭閻之子。一旦崛起以叨有祿位。一言苟善。一行苟美。一事爲苟合其宜。人莫不交口稱之。譽之。傳播之不休。若名賢之胤。雖有德善才美。表表暴著於其時。衆乃漠然若罔聞知。間有舉以似人者。則莫不曰。爲賢者後。固當也。又莫不曰。彼誠可矣。較之厥先何如。噫。甚矣。名賢之後難爲也。士君子幸生名賢之後。而爲衆所責備如此。雖欲同於衆人

邱文莊公集

得乎。孟敬登甲戌進士第。選試都臺。當道者。知其文忠公之後也。特注意焉。或不足之。遂出尹近畿地。孟敬慨然發憤。思大其家聲。以振起先人之遺緒。一言動。一舉措。咸惟先文忠是師。曰。此吾家法也。未幾。政聲赫赫。著京邑間。部使者以聞于朝。遂荷旌異之典。至是上計天官。又以最稱。故有是命。嗟乎。名賢之後。果難爲乎哉。無難也。何無難。爾象其賢。文忠公在勝國時。亦以名進士首擢同知遼州。既而入爲御史贊理中書。繼陞臺。參大政。薦登樞要。屢建大議。隱然爲國大臣。凡其謀猷建置。皆足以師表百世。後世人臣。以道事君。是所宜則而象之者也。又况爲其後人也哉。詩不云乎。無忝爾祖。聿修厥德。請以是爲吾孟敬賀。

贈董侍御考滿序

子友四明董君廷瑞爲南臺御史之六年也。以秩滿上京師。天官矚以陛見詔。許復職。行有日矣。凡在交游。謂予於君同年進士。且相好也。不可無言以贈之。予以君之始授職。及其初考。未嘗有爲一言以激厲其初政。勉

邱 文 莊 公 集

圖其後功者。今則再書考矣。造詣益深。練達滋久。其名既成。其績茂著。乃欲喋喋然以強聒之。無乃晚乎。僉曰。不然。古之名臣建事功。効忠力。往往在久任之後。如唐陽城爲諫議大夫。既七年。始一開口論陸敬輿沮裴延齡。蓋有待而然也。雖曰有待。然未必非朋友激發之功。使當時無韓退之。安知其不終默默乎。然則言之有益于人也不誣矣。子言之。毋多讓。又曰。有初而鮮終。宦成而心怠。人之常情也。董君前此六年。固已著能聲。播美稱矣。假令而今而後。稍萌毫髮苟且心。則行百里者半九十。山九仞者虧一簣。雖其爲人明敏恪勤。決不至此。然君子惜賢人而憂正士。愛助之心。有不能自己者。欲不言得乎。嗟乎。之二言者。皆躓也。予尙何言哉。雖言之亦不能有加矣。然而諸君命言之意。則不可虛辱也。顧惟蠢愚。言不足爲人輕重。請誦古人之言以塞其責焉。子朱子有言。一日居乎其位。則一日業乎其官。一日不得乎其官。則不敢一日立乎其位。有所愛而不肯爲者私也。有所畏而不敢爲者亦私也。敢以斯言復諸君。俾其書于帛以爲君贈。

雖然。此豈一董君責哉。君歸南臺。遇凡與我同道者。請皆以是語之。

賀丘治中序

太常寺丞雲間丘君允輝。榮陞順天府治中。命既下。有議者曰。君官容臺。十餘年于茲矣。容臺職典三禮。天子有事于郊廟。及秩于羣神。丞咸與焉。其職任重矣。今丞滿九載。僅得佐京郡。有如左遷然者。君得無弗喜與。又曰。君發身文儒。蘊有用之才而不施久矣。其心恒欲以功業自見於時。禮樂之司。雖云清切。然用之則有時也。倅貳京尹。任亦匪輕。有土有民。功業易以下及。大用之階。蓋駸駸于茲矣。君胡爲而弗喜。或舉二者之言。諗予。竊以爲謂君非喜者。非也。謂君非非喜者。亦非也。均之皆非知君者也。蓋明則有人民。幽則有鬼神。事神治人。初非二理。未有得于此。而不得於彼者也。昔舜命伯夷爲秩宗。典三禮。勉之曰。直哉惟清。是一德豈但可以事神而已哉。直其躬。清其心。以爲出治之本。吾未見形直而影枉。源清而流濁者也。世儒乃謂伯夷長於禮。故終老一官而不易。若然。則伯夷非孔

子所云不器者矣。豈其然哉。豈其然哉。古之君子。深蓄德而廣積學。器于身而不器于用。惟所用之。無所不可。又況有民人者。斯有社稷之寄。神與人惟一理。而事之治之非二道也。烏用置忻戚于其間哉。彼得意。則忻忻然。若將翔然。不得意。則戚戚然。若不可旦夕生者。此淺之爲丈夫者然也。豈所以論君哉。中書舍人張升之聞予言而躓之。或者退因書以爲君榮陞之賀。

贈鄉友林廷賓南臺御史序

友人林君廷賓。與予同邑而異學。正統甲子。偕赴秋闈。予叨預薦列。後二科。廷賓始得偶。予再試春官。運不遇。歲甲戌。乃獲與廷賓同登進士第。若有待然也。予以選入翰林爲庶吉士。廷賓觀政大理寺。又明年有南臺御史之命。於戲。人之出處。固若有其時。而予二人者。生同地。學同道。宜無不同矣。及其出處也。則始而同。同而異。異而又同。幸而同矣。而同之中。又有異焉。豈造物者有意於其間哉。雖然。君子之相與。固未嘗拘拘於同。

亦未嘗感戚於異。蓋不同者出處。而未嘗不同者此心也。心雖無不同。而亦不可以苟同也。易曰。上火下澤。睽。君子以同而異。由是以觀。則君子當睽離之時。不可無濟睽之功可見矣。濟睽之功無他焉。不苟同而已。昔者顏回之于仲由別也。行者則曰何以贈我。居者則曰何以處我。然則廷賓將別予以去也。敢不竊取顏子相贈之意。而爲之一言乎。且予居禁近。所職者在文學。而政事非所敢知也。而廷賓之職。則在夫振風紀。風紀之要。則在乎識大體。大體既正。則餘可畧也。贈廷賓者止于是矣。廷賓之行。其將何以處我乎。謹洗心以俟。

送山東張布政序

山東以布政使缺員。走驛馬以聞。時皇上御正朝。顧謂天官卿。若曰。惟天惟祖宗。全畀朕以天下。海宇萬里。實賴藩輔重臣。承流宣化。以分朕治。以紓朕憂。匪得其人。厥職或曠。而一方民物。或失寧居。矧茲山東。鉅藩密邇。京畿屬郡。惟六廣輪數千里。在古爲齊魯之疆。生齒物產之盛。視昔有

邱 文 莊 公 集

加。是尤不可授非其人。爾其擇于廷臣。孰能任茲承宣之寄者。輒以名聞。朕將授之以方伯之任。往撫朕師。乃惟曰某其人。皇上曰。俞。公受命卽行。惟予於公。素有同道之契。於其行也。不容以默。竊惟上之所以委任。而責望於公者至矣。公其念哉。夫古之大臣。後世所尊仰者。莫如周公太公。而二公。實百世人臣之楷範也。惟今山東。兼有齊魯之地。而二公之故封在焉。周公之治魯。親親而尙賢。太公之治齊。尊尊而尙功。臨二公之故國。必合二公所以爲治者兼施之。師其心而不泥其迹。酌其中而無蹈其偏。庶乎強教說安。兩盡其道。而得弛張之善矣。是卽皇上委任之意。天官推舉之公。而士大夫屬望之私。亦於是乎在矣。公其念哉。母忽。

送張方伯入覲序

江浦張公廷璽之爲廣東布政使也。歷右而左。通滿九載。皇上以嶺嶠之未靖也。詔復留公三年。至是將獻績。如京師。邦人士。安其治。入其化。浹洽其膏澤。而忘公之久於其任也。齎咨涕洟戚戚焉。相與言曰。公之去我。一

邱文莊公集

何速哉。始公以良二千石超拜方伯。踰一紀。于今適邊方多事之秋。中間王師有事於峒蠻者再。寇攘荒札。無歲無之。疆域民物。日削于前。而用度供億。曾無改于其舊。至或有相倍蓰者。公處事於難爲。給用於不足。施化於不可馴。制謀於無可奈何之地。其心一日。恒周流於十郡六十邑之間。雖窮山絕徼。頽垣敗產之下。無處而不到也。今制官以三考爲滿限。稱則陟之。公三其考。而又加一焉。功課不暇上。會同不暇與。咫尺天顏之覲。過家上塚之便。竟不能得一日少遂其心焉者。回視一時聯官共事者。率多柄用於時。入典政本。外營四方。借馳而驟騰。後發而先至。而公獨當一面之寄。守一官之常。遲遲至於十有三年之久。而邦人士願猶戚戚焉齎咨涕洟。以爲公去我速也。抑何與。蓋邦人士惜去公之心。即朝廷久任公之意也。上皇皇於邊方。亦猶下皇皇於室家也。一急於謀國。一急於謀家。是固不暇爲公謀也。而公又不自爲謀。是以專於一方。久於一官。噫。孰知久且專。所以積功厚而流澤深與。矧今上方寤寐英賢。念切求舊。所以爲天下國家謀者。皇皇

焉恒若有所不及。公茲入覲。心將有不世之遇。異等之寵。非常之任用。而區區一方。固囿於謨謀之內矣。邦人士奚用戚戚爲哉。子家瓊海。去會府二千里。而近適免喪。聞邦人士言而釋其意。且筆之簡。時掌海南衛事都指揮王璣。瓊郡守吳琛。聞而馳之。請書於帛。馳以贈公行云。

張方伯入覲詩序

方伯張公廷璽。在廣藩既滿秩。復留三年。間寒暑十有三年。茲將如京師。子旣述邦人士之言序以贈其行矣。而藩臬諸公。又不遠千里。遣倅浮海。屬予以諸公贈行詩序。夫詩有序。古矣。昔召公循行南國。布文王之政。舍甘棠下。旣去而人思其德。不忍伐其樹。詩以歌詠之。其三章章三句序曰美召伯也。召伯之教行於南國。今張公之來廣。其地里遼邈。非止召南也。其在任之久。非止暫舍甘棠下也。其當嶺海多事之秋。百責所萃。非止布其政而教行也。人之思其德。慕其化。非止愛其樹。而不忍剪伐敗拜也。一時大夫士以至於輿隸小民。所以歎美詠之者。又不止詩三章章三句而已。

也。世無采詩之官。觀風之使。則固不得采而序之。幸而藩臬諸公。念寅好之久。情誼之篤。各賦詩以寓其意。而特諉以子夏之任。予何敢當哉。雖然諸公之詩。雖以敘情志別。而公之操履氣節。治化功績。咸因是見焉。是固無俟乎予言。雖欲有言。亦不知所以言矣。獨念公在嶺海之間最久。勞績最多。有功於廣人最大。廣人所以思慕愛戴之者最深。予適免喪家居治下在儕類中。最好頗稱能言者。不能出一喙播揚盛美。以爲民倡。願使諸公先焉。今諸公不見鄙。又欲得不腆之文。塵珠玉之首。而公亦不以予不肖。求言以規益之。忍以瀆告爲嫌乎。在易二與四。同功而異位。一遠五。恒多譽。四近五。恒多懼。向公居召伯之任。凡事得以直遂。固已多譽矣。今公入覲明廷。聖天子憫其久勞於外。必將寵異而大用之。佐理弘化。以康四海。茲其時矣。能無懼乎。譽於遠而懼於近。古之大臣如周召者所以事其君也。皆然。敢以望公。

贈湖廣楊大參序

邱 文 莊 公 集

天官屬最要而劇曰考功。職專百官功課而殿最之。佐其長以黜陟之。任非其人。不能一朝居也。莆中楊君宗器。自登進士第。卽官於是。凡三轉其階。殆二十春秋矣。今年夏五月。大家宰以其名聞。擢拜湖廣藩司參政。或曰君嚮所考者。百官功課也。今君出參藩政。而人將於君功課乎是考。亦猶君之考人也。能無慮乎。惟楊子有言。大器其猶規矩準繩乎。先自治而後治人。君既知所以治人矣。則夫所以自治者。庸何慮焉。矧君以閎大博厚之器。開明通練之才。登朝以來。服事元僚。非止一人前後聯曹而共事者。毋慮數十人。內之百司。外之藩服。于凡百司之職掌。天下之政務。人才以賢否。莫不有以察知其詳。究極其實。而推原其所以然之故。間或有所掩覆遷就之者。亦皆有以灼見其弊。而不爲所欺。孔子曰。規矩誠設。不可欺以方圓。繩墨誠陳。不可欺以曲直。君之所以治人。卽其所以自治者也。異時以之而應夫人之治我。夫豈異哉。今一旦出而臨民蒞事。舉向之稽文核實於簿書之間者。一一見之於躬閱實踐之際。吾見其優爲之矣。或者尙何容慮哉。雖然。

君之此行。姑試之焉爾。昔之人有以片長寸善偶於當道者。有一日之雅。尚不爲所遐遺。況有器局如吾楊君者。久處鈞陶之下。相體悉而相知深。寧能久回翔於外乎。君行。其同官陳君某等求予贈言。謹書此以俟。

送雲南傅叅議序

天順三年夏四月。翰林檢討嚴陵傅先生。用內閣大臣薦。超拜雲南布政司叅議。命下。或以謂予朝廷引用文學老成之士。儲之館閣。養其才以待用。若先生者。恒在天子左右。備顧問。任纂修。是固其所。顧乃使之出佐藩服于萬里外。驅馳于川窮山阻之地。臨治乎鳥言夷面之人。豈其宜哉。予竊惟此正朝廷所以任用儲養之深意也。今夫朝著之間。百辟卿士。豈無先事候情。簡髮數米。問羊知馬者哉。又豈無內深刺骨。舞文巧譏。令行禁止者哉。顧皆不之用。而大臣之所論薦。聖上之所寵擢。乃屬之文學老成之士。豈不以斯人也。簡直而不苛。鎮靜而不浮。柔乎其形也。而其氣固。樸乎其貌也。而其心察。施之當時。見於行事。雖若無赫赫顯功。表表偉績。然而天

下之人。陰受其賜也多矣。矧雲南僻在遐荒。民夷雜居。種類不一。所以治之者。尤在成全安輯之。苟用新進英銳之人。一切繩之以法。劫之以威刑。雖或取快於一時。見效於旦夕。及其久也。知數窮而威嚴。而其害有不可勝救者矣。此古之識治體者。所以寧舍彼而取此也與。先生乘傳。將之官。其鄉人仕於京者。求予文以送之。予故述朝廷所以選用之意。爲先生告。然則先生亦思所以副其用也哉。

送陝西楊叅議序

戶科掌科事給事中姑熟楊君應奎。以秩滿。陞陝西叅議。行有日。其同官冉君尙彝輩。謂予曰。應奎之行。某輩竊效淵路贈處之義。將有所言以贈之。假喙於予。何如。予曰不能。尙彝曰。子非應奎之同年友乎。奚庸辭。予不得已。請一言以贈之。曰。昔范希文有言。居廟堂之上則愛其民。處江湖之遠則憂其君。夫憂其遠而不憂其近。非近無可憂者也。常人之情。慎近而忽遠。君子之心。則憂遠慎於近耳。非有所偏也。向也。君以名進士。擢

官侍從。出入禁闈。多歷年所。固已朝夕接近清光。凡上之起居言動。與夫禮度之修。政令之施。皆身親而目擊之。其臧否異同。得以隨事獻忠。固若無可憂者矣。然而遐方小邑。流離困弊之苦。窮還絕徼。更戍輓輸之勞。豈無一夫或失其所者乎。又況失其所者。不止一夫也。寧能不動念乎。是則可憂者也。此則君之已然者。今則異於是矣。予願君於向所憂者。今則思所以解其憂。毋徒懷憂之之心。而無解之之術。而又移向之所憂者。以憂其所不憂。則庶幾乎希文之用心矣。希文著功業在邨。延環慶之間。今君臨其經行之處。以撫其遺民。可不思所以師法之乎。先憂後樂。希文之用心也。立志以希文自期待。希文者之用心也。君以經術爲學。以儒科發身。有志古人者也。故予亦以古賢人之用心者期待之。諸君以爲何如。尙彙曰然。遂書以爲贈行序。

贈廣西江按察使詩序

天順六年春正月。朝命以監察御史西明江君元勛爲廣西按察使。蓋異數

也。命下。凡與之同朝及相往還者。咸爲之喜。蓋以公道信於天下。卓異之才。原有不次之擢。不至與庸庸者。同淹於常調。故喜之也。其在君者自喜。又有甚焉者。蓋君之母太夫人。今春秋八十矣。五月二十又九日其初度也。君以職事縻於朝。恒懷知年之懼。欲一展覲。其道無繇。茲幸拜恩命。廉察一方。其之任也。便道可以過家。而又適太夫人初度之辰。豈天假其便耶。其喜。蓋爲親也。昔廬江毛義爲親故。得一安陽令。其捧檄也。尙爲之喜動顏色。矧君自登第。未十年。即官三品。超出同列。總一方廉察之任。朱衣金帶。照耀閭里。俾垂白之親。躬見其子之成立。卓卓不凡如此。其喜爲何如耶。若君者。可謂無忝所生者矣。雖然。無忝所生。必無辱所命。無辱所命。斯無負所學。孔子曰。斷一樹。殺一獸。不以其時。非孝也。今朝廷拔君於衆人之中。而付之以數千里之地。數十百之官吏。數十萬之軍民。使君制其命而進退死生之。必其一各止其所。然後爲不辱所命。不然。其爲不孝。非但斷一樹。殺一獸。不以其時而已。其忝所生而負所學也大矣。可不懼哉。

是則所以爲君喜者。適足可爲懼耳。君行有爲詩贈之。并祝太夫之壽者。武選副郎范君德章。俾予序其端。予故述所以喜懼之意。以致朋友愛助之情云。

送劉仗和提學浙江序

予友劉仗和。以翰林庶吉士拜監察御史。將九年於茲矣。非獨以風裁著稱。且有文學名。適浙江提學憲臣缺。當道者謂非劉御史不可。遂以名聞。上可之。即擢浙江按察副使。奉璽書。專理學政。蓋精選也。行有日矣。或謂予曰。子與劉君厚。必吝文以贈其行。將何以立說。予曰。某將勸之以講學。或笑予曰。子何迂哉。君忠愍公之子。世業春秋。父子昆弟爲師友。並登顯要。海內所共知。而君以名進士選讀書中秘。雖爲御史。而文學之名。恒如在翰林時。天官卿知其然。擢之茲任。其文學固所優也。子又欲勸之以學。豈非迂哉。予曰不然。理無終窮。學無止法。學豈可一日不講乎哉。君所居者。雖風紀之職。而所專理者。則學校之政也。學校之政。所明者君臣父子夫婦

邱 文 莊 公 集

朋友長幼之倫。所求者伏羲神農黃帝堯舜禹湯文武周公孔子之道。所習者易書詩春秋三禮之經。所以敦化原。厚風俗。作成人材。以爲朝廷異時之用。其責任蓋不輕也。兩浙十一郡之士子。若冠若童。無慮數千百人。其賢否淑慝。皆于我一人焉。賴是係。日眈眈然以環視乎我。口喁喁然以擬議乎我。著疑義者待我以決。陷迷塗者待我以援。懷私見者待我以正。黯闇者待我以明。汙濁者待我以潔。懦退者待我以立。震撼擊撞者待我以鎮定。佻闖跌宕者待我以約束。盤錯紛結者待我以解舒。辛甘燥濕者待我以調劑。必事事處之當其處。人人止之得其所。物物知其所自來。然後庶乎其可耳。苟或一事之弗知。一理之弗究。一言之偶疵。一行之少頗。彼且羣然笑先生于列矣。又其甚者。乃至疵議。謗讟之蜩與。可不念哉。自非在我者講貫之有素。操履之有常。一旦卒然以應其無窮之求。偃然以當其全備之責。抑亦難矣。此講學之功。所以不可無也。書不云乎。惟教學半。而禮亦云。教學相長。得知新于溫故之餘。寓問學于教誨之際。古之聖賢。所以進修德

業。師表天下。用此道也。予于仗和。情誼深至。非苟相諛說者。故于其行。勸以古聖賢教學之道。言若迂而實切。豈苟然而已哉。或者領而去。左春妨右庶子徐溥時用。通政叅議何琮文璧。監察御史馮定士定。都給事中金紳縉卿。給事中黃甄器之。寯珍伯珍。聞予言而躉之。請書于帛。以爲仗和之官之贈。遂書之。予及六人者。皆仗和同年進士偕讀書翰林者也。

贈福建憲副何廷秀序

子友盱江何君廷秀。以秋官正郎。擢副閩憲。朝之薦紳士大夫。咸賦詩贈行。虛首簡俾予言。以序其相贈之意。噫。予何言。廷秀承家學。以經術發身賢科。造屬省部。歷禮而刑。自貳升長。聲名籍籍朝野間。夫人能言之。予何言。矧廷秀勵行嗜學。發于文章。典重有法。凡今之政務法比。無不精練。夫人能知之。予何言。雖然。予於廷秀。同年登進士。素有推重者也。欲不言。得不言乎。余聞古之君子。其事君也。憂治世而危明主。其交友也。危君子而憂善人。何則。自古及今。君子少。小人多。善人少。不善人多。善人君子

邱 文 莊 公 集

在衆人中。如斗在屋也。如明燎之處群燈中也。如比屋中之危棟突出也。如衆器雜陳。而明鏡爛然于其間也。蓋其自處高。其爲質大。而又致用光明。高大而光明如此。人舉目。斯見之矣。有善美焉。固未必彰。一有疵失。人皆指摘之。傳播之。不少容矣。豈非深可憂危者乎。是以古之君子。有志于扶持善類者。恒切切然。惴惴然。過於憂以危。非固以是相黨比也。其心誠有在于斯世焉。傳曰不有君子。其能國乎。使凡今之布列中外者。皆若而人。人人存此憂危之心。自憂自危。而又相與爲憂危。則善類以植。國脈以壽。天地間之元氣。恒以完矣。尙何憂危之有哉。廷秀德周而才敏。讀書而又讀律。一旦出刑曹。以持一方之風紀。固其所也。而余猶必以是爲言也。蓋推古君子相與扶持之心。憂其無可憂之憂。危其無可危之危。是則予向所謂何言之言。不得不言者也。

送憲副徐君赴廣東詩序

尙書刑部郎中徐君德容。用大臣保任。拜廣東按察副使。奉璽書專督海道。

邱文莊公集

同朝縉紳。咸賦詩贈別。通政叅議陳君時用。侍御魏君孔淵。援簡于余曰。請爲序之。予觀諸君之詩。所以道情寫景者。雖無所不有。而非徐君職業之攸繁也。余越產也。知其地里爲詳。請以此序群玉之首。可乎。二公曰可。竊惟廣東之地。爲郡者十。而入境于海。自東徂西。相距三四千里。國初于此設衛若所。大小七十餘處。以爲海道防者甚至。歲久而弊滋。戍守之具。一切廢弛。朝廷知將領之不足恃也。乃增置憲臣以提督之。于凡海濱之地皆然。而尤注意于是邦焉。蓋以境外即西南諸夷。珍異所出。得其物盈握。立可以致富。故人之冒險取利者。視死如假寐。雖伏歐刀者相踵。終不悔也。甚至招致外寇。爲邊鄙患。故是邦海道之寄。非其人有過人之才。廉聲素著者。不輕畀也。然往時所備者海。慮寇自外來也。今也廣右嗣搖。乘我不備。越境以爲腹心之害。則寇又自內生焉。于是始撤外之藩籬。以爲內之捍蔽。向所謂廢弛者。復蕩然無餘矣。不幸于此廢壞之餘。而當夫一面之寄。其爲任不亦難哉。雖然。無難也。大丈夫負過人之資。而立功名于斯。

世。惟恐不遇人所難爲之事。而無以顯其無所不用之才。苟紆紆徐徐。處平時。履坦塗。乘易爲之機。席可爲之資。雖有所爲。則亦無以異於庸衆人也。惟夫事之無可爲。而人皆不能以有爲也。而我獨優爲之。然後表表偉偉。著見於天地間焉耳。君行矣。予所望於君者。不止寧海道而已也。異時出自羊城。遵海而西。歷城邑之丘墟。覩村落之草莽。試爲我問諸海濱曰。致此者誰與。

贈浙江謝僉事序

刑部員外郎祁門謝德澤。用大臣薦。擢浙江按察司僉事。將之官。其鄉人仕諸朝者。知予與君相與也。屬予贈言。惟祁門春秋聞天下。君始以是經。起家進士。旣而造屬刑曹。今又擢僉按察司事。國朝按察司。以提刑列署。蓋以憲事非一端。而其尤重者刑也。君往者旣以是經佐其長。以明天下之刑矣。今而往僉一方臬事。獨能外是乎哉。先正有言。春秋夫子之刑書也。又曰。春秋聖人律令也。吾夫子假二百四十二年行事。以寓賞罰之權。

邱 文 莊 公 集

其於懲惡也尤深切著明焉。於鄭段之克。則推見其至深也。於齊俘之歸。則結正其罪也。于公子嘉之獄。則原情定罪也。於棄疾之惡。則誅其本意也。至於商臣之逆。則又推本所由。而著其首惡。於士穀箕父之反。則又本忠恕。而無偏黨之意。於乎。聖人本公平正大之理。以斷輕重曲直之事。的然中天理。犁然當人心。誠萬世斷獄者之權衡繩墨也。或者謂讀書不讀律。則致君無術。噫。古今律理。孰有外於春秋一書者哉。律而外乎春秋。則司空城旦書也。豈所謂律哉。君專門是經。既用以發身致位。然不知爲大司寇之屬。七八年於茲。所斷之獄。奚翅千百。曾有一二合於經者乎。君亦常引經斷獄。如漢人也乎。意亦或有之。然惟助其長而已。不得以專制直遂也。今僉憲於一方。故事凡天下按察司。皆有分道。道各有印章。歲各遣官巡行其部屬。事無大小。皆得以獨斷專達。君自是得以行其所學矣。今天天下事。萬有不齊。必權焉然後知其輕重。繩焉然後知其曲直。使在吾者無權與繩。則事至吾前。其不至於枉其輕重曲直之實。而倒行逆施之也者幾

希。春秋者。輕重之權衡。曲直之繩墨也。本諸此以斷天下之大事。決天下之大疑。迎刃而解矣。一方之臬事。奚足云乎。君往。念哉。毋迂視予言。

送惠州李知府序

今之郡守。古之諸侯也。世謂之邦君。以其於民有君臣之道也。謂之民父母。以其於民有父子之恩也。謂之民師帥。以其於民有師弟子之義也。民生三事。郡守備焉。其責任之重。誠未易盡也。盡之者。代不數人。嗚呼。求數人於數百年間。豈易得也哉。長沙李君明遠。蚤以進士拜行人司正。出知蜀之敘州府。其政聲固已籍籍在人耳目間。近世縉紳大夫。屈指數良二千石。君必預焉。尋丁家艱。解官家居。今皇上復正。大統之明年。起復。改知廣之惠州府。命下。惠之人士寓京者。聞之喜。相告曰。是治敘州有聲者也。侍御郭君。以贈行序見屬。且曰。君必欲得予文。以故不敢辭。予惟民生於三。惟君惟親惟師。郡守兼焉。其所係誠重也已。歷觀往古。盡茲道者蓋鮮。陳寵治郡。任王渙以簡賢選能。任鍾顯以拾遺補闕。雖明君之治國。

不是過也。黃霸治郡。力行教化。而後誅罰。務在成就安全。雖慈父之畜子。不是過也。文翁治郡。招下縣子弟以爲學宮弟子。爲除更繇行縣。必與諸生明經飭行者俱。雖嚴師之授徒。不是過也。若是者。代無幾人。人或專一事。鮮能全之。以一事名。史尙以爲美談。况其全也哉。所謂全者。必如孔子所謂庶而富。富而教。孟子所謂井田之制。學校之教。斯爲至耳。秦漢以來。言治者。皆苟而已。自非通經學古。號稱通儒者。烏足以語此哉。李君明遠。爲學以儒發身。是蓋管志聖賢之道者也。故於其行也。敢以是望焉。

送潮郡黃知府序

古之人治潮有聲者。吾得二人焉。唐韓文公。宋陳文惠公是已。二公俱以除鱷魚之害著聲。當時流芳後世。世之人卒莫有能優劣之者。予竊以爲戮之也以力。感之也以誠。力則動以人。誠則動以天。此二公優劣之判也。噫。繼韓之後有陳。陳之後。寥寥數百年。未有繼焉。若今守潮郡黃侯。豈非聞

邱 文 莊 公 集

二公之風而興起者乎。侯自下車以來。一惟二公之治潮者是法。其心尤切切焉。惟除民害是急。雖古今殊時。未嘗有鱷魚可除。而其所以除害之心。初與二公不異也。然鱷魚之害也。僅及海濱鮮食之民。而吾都鄙鄉遂之民。則固無恙也。且彼異類。冥頑不靈。初非有意害人。人適遇之。因以肆其毒耳。非若人與人同類也。顧乃噬人以肥己。傷物敗類。靡所不至。其設心措意。罔知紀極。其害非直鱷魚比也。居民上者。苟恬然不知怪。他他復復。袖手旁觀。而不之問焉。豈天子命官之意哉。夫師其心。而不泥其迹。善學古人者也。候之爲治。雖不拘拘于二公之故步。而其心則殆有合焉。所以繼陳公之斷緒于數百年之後者。非侯其誰望哉。雖然。囿物以術。術或有時而窮。制物以威。威或有時而衰。又孰若一誠之爲至哉。是誠也。在天爲實理。在人爲實心。大可以感天地。幽可以通鬼神。金石可洞。豚魚可孚。風可使之反。旱可使之雨。虎可使之渡河。蝗可使之不入境。珠可使既去而復還。况夫齊民也哉。侯誠始終此誠而不雜。則泝陳以上繼於韓也。不難矣。

則夫治潮有聲者。一公豈得專美於前哉。侯報政趨朝書最。將還。府丞李先生。潮人也。命予代之言以爲侯贈。予聞侯有志古人者也。故以古之人望焉。

送武昌章知府序

賢備之士。如良金美玉。然隨其所在。而光彩華煜。旁達四出。則雖雜蓬藿瓦礫中而不可掩者。自然迥與他物異。小夫孺子。足不入城市。目不識珍異。固未嘗見也。偶一見之。未有不驚詫而愛慕者也。又况實之通衢大肆中。而爲深識廣見者所接近乎。予友桐城章君絲綸。世所謂賢備之士也。登乙丑進士第。擢給事中。未幾。左遷趙州判官。尋知州事。居憂解任。起復爲應州。秩滿。起陞武昌知府。方其自法從遷趙州也。奔走州縣間。與群吏伍。宜若不復振作矣。然治聲赫赫然。聞燕趙間。入其境者嘉其政。接其容者醉其德。人之敬之。無異在禁近時然。及移應州極邊之地。戎馬之衝。其事之難爲。又有甚於趙者。而其政績之章章。視趙爲益著。

邱 文 莊 公 集

二公之風而興起者乎。侯自下車以來。一惟二公之治潮者是法。其心尤切切焉。惟除民害是急。雖古今殊時。未嘗有鱷魚可除。而其所以除害之心。初與二公不異也。然鱷魚之害也。僅及海濱鮮食之民。而吾都鄙鄉遂之民。則固無恙也。且彼異類。冥頑不靈。初非有意害人。人適遇之。因以肆其毒耳。非若人與人同類也。顧乃噬人以肥己。傷物敗類。靡所不至。其設心措意。罔知紀極。其害非直鱷魚比也。居民上者。苟恬然不知怪。他他倪倪。袖手旁觀。而不之問焉。豈天子命官之意哉。夫師其心。而不泥其迹。善學古人者也。侯之爲治。雖不拘拘于二公之故步。而其心則殆有合焉。所以繼陳公之斷緒于數百年之後者。非侯其誰望哉。雖然。囿物以術。術或有時而窮。制物以威。威或有時而襲。又孰若一誠之爲至哉。是誠也。在天爲實理。在人爲實心。大可以感天地。幽可以通鬼神。金石可洞。豚魚可孚。風可使之反。旱可使之雨。虎可使之渡河。蝗可使之不入境。珠可使既去而復還。况夫齊民也哉。侯誠始終此誠而不雜。則泝陳以上繼於韓也。不難矣。

則夫治潮有聲者。一公豈得專美於前哉。侯報政趨轡書最。將還。府丞季先生。潮人也。命予代之言以爲侯贈。予聞侯有志古人者也。故以古之人望焉。

送武昌章知府序

賢儁之士。如良金美玉。然隨其所在。而光彩華煜。旁達四出。則雖雜蓬藿瓦礫中而不可掩者。自然迥與他物異。小夫孺子。足不入城市。目不識珍異。固未嘗見也。偶一見之。未有不驚詫而愛慕者也。又况寘之通衢大肆中。而爲深識廣見者所接近乎。予友桐城章君絲綸。世所謂賢儁之士也。登乙丑進士第。擢給事中。未幾。左遷趙州判官。尋知州事。居憂解任。起復爲應州。秩滿。起陞武昌知府。方其自法從遷趙州也。奔走州縣間。與群吏伍。宜若不復振作矣。然治聲赫赫然。聞燕趙間。入其境者嘉其政。接其容者醉其德。人之敬之。無異在禁近時然。及移應州極邊之地。戎馬之衝。其事之難爲。又有甚於趙者。而其政績之章章。視趙爲益著。

而人之敬之嘉之者。又益加多焉。所謂良金美玉。隨所在而光彩華煜。而自不可掩。君其是哉。君其是哉。雖然。金鍊數而愈厲。玉用久而益澤。吾知今之守武昌也。其治在會府下。其職任之重。土地之廣。人民之多。事務之殷。較之前政。奚翅千百。其堅強之質。溫潤之氣。發越之光。於是乎愈可見矣。譬則良金美玉在通衢大肆中者也。則夫人敬重之。賞識之者。當百倍于前。異時鑄爲鼎。以象夫物。用爲璧。以薦之天。又將于是乎取之。予交君久。而知之有素。蓋所謂金玉君子者也。故於武昌士大夫之請。卽其有而似之者。以爲君之官之贈。

送金華周知府序

金華。東南文獻邦也。自宋元訖于國初。儒學之盛。彬彬濟濟。踵武相望。一時稱文獻邦者歸焉。亦猶春秋時之有魯鄒。東漢季之汝穎也。文獻之邦。非得儒者以治之。則弗克以稱厥任。大治周君子正。以膳部正郎。拜知金華府事。行有日。宗人府儀賓王君。求予言以贈行。君安成彭文憲公之高第弟

邱 文 莊 公 集

子也。以春秋經。中庚辰進士第。歷官兩京。造次必於儒者。予喜其以儒者而臨文獻之邦。其必得夫治之之要。而慨於士論也已。然予於此竊有疑焉。試舉以問之。婺自宋南渡以還。呂成公。陳龍川。唐說齋。同時並興。各以其學鳴於一時。自時厥後。止山何氏實得朱子之正傳以授王魯齋。而金仁山。許白雲。以次相傳。時則有若永康之胡。浦陽之柳。烏傷之黃。東陽之張。蘭溪之吳。皆以文章擅名天下。不特乎此。白麟溪之鄭。累世同居。又以義聲赫赫著聞遠近。迨於國初。宋濂先生。佐我皇祖開一代文治。當是時。又有若王許吳胡蘇戴諸公實佐佑之。鄭氏之彥。亦有若濟若沂若栢者焉。一時清才碩學。天下宗仰。何其盛也。今距其時幾百年。聲名文物。宜其歷久而益盛。然近日婺郡之民風士習。回視於其前。殆若有不及焉者何也。蓋必有其故矣。予求其故而不可得。謹因君之出守也。試一問之。君至郡。蒞政之暇。試爲求其所以致此者。幸因風以見教。雖然。古之善爲治者。咸以正風俗。興人才。爲當務之急。文翁化蜀。韓公化潮。皆非有所因也。

尙能興起之。至今兩郡之人。百世猶有賴焉。況參故文獻邦。前輩典刑。去今未遠。一日作而興之。以復其百年之故處。夫豈難哉。君以爲何如。

送瓊郡葉知府序

瓊郡。自昔號爲樂土。而以易治聞於天下也舊矣。蓋以一郡獨居海中。無比壤接境也。民皆安土。無流庸外徙也。冬寒不甚。無戰塚墮指之苦。民不憂凍也。田歲再收。兼有山林川澤之利。民不阻饑也。奇香異木。文甲氈毳之產。商賈實遷。北入江淮閩浙之間。歲以千萬計。其物饒也。風俗質樸。資性異懦。鄉無武斷豪奪之家。俗鮮椎埋橫技之習。其人淳也。出賦止於供軍。無漕輓輸將也。養軍止於守土。無外繇更戍也。凡此數者。皆他郡所無有。誠所謂樂土而易於治矣。然而世之仕者。往往以難稱。而不樂往。何哉。噫。有由然矣。豈非其人器弗宏歟。才弗贍與。望弗隆與。皇上復正大位之明年。詔以台州府同知葉候爲瓊州府知府。命下之日。予往候之。一見之頃。卽得真爲人。大凡所謂有器有才有望者。候真其人哉。蓋器必

宏。然後有大受之地。才必贍。然後有運用之資。望必隆。然後有以恆物議而厭衆心。是三者。他人有其一。則雖以之治四通五達。繁劇要害之郡。且無不可者。况候兼而有之也哉。夫以兼人之德。臨和樂之地。易治之邦。非惟政事得其理。民庶賴以安。吾知一方之山川鬼神草木鳥獸。亦莫不寧之矣。嗟乎。瓊山人何幸得有器有才有望如候者。以父母師帥之哉。候昔佐肇慶。嘗奉藩檄。督戰舟於海南北諸郡。留瓊者閱月。瓊之父老。觀感愛戴。恒有盍不我牧之歎。今候之往。式符其願。先聲所至。其喜可知矣。故余於候之行。謹書以爲贈。以助吾鄉人父老之喜云。

贈瓊郡王太守序

瓊州府知府缺員。部使者章猶未至。天官卿聞之。謂其屬曰。瓊郡去京師萬里。顯顯居大海中。屬邑十。支郡二。人民數十萬。其命繫於守一人。守一日不可無也。亟擇其人以名聞。命下。乃刑部正郎王君宗周也。一時公卿大夫士同勅者。咸以瓊部得良二千石爲余賀。余詢其實。咸曰。君自第進士。即

邱 文 莊 公 集

造屬秋官。凡厥攸司事有疑難。輒以屬君。君於法比而仁厚。惻怛之意。恒存於明慎詳審之中。經君所論斷者。人咸以爲不冤。嗟乎。吾郡何幸得不冤人者以爲之父母師帥哉。君廷辭有日。余念吾人十數年來。無罪而受人之冤者多矣。一日得君以解其苦苑煩。幸因其行。請即朝之公卿大夫士所以賀予者。轉以爲吾鄉之人之賀。胡賀爾。賀其得不冤人之人。以爲其父母師帥也。於戲。吾鄉父老若朋儕暨諸子弟。明聽余賀言。吾與爾厥祖若考。均生茲邦。自吾有生以迄於今。髮種種矣。見吾之守若倅。亦旣多矣。民有事逮至。不冤之者。亦云鮮哉。矧無事而克推其不冤之心。以不冤其無所冤。尤其鮮有。今吾人何幸得仁厚惻怛明慎詳審之父母師帥。以養以教。以全吾人之生。以明吾人之性哉。自時厥後。爾之有罪。惟當。爾之無罪。亦惟當。爾有蓋藏。爾其自用。人不爾揭。爾有田廬。爾其自叉。人不爾擾。爾之是則是。非則非。人不爾變幻。爾之有則有。無則無。人不爾易置。爾齊民也。人不隸爾於尺籍。爾良人也。人不踐爾於好。九。爾之肌膚。爾其自保愛。

邱 文 莊 公 集

自今人不惜酷爾。俾爾身痕瘡。爾之貨賄。爾其自儉嗇。自今人不攘攫爾。俾爾室空罄。昏莫無人。叩爾門戶。出入無人。撫爾長短。爾寢其安。爾食其旨。爾骨肉其完全。若斯之類。皆爾前此十數年欲得之不可得。去之不能去者。一旦得之去之。余用是豫以爲爾賀。爾自今伊始。其各守爾分。供爾役。輸爾租調。非爾固有弗取。非爾當得弗爭。非爾宜爲弗行。惜爾身。保爾家。和爾弟昆。教爾子孫。親爾族姻。睦爾鄉黨里鄰。父訓其子。兄諭其弟。老長囑其幼少。以毋違爾父母師帥之命。吾言雖耄。爾其聽之哉。無敢。君至郡。洩事伊始。幸召諸士民。以余茲言示之。於戲。余言尙其有徵哉。雖然。余於是又不能不爲吾鄉人父老朋儕子弟慮。方今聖天子明見萬里。外股肱大臣。孜孜以求賢圖治。竊恐吾使君之惠。不久專於茲一邦也。漢廷張於之任。所以使天下無冤民。而民自以爲不冤者。朝廷方將有待於君矣乎。於是乎書於帛以贈

邱 文 莊 公 集

卷之三
序

五十一

丘文莊公集卷之四

贈瓊郡陳同知序

錫山陳侯。以泰安州知州。需選天官。陞瓊州府同知。瓊之人士寓京者。聞命下。卽趨走其寓舍瞻拜焉。既退。私相語曰。瓊之民有幸矣。去年得袁公爲之守。儒者也。今年又得侯爲袁公貳。亦儒者也。以儒佐儒。吾郡三州十邑之民。庶其有瘳乎。語既。人人喜動顏色。明日走報余曰。吾郡又得賢佐。子知之乎。吾與子之父兄鄉黨。下及草木禽魚皆得霑被其教化。沐浴其膏澤矣。子寧不喜乎。喜之可無賀乎。賀之非文不可也。願今京師學士大夫。非無能文者。必吾郡人。然後知吾民情風俗之詳。賀侯之文。子毋庸辭。余忝以文字爲職。且郡人也。袁公之行。既謬言以贈之矣。今侯之行。又奚容默哉。雖然。侯儒者也。不出戶庭。已於天下民情風俗。無所不周知。非必躬履其地。耳聞目見。然後知也。則於吾郡之民情風俗。皆侯平日博洽中

邱 文 莊 公 集

一事。而又何待予贅哉。請言其略。吾郡獨在海中。廣輪幾二千里。其地廣矣。廣足以有容。宜其民之衆。今反寡焉。嶺以南。自昔稱多奇貨。而吾郡所出者。恒什八九。其物產衆矣。物衆足以自饒。宜其民之富。今反貧焉。朝廷以其地去京師最遠。特優待之。凡百徵需。比內地百不及一二。其賦役輕矣。賦輕得以自營。宜其民之逸。今反勞焉。比年歲屢登。斗米僅十餘錢。宜其民之有餘矣。而耕者往往告饑。府若州若縣。學校共十有四。科目外。歲貢士計十年總其凡無慮五十餘人。宜其人材之衆矣。而仕者恒不多見。是五孝。宜若有餘。而反不足矣。豈無其故哉。事之如此比者甚衆。是蓋其易見者也。余竊疑之久矣。每求其故而不可得。幸侯之往。試一問焉。所以致此者。必有其故矣。誠求其故而得之。剔其蠹。塞其源。逆閉其塗。而復其常處。則三州十邑之民。信乎其有瘳矣。則夫教化之霑被。膏澤之滋潤。庸有窮乎。

送伍通判序

邱 文 莊 公 集

國家承平百年。海內無事久矣。仕者恒以得山水之郡爲樂。然郡之有佳山水者多臨邊徼。當孔道。或其地瘠民貧。俗不尙文學。不然。則其民悍戾。喜鬪訟。多椎剽之盜。武斷之豪。訟牒紛冗。欲求一日之暇。有不可得者。是以往往不如其意。幸得佳郡皆無是數者之累矣。而其人又多喜事功。貪聲利。胸中擾擾。不能斯須寧者。故雖得之。而不知其爲樂。予友羊城伍君尙節。簡靜之士也。爲人忠實。無他腸。不設城府。爲崖岸。與之交往。數十年恒如一日。蚤膺鄉貢。試禮闈。辭校官。入太學者。十餘年。今拜命爲寧波府通判。四明山水名天下。形勝偉特。羣山秀拔。湖蕩清溢。泉流斯委。號爲東南奧區。內絡湖渠。原田交灌。外淡漲海。海錯雜出。號爲東南樂土。詩書之澤相染。絃歌之聲不絕。世宦之盛。如史如袁。文學之尤。曰麟曰鳳。至於理學之宗。則又有若楊黃諸人。流風餘韻。至今猶存。號爲東南文獻之邦。向所謂數者之累。幸皆無之。而君又居倅貳之職。上焉有守以總其繁。下焉有屬以分其詳。君居其間。以簡靜之德。臨淳厚之民。豈非地與人

相稱哉。惟簡能御衆之繁。惟靜能應衆之動。以此佐其長。臨其下。無難事矣。苟其身自處於委瑣紛擾之中。自治且不假。而况治人乎。而况樂山水之勝乎。君甚稱是官。而官又與他相稱。可謂得其樂矣。凡相與厚者。咸賦詩贈君行。予尤厚者。故爲序。

送傅推官序

刑者。聖人不得已而用之者也。用之必於不得已。可以已而不已焉。是豈制刑之本意哉。昔者聖王既制刑書。頒之天下。示民以不可犯。復立刑官執刑書以斷天下之獄。使民知是書之必用。而其條貫之。必不可犯。而犯之必不得已。是蓋用之以禁制其未然。而非錄以是待之也。苟非甚不得已。必不用焉。其用之也。必原其情。揆諸理。定以法比。審故誤之因。求法外之意。然後用之。不致輕也。我國家倣周典以建官。內設六曹。刑居其一。外之郡設守倅者三。而理刑獄者惟一。其意蓋可見已。守倅譬則菽粟稻粱之類。所以養民生者也。刑官譬則湯液鍼砭之類。所以防民疾者也。吏乎民者。不思

耕藝儲積以養民之生。顧乃總隄然摺撫傳致求民之疾。以施其吐下熨灼之方。豈理也哉。瓊郡去京師最遠。民俗視內地頗淳。健訟怙法者。固不能無。然愚昧罔知。而誤抵于罪罟者亦多矣。予去家也久。於鄉邦之事。雖未必一一知其詳。然聞茲數年來。水旱相仍。民多疵癘。歲收薄惡。物價騰踊。蓋必有以召之者。昔東海殺一孝婦。天爲之旱者二年。意者刑罰有不中歟。乃者盱江傅君用端。以太學生歷政刑曹。謁選天官。特擢吾郡推官。受命之日。卽介封部主事左君時翌過予。予一見之。知其爲仁厚和易之君子也。退而語凡鄉人以在京者曰。吾人庶幾其有瘳乎。所以推哀矜勿喜之心。以生吾人者。其在斯人乎。回災異之變。爲豐穰之祥者。其機在此乎。僉謂予直有贈言。予故推古人所以制刑。及聖朝設官之意。以爲君告。非欲君以姑息惠奸也。君其念之哉。古人有言。求其生而不得。則死者與我俱無憾。又曰刑罰不苛。是刑罰中教化。君其念之哉。

贈潮州張推官序

崇川張仲鼎。以鄉貢進士卒業太學者久之。需選天官。拜命爲潮州府推官。命下。潮之士走謁予。需贈言。予謂之曰。以儒生而司郡刑。四邑之民命。庶其有瘳乎。蓋刑官。民命所係。一不得其人。則一郡之民。有橫罹非命者矣。一人非其命。則感傷天地之和。而召旱暵之災。災仍則歲歉。歉則民不聊其生。是則郡之治教。雖總於守。所以輔其治。弼其教。召和氣。致豐年。則本於司刑之官也。烏可非其人哉。昔東海窈一孝婦。而致旱者三年。一婦人之非命。何與於天。而天乃以一婦人之故。致一郡之災。是則爲一人。而禍及千萬人也。天豈屑屑爲是哉。蓋天人咸通之理。不以小大衆寡而殊。天無往而不在。人無一而非天。千萬人此天也。一人亦此天也。傷其一人之天。而天之在乎千萬人者。亦從而傷焉。可不慎哉。由是觀之。司刑之官。誠不可以不慎擇。以其非獨有係於人。而實有係乎天也。彼夫以案牘爲師。而從事柱後惠文冠者。詳於人。而略於天。烏足以語此哉。天人之理備於易。易於刑獄之事。屢致意焉。於嚙嗑曰明罰敕法。於賁曰無敢折

獄。於豐曰折獄無刑。於旅曰不敢留獄。易者性命之書。而於刑獄之事。丁寧諄切如此。聖人之意詞可識矣。君以經書爲學。以儒科發身。其語異乎世之爲俗吏者。故於其行也。推夫天人之理以告之。

送鄭鈞州序

問羊知馬。機開鍵閉。昔之人固有用之以成名者矣。君子不取也。深又巧。賦。刺骨燔膚。昔之人亦有任之以爲治者矣。君子不取也。蓋用智者。術數有時而窮。任威者。刑罰有所不能加。若夫居簡以臨民。正容可以悟物。儲精蠖濩之中。可以逆釐三神。談笑尊俎之間。可以折衝萬里。當之者意銷。遇之者心醉。其惟誠乎。予友雲間鄭叔潤。誠實人也。質直而謹恪。平生無僞言僞行。自其居家庭處里。閉以至游庠序。登甲科。所以處已接物。一惟誠焉。是務。無所矯飾。天順四年。以名迪士拜知鈞州。入境之初。望車塵者。瞻其容。已動其心。視篆之始。拜階下者。接其言。已革其面。未嘗任智與威。而四封之內。自然聞風而向化。二年之間。有如一日。今年以考滿。來

觀闕庭。天官考稱。將歸所治。凡與之交好者。需予贈言。予惟叔潤之政治。章灼人耳目如此。奚俟予言爲哉。雖然。叔潤固無俟乎予言。予亦不能以無言也。然則將奚言耶。不過推明叔潤所已行而有驗者。以瀆告之耳。蓋是誠。在天爲實理。在人爲實心。歛之則成已。施之則成物。一念之至。可以貫金石。平豚魚。感鬼神。動天地。風可使之止。旱可使之雨。虎可使之渡河。蝗可使之不入境。鱷魚可使之遠徙於海。珠可使之去而復還。况夫齊民也哉。誠持此心而始終不渝。不以智數威嚴雜焉。若是而民之不化。治效之不益著。聲譽之不遠聞。萬無此理也。叔潤歸。不必他求。於此而加施焉。則雖古聖賢之事業。亦不過此矣。一郡守云乎哉。觀斯文者。謂予爲迂且過者。非知言者也。亦非知治要者也。

贈新興賀知州序

朝廷以滇南地僻遠。恒慎擇其長吏。非其人。不輕予之。所予者。必出自學校。通經史。知理道。達政治者也。天順壬午冬十月。天官卿羣士子之需選

者。而銓試之。首擢長沙賀恕。近仁爲雲南新興知州。循故事乘傳。將之治所。其鄉友某謁予文。以爲近仁之官贈。予聞地有遐邇。而人情之好惡。則不遐邇異也。均好生而惡死。均好善而惡惡。均好逸而惡勞。均好聚而惡散。均好取而惡予。均好利而惡害。善於治者。順其性而導迪之。寘之生全休息之地。而不拂其情。斯相安矣。彼昧者。乃荒遠其地。鄙夷其人。畜視而漁食之。使之失其所以爲生者。一旦至於啓事造孽。非惟彼不得以安其生而已。亦不能安其位矣。豈不兩有所失哉。考之前志。古人之治於斯者。若張喬除去奸猾。而二十六郡盡降。張處陀以淫虐致亂。禍延二十餘萬人。梁毗不取一金。酋長感悅。史萬歲貪其賄賂。隨服隨叛。則人情好惡。大略可見矣。豈以古今而異哉。且順其情則服。逆其情則去。雖齊魯吳越之民。莫不皆然。况荒服之外乎。是尤不可不加之意也。賀君湖。湘故家子。曾大父以下。世爲顯官。得家庭之傳有素。發身賢科。卒業太學。遍交當世知名之士。所謂通經史。知理道。通政治者。非其人耶。天官卿

首擢斯任。誠真知人。余知其必能傾民之情。以導迪之。克副聖天子軫念遠人之意必矣。異時政聲彰聞。其名位殆不止此也。於是乎書。

贈儋州林知州序

莆田林侯之守儋州也。政行惠流。民夷悅服。儋之士。咸以爲前此數十年握郡章者。皆未之或過也。自余來京師。見郡人以事至者。詢及賢守令。必曰林儋州。及求其所以賢。則又往往不能言。嗟乎。爲治而至於人莫能言。非不能言。莫可得而言也。昔班孟堅傳。循吏六人。各以一事擅聲於時。獨河南之守吳公。無事可書。止曰治行爲天下第一。一言之外。無可書也。豈真無可書者耶。噫。爲政而人無得而言。史無得而書。其真循吏哉。雖然。古之所謂循吏者。往往在河朔汝潁之間。未有地遠而偏如儋耳者也。地遠而偏。已之藏否。上之人弗聞知也。民之欣戚。上之人不聞知也。有善名不揚。有惡聲不彰。名不揚。則賞不及。聲不彰。則罰不加。賞不及則怠。罰不加則恣。怠則多苟且之政。恣則無顧惜之心。此世之仕者通患也。自

非的有所見。確有所守。未有不怠且恣者焉。古人有言。無所爲而爲者。義也。侯殆有見於此乎。今年春。鄉人賈僨者來京師。拜官南還濱行。求余文。將持歸以爲侯贈。余問之。慎無可言。余亦無可書也。若侯者。其庶幾古循吏也耶。誠一其初終。不中變焉。名位將不止此也。

送穎州高同知復任序

嘗怪歐陽文忠公。世家廬陽。及其官游四方。歷守七郡。所至如滌。如揚。如毫。如彘。皆不之思。而獨惓惓於穎。既去任。而猶思之不置。時時見於文字間。迨其晚年。得遂所請。乃不復歸吉。而終老於穎焉。意其人民土俗。必有異於他郡。而足以感公之心。而爲所愛慕者。不然。故鄉飛鳥。亦啁啾之言。豈公徒能言之。而不能允蹈耶。及觀思穎詩集序。所謂民淳訟簡。而物產美。土厚水甘。而風氣和。然後知公之所以眷眷於穎者。意有在也。況今地在皇畿內。爲帝鄉之支郡。漸染聖化日深。其民風土習。必有非昔比者。則夫今日之仕于是也。其官閒無事之樂。殆有過於昔人者矣。泉南高明

邱 文 莊 公 集

文顯佐茲郡者六年矣。吏習而民安之。今年以滿兩考。來上天官。績以最聞。將俟九載而超陞焉。其治下張翀等。計其在郡之時。僅餘一考。慮穎人之不得久專其惠也。欲言之。而辭不足以達意。謁余文以代之言。嗟乎。世之仕州縣者。恒多以魚肉視其民。民用是亦視之以寇讎。一旦解任而去也。如騎虎而得下。而民之幸其去也。如負芒刺而得釋。況去之復思。思之而冀其復來耶。由是以觀。文忠公之於穎。非獨其民俗之善。抑亦公之德政。有以感孚乎其人也。蘇子由嘗稱公之政。察而不苛。寬而不施。吏民安之。則公之所以得穎人心者。其有在夫。余聞文顯之治穎。亦有上下相安之美。豈其天資近道。故其所行亦有暗合於公者乎。不然。何邦人之戀戀於文顯如是也。文顯臨先賢之故郡。治其遺民之子孫。誠能體其心而施之。不縱弛以寬。不苛刻以察。始終一致。而不變焉。則雖不能與之齊驅。而亦可幾其萬分之一矣。力今朝廷清明。尤注意於牧民之任。未有庶幾如古者。而使滯於常調也。治行第一。徵爲公輔。穎川舊有故事。豈古有其人。而今

無乎。文顯當是時。其亦思穎否乎。是爲序。

送膠州陳節判序

漢史傳。循吏六人。而其一出膠東。膠東之治。流芳史冊。古今以爲美談。於乎。王成何以得此聲於當世哉。考史所稱。其勤之大者。亦不過謂其勞來不倦。以致戶口蕃殖耳。夫勞來。非難事也。而數百年以來。未聞能繼其後者。何耶。豈古今人不相及耶。抑古之民易治。而今難耶。不然。則當時流民。自古入萬餘口。皆僞增。誠如史氏所云邪。建安陳君廷輔。以太學生擢倅膠州。二年於茲矣。報政來京。天官考其課居最。將還任。所過余。求言。余聞今之膠州。卽古之膠東也。疆域如故。而守茲土者。未聞有如王成者。豈真不可如哉。願吾所以勞來不倦者。未如之耳。夫勞來。可能也。勞來而繼以不倦者。難能也。故雖尼父之聖。師與由之賢。所以教之爲政者。亦惟以不倦爲言。然則成亦有得於孔門之教歟。矧吾廷輔出自學校。其於孔門不倦之教。服膺有素。心聖人之言。臨古循吏之迹。所以繼其芳躅。而

追配之者。誠無難矣。但不知果能不倦否乎。州之守虞君濟民。余友也。君歸而以余言諭之。相與勉焉。則夫三齊之間。有以賢守佐並稱者。必吾濟民與君也。王成豈獨專其美於膠東哉。古人豈終不可及哉。是爲序。

贈姚自明擢大興知縣序

國朝赤縣令之制。視他縣令秩高一等。朝夕得預朝參。他令則覲見有時也。三年考滿。得給敕命。他令則必待九載也。善政著聞。則不俟終考。而不次超擢。他令則必循資格也。有所按問。必待上請。他令則不待報。而徑速置對也。均是令也。而朝廷待之獨優。優之所以重之。重之所以難其選也。選之難也如此。則居是任也。夫豈易哉。蓋以天子輦轂之下。百責萃焉。百需出焉。五方之民聚焉。上有文法之繩。旁有掣肘之拘。下有摘紙尾之抗。甚至有近貴之矯虔。法比之撻缺。知識之請求。而必欲一如其志以行。難矣哉。自非材行之卓。持守之堅者。不足以當茲任也。求其足以當茲任者。於今吾得一人焉。姚君自明是已。君廬陵人。其先以

邱 文 莊 公 集

旁累。謫戍朔方。因家焉。發身戎行。奮志經史。一旦拔等夷而出。以與天下豪儔士相頡頏。非材行之卓。不能也。登名天府。四至禮部。得校官。輒不就。卒業太學幾十年。斷斷乎其必得所志而後已。然而弗偶。卒亦未如之何。今不得已。始就舍選以出。非持守之堅。不能也。古人有言。窮之所養。則達之所施。以是占之。則君之於是任。優爲之。無難者矣。嗟乎。天下事。本無難者。顧在我者有不足耳。以我之不足。故見事之有難。非事之難無諸已也。使在我者。恢恢乎常有容地。綽綽乎常有餘才。灼灼乎常有定見。卓卓乎常有固志。則事之未來也。有以灼其幾先。其既至也。有以中其肯綮。其已過也。有以得其歸宿。則雖天下之大。幾務之繁。尙優爲之。况一赤縣令乎。此予所以斷焉知君足以當茲任。而無難也。天官卿。承上命。而以君膺是選。眞誠知人。而君亦眞無負所用也哉。君之同學某某。謂予與君有一日之雅。需言以贈。於是乎言。

贈段可久宰福山序

今之縣令。古百里侯也。於民有父子之道焉。於吏有君臣之道焉。於學校有師弟子之道焉。士之筮仕。即得百里之地。有數千戶之民。以君之父之師之。亦可以行其志矣。然世之仕者。往往重內而輕外。一登科目。即視州縣如陷阱然。惟恐已之不幸而或墮焉。之人也。豈慮其職之未易稱耶。民之未易化耶。吏之未易馭耶。政事之未易脩舉耶。曰皆非也。政以其胸中之勃勃然未易平耳。雖然。領郡輒無色之官皆有詞。豈獨今日然哉。唐府帥見大府。必戎服。左握刀。右屬弓矢。帕首袴鞞郊迎。令狐峒刺吉州。謁見齊映。從容步進。不軼首戎器。即以得譴。夫府帥之見大府。刺史之見觀察使。尚爾。則縣令可知矣。宋使者行部。所部郊迎數十里外。或遇霖潦。瞻馬首。脩至。跪拜泥淖中。移時不敢輿。既就館。拱手立座下。三跪進酒。其卑辱也甚矣。然是時韓昌黎以名世大儒。謫令陽山。朱紫陽以命世大才。首簿同安。未聞其以驕蹇得譴於時。及考其所以致譴者。乃以闕異端。忤權貴之故。所以然者。豈非以上下之分所當盡。是非之公不容昧。可以理誦。而不

可以勢誦耶。予友段可久。少負奇氣。好讀史傳。而慕古豪傑士之爲人。不肯媵阿隨人。後舉進士。則以病得告家居。其於富貴利達。蓋漠如也。今不得已。始起拜命。得知登之福山縣。嗟乎。可久豈百里才哉。雖然。今則然矣。將若之何。夫以大才試小邑。如以千里馬馳數十里之地。不患其不至也。以百石弓射數十步之遠。不患其不中也。可久行矣。其尙明理以御氣。無若小丈夫然。積勃勃者於胸中。見悻悻者於顏面。於上下之分則不肯安。臨勢利之際。則厥角稽首之惟恐後。其爲科目累也大矣。予托交可久。相知最深。於其行。慕古人贈處之義。方將有所規焉。適地官主事劉世英。率其諸交游屬予文。以華其行。遂書以贈之。可久得無異吾言乎。

贈孟縣張知縣序

會稽張君景璫。以昌平縣縣丞九年考滿。陞知懷之孟縣。行有年。其友尙寶司丞江君宗海。中書舍人張君升之輩。謀所以贈其行者。謂非文不可。將請之大方家。景璫曰。必得某文。時予方在告。升之以文請予。辭以疾。明日

升之偕宗海復來。且曰張君慕子之文。必欲得之。子毋庸辭。嗟乎。予言何足爲人輕重。而張君必欲得之哉。予聞君。山西布政公之從子。福建僉憲公之嗣也。其學業得之家庭之授受者有素。向丞昌平。密邇京師。且在山陵下。事煩劇而民難治。君從容爲之。綽有能譽。其於治體。固已試驗之有素。況孟視昌平。不逮遠甚。而令視丞。其權任亦自不同。譽之屠牛之刃。不難于割鷄豚。彼大而此小也。斷臄髀之斧斤。不憚於剗膚革。彼難而此易也。道譬者之相。不憂其步履之顛躓。彼相人而此自行也。雖然。人固有能於大。而不能於小者。不見海舟乎。能出沒於吞天浴日之波濤。至於入溪澗則膠矣。亦有能難而不能易者。不見猛將乎。能搴旗斬將於鋒鏑紛擾之中。優游樽俎間。或至失七箸矣。又有能助人而不能自爲者。不見奕棋乎。能料敵制勝於袖手旁觀之時。當局則昏瞶矣。雖然。此所以論庸衆人也。非所以論出乎衆之人也。材之出衆者。天分既高。而又假學力以充之。持之以定志。本之以實心。行之以強力。則是天下事。無大小。無難易。無人已。一

切優爲之矣。是之謂天下通才。君得無近似之乎。予力疾書此。以塞二君之請。俾書諸帛。以贈張君之行。君得無異予言乎。

贈鄭陳留復任序

余官禁近居京師。凡吾嶺南大游宦四方者。無間識與不識。人來自其治所者。必詢其治狀。治則爲之欣然。否則不樂者竟日。余友海陽鄭君暉之爲陳留令。六年於茲矣。人來自汴者。往往稱其善不容口。及求其所以善之實。則相顧愕然。擬議者良久。而卒亦無以爲對。嗟乎。此君之治所以爲善歟。老氏有云。其政悶悶。其民醇醇。君之治。殆近之乎。夫善於治者無迹。大凡存形迹者。爲名者也。苟行其所無事。而不容吾心。因民之俗而不立異。順民之天而不拂其所欲。公是非。而是是非非之。同好惡。而好好惡惡之。時其耕而耕焉。吾不爾督也。擇可勞而勞焉。吾不爾私也。纒緒而纒纒。字幼而孳畜。吾不爾程也。某山有木可爲棺。某亭有家可用祭。吾不爾知也。夫然。則雖無殊異之行。超卓之功。而民陰受其賜也多矣。視彼煩禁令。

程功課。要聲譽。以希賞擢者。其誠僞正譎之分。奚翅天淵乎哉。君爲陳留非一日。談其善者非一人。至求其實。乃無一事可指。非無事也。有其事而無其迹也。無迹。故無名。無名。故不可得而指言焉。雖然日計不足者。月計恒有餘。在位無赫赫之名者。去後恒見思仰。孰知其不務一時之名。乃所以垂久遠之名歟。今君報政天官。考最將還鄉。入寓京者。求予文贈之。予多君於治。凡吾嶺南人仕中外者。皆預有光焉。故樂爲之書。

送梁景熙知蕭山縣序

皇帝復正大統之四年。因天下百司朝覲京師。首舉更賢育民之典。簡州縣之吏。去其尤無良者。擇進士中之有名者往補其處。於是吾鄉之爲進士者四人預焉。潘洪克寬得東平州。崔浩文淵得吳縣。吳滄源深得弋陽縣。梁昉景熙得蕭山縣。四人者。景熙年最少。而蕭山尤號難治。愛景熙者。咸爲之慮焉。予曰無慮也。胡無慮耶。有恃也。昔宓子賤爲單父宰。所父事者二人。所兄事者五人。所友事者十一人。皆教子賤以治人之術。邑用以治。今

蕭山之人。可師可友者。吾不得盡知也。乃若碩德古學。爲天下所宗仰者。有家宰魏公焉。公邑人也。百世之遠。聞風尙興起。况親炙其人者乎。清德惠政。爲兩浙所稱最者。有太守彭公焉。公鄉人也。千里之遙。引領冀觀。况親爲其屬者乎。以吾景熙英妙之資。謹厚之道。通經學古之才。得二公以爲師法。其於治邑也何有。予所以恃而不爲景熙慮者。此爾。嗚呼。古者學而後入政。今吾景熙因政而得師。異時學之所進。當不在子賤後。而蕭山之治。豈下於單父哉。予於是不獨不爲景熙慮。且爲之喜且幸矣。於其行也。書此以贈之。

贈韓敬夫序

予友韓敬夫。世家河內之脩武。以正統丁卯鄉貢進士。第試禮部不得意。其後屢試皆然。今十有六年矣。始以太學舍選得爲婺源縣知縣。瀕行過予。言別曰。某大學十年交游之舊。茲忝有民社之寄。才薄而任難。心甚惴焉。吾子能無一言開發我乎。予惟發源、文公之闕里也。吾敬夫平昔所讀者。文

邱 文 莊 公 集

公之書。凡其所以見於脩身制行。接人待物者。何往而非文公之道。今將臨文公之故里。以治其鄉之遺民。不過推文公之道以行之焉耳。豈俟他求哉。夫文公之道。全體大用之道也。大而以之治天下。次之以治一郡一邑。小之以治一家。無用而不效。鑿乎如衣布帛。必可以不寒。食粟菽。必可以不飢也。雖然。求之於空言。孰若求之以實効。昔文公二任民事。其在同安也。蒞政事以勤敏。開士子以義理。其在南康也。列三條以新教化。定規式以明教條。其後臨漳之政。亦稱是焉。寬嚴適宜。政教兼舉。其施爲之序。俄頃之化。非但足以致一時循良之績。而實可以爲千萬世治民之規矩繩墨。秦漢以下。所謂循吏者。皆不足道也。吾敬夫誠能一遵文公之所已行而效者。遠以治諸其鄉之人。吾知文公在天之靈。亦未必不莞爾而笑也。敬夫其勉之哉。敬夫曰唯唯。適監察御史司君希謙。求予贈言。遂書以爲敬夫之官之贈。

贈如臯易知縣序

邱 文 莊 公 集

予友高涼易君立方。以易經領東廣鄉薦。今二十有七年矣。數試禮部。得校官。輒棄去。游太學者久之。然卒不能如初志也。今年夏。拜命爲揚之如臯知縣。戶部主事蕭君有慶與之友。連過予。徵文以爲君之官之贈。嗟乎。火之宿也用之壯。水之溢也流之長。其理然也。君老於場屋。深於世故。一旦小試之以百里之政。吾知其無難者矣。子聞古之君子。四十而始仕。植之於既固之後。決之於將溢之時。故其於天道民彝。物理事機。人情世態。時宜地勢。官政吏治。士風土俗。無不究諸心而求其故。或得之於簡冊。或得之於傳聞。或得之於謠諠。或得之於談論。或得之於涉歷。或得之於耳目。閱世久而經事多。其輕重、長短、大小、遠近、厚薄、迂徑、險易、深淺、廣狹、多寡、強弱、虛實、高下、明晦、同異、詳畧、繁簡、羸縮、淳澆、真僞、始終、本末、因革、損益、良苦、新陳、偏全、常變、先後、久暫、豐吝、利害、成敗、盛衰、得失、曲直、誠詐、是非、可否、取舍、好惡、向背、莫不的然知其所以如此。與其所必當如此。而不得不如此。所不可如此。而決不如此。

邱 文 莊 公 集

者。一旦出而用之於時。小用之則小效。大用之則大效。無不可焉者。以故更多善政。國無失治。民得以遂其生。物得以止其所。有由然也。後世則不然矣。夫以血氣未定之年。而當夫人民社稷之任。歷世淺而練事少。徒恃其資稟。而無問學講習之功。甚者負驕吝之氣。懷苟且之心。其不至倒行而逆施之者幾希。如此。而欲求吏治之循。民生之安。胡可得耶。胡可得耶。若君者。可謂閱世久而經事多矣。海陵民得斯人而爲之父母。豈非幸哉。詩不云乎。豈弟君子。民之父母。欲其強教而悅安之也。又不云乎。樂只君子。民之父母。欲其順民所好惡也。知所以強教之。則不過於慈。知所以悅安之。則不過於嚴。然必順民之所好惡而好惡之。則其所以說安強教者。皆得其平。而不至於倒行逆施矣。如此而爲民父母。庶幾異乎未知爲父母之道。而遽使之有室家者歟。於是乎序。

送清江管知縣序

今制由儒而仕有二途。曰科目。曰舍法。舍法循資以用常才。而科目則以待

邱 文 莊 公 集

非常之才焉。國初定制。兼用之。布列中外。蓋均任也。近世太學生得內任者。十無一二。而進士則十而八九矣。於是仕者遂至重內而輕外。一登甲科。則京秩乃其囊中物。而視州縣之職如草菅然。不幸得之。匪怒則戚。嘻。其甚矣。惟有志之士則不然。其仕也不必於內。亦不必於外。惟所用之而已。固未嘗有所輕重於其間。譬之金焉。用爲劍。則以割。用爲鑑。則以照。用爲戈戟。則以擊刺。用之而無所不可。斯爲良器。苟金之在治也。躍出而自鳴。曰。我將爲此。而不屑於彼。豈非不祥之甚哉。金臺管世隆。以進士擢清江縣知縣。命旣下。人咸謂世隆生長輦轂下。必將戀內而厭外。而世隆方且治裝啓行。無毫髮不平。意見顏面。噫。所謂有志之士。非耶。蓋君子之志於學也。將以用之。用之於內。則志於致君。用之於外。則志於澤民。職任有內外之殊。而以行吾志則一也。雖然。澤民易。致君難。內之致君也。非夫闡歷之久。倚任之隆。聽信之篤。未易以致其啓沃之功。而引之於當道。以成夫治平之效。若夫外之澤民也。其隨吾身所至之遠近。所爲之大小。所

邱 文 莊 公 集

轄之衆寡。朝發而夕至矣。苟存吾心。推所學。盡其職以施夫及物之仁。皆可以成一時之治安。一方之民。而不負大君之所命矣。不負所命。是亦致君而已矣。奚必日侍左右。近清光。而後謂之致君也哉。矧民者。君所藉以爲治者也。吾能保其民。是能分其憂以安其位矣。所謂致君也。孰大於是。方今聖君在上。圖治若飢渴。固未嘗暇。邇忘遠。而掌鈞衡者。又能體上之心。將以均內外爲已任。士仕斯時。得外任者。但患不能平其氣。以立其志焉耳。有志於斯民。惠澤洽於一方。聲名流於四遠。則自外而之內。由小而大。可計日而待矣。世隆將之任。其同年進士有爲之求贈言者。於是乎書以俟。

送容縣林知縣序

羊城林廷輝鳳翔。以禮經數至禮部。連不偶。今以舍選擢廣西容縣知縣。戒行有日。鄉之士夫。寓京師者。謂予於鳳翔有夙好。來求贈言。且曰。先生明於治體。何以教鳳翔。予曰。莫急於城守。有笑余者曰。先生何迂哉。城守

邱 文 莊 公 集

者。將領之事也。而以責之長吏。是庖人不治庖。而責尸祝越俎以代之也。先生何迂哉。余曰不然。使鳳翔令容在十數年前。余勸之以此。誠迂也。又使鳳翔得邑在齊晉吳楚之域。而余勸之以此。誠迂也。今夫廣右之地。峒氓竊發。歲無虛月。曩時鷄犬相聞之處。禾麻接畛之場。今則丘墟矣。數十百里之間。人煙蕩然。僅僅存者孤城耳。一方之民人。幸而不係繫於異類。汗血於兵刃者。咸假息於此與。夫倚山結聚以避寇者。亦莫不唱唱引領。恃此以爲聲援。苟循故常。拘職守。他他偃偃。尙襲前人之故迹。則身且非我有。何有於民哉。是故雖有良法善政。亦無所於施矣。矧容之孤城。守以羸卒數百。前此亦常破于賊矣。往事之明鑒也。可不慮哉。昔趙襄子使尹鐸爲晉陽。而請以保障爲先。君子與之。彼全盛無事之秋且然。而況此殘破之區乎。余所以勸吾鳳翔以城守者此也。鳳翔誠不迂余言。先事而慮。不以無事而怠弛。不以有事而失錯。兢兢焉如慈母之鞠其病子。撫摩愛惜。既恐其舊病之不去體。復慮其新有所加也。如舟人之操漏舟。謹其出入。見雲而

思風。未晚而思歸。泊之地。時時視其罅縫。恐水之或滲以入也。如病者之畏風。扃其戶。塞其竇。又必厚其衣衾。或坐或臥。必擇夫溫煖之所。恐其或有以致之也。若然。則民得所保障矣。夫然後以發其政。以施其教。尙何往而不可哉。笑者聞余言而心醉。遂請書以贈鳳翔。余再告之曰。季路言志。於尼父欲因師旅飢饉之後。期以三年。可使其民之有勇知方。鳳翔今得邑於容。庶幾近之。其尙知所勉哉。

送梁弘道教諭序

嶺南人才。在古莫盛於始興。唐相張文獻公。史雖稱其爲韶之曲江人。然其所生之地。今實隸雄之始興焉。余嘗循潯江而上下。登黃岡之野。翹首東北望。山林岡阜。蔚蔚然猶有英偉之氣。蓋翩翩九鶴從天下降之所也。今去公七百餘年矣。山川風氣。不改故常。而人才之生。一何寥寥哉。豈扶輿清淑之氣。獨豐於古。而膏於今邪。抑或五嶺以南。地簿而氣浮。公盡其全而得之。後無復餘邪。余求其故而不可得。古岡梁弘道先生。以潯郡文學升掌

邱文莊公集

始興教事。將之任。鄉之交游來求贈言。余聞先生通經學古。志趣不凡。蓋赤嶺南人士中之錚錚然者。今掌教於斯。而吾嶺南亘古今第一等人物所生之地。適在其化雨沾濡之中。得以覽觀其山川。占候其風氣。詢問其父老。考究其圖籍。必將有以得其彷彿者矣。如得之。幸因風以告我。雖然。余請以意言之。方唐盛時。公之風度德業。非獨嶺南士所間有。唐三百年來。中州人士。亦不多見焉。然當是時。越俗猶未甚變。南蠻之習。尙仍其故。章甫來適。無所用之。蓋終唐之世。惟公一人而已。他求之前聞焉。今之世則不然。衣冠禮樂。蓋彬彬然與中州等矣。求其一人德業風度如公者。雖不可得。然其間服章縫學周孔者。在在而有。豈所謂扶輿清淑之氣。在古專鍾於一人。今則分而散於衆歟。惟專故大。惟散故小。理或然也。夫求其大者。於今固不可必得。然於其衆小之中。掄而擇之。翕而受之。開而廣之。引而長之。拓而遠之。安知其終不至於大邪。此開發啓迪之功。所以不能無賴於師儒之任也。先生念之哉。

送鄭司訓序

余童穉時。聞鄰邑之樂會鄭文學先生者。閩人也。以文名一時。凡一方求文者歸焉。稍長。爲舉余業。又得鄭主事所作戴記程文誦之。知其爲文學子也。及來京師。游縉紳間。論及當世良有司。皆以寧波鄭太守爲首稱。蓋文學之弟也。固已信閩鄭氏之多賢矣。乃天順八年。朝廷進太學生於內廷。群試之。簡其文合程度者。授以師儒之職。分教天下府州縣學子。叨在考校之列。既拆卷中。有鄭其姓名文充者。閩產也。所作不苟。非無傳授者。予竊念焉。得非樂會文學之子。姓屬乎。又數日。吏部員外郎王君。偕一士大夫見訪。衣冠偉甚。禮度閒雅。予意其鄭君也。問之。果然。蓋君受職得瓊之文昌司訓。以予郡人也。特過焉。問道所由。詢其家世。乃知君太守公之嗣子。文學乃其世父也。於是益歎鄭氏之多賢。明日員外君。以贈行文見屬。嗟乎。鄭氏多賢。著自古昔。漢之康成。闡明經訓。後世言經學者宗焉。唐之廣文。澹素自持。後世居儒官者慕焉。宋之名士。有氣高行古。以知天盡性爲

學。當時並稱閩之四先生者。是又君之鄉先賢也。一二三君子。清德古學。百世師表。凡天下之爲師儒者。所當取法者也。況出自其宗也哉。君出自儒宗。得家庭之傳有素。少游四明文獻之邦。締交一時賢豪。資益良多。今以英妙之年。膺師儒之任。分教百里。且與曩時世父所過化之地相密比。遺文墨迹。往往故在。所以繼其芳躅。使一方之人。凡有所述作。必趨向焉。亦猶異時樂會之有鄭文學也。豈不美哉。君清才雅度。非久淹常調者。其勉之。勿自棄。

送鄉友馮元吉教諭序

正統戊辰。予與萬全馮元吉偕計上春官。試俱不利。卒業太學。又三年。元吉中乙榜。得岑溪教諭。予亦辭官同舟南歸。又二年。予叨甲第。官翰林者八年。元吉始考滿。來京師。天官考稱當陞。而以舉子不及數。仍舊職。改任巴縣以去。嗟乎。海濱一別。倏爾十年。今茲復別。非閱十寒暑不相見也。人生斯世。能堪十年者幾邪。則夫臨別贈言。情烏能已。雖然。情不足道也。

邱 文 莊 公 集

願吾儕平日。所以相期待者。有出於情之外者焉。苟德學之不進。名節之不立。職業之不脩。則雖朝夕跬步相追逐。奚益哉。德學進矣。名節立矣。職業修矣。相去之地。雖在千里之外。相見之期。雖在數年之後。恒如同一日處一室也。夫何遠邇久近之間談。元吉行矣。予并忘情者。然寧舍此而取彼者。豈不以古之君子。所以相與爲交際者。道有大於情者乎。蓋不徒以是責望元吉。亦以自責也。於是言而復繼之以詩。其詞曰。維北有燕。維南有越。自南徂北。莫匪其極。亦既遼止。矧乃他適。適彼蜀土。在天一隅。引領址南。山川邈如。念子行邁。我心鬱紆。牲牲鹿羣。噉噉雁賓。彼物之類。式和以親。胡我與女。化離孔頰。音之哀矣。如兄如弟。今之睽矣。如雲如水。感今念昔。情曷能已。輿言贈之。于道之左。立教以身。奚如不可。無言不讐。予何以處我。

送鄉友崔仲淵司訓序

予友崔仲淵領鄉書。僅二十年矣。試南宮。入太學。餘十年矣。循常資以入

邱 文 莊 公 集

選。歲不一再。可得美官。然非所好也。棄年勞以就教職。得建昌之南豐縣學司訓。孟子所謂辭尊居卑。辭富居貧者。非此邪。夫人之仕。孰不欲尊且富哉。士而不欲尊且富者。僞也。顧取之有道。進之有禮。不可苟得焉。不可幸焉致。得之以道。進之以禮。斯君子爲之矣。夫有可得之道。可致之理。然而時不我利。歲不我與。則亦姑即其所居之地。以樂其日用之天。苟必待尊與富。而後行吾志焉。則有終其身而不得者多矣。雖然。位有尊卑。道則尊而未嘗卑。祿有富貧。學則富而未嘗貧。矧師儒之職。以學爲業。以道爲任。自三皇五帝以來。凡其所具之仁義禮知。皆吾性之所有。有之。則三公之位。不能踰也。學自六經子史。下至百家之言。凡布於方策載籍者。吾無一而不究。究而有之。則萬鍾之富。未足多也。苟道則尊。而吾方戚戚焉以嗟卑爲念。學則富。而吾方汲汲焉以憂貧爲心。則失其所尊富者矣。而況道與學俱無有哉。嗟卑。則屈抑苟賤。無所不爲。憂貧。則需求乞貸。無所不至。此舉世學校官之通患也。仲淵其勿似之。有以自尊。而不在於爵位。

有以自富。而不在於貨財。非獨以此自尊富。而不屈挫於人。且用是以施教於人。使凡在吾化誘之下者。皆知天下真有自尊自富之道。出於爵位貨利之外者。庶乎無忝於師儒之職矣。仲淵其尙慎哉。

送鄉友林茂才贛州府學訓導序

吾友林茂才。以上舍生應校官選。與天下舉子羣試於奉天門下。翰林考其文在優等。得贛州府學訓導。戒行有日。時郡人士在京者。比常年爲多。相與醪錢。具酒殺。飲食之於城東佛舍。酒酣。有起而歌者。曰漶廬之利兮。以艾苕華。饒歌鼓吹兮。協以枯楊皇華。干狐之腋兮。當暑以代麻。時命則然兮。吁其奈何。繼有歌者曰。章貢交流兮。屹以鬱孤。有新廟貌兮。高渠渠。峨峨其冠兮。講唐虞。誦髣髴兮。來趨其隅。尊有酒兮。饌其魚。鄉人往來兮。通簡書。安居而飽食兮。徐徐于于。彼擁蓋以前訶兮。方且奔趨。歌竟。杯行無算。談笑懽譁。以罄一日之樂。甚至攘臂呼諫。踉蹌起舞者。亦或有之。而吾茂才。方且歛容端坐。兀然不出一語。有問焉。唯唯而已。衆莫不驚愕。

邱文莊公集

歎羨其克己之勇。而折節之峻也。竊相語曰。方吾儕與茂才同游學校時。年少而氣豪。顧天下事。百無一當其意者。於世所謂功名富貴。視之若囊中物。謂試探手即可得也。其後累應秋試。至則罷去。最後爲有司勸駕。可以起矣。猶且遲遲其行。至五六年之久。豈意老之遽至邪。今不得已。俯就儒官。翻然收斂檢束。就規矩中。始終若二人然。豈闕世既久。而覺前事之爲非耶。抑歲月斯邁。而志氣銷輒耶。明日舉以告予。余曰不然。不見夫秋水時至邪。方其百川暴漲。衆流交匯。兩涘渚涯之間。不辨牛馬。漫山平谷。一望無際。觸木而折。衝岸而崩。流石而浮。巨峽不能扼。高埠不能防。一有排迫。則怒號哮吼。聲震遠邇。及夫霜降水落之後。奔放者注之海。泛濫者歸故道。疏而成川。滯而成湖。渟而爲淵。平鋪漫流。隨山曲折。因風成文。可泝可沿。可游可舟。可以澆灌。可以澆濯。可以鑑面目。可以供飲食。其他潤澤之功。沾溉之利。無所不有。夫今之水。卽昔之水也。何前後相懸絕如此哉。時則然也。然此乃大川大陸所有之形勢。彼夫沼沚汙池。烏有是

哉。若是者。可以喻吾茂才矣。夫人至於歛華就實之時。是惟不用。用之而無不可。惜其官拘地冷。不足以盡其用耳。雖然。已不自用。而授之人。俾其代以用吾之用。是亦吾之用也。奚必自己出哉。衆聞予言。咸以爲然。遂次第其語。以送茂才之行。

送太子少保禮部尙書涪陵劉公致仕序

太子少保禮部尙書掌太常寺事涪陵劉公凌雲。年未至。以足不良於行。乞致其事。上弗許。旣而章再三上。上以其情詞懇切。特俞其情。且敕有司月給糧米。歲給輿隸。以示優禮大臣之意。嗟乎。聖天子之於大臣。恩禮一何厚哉。然此非特以爲公。蓋以公職所學者。國家之禮樂。佐天子以郊天享廟者踰十年。每遇大禮。致辭于殿陛之上。周旋於壇陛之間。咫尺天顏。以導引贊助聖躬以裸獻。所以對越上帝靈承列聖在天之靈。以致其願歆。於以受祿於天。而錫綏和豐穰之慶於天下。非但供一事。洎一職者可比也。公寅清勤恪。服勞有年。爲先皇帝所眷注。今上嗣登寶位。方賴公之用。而

邱 文 莊 公 集

顧容其以私去。噫豈得已哉。蓋古者仁君之於其臣下也。方其壯而強也。用之必盡其才。而不遺餘力。苟或疾而耄焉。則亦便其私。而不強其所不能。致事而歸。猶必使之得所安養。以終其天年。其仁義之兼盡也如此。後世則有不然者矣。歐陽子嘗言出兩漢以來。雖仕至三公。每上印綬。卽自駕其車轅。一辭高爵。遂列編氓。而韓文公亦云。中世士大夫。以官爲家。罷則無所於歸。由是觀之。則前代之任者。平生竭力以盡心所事。一旦老而休焉。蓋有不得其所者矣。孰若公生盛時。起家諸生。而荐歷華要。疊荷恩封。及其祖考若妣。官登八座。位極人臣。茲其歸也。而又特給之日食。資以人力。昔人所謂雖有還攻之名。而仍享終身之祿者。公實有之。公世以農畷爲業。有田園之樂。有林泉之勝。倉園足禾稼。亭沼饒花木。有可以養生之具。有可以適趣之景。昔人謂閉門歸隱。則俯仰山林之下者。公亦實有之。矧今年方五十有九。距古人引年之期。猶將十稔。茲以疾而預告。非以老而謝事。近時公鄉大臣。有以老疾家居者。朝廷有事。往往起之。具有成比。

公偶以疾去。非廢不可起也。國計之重。甚於身謀。民瘼之慘。急於己疾。公之歸也。其尙顯精神。近醫藥。以毋忘乎聖天子之所軫念。九重之使朝臨。而萬里之轅轡駕可也。余犬馬之齒。較公爲長。歸裝久束。第以國史事重。未敢言私。然且暮間爾。公之再來。予已去矣。余與公同年登第。今十有春秋矣。在班行中。特相親厚。公行。其太常僚屬。感公厚德。相率求余文以贈行。於是乎書。兼以致予意云。

贈都憲彭公致政還嶺南序

入皇朝嶺南仕者。惟寶安爲最盛。余所及見者。禮部侍郎陳公。副都御史羅公。僉都御史廬公。陳公以文學顯名中外。而羅廬二公。則以才猷著功邊方。然皆能始終以名節全歸其鄉。是二人者。並出乎一邑之間。非獨嶺海所無。雖中州內地。亦不多見也。今彭公景宜。以工部左侍郎。改右副都御史。巡邊於遼。幾九年矣。故事歷官三考。當陞其秩。公年僅六十七。卽上章乞致其事。上俞其請。鄉人在京者。咸曰。公嶺南仕宦者之巨擘也。謂濬以

邱 文 莊 公 集

文字爲職業。而以送行文見委。惟公兼二人者之所任。而又盡有所長。二都憲公立功西北。而公則兼於東。夫生極南之陬。而馳功名於朔易之會。以禦戎鹵。孰謂南人綿薄也哉。雖然。方公輕裘緩帶。指麾叱咤於朔雲邊雪之中。永足爲公勇也。惟當衆人奔趨酣參之秋。屹然立。截然斷。毅然去。無毫髮顛懣意。然後見其勇耳。孰謂南人綿薄也哉。夫天道以南爲陽。陽固剛矣。而風氣之在地者則柔。百越處地之極南。人生其間。體柔而用剛。蓋地氣然也。濬嘗歷考史傳。嶺南人仕中朝者。恒不多見。若唐曲江之張。日南之姜。滄川之劉。宋則南海道宗。武溪安道。潮陽元龜。增城適子。僅此數公而已。然皆進以禮。退以義。求所謂倖進患失者。蓋鮮焉。若是者。雖係其人。所存所遭之不同。抑亦由於地氣使然歟。公生諸公後。遭際聖明。起家科目。官御史。則振風裁。貳廷尉。則慎刑罰。爲郡守。則藹循良之譽。總方面。則廣旬宣之政。兩任邊寄。所至則威行而惠施。撮其平生履歷。藹然鄉先生典刑。千百世猶一日也。今又謹知足之戒。決勇退之節。優游田里。

以取桑榆之效。巋然獨立於嶺海之間。爲鄉邦之耆舊。朝廷之遺老。使鄉人子弟。處者得以考德而問業。出者有以取法而遵承。所謂天地間之全人也。豈其然乎。濬也於公有鄉契。於其行也。不能無言。戶部郎中祁君順。公通家子也。請書之帛以贈。

送王繼甫南歸序

予交遊海內賢豪多矣。心所推重而樂相與者。可屈指數也。而宣城王繼甫其一人焉。豪邁開爽。不屑細故。口論天下事。聲震有證據。遇事奮發敢爲。蓋亦一奇男子也。然官止一縣令。兩居其官。輒不久。竟不得究其所蘊。年富力壯。可以有爲也。乃毅然謝事以去。嗟乎。其進也何難。而其退何易哉。繼甫年弱冠。卽領鄉薦。試春官。得校官。不屑就。卒業執學。再試。又不中。居太學者久之。尋以舍選。得蜀之郫縣。縣卑僻而民貧。當西番入貢道。番僧往來。歲無虛月。到則羣入縣治。索庖廩。稍不如意。令佐以下威被羣辱。繼甫至嚴門禁。不許擅入。番僧扭故常。直至廳事見令。不爲禮。大肆其兇。

邱文莊公集

繼甫目左右拉下。痛杖之。幾至斃。吏胥以下。咸吐舌。久不得入。歎曰。西僧爲西蜀人患。非一日矣。藩臬大吏。不敢厲聲色臨之。况加箠乎。邑人於是大懾相戒。不敢犯其令。而西僧入境者。自是亦少戢矣。未幾。丁家觀解任。起復改山東陽穀縣。縣多椎埋之盜。白晝掠舟車。焚廬舍。罔有所忌憚。繼甫至。問父老以民所疾苦。咸言莫苦於盜。不得聊生。繼甫即選丁壯。嚴守備。聞有盜者。即躬鞍馬。具弓矢。率壯夫馳赴之。往無不獲者。盜尋逸他境。大抵其爲治。以抑奸宄。扶貧弱爲事。兼并家忌之。肆爲謗訕。然其守正不回。檢約嚴密。攬撫無所得。卒亦莫如之何也。其政績灼然在兩縣人口耳者。不可一二紀。然能振發於衆人委靡之中。此二事尤爲可喜。今年春。偕天下百司朝覲闕庭。旣竣事。卽上章乞致事。當道者聞其名。苦留之。繼甫堅欲去。幸遂所志。卽束裝南歸。旣去數日。交游者始知之。給事中河東樊冕景瞻。西蜀冉哲尙儀。姑孰楊璧應奎。監察御史東吳朱鉉良玉。刑部郎中會稽謝廉允清。工部主事錢塘楊懋克勤。謂予曰。吾輩與繼甫相交好。

邱 文 莊 公 集

者。知之深。而善文莫如子。今其去矣。寧能默默無一言乎。子曰諾。嗟乎。古所謂奇男子者。今世蓋不多見也。而繼甫豈非世之僅有者乎。然而位不滿其才。如以千里馬使之折旋畦徑之間。縱有追風絕塵之足。亦何所施焉。今而又放之於長山茂林之間。不復駕馭之。可惜也哉。雖然。千里一蹶。古人深戒。又孰若遂其自然之性。雖無馳騁之快。亦免困踣之虞。爲愈哉。予既以是言復諸君。俾書以寄繼甫。又系以詩。詩曰良馬千里姿。逸態何權奇。有足不得聘。居然自鳴嘶。伯樂世豈無。道旁空歎咨。此事古已然。不但今人悲。世重冀北產。按圖定黃驪。謾勞耳批筒。空有肉駮垂。胡天賦奇質。於地乃不宜。幸哉免鞭策。莫羨黃金羈。長林多清泉。食飲聊自怡。八生適志耳。去去將何疑。

歸田樂詩序

歸田樂詩八章。章十二句。送衡州通判唐公履信致仕歸瓊山也。公邑大姓以鄉貢進士卒業大學。解褐郎倅衡。歲將一周。以憂制家居者六七年。衡之

邱 文 莊 公 集

人。至今無貴賤老幼賢愚。稱頌之不容口。不以其去任既久而衰。今年起復至京師。衡之人及瓊士寓京者。咸喜公之來。謂公才長器闕。蓄久養充。前日衡陽之政。特其端緒耳。未足以究所有也。茲將復之官。必將有大設施。如古所謂循吏者。不但已也。方將拭目以觀其新政。而公不謀之故舊。不決之龜筮。卽上章乞致仕。既得請。欣欣然喜溢顏面。舉手加額曰。吾一生之事畢矣。嗟乎。人生之事。豈易畢哉。貪功名者不能畢。固權位者不能畢。嗜貨利者不能畢。圖徼幸者不能畢。懷晏安者不能畢。計身後者不能畢。天下之物。凡一有所繫吝於心。皆未易以畢之也。惟中有所主。外物不能干。而真知天下之至樂者。然後能畢之。雖然。是樂也。亦未易知也。禮不云乎。樂樂其所自生。蓋以生於斯。長於斯。老而休於斯。百年之後。又正丘首於斯。斯蓋人生之至樂。舉天下之事凡可樂者。皆莫加焉者也。雖南面之樂。不足以當之。彼區區之功名利祿。又何足道哉。公殆有見於此。不然。安肯以未老之年。而遽爲歸閒之計哉。公行矣。潛因本公之意。述臆園

之事。分爲八謠賦詩以送之。公歸抵家。卽其事而歌其詩。亦未必無以少助其樂之一二也

醉花

海南地暖無冬春。四時一氣和且溫。山丹佛桑到處有。素馨茉莉隨時新。花開不必盡應候。村釀家家皆有酒。披衣躡屐任意行。遇酒逢花輒開口。開口向天笑更謔。一任花開復花落。賞花醉酒過年年。人生無如歸田樂。

吟月

仙山一片平如砥。天風吹散樓臺氣。月輪湧出海東洋。光彩分明無障蔽。公家正在域之東。江流繞屋清溶溶。天寬水近多得月。月光照人清興濃。興來長吟邀皓魄。坐到東升到西落。吟詩賞月過年年。人生無如歸田樂。

競渡

寒食清明都已過。枝上榴花紅朶朶。龍舟繫浪去如飛。鼙鼓喧天槌欲破。掀髯岸幘坐江頭。指揮白羽橫中流。錦標入手拍掌笑。楚聲一曲帶醉謳。向晚

擊舟沙嘴泊。開筵把酒爭酬酢。厭厭不醉夜不歸。人生無如歸田樂。

賽神

海上深田歲兩收。居民不識饑與流。九月十月登場後。家家釀錢賽田頭。割牲酌酒歌且舞。鷄骨玻璃杯代神語。須臾徹饌飲神餘。劇飲狂歌忘爾汝。古人蜡祭久遼邈。鄉人報祀殊不惡。蒼顏白髮翁獨尊。人生無如歸田樂。

觀漁

公家屋後臨流水。水中潏潏多魴鯉。盤渦莫測有縱鱗。數罟不煩無赤尾。大魚津津流白舫。小魚濺濺盈尺長。天寒歲暮草木黃。閒循江岸觀漁梁。得魚作鱸鮮且薄。旋發新芻動清酌。醉來江上枕流眠。人生無如歸田樂。

督耕

公家負郭多良田。屋前屋前遙相連。芒針刺水戚如纈。秧馬行泥疾若船。三春農務村村急。也隨區鷺田疇立。還似衡陽二月中。獨騎齋馬循阡陌。田

家風俗殊古朴。瓦盆盛酒亦不惡。酒酣仰天歌鳴鳴。人生無如歸田樂。

結會

未老得閒從古稀。林下一人今見之。故鄉況有白頭友。平生意氣同襟期。洪崖老仙婚嫁畢。臞軒後人正閒適。昭川外史應時來。共剪燈花話疇昔。疇昔風流重振作。不數香山與西洛。相將擊壤歌太平。人生無如歸田樂。

厚俗

吾鄉風俗自昔淳。依稀太古之遺民。海邊鄒魯故自謂。江西道院未足云。一自坡仙謫儋耳。衣冠禮樂班班起。齊民不習城旦書。士夫動用文公禮。聞道今來頗殊昨。正賴老成敦鄙薄。邦人翹首望公來。人生無如歸田樂。

岐山八景詩序

瓊城之東兩舍許。有勝地曰條岐。其山謂之岐山。山之形若樹屏然。蒼翠之色。四時不渝。山之下有水。水之流紆迤若帶。繚繞乎田疇之間。其田彌

邱 文 莊 公 集

望。可數千里。越田而南。有墟市焉。鄉人之貿易者。恒辰集于是。蓋亦一方之勝景也。友人蒙亨時中世居其間。居之前有池。池之中有島。島之上雜植花木。而環其居者。又有榕樹椰子之屬。遠而望之。鬱然深秀之中。棟宇隱然在焉。則又據山水之勝。而獨得之者也。君以易經發身賢科。游宦四方。因即其勝。釐爲八景。攜以自隨。遇能詩者。輒請賦之。以予爲同學。而特以序見屬。夫蒙君明易者也。而君之姓即山下出泉之象。而君之居。上山之也。下水也。又與蒙之象合。觀于山也。有艮之象。觀于水也。有升之象。觀於水之流也。有坎之象。觀於水之止也。有兌之象。於山而耒耜也。有益象。於市而交易也。有噬嗑之象。一寓目之頃。而易之理備焉。矧君之姓蒙也。名亨也。字時中也。於蒙卦之義盡有。所以果行育德者有自矣。則其於俯仰之間。顧瞻之際。而八景者粲然於目。油然而心。所謂思不出其位。積小以高大。以常德行。以資講習。以足天下之食。以致天下之民。所以脩身致用之具。盡在是矣。豈獨玩適而已哉。夫天地間無往而非易。易之象無

往而不有。有是象則有是理。君專門以易。其造於易之理也必深矣。予因推易之義以序之。君之子克昌。從學於予。亦傳君之易學者也。質粹而幼悟。蒙九二之克家子。其在茲乎。岐山之山水。不徒然矣。是爲序。

屏山聳翠

門外青山列畫屏。半空飛翠落簷楹。曉天霞映疑張錦。春雨花明似寫生。煙染嵐光晴欲滴。雲連樹色晚猶橫。清時未遂歸山志。謾對新圖想舊盟。

帶水灣環

寒流如帶繞茅堂。壘與詩人繫闕腸。斜束山腰分黛碧。橫紆田腹界雲黃。石渠雨過灘聲滑。竹檻風來水氣涼。羨殺江頭垂釣客。綠簷眠月聽鳴榔。

榕樹屯陰

繞屋扶疎碧四圍。炎天嗙嘯最相宜。倚雲翠蓋童童立。到地青絲裊裊垂。風動每聞蒼雪落。日斜時見綠陰移。閒來廣地支頤臥。絕勝公庭聽五辭。

椰林挺秀

千樹椰椰食素封。穹林遙望碧重重。騰空直上龍腰細。映日輕搖鳳尾鬆。山雨來時青靄合。火雲張處翠陰濃。醉來笑吸瓊漿味。不數仙家五粒松。

月池夜色

擊破蒼苔玉半瑣。徘徊雲影映天光。素娥晚浴九秋露。丹桂晴涵午夜香。淡淡微風清醉骨。溶溶涼氣沁詩腸。箇中妙趣人知少。況有源頭活水長。

花島春香

碧玉波心一島微。春來花卉競芳菲。輕風暖散芝蘭氣。麗日晴烘錦繡圍。唵客幾回凭檻賞。流鶯百轉繞叢飛。可堪美景成虛負。人戀明時未肯歸。

山市曉晴

暉暉晴日照山隈。野市柴門趁曉開。木屐穿花遊子至。綠荷包飯遠人來。化居有道晨常集。拄杖無錢晚始回。會有仙翁來賣藥。壺中咫尺是蓬萊。

洋田朝雨

平田漠漠雨絲絲。曉色溟濛望眼迷。雲脚亂垂沙鷺濕。溪流新漲水禽啼。喜看翠浪翻千疊。眞信黃金在一犁。白首歸田定何日。追隨沮溺隴東西。

送蔣生歸省詩序

邱 文 莊 公 集

禮曰老而傳。所謂傳者。非但謂其家政也。而於其平生所守有所得者尤切焉。夫人非生知。不能不資於學。學非一日之積也。資稟有高低。所得有淺深。而其所以得之也。又有難期焉。苟得之於已而不及用。用之而不克盡。或用矣而無所紹述焉。方其壯也。尙或他有所覲。今既老矣。決無可用之期。或用止於是。而不可復進。與夫用矣而或至於遺忘。不有所傳。一旦湮先朝露。則所學隨身斯盡矣。豈不可惜哉。予自幼志於學。凡身之所至。耳目之所見聞。心思之所注想。苟有益於身心。有資於學識。有可用於斯世斯民者。無一而不究諸心焉。童仕以來。卽以文字爲職業。凡其平日所

邱 文 莊 公 集

學。而似有所得者。隨事以應用。或用之而驗。或用之而不驗。或未及用。用之不知其驗與否。今頭童齒豁。去死期不遠矣。欲一一筆之書以俟後世。冀或有知我者焉。然精力衰。而筆路荒。不能如素志矣。獨奈何哉。每於中夜輿思。撫枕發歎。一世士子。汲汲功利。惟舉子業是務。可與告語者。誰歟。乃歲戊戌。予年五十有八矣。距禮老而傳之歲。僅十有二春秋焉耳。適有喪子之戚。而清湘蔣生。以故人子來見。憫予戚戚也。而慰解焉。蹠而言曰。先生幸與先人有一面雅。冕願執弟子禮以終身。予意其止欲習舉子業爾。拒之。生曰。冕之志。不專有進取。先生進教之。幸甚。時生年未及冠。發西廣解。未利春官。循例當歸家。乃毅然留居京師逆旅中。從乃兄昇。歷仕督府。朝夕來予館下。考德問業者二年。今茲再試。又不利。將歸省其母氏。別予遠去。欲留之而不可得。因念昔宋太史年幾七十。始得方希古。於其別去也。作詩十有四章送之。予雖不敢上擬太史公。然得一英才而訓飭之。喜動顏色。而天理民彝。不能已自其心。則無以異於太史公也。因步

其韻。特筆以送生。其所以期望於生。以永吾無窮之傳者。意在言外。生其念念不忘。無徒謂強聒。一一宜書紳。庶如太史公之所望於其徒者然。詩曰。文章有大家。制作稱妙手。欲知爲文法。如造內法酒。既如蜂釀蜜。又如蠶吐絲。不見勤織女。嫁有百襲衣。至理須靜觀。冥心休外慕。戀戀憂子母。一步數回顧。欲任萬鈞重。寧見頰兩肩。急就無鉅功。凡事無不然。生意暢于春。清氣生於夜。點鐵可成金。糖霜原是蔗。老成悼無傳。賴汝以改憂。我有百車貨。寄汝萬斛舟。悠悠天盡頭。勤行亦可往。有事勿預期。勿忘助勿長。叮嚀出我口。妙契在汝心。愛身如愛玉。受言如受金。織錦由寸縷。成山豈一簣。譬如農耕田。不爲旱潦廢。與其求知人。孰若求之天。西子蒙不潔。反羨媼母妍。采木來山中。彼此初不異。一入工師手。乃獨成良器。

試金當以礪。磨玉須用沙。春融冰化水。日映雲成霞。
我心日思歸。後會難數遇。須知歲月馳。疾似追風驥。
老景難爲別。愁懷未易開。高堂寧覲後。念我早從來。

壽嚴陵先生七十歲詩序

嚴陵先生。以少保吏部尙書兼謹身殿大學士。致政家居之七年也。歲在癸卯。距其始降之年。蒼龍舍甲午天運歷五紀而過之。又將齊焉者也。昔人謂稀有之年是已。夫人徒有是年而無德與位。固已稀矣。况又有德有位而得其年。其爲稀也豈不尤稀乎哉。先期其家嗣翰林侍講良臣。得朝中名公鉅卿才大夫士祝壽詩若干首。自閣老以下咸有之。旣粹成帙。將寓歸。至先生初度之辰以爲壽。以濬老門生也。特以序引見屬。嗟乎所以爲先生壽者。豈可苟同衆人乎哉。夫衆人之所謂壽者以其身。身止於百二十歲也。先生之所謂壽者則以其名。名豈可以歲計哉。蓋將期之以千萬世而無窮也。雖然。先生稟扶輿清淑之氣。生際文明極盛之時。三光五岳之氣旣完。而

所以培植保合之者又益加厚。保之以泰和。休之以元陽。茹之以菁華。其氣清以醇。其質厚以全。身無恙而心無憂。既已越下壽而駸駸夫中壽之域矣。由是而底夫百二十年之壽。則固其所固有者也。固無俟於祝矣。祝不祝。於先生何加損。若夫壽先生之令名於千萬世而無窮。則固先生平日之所志。所謂不在溫飽者之所充而極焉者也。先生少有大志。弱冠試秋圍。即第一。他日試春圍。又第一。進而對大廷。又第一。所謂三元者。皇朝百年以來。僅於先生一見之。甫入翰林。即拔於衆人中。而進于清嚴密勿之地。預聞朝廷大禮樂。大政事。大議論。凡國家有大制作。多出先生手。自筮仕至於休致。始終不出禁門。而名聞於華夷。功著於遠邇。中間雖或暫爲六月之息。然所以培其負大風之力。而爲九萬里扶搖之地益大以遠。故其再出也。位極人臣。治效可稱述。而疵議不加焉。矧又得以未耄之年。而享其清閒之樂。天錫之以金福。人歸之以令名。穆叔所謂三不朽者。先生皆兼而有之。真足以傳之千萬世而無窮矣。其爲壽也。蓋將與天壤相始終。所

謂百年之期頤。百二十歲之上壽。烏足爲先生道哉。

壽李希潤七十歲詩序

壽之言見諸載籍者。始於書。詳於詩。詩之言凡二十有八。爲君父言者二十有七。爲母言者一焉。是皆詩人祝願之辭。所以述人心之所欲。臣子之至情。言之不足而詠歌之者也。後世祝人之壽。必形於篇什者。厥有自哉。海虞成齋李希潤先生。明年年七十。六月二十六日。其初度之辰也。其子侍講世賢。縻於職。弗克稱觴膝下。先期徧于朝之公卿大夫。名能詩者。預賦詩以爲先生壽。且及其母孺人焉。予聞先生履道葆醇。隱聲于海隅之區。介以厲其俗。如徐穉之在南州。德以薰其鄉。如陽城之在晉鄙。誠以召和而致歲穰。如桑庚楚之在畏壘。不出戶庭而知天下之事。不求聞達而致遠邇之譽。不希仕進而來章服之華。以篤厚之資。膺恩封之典。享耆老之年。齒德爵三者俱尊。其庶乎南山有臺之樂。只君子者歟。當夫懸弧之日。賓親畢至。少長咸集。酒醴維醕。殺核維嘉。俎豆既潔且庶。先生蒼顏白髮。頽然

危坐于高堂之上。以受子姓之賀。以次及于姻親朋舊。賀畢而燕。以次起而舉觴爲壽。安知其無效古人斷章取義以賦詩。如左傳所載者乎。爲此春酒。以介眉壽。于以致其親愛之祝者有焉。稱彼兕觥。萬壽無疆。于以致其無窮之祝者有焉。或歌黃耇駘背之章。或詠令妻壽母之句。一堂之間。情意諧洽。禮儀中度。驩忻交通。其樂爲何如哉。引而導之。翼而輔之。其所以享壽祺。介景福。眞有如松栢之茂也。岡陵之高且大也。南山之不騫不崩也。古詩人所云云者。莫不有之。顧惟克家顯宦之子。獨不與焉。寧能不感於心。然而命服之輝煌。天詔之褒嘉。瑰辭麗句之祝讚揄揚。誰所致歟。觀其服章。佩夫詔旨。諷其篇章。則子雖不在側。愈於在矣。韓子所謂子在京師。雖有離憂親心樂者。殆謂是哉。先生以詩學傳家。侍講君受趨庭之訓。旣以三百五篇取高第。爲天子文學侍從之臣。予用是本詩爲說以冠諸作者之端。以爲先生千百歲壽。

壽吳餘慶詩序

邱 文 莊 公 集

斗牛之墟。湖山之間。有臞然一翁。鶴髮皤顏。面如渥丹。超然物外。而不爲聲名利祿之所役。蓋延陵季子之遺裔也。歲在昭陽、大荒落日、躡鵝尾之次。囊開十又一莢。是爲初度之辰。泝其懸弧之始。至是蓋四百二十餘甲子矣。爰有甥館之賓。衣繡持斧。坐鎮于南海之涯。予雖不識是翁。因其溫然之玉。潤澤可挹。則其瑩然之冰。清粹可想見已。門楣之光。發爲孫枝。蘭茁其芽。金英瑤華。來自劍江間安之餘。載求珠玉之章。將寓歸以爲翁壽觴之侑。虛其右簡。請予文先焉。維南有星。居狼之北。秋分之旦。耀芒于丙。春分之昏。收燄于丁。是爲老人。維東有峯。峙岱之巔。近依日觀。視夜如晝。旁睨介丘。望河如帶。是爲丈人。是翁也。其天之老人星乎。其地之丈人峯乎。星體在天。光照下土。芒色寒正。光彩煜潤。翁之明德不汙比之。山盤于地。峻極于天。意氣端重。雲雨勃興。翁之厚德澤物似之。予也不佞。請以是二者。爲翁之壽。且以弁諸作者之前。翁吳姓。餘慶其名。其先自臨川徙豐城之甘塘。又自甘塘徙少塘。今五世矣。其求予言者。翁之外孫廣東

憲副涂君伯輔嗣子耿也。

謝署正輓詩序

哀死以詩。禮歟。曰禮也。曷以知其然。於禮有之。志之所至。詩亦至焉。詩之所至。禮亦至焉。禮之所至。樂亦至焉。樂之所至。哀亦至焉。是蓋發于人心之自然。而形於聲音。合於典則。比於節奏。有以動其怨慕哀痛之情。是豈無故而然歟。此哀死者。所以必以詩。詩必合於禮。禮之中必有樂。樂之至必爲哀。斯豈無故而然歟。一本乎人心自然之天。莫之然而然。雖欲不然。不可得也。近世輓詩。說者謂其源流於田橫義士之作。斯固然矣。抑孰知其所以然者。乃出於人心本然固有之善。秉彜好德之所同然者乎。願昌謝公以善。以子光祿寺大官署正昱貴。敕封如其官。以天順甲申歲卒于家。訃至京師。一時卿大夫士。咸爲詩哀悼之。併及其內子王安人。嗚呼。所謂哀死以詩者歟。禮知生者弔。知死者傷。傷生於死者。而弔生於生人。今謝公平生。足跡未嘗出其里閭。名姓未登於任籍。禮義所施。僅在其姻

族。德惠所及。僅於其鄉閭。而諸君子一聞其訃。徒以其子故。乃哀悼之不已。以至形於詠歎。諧於音律。協於節奏。成於篇章。其辭悲以切。其意幽以遠。美乎淵哉。皆有古詩人之風。中夫禮。合夫樂。而極其哀傷感慕之情。夫豈無自而然歟。署正君既稔成帙。借其鄉友求予序。於是乎書以冠諸作者之前。

贈段通判考滿序

古人於官聯。有朋友之義。情好洽而志嚮同。相觀而善。故能共成事功。以著休聞於無窮。所以然者。合以義。而不以利焉耳。永平太守周君德明。以其同寅段君汝濟之倅郡三年也。將上計於天官。不遠數百里。以書抵京師。求予文贈之。予於是不獨見段君之善於佐政。而亦因以得周君之僚屬相得也。古道不見於今久矣。夫以東西南北之人。偶聚於於一堂之上。苟不舞智以相傾軋。用術以相籠絡。斯可矣。況望其相觀而善如朋友也哉。諸君之爲政。與其所以相與者。予不得而盡知也。卽其求文相贈之意推

邱 文 莊 公 集

之。則其能以義相比可知矣。道二。義與利而已矣。入乎義。則出乎利。義利之不竝立。如薰猶冰炭之相反也。彼孳孳於義。此汲汲於利。其能有合也哉。其有所合者。必有所同也。雖然。同亦非君子之所尚也。易不云乎。君子以同而異。而孔子亦曰。君子和而不同。君子固不可以不同。而亦不可以苟同也。守曰可。而倅曰不可。守曰不然。而倅曰然。同其理。而不同其情。是之謂不苟同。若同聲附和。心不然。而口然之。則是雷同而已矣。義果安在哉。國家用人。必歷九年而後遷他秩。汝濟以名家子。發身儒科。倅是郡今甫二年。其優異之聲。已灼灼乎其昭著如此。其尙圖惟厥義於其終哉。圖厥終如其始。異時京畿列郡。聞有守佐俱廉能著稱致璽書竝褒。而陞秩賜金必永平也。夫謹書以俟。

送莊瑩中赴秀水縣序

金陵莊瑩中。以名進士擢知秀水縣。其友李應禎求予文以送之。且曰郡縣之吏。難莫難於令。而瑩中以妙年書生。初筮仕。即得令繁劇之邑。命下楊

邱 文 莊 公 集

然。懼其難。而圖所以盡其職者。而未得其方。願子一言以勗之。予曰。令而難矣。誠如瑩中所慮者。然其所以難者有三焉。莫難於臨下。莫難於事上。尤莫難於律已。盡是三難而無愧焉。則令之職舉矣。何者。難得者民心也。難知者民情也。難變者民俗也。難察者民僞也。難革者民弊也。難瘳者民病也。萃是數難於令一人焉。必欲事專中其理。人人遂其欲。難矣。事上之難殆有甚焉。徧迫者難事也。貪欲者難事也。忌刻者難事也。徧私者難事也。暴虐者難事也。瑣細者難事也。臨吾上之人。有一於此。而欲行吾所學。使吾志得以直遂。而無掣肘之患。難矣。律已之難。尤有甚焉。莫難制於欲心。莫難遏於私心。莫難懲於忿心。莫難廣於徧心。莫難正於偏心。莫難約於侈心。莫難保於常心。是數難者。一或忽焉。其欲不獲罪於上。賈怨於下。以稱吾之職。難矣。爲令之難。一至於此。可不慮哉。可不懼哉。應禎再拜曰。子之言至矣。請以是語瑩中。俾之思其難。以圖其易。服子之言於無斃。於是乎書。以爲送莊瑩中赴秀水知縣序。

送鄉友富川韋知縣序

鄉友韋君忠。以太學生釋褐爲富川知縣。將之任。友人符君文質謂予曰。凡吾同郡之士。出自學校。調選天官者。拜命之官。吾子皆有文贈之。韋君子同邑。又相好。其不吝於言也必矣。敢以爲請。竊惟富者贈人以財。仁者贈人以言。予也業儒而貧。仁道之大。又非所敢當。故惟竊仁人之言。以爲吾鄉故舊朋友臨別贈。非敢公言於人人也。傳不云乎。能以禮讓。爲國乎何有。是爲治莫先乎禮讓也。吾願君以禮待人。史不云乎。吏以案牘爲師。是居官莫先乎守法也。予願君以法持已。或曰先王制禮。所以治躬。非專於人也。朝廷立法。所以治人。非專於已也。子言無乃偏乎。予嘗觀夫世之爲長吏者。知有勢位。而不知有禮。知責人。而不知正己。僅得一官。自視侈然。甚尊且大。視民如草芥。視士如仇隙。獨不念吾之祖若父。亦齊民。吾之身。亦嘗爲士。吾以人而治人。易地則皆然耳。吾之待人也。不以禮。可乎。已之身。率意肆行。舉手搖足。皆離三尺。法中而不知檢。顧乃從事司空

城日書。專恃柱後惠文冠公以責諸人口。某家於某事可案。某人於某事可論。獨不念吾之所行。一一皆合法否乎。噫。斯二者。天下爲長吏者之通患也。是皆予與君在學校時所親見者也。今君荷國家作養厚恩。一登仕。卽膺七品之秩。有百里之地。慎毋效尤。則予贈言之意。亦諸友同贈之盛心也。

丁守彝哀詩序

鄉進士寶安丁廉。手一帙甚鉅。踵門告予曰。此朝野諸公哀先父菊莊先生之詩也。願爲之序。先生名恒字守彝。予聞其人也久矣。守彝以詩聞一方。其詩冲澹清雅。頗有唐人風致。蓋工於詩者也。生而工於詩。沒而人以詩哀之。不亦宜乎。蓋詩本性情。而情有七。哀其一焉。三百篇中如二子同舟黃鳥諸篇。皆悼死者而哀之之辭也。漢魏以來之詩。如七哀之作。雖不明指其人。哀傷之意。隱然見矣。有唐作者尤多。至老杜之八哀。則歷述其人之行實。而終之以悲悼之情。千百載後。諷而誦之者。莫不悚敬愛慕。如其人

邱 文 莊 公 集

之猶生。悲思疾痛。如其人之始死。不必歷考史傳。而斯人之生平大槩。歷歷然在目中矣。昔人謂杜詩爲詩史。予竊以爲近世哀輓之作。皆死者之實錄也。夫達官貴人。功大名顯。其卒也鼎彝有銘。諡有議。史有傳。固不必藉此以流聲實於後來。若夫山林寂寞之迹。有人隱士。名不載于仕版。跡不至於都市。雖有絕世之行。探頤之學。而昧昧無聞者多矣。自非當代之能言者。取其行之高蹈。悲其生之不遭。形諸聲詩。傳諸將來。夫何以能壽其名於天地間哉。此哀輓之詩所以作。而孝子慈孫所以惓惓於斯也。矧守彝博學能文。而於唐人詩尤其所長。其詩名固已著聞於一方矣。今由諸公之作。殆得以廣其名於四方。永其傳於後世耶。後有知言者。采輯有明一代之詩。因諸公之言。而知有守彝。使其詩得在所選焉。未必不如唐晉中之邵謁也。是爲序


侯教諭哀詩序

人莫不死也。而死得其所之爲難。所以難者。非死之難。處死之難也。尤溪

邱文莊公集

敬諭大台侯邦重。以父怡素處士之沒。哀過而至於毀。不幸卒焉。或者病之。曰聖人立爲中制。教人無以死傷生。今君以親故。哀毀以死。無乃非中制乎。嗟乎。爲子死孝。爲臣死忠。可謂死得其所者矣。然死忠與死孝。實同而異。子之於父。天也。臣之於君。人而天也。人而天者。可以用義。純乎天者。一於用情而已。義有所不計焉。非不計也。不及計也。蓋人之有是身。親所生也。無親則無身。親既喪矣。吾身何有哉。於其泣踊號慕之時。創鉅痛深。五內分裂。上不知有天。下不知有地。中不知有己身。又何暇計其死生也哉。是故親死而哀。哀而至於毀。毀未必死也。而或死之。非故自戕其生以致之死地。而忽不自知。其至於死也。是其死也。盡出於天理人情之至真至切。非若臣之於忠。得以義權其輕重緩急。以爲去就死生者焉。然則君之死也。揆之中道。雖不能不過。然其志則可務。而其情則可哀也已。矧君年方富。學方進。才方可以有爲。乃弗得下壽。乃不階貴位以死。是尤不可大可哀矜也哉。誠宜訃音一聞。一時縉紳大夫士。無不問識與不識。莫不爲之

歎情哀悼。而又長言之詠歌之不一焉。是亦天理人情之不容已者也。君之季父方伯公。稗諸公哀君之詩。既成帙。俾予引諸其端。予故推明君之志。以見其所以死。用以解或人之病君者云。



82

77/20

77/204

籌印海南叢書預告

敝局自開幕以來。已逾三載。對於世界新文化之播傳。已竭盡棉薄。(如多購出版新書及翻印總政治部及中山大學政治訓育部叢書等)獨我瓊文獻。尙未遑顧及。以致地方父老。時相敦促。久無以應。良用歉然。現幸籌備就緒。擬將搜集前賢遺書。命名海南叢書。以便編定次序。先後印行。茲已校訂丘海合集爲第一種。增脛詩話爲第二種。業經出版行世。並荷王堯雲先生廣爲搜集得十餘種。(另表列在本集中卷編末)原本滂漫。中有錯誤。須俟堯雲先生參攷校訂。然後陸續印行。惟印費浩繁。推銷有限。敝局能力薄弱。恐難勝任。尙祈海內外人士。景仰前賢。廣爲推銷。俾我瓊數百年之文獻。不至湮滅。此不特敝局之幸。瓊儕文獻。實利賴之。

瓊州海口海南書局謹啓

海南叢書第一種

邱海合集
中

務學韓卓秦題籤

◀ 行印局書南海口海州瓊 ▶

24614

邱文莊公集

丘文莊公集卷之五

高州府學記

高涼郡學。興於公私力屈之時。可書也。天下之事。動之有機。用之有要。爲之有其方。則不難於成。十數年來。海以北地。爲蚬獠所侵擄。民十喪其七八。官府岌岌然居民上。凡事一切蠹具。上之人。亦不甚拘以文法。按以故事。至於學校一事。尤以爲不急之務。視之蔑如也。廣東按察副使闕里孔公韶文。獨慨然太息。以謂民物凋弊甚矣。必欲復承平之舊觀。非振作士氣。固結人心不可得已。必欲作士氣。結人心。亦惟鼓之以其機。提之以其要。行之以必效之方。然後庶幾焉耳。學校者。申明教化之所。義理之所從出也。所謂動之之機。用之之要。爲之而的有可效之方。其不在茲乎。始公以名進士。出知邊縣。擢知高州府事。以撫綏得宜。控制有方。爲當道者論薦。起貳憲臺。奉璽書專理高雷二郡兵務。然其心尤惓惓於高。顧爲士



(南)

邱 文 莊 公 集

氣疲靡。人心渙散。所以鼓而舞之。萃而聚之。非學非廟。厥道何繇。所以申明教化。使民知所趨向。講明義理。使民知所感發。無有先於教學之事者。於是節縮費用。量度事宜。取用於財屈之餘。役力於民鮮之時。其所施爲措置。蓋視他郡尤難焉者。凡學制所當有。若大成殿。明倫堂。從祀之廡。分教之齋。其規制一復承平之舊。而又有加焉。知高州府事豫章胡侯琳。知名縣瓊山曾君英。以書遣永福文學楊拱來求予記其成。昔魯僖公脩泮宮。春秋不書。說者謂常事爾。彼春秋之世。雖曰征伐盟會。歲無虛月。然當是時禍不及民。是以學校之脩蓋未廢。雖不書可也。若夫今日高涼之境。自夫有司不戒於其初。遂馴致於田里蕭條。民無蓋藏。凡所以養生送死之具一切蕩盡。尙何有於教與學哉。於此之時。有能以餘力及於教學之脩。可例以爲常而不書哉。孔公舉此。可謂得其機要。而必有可效之方。蓋教化既脩。義理自明。義理明。則仕者知有備無患之義。先事則豫防而宿戒。已事則謹守而嚴持。知食焉死事之義。無事則與民相爲心體。有事則與城相

爲存亡。爲民者知入孝出弟之義。時平、則服勞樹畜以事其父兄。患至、則衛之如手足之於頭目。知尊君死長之義。平居、則趨事赴王以奉其長上。臨難、則衛之如子弟之於父兄。夫然。則學校之設。不但聚生徒以講學。育才以需用而已。詩曰。既作頻宮。淮夷攸服。蓋理明則人心固。人心固則士氣作。士氣作則彼蠢然冥頑者。亦將惕然感動。幡然歸順矣。運其機。舉其要。行其方面必效者。孰有過於此哉。於是不辭而爲之書。

梧州府縣廟學記

梧郡、介兩廣間。實爲嶺海要地。皇上以邊疆之不靖也。命御馬監太監陳公。都察院右都御史韓公。平江伯陳公。昇以節鉞專征之柄。以總鎮兩藩地。未幾、平江公以召去。而平鄉伯陳公實來繼之。武功告成。邊鄙肅清。于時韓公實任總督之寄。諭于衆曰。武功雖可以遏絕亂略。然非聖人之所尙也。所以柔人心。而銷輒其強梗之氣。莫若脩文教。脩文教。莫若興學校。太監公聞而是之。爰主其議。而前後兩總戎公。議皆克合。一時兩廣藩臬諸

邱 文 莊 公 集

公。以事在梧者咸與焉。於是庀材鳩工。大肆興作。拓其基而大之。撤其舊而新之。材足而良。工能以勤。都憲公視事之暇。躬焉督視。衆心齊同。畢力殫藝。曾未踰時。規制咸備。中爲禮殿。翼以兩廡。繚以周垣。廣庭重門。一一如制。郡學岐其左。邑學峙其右。講誦之堂。齋祭之室。會食休宿之所。以至於庖滷庾庭。凡學制所當有者。兩皆備焉。閎麗靚深。爲兩藩學校之冠。議者謂非獨嶺以南所未有。雖中州亦不多見也。父老相與議於鄉。曰。鄉也室家之不保。何有於學校。士民相與議於途。曰。鄉也奔走之不暇。何有於讀誦。呻吟之聲。化爲絃歌。棘莽之區。變爲俎豆。伊誰之功歟。是不可不知所自。於是廣西按察司副使范君。布政司叅議黃君。因衆心之所願欲者。求予文以紀其實。將刻諸石。以垂永久。竊惟有虞舞干羽于兩階。而有苗格。魯僖作頤宮。而淮夷服。孔子亦云遠人不服。則脩文德以來之。則用文德以服遠。其來尙矣。雖然文德之敷。必在於徂征之後。蓋先有以折其氣。而後有以服其心。苟非大禹先有徂征之師。則兩階之間。七旬之舞。豈

邱 文 莊 公 集

能遠格有苗於萬里之遠哉。是故文德武功。必相爲用。又必有定所。有常時。而後可行之久遠焉。學校者。文德所從出也。於此明倫。於此講道。於此同風俗。於此造人才。出征則於此受成。振旅則於此獻馘。鄉則於此飲酒。射則於此比耦。與凡歲時禮節。帥民讀法之類。咸於此焉行之。開人心忠孝之天。立國家紀綱之地。扶世教於不墜。廣材用於無窮。此先王立教之大端也。若夫作士氣於委靡之餘。折理謀於萌芽之始。歛強悍之氣。以圍之道義之區。斯又其微意所在焉。公建學立廟之意。其有見於茲歟。予旣敘其實。而又竊魯人作詩頌泮水之義。繫之以詩。俾邦人士歌誦公之盛德。永永不忘也。

桓桓學宮。于江之滸。禮殿中峙。翼以周廡。左郡右邑。兩岸夾輔。經閣峨峨。圖書之府。講堂渠渠。論道之所。棲士有廬。養賢有庠。有庠有滸。有庭有戶。凡制所有。莫不備舉。室于斯楹。墉百其堵。式完以整。鱗鱗雅雅。如砥之平。如聲之翥。如日星之麗。如枝幹之附。像設維肖。器用不

竊。有事上下。上下降俯。於論鼓鐘。於舞于羽。麗牲有碑。薦醴有俎。駿奔在列。心虔貌儻。有翼其趨。十百其侶。闐闐啾啾。篋笥斯鼓。準圓於規。則方以矩。容貌僂僂。衣裳楚楚。言笑詡詡。和樂姁姁。匪道弗談。匪善弗取。百越之墟。千祀之宇。土風民俗。變而中土。如古鄒魯。如漢穎汝。揆厥所元。夫豈無故。曰安陽公。今之申甫。柔不爾茹。剛不爾吐。爾饑而寒。我翼以哺。爾兇而頑。我礎以斧。不飾而文。不威而武。新宮告成。四方來覩。父詔其子。孫承於祖。相話以言。銘鏤肺腑。曰今學宮。昔焉草莽。倏然而成。莫匪神助。匪惟學宮。我室我處。我田我耕。我子我乳。今我所有。孰非公之所與。公不自有。歸之當宁。予因民心。代天作語。述此銘詩。以詔終古。

瓊山縣學記

孔子生於魯。魯之南境則楚。北境則齊。當孔子時。楚竟淪於蠻夷。齊必一變而后僅可至魯。魯聖人之鄉也。亦必一變而后可以至於道焉。然當孔子

邱 文 莊 公 集

世。魯之治化。竟未聞其能一變而底於時雍之域。況今去聖人之時。餘二千年之久。距聖人之居。幾一萬里之遙者乎。瓊在禹貢荒服外。漢武元鼎中始入中國。其去聖人之居甚遠。服聖人之教最後。其於聖人之道。蓋聞風而興起。非有所觀感而過化者也。然今日衣冠禮樂之盛。固無以異於中州。其視齊魯亦未或有過之者。豈孔子欲居九夷之志。乘桴浮海之歎。豫有以定於千載之前。萬里之外哉。瓊山縣居郡郭下。郡有瓊山。譬則人身之有首面。邑有學校。譬則首面之有眉目也。茲邑實爲諸邑之首。其學校亦視諸學爲冠。邑有學。肇於宋。始遷今地。則在國朝洪武九年。自是以來。雖屢加脩繕。而僅取苟完。無經久計。成化乙酉。廣東按察副使會稽唐君質夫。行部至瓊。始發官賞。與知府清漳蔡君叔清。脩復明倫堂。暨崇禮養正二齋。功未就緒。歲辛卯。憲副豐城涂君伯輔奉璽書。專鎮海南。留心學校。乃市旁近地以廣學基。兼助其費。以畢前功。又創會饌堂。及號房三十間。知縣事五羊梁昉預力其間。訓導高涼周書專董其事。旣訖。王。以記見屬。予邑人

邱 文 莊 公 集

也。知瓊之教事爲詳。說者謂瓊士未知學。蓋自宋姜君弼。從學蘇公子瞻始。殊不然。公作伏波廟記。謂自漢末至五代。中原避亂之人。多家于此。今衣冠禮樂。蓋班班然矣。觀公此言。則其未渡海以前。已有衣冠禮樂之盛。至公始益變爾。皇朝洪武中。姚注趙謙古則來典教事。一時士類。翕然從之。文風用是不變。至今瓊人家尙文公禮。而人讀孔子書。一洗千古介鱗之陋。出而北仕於中州。中州士大夫不敢鄙夷之者。未必無所自也。謂非學校教學之功。可乎。今世學校。所以爲教者。非六經孔孟之言。在所擯斥。三尺童子。人人知性之本善。而有荀董楊韓之所不及知者。豈今世童子固勝於前世鉅儒乎。教素行也。教行。則道明。推諸四海而準。瓊處大海極南之陬。去齊魯幾萬里。而道之彰彰然著明如此。是知聖人居夷之志。浮海之歎。不行於駕說之時。而著於奠楹之後。蓋百世可知也。昔之學者。不遠千里。裹糧負笈。以從師干遠。今聖人之道。與王者之化。並駕而偕行。隨在而有。經有常說。不假於辨難。學有常師。不假於外求。居有常所。不假於

游從。食有常廩。不假於經營。今之爲學者。固易於古人數倍矣。於此而不知所以自勉焉。甚至於自暴自棄。豈非聖世之棄材。名教之罪人也哉。予忝生是邦。於邑士爲鄉先達。故因記學之成。廣二憲副公作興之盛意。而規之以言。非獨儆于今。且以示來者於無窮云。

萬州遷學記

昔史臣紀禹貢山川。而終之以聲教所至。其東西北。皆以地言。至於南獨言其方。蓋以聖人體天爲治。面之所向。目之所視。其明德之光被。初不可以地里限計也。廣海居中州之南。瓊又居廣海之南。瓊之支郡曰萬者。又居瓊之南。茲地在禹貢時。因遠在荒服之外。然當是時聲教所訖。東止海。西止流沙。北止朔方。今閱數十代。更數千年。其三方固未嘗越之而有所加也。惟南則日闢日遠。雖以區區四州之地。去中國萬里之遙。而郡縣之建。學校之設。與齊魯不殊。豈不以南者離明之方。文明之地。萬物皆相見於此乎。萬在前代爲萬安軍。附郭邑曰萬寧。皆有學。國初改軍爲州。正統中。

邱 文 莊 公 集

罷萬寧縣。而學隨以廢。成化壬辰。衆以州學湫隘。縣學之舊基。則高亢而明爽也。議欲遷之。適廣東副按察使涂君奉璽書。專鎮于瓊行部。至萬。爰主其議。乃命守備指揮舒翼。知州梁某董其事。經始於是年某月。訖工於明年某月。新學告成。衆謂不可無記。乃遣鄉進士曾昌來求予文。惟都邑有學校。猶其有苑囿。然儒峻在民間。譬則草木生於原野也。殊形異種。叢生散處。藝圃者移彼置此。區別而羣聚之。栽培灌溉。各順其性。而不戕其生。慮其不能敏成而速化也。又易置其處以冀其速成。使凡在吾所培植者。皆足以資世用。而不棄捐於人。諸士子生民峻之家。選入庠序爲弟子員。何以異此。上之人所以培植滋潤之功。如此其至。而又擇夫高爽之處。以廣所居。其尙思所以挺立拔出。以爲向陽之草木。欣欣然就陽明之光。求以自異。夫陰崖寒谷之所生者。異時由郡圃而進於禁禦。其爲臺萊。爲桐椅。爲新甫栢。爲徂徠松。爲衛武公之葦竹。爲召伯之甘棠。爲周王之棫樸。使夫天下後世之人。咸曰聖化自北而南。日遠日盛。雖遐方之地。不異中州。百世

之下。不異古先。顧不偉歟。

道南書院記

道學復明于宋。起自西南。而行於中州。其後也。復還於東南。蓋天示奎文。以開有宋一代文明之治。生周子於道州營道縣。歷四葉。天子以明道紀年。是歲明道生于黃州之黃陂。明年伊川生。大賢所生。其地其時。皆不偶然也。二程倚其父大中公。宦游南安。周子適官。於是承父命從學焉。是則道學之興。其始蓋自南也。程子既長。歸北方。乃以其所得於周子者。教河洛之間。一時南北士。多從之游。南方之士。其尤著名者。游與楊也。游之別也。程子未嘗無贈言。推龜山先生之行。特發爲吾道南矣之歎。所謂南者。非道始之南也。道終歸于南也。嗟乎。先生之歸。豈但儒道隨之而南哉。曾幾何時。而世道亦從而南矣。雖以嵩洛間人。亦不復知有程學。幸而奎文道脉。中興於南。朱子者出。斯道乃大明于甌閩之間。使天下後世。知有聖賢全體大用之學。帝王大中至正之道。萬世行之而無弊者。其功大矣。後

邱 文 莊 公 集

之人。推原所自。咸歸其功于龜山先生。蓋以周程二三子。發明孔孟不傳之秘於絕學千五百年之後。演斯道之脉而延之。傳常行至今者。非先生之功而誰功。傳曰道待人而後行。當宋運中否。假使世無先生。則無朱子矣。無朱子。則周程以上所傳之要。堯舜以來相承之緒。必至中絕。其所關係豈輕故也哉。是以尙友古人者。不徒論其世。而必表其地也。謹按先生自五世祖來居將樂。初師程伯子于潁昌。繼師叔子于洛。得道南歸以授其徒羅仲素。仲素之先。豫章人也。避地來居南平後。徙于沙。仲素於楊門。獨能任重詣極。以所得河洛之學。授其同邑李愿中。而朱子淵源。實於是焉出。是二先生者。皆劍產也。而朱子亦生劍之屬邑尤溪。夫以一郡之狹。四邑之小。二三百里之近。百年之中。乃有四賢竝生于一時。上承下啓。以延千萬年道學之脉。其地蓋視東周之鄒魯也。昔孔子生於魯。當成周之既東。乃欲興其道於東方。蓋謂魯也。然而竟不得如所志。惟以斯道傳其徒曾參。參以傳聖孫伋。伋傳於鄒孟軻氏。後世稱斯文之宗。必曰孔孟。稱文獻之邦。則

邱 文 莊 公 集

歸鄒魯云。方宋盛時。孔孟之道。大行於河洛之間。是時尚未南渡也。先生歸延平。程子已謂其載道之南。其後果有羅李二先生繼先生而起。以傳其道。集大成於朱子。今天下家藏朱子之書。人習朱子之學。夫孰不知其淵源。來自紫陽。而聚徒講授於考亭雲谷之間。以發揮程學。上邇孔孟之傳。抑亦或有不知劍浦之濱。九峰之麓。乃朱學所從來之要會者矣。苟非當路君子有以表章之。夫孰知其然哉。鄱陽蘇章。蚤習程朱之書。以明經登進士第。歷官郎署。來知延平府事。慨然欲推所學。以見於行。首以化民成俗爲政。恒謂世之論道學所興之地。必曰濂洛關閩。閩八郡而分上下。茲郡實居上下之中。西與建境。其西之趨會府者。沿劍津而下。東與福境。其東之朝京國者。沂劍津而上。或往或來。何莫不由於斯。閩中所產士。以朱子爲第一流人物。而閩士所建立者。以重明道學。爲第一等事功。延平爲郡。雖僻而小。然其所關係甚重而大如此。非但有光於八郡也。於是與其同寅通判府事應元徵。推官王鐸。圖所以厚報祀而大顯揚之者。僉曰三先生

於南沙將樂。舊各有專祠。近又於郡城北隅。合而祠之。毋庸致力矣。今吾儕新構公宇。以爲朝命重臣駐節之所。甫爾告成。而未有名稱。蓋揭道南二字。以爲書院之榜。以示八閩士民。與夫四方宦游士大夫。凡使節往來。及以事經行者。俾知茲郡爲道學重興。淵源所自之地。不亦韙與。侯曰然。遣伴來求記於予。予旣推原斯道所以南之故。及其書院所以名者如前。又爲記其規制歲月。曰書院在府治之東。廣丈十有一。長十有七。前爲三門。後爲廳事。中爲堂。最後爲燕息之所。前後各六楹。竝翼以兩廡。通環以周垣。經始於弘治壬子春。其落成則是歲之秋八月也。

賜進士題名記

太歲上章閏茂。是爲大明弘治二年。皇上奉天承運。賢俊登庸之第一榜也。故事旣賜進士第。必立石太學。以示久遠。禮部臣以題名記。請皇上以命臣濬。臣於是時叨居讀卷之列。而文武群臣合辭上賀之際。實與焉。伏惟賀辭有曰。天開文運。賢俊登庸。夫謂之運者。氣化流轉之名。有天運焉。有世運

邱 文 莊 公 集

焉。有文運焉。天運則無往不復。世運則歷數相乘。若夫所謂文運者。綜天經地緯之機。顯神功化理之妙。凡在宇宙間開闢以來。三才之道。五倫之教。六經之旨。萬事萬物之紀。咸具于茲。匪徒圖書字畫。言詞藻繪而已也。蓋必天運循環。否極而泰。聖人應運而生。握持斯世。身任乎斯文在茲之責。正倫理。明經術。以丕弘治道。儲民俊而教育之。掄士秀而登庸之。資其彌綸參贊。用人文以化成天下。而文運於是乎興。雖人之爲。而天實啓之也。粵自帝堯以歲甲辰開華夏正統。以闡文教。歷甲辰者六十又三十六年。至宋祥興己卯。而文運遂以否塞。我太祖高皇帝。生應昌運。以歲戊申開國建基。以復中國境土。載闡人文。既用興王良佐。建大業。垂大統。以開一代文明之運。然猶思所以爲聖子神孫可繼之道。即於次三年庚戌。詔天下設科。以其懷才抱德之士。明年親策之於廷。歲乙丑。遂定爲今制。至是六千十一子再周天。前後三十有七科矣。肆我皇上。亦以歲戊申繼統。適符聖祖創業之年。而次三年開科策士。亦龍集庚戌也。乃今三月望。皇上御

邱 文 莊 公 集

奉天殿。親出制策。試禮部所貢士。次其甲第。賜錢福等三人進士及第。楊旦等九十人進士出身。祝祥等二百五人同進士出身。彬彬濟濟。鵠立於丹陛之下。以聽鴻臚句傳。揭黃榜于魏觀。一日聲名遍乎天下。文武羣臣公廷合辭。以賢俊之名歸之。爲九重賀。於乎。名歸則責隨之。賢俊之名。何可當也。必爲一世人豪。如虞廷之黎獻。周室之克俊。詩所詠之譽髦。傳所稱之天民。史所書之國士名臣。然後足以當之。不然。碌碌庸庸。冒賢俊之名。而欲覲其登庸。以享有爵祿可乎。矧斯時也。正當皇明千載特起之運。聖神繼照。世運亨嘉。斯文之運。至是益恢以大。三光五嶽之氣復完。人文昭宣。噫。茲何等運邪。斯士也。皆世所謂長才秀民。傑然於衆人之中。乘此氣運之盛。得以所學爲聖天子之所親擢。將進而官。使之以弘一代文明之治。明良相逢。上下交而其志同。噫。茲何等遭際耶。當此氣運。有此遭際。乃甘於暴棄而無所建明猷。爲非夫也。豈不負明時而玷大科哉。

江都縣學進士題名記

邱 文 莊 公 集

自黃帝正名百物以後。有一物必有一名。然物有時而盡。惟名則不特形以生。而長留於天地之間。所以然者。有聲音文字以寓之。蓋聲音文字。根於心。出於口。而具於點畫之間。著于簡冊。刻于金石者。百世猶一日也。自唐以來。始有題名記。盛于宋。而極于本朝。故事凡登進士第者。刻其名于石。列于太學。而天下郡縣士有登甲科者。亦列其名于學宮焉。江都、揚州、附郭邑。自昔稱揚一、益二。天下州郡之盛。揚州爲最。揚州屬邑。江都爲最。是以人才之生。江之北。淮之南者。以是邑爲稱首。雖然。士生民中。猶人生物中也。天地間物生多矣。然一物有一名。名同而物無不同者。惟人之生。同一形體也。而人之名則人人殊。一人有一名。千萬其人。則千萬其名。以至于億兆皆然。自有此邑以來。人生其間者。何止億兆之億兆。而名存于世也。萬不一二焉。漢以前不暇論也。自唐以後。揚州戶口。見於史者。在唐戶七萬七千一百五。口四十六萬。而人士之有名列傳者。曹憲、王紹宗、李邕、李鄴、及鄴之孫礪僅五人焉。在宋戶五萬六千八十五。口十萬七千。而

人士之有名列傳者。孫洙呂溱輩不過數十人焉而止。彼生而具人形。書于版籍。登於天府者。人人有一名也。人呼之。而已應之。久而至六七十年。遽已與草木同漸盡矣。而唐宋此數十人者。夫何朝代數更。而其名姓。恒若生者。託之聲音文字之間然也。然其所以得託於聲音文字間。而有以爲不朽之傳者。是豈無其故歟。穆叔有言。太上立德。其次立功。其次立言。是三物者。所以壽其名於不朽之具也。江都縣學。而洪武乙丑開進士科以來。登名黃甲者。遑遑有之。然未有爲之題名者。今知縣事會稽董君豫以名進士來尹于茲。謂爲政以人才爲先。治民以法。不若以教。報國以身。不若以人。思所以作興其人才。俾其知所以奮發。出而爲國家之用。視事未久。卽白于巡都憲張公、督學御史婁君、太守楊君、命工礱石。題前進士之名。以爲後進士之勸。乃走書京師以記來請予。故學穆叔之言。俾勒諸貞石。以示江都之士。雖然。德也。功也。言也。實之謂也。而能立之。則名在焉。有其實。斯有其名。徒有其名。而無其實。後之人將指其名而責以其實。實之無。

而徒名之有。不若無之爲愈也。無實之名。非惟人不喜堪。造物者亦將不吾堪矣。可不畏哉。可不勉哉。

餘姚縣學進士題名記

名爲天地間不朽事。蓋天地間。萬形皆有盡。惟名也者。雖因形而有。不隨形而盡。其爲事恒不朽。而長留於天地之間。是以自古聖賢。形皆漸盡。而其名恒彰彰故在。歷百千萬世如一日然。談之者不置口。而聞之者猶知起敬起慕。夫豈無自而然哉。三代以來。銘鼎彝。紀太常。載載籍。皆其事也。然各隨其世之所重。而著其名。以傳之不朽。自夫科目之制興。而世之所重者在進士科。朝廷旣重之。而士之得之者。亦知自重。往往有名於天地間者。皆自此塗出也。故所在學官。輒醵石爲碑。紀已得者氏名。以爲未得者勸。宋以來則然矣。今天下郡縣多有之。而紹興之餘姚縣獨闕焉。羅山胡瀛孟登。以名進士來知縣事。慨然歎曰。餘姚爲兩浙壯邑。入皇朝百有餘年。浙以東。士以文魁天下者。僅五人。而二人者出吾邑中。而辛丑一

邱 文 莊 公 集

榜。天下三魁。而吾邑又得其二。某待罪邑中。適逢其會。所以紀其盛。而昭之遠者。職也。因龔石爲碑。具其事。白郡守浮梁戴君琥。適邑人張叅議琳來。因具書以請記于予。爰自天開地闢。以至于今。人生天地間何限。而其氏名著五經十九史中者。蓋無幾。嗚呼。人而得一名於天地間。夫豈易哉。姚邑人著名史傳者。自漢嚴光始。厥後由科名發身者。惟孫子秀一人。列名宋史傳中。他蓋未之見焉。嗚呼。一邑百里之間。歷數千百年之久。而垂名不朽者。僅僅若此。山川之秀所鍾者。止此數人邪。其餘皆與草木同盡。而此數人者。恒昭昭而不朽於天地間。其必有所自也。夫聖朝進士科。視前代加重。而於掄魁之選尤重。惟其爲士之人所重。故天下之人莫不重之。重之斯望之。望之深而不副所期。此責之攸歸也。孟子曰。惟仁者宜在高位。不仁而在高位。是播其惡於衆也。然則有是名者。紀于郡乘。刻于貞石。列于其學宮之中。其播今而傳後。非直一時在高位也。形去而名存。長留。在天地間而不朽。仁之名。固假是以長存。而不仁之名。亦由是以長

暴著不亡。後之人將指其名。而責其實。而加之以仁不仁之稱。吁可畏哉。往者已過。而來者續之。將若之何而可。董子所謂正誼不謀利。明道不計功。仁者之事也。立德立功立言。率以是而存諸心。以共成天下國家之務。是則天地間不朽之盛事也。請以是代二君言。爲邑人士後來者勸。

會通河土橋石牓記

皇朝因勝國會通河故道。而深廣之。通江淮漕。以實京師。餘六十年于茲矣。然地勢多變。天時不常。盡人事者必隨時因勢以節宣之。然後盡其用而利濟於無窮焉。自河決陽武。潰出張秋之後。朝廷既命大臣築塞之。以復其舊矣。然其間猶有所壅滯之處。一時任事之臣。隨所在而爲之防備。非一所也。河流經東昌府之堂邑縣境。地名曰土橋。其上流之牓曰梁家鄉。沿而至是。十有五里。下流之牓曰載家灣。泝而至是。四十有八里。又三十里。抵臨清縣之上牓。漕舟至此出會通。而下漳御。僅七八里爾。輒膠於淺。而不能行。日集而羣聚於土橋。上下十數里間。舟人叫囂。推挽力殫而聲嘶。望而

邱 文 莊 公 集

不可至。主漕計者病焉。時山東按察僉事陳君善，專理其境之運道。議於此，建牋以積水濟舟。屢言於上。而弗見報。會都憲翁公、巡撫山東。所至詢民疾苦。君乃以狀上公。具聞諸朝。天子可之。下其議於工部。仍命吏部設官，如常制。公得請。躬蒞其處。區畫事宜。俾君專其事。君計徒庸致財用。授其屬東昌府通判馬聰等督工。即於所謂土橋者。建石爲新牋。凡其規制之廣狹長短。與夫疏水之渠。祠神之宇。蒞事之署。一如常度。經始於成化癸巳冬十有一月之朔。至明年甲午春三月告成。於是水之渙散者有所束。而舟之往來者無所阻。省常歲挑浚之役。薪藁之費。奚翅千百。未幾，公入朝爲地官少司徒。而陳君亦陞本司副使。人之嘉其績而蒙其利者。恒如一日。歲丁酉。陳君，乃以書來。俾予記之。竊惟水生於天一。而成於地六。其大用在滋稼穡以養人生。其生於天者。旣潤其載穎之苗。俾生生以爲民矣。其成於地者。復浮其旣粒之實。俾陳陳以爲國計。順天地自然之理。平其勢以通其利。非大君孰主張是哉。君主張於上。臣輔成於下。此古者劄

剡疏鑿之功所由興。而後世河渠堰牖之利所由設也。漕運之制。雖始於禹貢。而特盛於漢唐宋之中葉。然所漕者。江也。淮也。河與渭也。彼皆各因天地自有之勢。惟汴出於人爲。而其初意。在於般遊。後世特假之以漕焉耳。惟我國家竝建兩京。據西北之形勢。而用東南之財賦。中間南齊魯北之境。氣勢衡絕。脈絡中閼。爰尋故道。引汝泗。循淮濟。會通漳御。以達于燕。於是則用豐而形勝益壯矣。是則會通一河。雖若有所因。然昔人啓其端。未大著其効。若夫弘深廣運之功。則有在乎今日也。其大規畫。大體勢。固本乎朝廷。若夫因時隨勢。節備而曲通之者。其任事之臣。不爲無助焉。予謹因一牘之役。而推原其本如此以爲記。庸以示夫後之人。

紹興府新修水利記

紹興、居浙東下流。凡隣郡及屬邑之水。多會于斯。以入於海。有東西二江焉。東江於民無甚利害。惟西江之水。則會稽、山陰、諸暨、蕭山、四邑之民。實資以爲利。而亦往往有害於其間。故昔官于茲。有志利民者。若馬氏之築

鑑湖。龜山之築湘湖。趙彥倭之築海塘。皆於是江焉以致其力。其遺迹可考也。雖然。土地變遷。古今異宜。固有昔然而今不然者。君子舉事。視夫利之所在者何如爾。又何陳迹之泥哉。當是之時。水散流以入於海。利在于蓄水。是宜昔人築塘積堰。而禁民廢湖以爲田。今則塘堰久廢之餘。凡昔日汪洋沮洳之區。莫不眇眇而芄芄。悉成膏腴之壤。四邑之民仰給以生。生者。非一日矣。尙欲泥其迹而不知變更。可不可哉。此紹興知府戴侯琥水利之興。所以異於前也歟。侯以名御史。來知郡事。下車之初。問民疾苦。知其所患。莫急於水利之修。乃躬臨其地而徧閱之。以求其利之所在。與害之所必至。備得其實。乃擇日庇徒。於其要害處。建石爲埭凡六。在山陰之境者五。曰新竈。曰栢林。爲洞者四。以泄江南之水。曰夾蓬。曰匾陀。爲洞者三。以泄江北之水。曰新河。爲洞者二。以泄麻溪五湖之水。在蕭山之境者一。曰龔山。爲洞者二。以泄湖湘之水。蓋旁近谿澗之水。下流皆胥會于小江。龔山有埭。分以小江之勢。而新河之埭。又併小江諸水。悉引而西

莊文公集

焉。其所建置。疏塞啓閉。咸有法則。斷斷乎必有利而無害。必可經久而不壞。諸費一出於官。而民無與焉。於乎。若戴侯者。所謂良二千石者。非邪。郡之耆舊。封給事中張蘊輝父爲鄉人倡。適節推蔣君誼以事來京師。屬求予文。以永侯之功於不泯。竊惟五行之用。水土爲大。土爰稼穡。而所資以生者。水也。水之在土也。潛則泉。發則源。流之則爲川。塞之則爲淵。潤下之性。固無往而非利也。然或失所制。則往往或能以爲害。故水必賴土以制之。人因而用。畱其所不足。而放其所有餘。適夫過不及之中。然後能成生物之功。其大用在滋稼穡。以養民生。善用之。則燥陽不能以亢。濕陰不過於淫。而草木蕃蕪。百穀用成矣。此古之明王。所以必謹於溝洫坊備之制。而世之良吏。亦必舉夫疏通濬蓄之政。有以也。夫紹興古名郡。吏治之載於史冊者。代有其人。而尤以興水利爲良。今而遺蹟或存或湮。而百世之下。蒙其利而仰其德者。恒如一日。戴侯繼前人後。而興此役。雖不拘留其已往之陳跡。而其利民之心。則固昔人之心也。後之繼侯者。人人

存侯之心。行侯之政。次第而推廣之。則其利之在民者。庸有既邪。於是乎書以爲記。蓋美前政之良。以啓後之繼者於無窮焉。

瀛洲橋記

水在天地間。爲利最大。爲性至險。可用也而不可蹈。可涉也而不可越。聖人者。任裁成輔相之道。設卦以占其利涉與否。而又制器以爲利涉之具。順而行之。爲舟爲筏。逆而度之。爲橋爲梁。既有其具。則地之勢盡矣。而人之行也不止。地之形斷矣。而人之行也不絕。由是而極天所覆。地所載之處。無不可至焉。閩爲東南輿壤。川流不出其境。舟固隨流沿遡上下于其境中。若原陸衢途行。所必由水中斷。而地橫絕。所以截流而渡者。又必有橋梁之設焉。建郡。居閩之上游。而建陽。又居郡之上游。是爲徽國文公講道之所。其地視魯闕里。萬世道統闡于此。四方書籍聚于此。其邑雖小。而其所關係甚大。矧爲江淞入閩之咽喉。八閩人北出而朝于京闕。未有不由此者。去縣治十里許。舊有橋曰瀛洲。在考亭書院之右。昔元定先生謫道

邱 文 莊 公 集

州。文公先生嘗率諸生餞之於此。蓋邑之最勝處也。人士過此者。想二先生之高風大節。必徘徊歎咏而不忍去。庶幾有感發興起之助。非但以利濟往來之人。俾其不病涉而已也。永樂丙申。洪水泛漲。橋圯者六十有二年矣。成化丁酉。瓊臺海澄靜之。以乙未進士來知建陽縣事。慨然以興復爲己任。始與寮屬熊傑輩。捐俸以爲民倡。適貳守古曹李君明以事行邑。專委典史趙銘以經理之。而董其役者。耆民陳嬰丘童、陳志、翁泗、僧鷺峯也。經始于歲丁酉春三月。告成則庚子歲秋八月也。橋之下有石墩七。上爲屋四十有一。嗚呼。物之成敗。雖有五數。而其所以成之者。未必不由人之智識才力也。方是橋圯時。天之十千十二支相配。至是一周而又過之。中間蒞是邑者。豈無賢令。佐按是邑者。豈無良守貳。暨明部使者。及是邦之人。亦豈無市里之義俠者邪。然而卒有待於今日者。有由然也。昔孟子譏子產惠而不知爲政。文公先生。亦舉蘇長公言。謂其有及人之小利。無經世之遠圖。嗟乎。一橋樑之廢興。固若無甚大關涉者。而大賢君子。往往以是而察其

人之所爲所圖。夫豈無徵之空言哉。靜之初舍鉛槧之習。以臨吏民。即能有餘力以及夫徒杠輿梁之事。亦可謂識治體者矣。雖然。古者徒杠輿梁之成。一歲事也。若夫後世石梁之建。則又以世計焉。事尤難於古矣。夫成之固不易。而敗之亦不難。文公先生記上清橋。欲後之君子知其成之不易。相與謹視而時脩之。今茲橋在文公之鄉。而予爲之記。請即文公斯言。以爲其後之君子告焉。

唐丞相張文獻公開鑿大庾嶺碑陰記

嶺南。自秦時入中國。歷漢三國南北朝至于唐八百八十有八年。丞相張文獻公。始鍾光岳全氣而生于曲江之湄。時唐高宗咸亨四年癸酉也。公生七歲。卽知屬文。十三以書干廣州勅史王方慶。是時已爲張燕公所知。年二十五登進士第。授校書郎。蓋公長于武后時。不欲仕女主。至中宗復辟之三年始出也。玄宗即位之初。又策道侔伊呂科爲左拾遺內供奉。開元四年。承詔開大庾嶺路。唐書地理志。謂開路在十七年。非也。當以公序文是年爲

集 公 莊 文 邱

是。燕公於開元十二年薦公、可備顧問。明年燕公卒。玄宗思其言。召公爲秘書少監、集賢院學士知院事。會賜渤海詔書命、無足爲者、召公爲之。被詔輒成。遷工部侍郎知制誥。尋遷中書侍郎。是歲又拜同中書門下平章政事。又進中書令。與李林甫裴耀卿竝相。林甫無學術。見公文雅。爲玄宗所知。內忌之。竟爲所傾而罷。公在相位甫二年耳。俄以周子諒事、出爲荊州長史。卒年六十有八。公之氣節文章、治功相業。著在信史。百世共知。自公生後。大嶺以南。山川灼灼有光氣。士生是邦。北仕於中州。不爲海內士大夫所鄙夷者。以有公也。凡生嶺海之間。與夫宦游于斯土者。經公所生之鄉。行公所關之路。而不知所以起敬起慕。其非夫哉。予生嶺海極南之徼。在公旣薨之後六百又八十年。甫知讀書。即得韶郡所刻千秋金鑑錄讀之。已灼知其爲僞。旣而即史攷之。史臣僅著其名。而不載其言。意其遺文必具也。求之徧方下邑。無所謂曲江集者。年二十七。始道此。上京師。游太學。徧求之兩京藏書家。亦無有也。三十四登進士第。選讀書中秘。見

邱 文 莊 公 集

曲江集、列名館閣羣書目中。然木天之中。卷帙充棟。檢尋良艱。計求諸掌故。凡積十有六寒暑。至成化己丑始得之。乃併其囊公武溪集。手自錄出。是歲丁內艱。南還道韶。適鄉友涂暉景旻侔是郡。因話及之。畱刻于郡齋。公之遺文。至是始見于人間。竊觀集中有公所作開大庾路序。而蘇詵爲之銘。意公此文。當時必有碑刻。歲久傾圮磨滅。今陳跡如故。而遺刻不存。豈非大缺典歟。每遇士夫之官廣南。勢力可爲者。輒爲浼其伐石鐫文。以復當時之舊。諾之、而食言者多矣。今上即位之二年。嶺北袁君慶祥。由秋官屬擢廣東按察司僉事。奉敕提督雄韶等府兵備。臨行別予。予復申前語。君曰諾哉。又明年以書抵予。謂近得碑石於英山。磨礪已就。將求善書者。錄公序文、及蘇氏之銘。刻諸其陽。屬予一言識其陰。於乎。天地大勢。起自西北。而趨於東南。大庾嶺、分衡岳之一支東山。橫亘江廣之間。自此之南。以極于海島。奇材珍貨出焉。戰國以前。木始通中國也。秦時始謫徙中原民戍五嶺。漢武帝、始遣將分路下南粵。樓船將軍楊僕出豫章、下滇水。

邱 文 莊 公 集

疑卽此途也。然序文謂嶺東路廢。人苦峻極。行徑資緣數里重林之表。千丈層崖之下。意者大嶺迤東。舊別有一途。公旣登朝。始建議。相山谷之勢。革坂險之故。以開茲路也歟。茲路旣開。然後五嶺以南之人才出矣。財貨通矣。中朝之聲教日遠矣。遐陬之風俗日變矣。公之功於是爲大。後之人循其途而覆其迹。息肩于古松之陰。寓目於新亭之下。讀公之遺文。想公之風度。豈徒若晉人望峴山而思羊叔子哉。萬世之後。亦有過洛水而歌大禹。如昔人者已。雖然。公之功固大而著矣。然使千載之下。往來之人。臨公遺跡。而知開鑿之功。真出於公無疑。傳誦感戴於無窮。蓋亦有賴於斯碑之重建焉。僉事君之功。亦不可以不知也。君字德徵。贛之雩都人。其家去此百里。而遠蓋在嶺之北也。君在太學時。常建言國計。大有補於時。用是名聞遠近。今持憲節于嶺南。聲譽籍籍。以知其進。蓋未可量也。予雖家嶺之南。然去此幾二千餘里。踰公薨之歲。始見知于當宁。而日薄西山。無能爲矣。所以追前人之芳躅。而振發其聲華者。不無望於嶺南北後來之俊彥。而

於僉憲君蓋惓惓焉。屬也幼有志。尙友古人。而於鄉賢尤所注意。今年七十有二矣。將歸首丘。素願乃酬。豈非平生一快事哉。不勝欣幸。勉爲書之。男以刻焉。

延祥寺浮圖記

延祥寺、在南雄府治東二里。宋大中祥符間僧祖善始建也。寺有浮圖。在佛殿之右。以級計之凡九。以尺計之凡若干世。傳爲異人所創。蓋以其陰晴有影者三故也。佛之教行乎中國。中國之人所以崇奉之者。無所不至。廣其寺宇。嚴其像設。而又累木石以爲浮圖。中國之有浮圖。蓋自孫吳時僧康會創於金陵始。及晉南遷。重加修飾。天下倣而爲之。於是下至偏州小邑。無不建之以爲標表焉。嗚呼。其來也遠矣。夫佛之教。以寂滅爲宗。固無有所謂身。烏有所謂寺宇像設。固無有所謂寺宇像設。烏有所謂浮圖。固無有所謂浮圖。又何影之有。是皆知奉其教之外。而不知其內者也。若是者。非直吾儒所不道。而深於其教者。亦所不取焉。抑予聞西竺氏之教。法派

相傳。凡二十八代。至達磨始至中國。又五傳至盧能而止焉。其始也、達磨自南天竺浮海至廣州。而北往中國。其終也、盧能自黃梅得道歸。南至廣州祝髮。終于曹溪居焉。遂不復傳。是則禪教之興。始終皆在於嶺南。而雄都乃嶺南往來必由之道。而寺適當其衝。而浮圖在於是焉。謂之異人之建。雖不可必。要之不能無意也。意笏袍之士。必有深於達磨之道。知本乎內者寓於斯。有與無。必能辨之。募緣重修者寺僧智廣。主盟者千戶譚某。與工始景泰乙亥八月。畢工則明年某月也。寺之先後修建。不與浮圖者。茲不載。

重修杭州石屋寺記

錢塘南高峯之麓。有寺名石屋。卽吳越王所建大仁院也。寺距西湖二里許。中有巖石。其下穹然空。窈然深。若屋然。後人因以名寺。鐫石爲阿羅漢像者五百餘。其間泉石之勝。奇詭萬狀。遊西湖者。必盤旋焉。蓋杭之山南勝境也。歲久而圯。鞠爲草芥之區者。不知凡幾年矣。成化改元。有比丘惠鑒

者。自京兆來游于杭。歷觀陳迹。慨然以起廢爲心。結茅其間。久之。游人至此者。咸與憫念。相率助以貲財。鳩工聚材。期復其舊。若殿、若閣、若堂、若廊廡、丈室。與夫山門、橋塔之類。咸以次就緒。煥然一新。雖永盡如往昔之壯麗。然以一遠方之僧。無所因起。不假勢力。一旦倏然成久廢之功。蓋亦難矣。歲丙申。馨來京師。介通政何公文璧。欲予文記其成。惟道不同。則不相爲謀。馨佛者也。有所述作。顧不於其同。進而以屬之吾文。此亦可見天理之在人心。有不容泯然者。烏可靳一操筆之勞哉。嗚呼。佛之道。吾不得而知之也。所謂因果。所謂緣業。彼之深於其道者。亦在所不取。況吾儒哉。然以予觀之。其徒之所不取者。顧猶有可取者焉。彼其衣敗色之衣。食棄餘之食。上於諸佛乞法。下於檀那乞食。其教之所謂比丘者。蓋如是。彼佛立教。而以是名其徒。蓋欲堅忍其心。使之不外慕。而專一於內。以求其所謂最上乘者。其於世間一切紛華聲利、美好端麗之物。視如土苴。雖其君親眷屬。有所不顧。頭目手足。有所不惜。况外物乎。夫如是。然後謂

之得道。道必得。然後謂之高僧。今世所謂高者。往往華服。用精飯饌。居則侈屋宇。出則盛騎從。甚至爭總攝之位。購住持之櫬。終訟以告訐。持挺以相向。至於犯戒律。違規約。則又其日用常行事耳。若是者。豈佛教使然哉。雖然。彼爲此者。其心蓋亦了然知其不足以得道成佛也。願業已爲之。舉世皆然。若亦姑爲是以銜俗耳。於是大言以自蓋。虛喝以相脇。遁辭以遷就。謂夫一坊有爲之法。皆小善有漏之因。付佛祖於一棒。視道法以矢櫬。嗚呼。佛之道。果如是否乎。吾不得而知之也。比丘惠馨。敝衣糲食。苦心極力。銖積寸累。以興起此寺於百年廢墜之餘。所謂堅忍。而專一心於內者。蓋或有之矣。其於此丘之名。庶幾矣乎。是則可取也。何公非佞佛者。爲之請記。予故不辭而爲之書。如此西湖之上。佛剎之盛。甲於四方。遊僧之所必至。刻石于此以示之。必有是予言而知所擇者。於其教未必無所補也。豈但紀其成造歲月而已哉。

天妃宮碑

邱 文 莊 公 集

天所覆者、地也。地之盡處、海也。海之所際、則天也。蓋氣之積爲天。而凝結以成地。所以浮乎地者、水也。水源地中。而流乎地之外。其所委之極。是則爲海。海之大際天。其爲體也甚鉅。而其用則甚險而莫測焉。冥冥之中、必有神以司之。然後人賴之以利濟。中國地盡四海。自三代聖王。莫不有祀事。在宋以前。四海之神。各封以王爵。然所祀者、海也。而未有專神。宋宣和中朝遣使航海于高句麗。挾閩商以往。中流適有風濤之變。因商之言。賴神以免難。使者路允迪以聞。於是中朝始知莆之湄洲嶼之神之著靈、驗於海也。高宗南渡。紹興丙子。始有靈惠夫人之封。紹熙某年。加以妃號。元人海運以足國。於是配妃以天。我太祖高皇帝。革去百神之號。惟存其初封。迨我太宗文皇帝。建國幽燕。初資海道以饋運。繼又造巨艦。遣使通西南夷。乃永樂己丑之歲。詔中貴鄭和、建宮祠神于南京之儀鳳門。太常少卿朱焯齋祀封神爲護國庇民、妙靈昭應、弘仁普濟、天妃。京師舊有廟在都城之巽隅。大通橋之西。景泰辛未。住持道士丘然源。援南京例。請

升爲宮。然規制尙存其舊。弗稱宮之名也。成化庚子。然源乃募財鳩工。拓大而一新之。既成。礎石爲碑。介天官副郎雲間張天駿徵予以記。惟天爲大。物不足以儷之。儷之者地也。地之所以爲地。具山與川之形以成。然山有限界。足力可以盡之。惟川之爲川。液融於地。氣通於天。形浮於地之外。而委於天之際。以爲海。源源之流。積而不溢也。炎炎之燄。曠而不乾也。汪洋浩渺之浸。無所如而不相通也。是則海之大。與天同。而司海之神。稱天以誅之。而且假以僂儷之名。厥亦宜哉。今海濱之地。神祠在在而有。矧茲京師。密邇天宮。凡天下之人浮海以利涉。欲之北東南西。以盡乎輿地之所止。而又外而極于車轍馬足所不至之域。其啓行也。咸於是乎伊始焉。祠神之宮。而無壯大高廣之制。豈得爲稱哉。茲其稱矣。人侈其觀。則神妥其靈。神妥其靈。而益著其感通利濟之效。俾夫怪風駭濤之險。等于平夷。足國之用於無窮。廣帝之化於無外。凡天所覆之地。神之靈無不在焉。國家祝號祭秩之典。其與之永永無極也。予生海之南。備知海之

大而險。神之功之駿而捷也。既爲文昇張君。書以刻石。而系之以詩。

皇明聲教兼華戎。車馬絕跡舟以通。飄飄一韋萬仞中。

崩雲屑雨掀巨風。死生瞬息歸溟濛。誰能拯濟神之功。

一念所至靈斯從。收風平濤攝蛟龍。神光閃爍來半空。

驚波駭浪平地同。徽章誌號昭皇封。峨峨廟宇都城東。

天下祀典始此宮。千禩作配齊穹窿。國祚與之無終窮。

茅山復古堂記

茅山崇禧萬壽宮。古有別院。曰威儀。唐道門威儀鄧鍊師所創也。宋秦丞相檜之家隣於茲。重爲修建。其夫人暨子熹所施繡像。至今猶存。後人因號爲檜堂云。歲久而圯。國朝永樂初。正一湯公希文。承其師王懶雲命。大加修葺。適中書舍人臨川吳均過焉。謂曰。此堂建於唐。至今奚翅七八百年。可謂古矣。久廢而興。豈非復古乎。宜名之曰復古。爲更書其扁焉。天順丁丑。希文既退居。嗣其教者。華陽洞靈官湯與慶也。湯臨終。惓惓以護持

斯堂爲囑。成化丙戌。不戒于火。遂成灰燼。與慶深以負師遺言。是惕是懼。罄資節費。鳩工聚財。即于明年春三月。按其舊址而重構之。啓土之初。于地中得錢一。上有文曰萬壽復古。衆傳觀之。咨嗟讚歎。以爲堂構之所。以復古扁之。所以更易。信皆出於前定。有非偶然者矣。是冬十有一月。旣已告成矣。又歷九年。是爲成化丙申。與慶慮其久。而後之繼承者。莫克知所自也。爰來京師。介其鄉進士徐君傳求予文。記其歲月。予詰之曰。堂以古名。所謂古者。復其規制而已哉。無乃亦欲復其道乎哉。若止於復其規制。夫人能言之。徵於其徒可也。何用徵諸吾儒乎哉。自斯堂言之。由今而視唐。謂堂爲古可也。何若以華陽言之。由威儀師而視三茅君。則唐非古矣。雖然。三茅君所以成其道。闡其教。又必有所自始。所自始者。豈非尤古者哉。予請推道家之所攸始。以示夫居山道學之士。俾其知古之所在。由是而之焉。以復之何如。與慶曰然。夫道家之說。始於老子。老子之言。備於所謂道德經者。道家之有道德經。猶儒之有魯論也。學道之流。顧乃專力乎行禱。

祈之事。而孜孜焉於其所謂度人延生之說。而於五千言道德之宗。一切置而不問。是欲入海者不涉江河。而游泳於溝洫之間。而能有所至者。未也。何者。道原於天。具於陰陽。凡有形有氣者。莫不有此道也。老子出。乃即所見而明之。以爲一家之言。宗其教者。乃私以爲己有。曰此道之教也。夫道之爲教。雖宗於老氏。而道之所以爲道者。固不專在是。亦不止於是。等而上之。拓而大之。則固有在矣。雖然。道固無所不在。而人所從以入。則必有其徑焉。彼所謂徑者。五千言是也。學者必由是而之。然後可以入道。後之居茲堂者。其尙威儀師三茅君。由三茅君而老子。而達乎黃帝氏。以極于洪荒開劫之初。太一函三之始。必如是。而後可謂之復古。

莆田柯氏重修祠堂記

莆田柯氏。世居其邑東南之安樂里。柯山下村居。皆柯姓也。柯之先。當有宋盛時。構屋數楹。以爲族人總會之所。名以都廳。又於廳之東。建祠堂。祀其始遷祖贈承事郎昱。及其子海豐令新之處士輝之。蓋數百年于茲矣。子

邱文莊公集

姓環祠而居者毋慮數百家。世遠而派分。歲時祭薦。雖各於其寢室。至於報本反始之祭。咸必會于斯焉。歷宋元迄于國初。屢修屢壞。至承事公十一世孫德平。乃慨然撤其舊而新之。木石工作之資。一出諸已。而族人弗與焉。時正統己巳歲冬十月。畢工則明年夏五月也。規制位設。一如其舊。既成釁而祀焉。自是歲事有常。族人畢來。序列以禮。秩秩以恭。衍衍以和。優然真若見其神之顧歆。翕然咸興其尊祖敬宗睦族之心。人不以居異而疎。情不以服盡而遷。數千有百人。皆曉然知其出於一世一人之身也。嗚呼懿哉。德平公。既捐館舍若干年矣。未有爲之記者。今其孫詹事府少詹事兼翰林院學士孟時。述其成之歲月。俾予記之。惟昔聖人作易。於萃於渙。皆係以假有廟之辭。蓋以萃聚人心而收其渙散。俾咸推一本之歸。莫有要於廟祀者。故古昔盛時。天子至官師。皆得立廟以祀其先。天子以萃天下之人心。諸侯以萃一國之人心。大夫以下則萃其一家一族之人心也。自封建廢。而世祿族居無常制。私家之廟。議卒莫如。宋儒始殺廟制以爲影堂。既

邱 文 莊 公 集

而又以祀影非禮。而更爲祠堂。然其祀止於四代。世固已罕行之。又況能推原所自來。以及其始遷之祖如柯氏斯祠也哉。夫當世數久遠之後。族屬分散之多。情與服而俱盡。泛然相過。而適然相值。蕩然如途路之人。渙散而不可約束。一旦凝心固志。聯絡親比。尊卑以世。長幼以齒。咸邇流以徂源。循枝以返根。是孰使之然哉。茲盖有功於世教甚大。非但一家一族之事而已也。或曰。古者廟數。官師一、士二、大夫三。宋人始有四代之祭。泥古者。猶謂其踰禮。況又推而上之也哉。嗚呼。古者一家受田百畝。今世營利殖產者。乃至千百倍於古。舉世安之。顧於反本始。序昭穆之舉。而獨以爲非古政。昔人所謂寧去小違古。而就大違古者也。豈非惑與。予因學士君之請。勉爲書此。以示其後人。且以解或人之疑。

稽古軒記

天地有初也。生民有初也。凡天下之萬事萬物。亦莫不有初也。自吾有生之前。以邇夫天地、生民、事物、有初之始皆古也。今時所謂古。乃昔時之今。

非物有古今也。時焉而已。昔文公先生、作小學書以教萬世。始於立教。繼以明倫敬身。而終於稽古。蓋歷傳記。接見聞、紀述古人之嘉言善行、以實前言也。人生八歲入小學。則以是教之所以端其趨向。廣其見聞。而示之以法則也。海南節使周遠士毅、自幼明敏異常。方入小學時。從師讀文公是書。則慨然興起。知所嚮往。稍長、嗣祖職以僉衛事。公暇。輒親近儒生。購求書籍。皮于軒窗之中。時會師友以講閱焉。扁其軒曰稽古。蓋有取文公立教之意也。以予鄉先達。與厥祖廣平公爲夙契。世有通家之好。求予文爲記。予惟稽古之言。始見于虞書之堯典。舜親授受于堯。僅再世也。虞廷史臣述堯之事。遽以稽古爲言。由是觀之。所謂古也者。非必闕世久遠也。則雖父子易世之間。咸可謂之古矣。雖然。古豈易稽哉。昔秦廷君解堯典。粵若稽古。殆三萬言。自堯至舜。一代尙然。況生千載之下。而欲考千百載以上之事。世代遼邈。典籍浩繁。必欲一一以盡之。非窮晝夜。竭心思耳目之力。一息不容少懈者。豈易能哉。是以古人有近思切已之說焉。士毅出自武甯。食

世祿以爲武官。所業者武事。所聯比者武將。所統馭者武卒。近而思之。切於已者。尤在武焉。予願士毅公退之餘。涉獵討論之際。遠歷乎傳記。近接乎見聞。以求古人之嘉言善行。究諸心而服行之無數焉。古人嘉言有所謂委質爲臣。無有二心也。食人之祿。則死人之事也。已所不欲勿施於人也。躬自厚而薄責於人也。臨事而懼好謀而成者也。貴謀而賤戰。必爲不可勝。以待敵之可勝也。母恃其不來。恃吾有以待之。母恃其不攻。恃吾有所不可攻也。古人行有所說禮樂而敦詩書者。與士卒同甘苦者。以全取勝。先計而戰者。先國家之急。而後私讎者。雅歌投壺。雖在軍旅而不忘俎豆者。蕩佚簡易。寬小過而總大綱者。擇古人言行而收之。以爲吾身今日之用。雖聖賢切問近思之學。不外是矣。豈但一武將之事而已。士毅勉乎哉。母徒慕其名。而必旣其實也。誠如是。予知廣平公於九原之下。知其孫能稽古論以服行之。又聞予之言而獎勵之。地下有靈。殆將粲然而撫掌矣乎。於是乎記。

竹坡記

竹之爲物。取象於易。任土貢於書。播詠歌於詩。具儀物聲音之制於禮樂。植物之見錄於經也莫備焉。是以大雅君子。寓志於物者。恒有取於斯。安成吳先生掌教南離時。齋居之旁。有積土如坡然。坡之上有竹千數竿。散陰覆軒擗間。先生退自彝倫堂。諸生執經問難者。日造齋下。憩竹之陰。以俟先生之誨。當天日晴明之時。清風徐來。綠陰滿庭。先生布席於茲。橫經其前。諸生雁行立以序進而質所疑。讀易者以蒼良問。讀書者以篠蕩困輅問。讀詩者以菁菁籊籊之義問。讀禮者以箭筠笏本管籥簫簧之類問。先生一一答之。盡其詳。諸生充充然各有所得也。乃揖而退。先生語侍者曰。向者之問。殆有啓於吾心矣乎。吾平生於物。百無好也。獨於竹焉嗜之。不翅義理之悅我心。六經者。義理之所自出也。而竹之用備焉。吾之所以取于竹。正以是耳。向者之問。非徒啓於吾心。殆有所契矣乎。小子識之。於是以竹坡二字。揭諸齋居之楣。因而以自號焉。明日諸生聞

而歎曰。先生六經之宗師。天下學者所取正焉者也。本六經以取竹。一洗晉唐以來詞人墨客之陋。其諸異乎人之愛之與。自是相率咸以竹坡先生稱先生焉。未幾。朝廷以纂脩事召先生來史館。予忝在執筆之末。先生間以語予。且曰。竹無處無之。南雖吾不復往矣。兒曹輩知吾所愛在此也。乃於家居壺丘之東。營齋居。築土坡。植脩竹。與南籬等。以待吾之歸老也。幸子爲我記之。予不敢以弗文辭。因次第先生與諸弟子答問。以爲竹坡記。俾天下後世知以六經取竹者。自先生始。

栢庭記

增城有隱居之士。廖其姓。植栢滿庭。日哦其間。客至。則曰子姑去。毋亂吾。吟思徐徐于予。樂以忘憂。亦猶崔丞之於松也。客有來京師。舉其事語予者。請優劣之。予曰。廖君則優矣。客曰。何也。予曰。君隱者也。不事事。而自適其適宜矣。彼食君祿。佐其長。以牧其民。顧乃窮日力以吟哦。漫不可否事。自爲計得矣。如民何。是則君爲優矣。客拜曰。先生之言躓矣。敢

請一言以記其所謂栢庭者、可乎。予曰、古人所謂記者。所以載其建置之規制。紀其歲月之始末。今廖君植數栢於庭除之間。非有規制可載。歲月可紀也。焉用記爲哉。予意不過欲推明其志操之所在而已。君乎。得無欲厲其堅貞之節。以守其歲寒之操矣乎。若然。可謂有得也已矣。彼其百花之豔冶。衆木之敷榮。非不可愛也。人皆競之。而君獨不之取焉。謂非有所得不可也。然則何得乎。禮不云乎。禮之在人也。如松栢之有心也。志其在此歟。傳不云乎。歲寒然後知松栢之後凋也。操其在此歟。請以是記之如何。客曰、他人有心。予忖度之。先生之謂也。讀書之。遂次第其與客言者。以爲栢庭記。廖君名某所謂客者。則甥太學生願華也。

愛竹居記

古之人、以竹爲用。至後世始以竹爲玩焉。自黃帝命伶倫取竹於嶰谷。以爲律呂、虞庭之韶笙簫與焉。至周則竹之用備矣、或以爲簡。或以爲笏。或以爲籟。無非以爲用也。漢魏以來猶然。晉世始以風流相尚。不事實用。於

是有竹林之遊。然猶未聞有愛之者。愛之者。實權輿於王子猷。自是厥後。騷人達士。聞風相尚。取以爲號。用以比德。慕其虛者有之。尙其節者有之。而愛之者益多矣。廬陵劉君。隱居不仕。他無所好。性酷愛竹。環其所居間。植竹數百竿。命其里曰金竹。至其孫章。不忘先祖之所好。因自扁其所居之室曰愛竹。蓋以先祖手澤所存。非若晉人之愛也。昔蘇長公有云。醉翁行樂處。草木皆可敬。夫慕其人者。於其所行之處。一草一木。尙且加敬之。矧爲其後。而於其先人之所親植者乎。章之愛竹也宜矣。公之敬草木者。尊其師也。章之愛竹者。念其祖也。於師也則敬之。於祖也則愛之。愛之、仁也。敬之義也。然則章之愛是竹也。其亦出天理民彝之不容已者乎。章之季父郡博先生掌教吾郡。今來京師。命予爲記。故不辭而爲之云。

牧菴記

盱江俞大有振明。自幼究心易學。用漢京氏納甲法。以六十四卦、三百八十四爻、定人之吉凶悔吝。而處其從違趨避。爲人子言。依於孝。爲人臣言。依

邱 文 莊 公 集

於忠。如嚴君平所云者。乃就六十四卦中。取謙之一卦。三百八十四爻中。擇謙之初六一爻。得孔子象辭牧之一言以自處。扁其齊居曰牧菴。因以自稱。振明幼有用世志。既而事多不如意。僅得掌蔡駟馬都尉家教。予嘗延振明教幼子崑。不幸癘亡。振明因從余游。暇日以菴記爲請。按爾雅郊外謂之牧。周官牧人。小雅考牧。牧畜者也。虞十二牧。漢十三牧。牧人者也。詩所謂自牧歸藎。易所謂卑以自牧。其牧已者歟。廣牧畜之法以牧人。歛牧人之法以牧曰。振明之意。蓋有志於謙初六之君子謙而又謙。而期以保有終之吉乎。是則然矣。雖然。振明以柔和之資。謹厚之性。處下位而安貧困。不患其不卑也。卑之又卑。素有也。有終之吉。可保也。予笑容贊哉。抑聞之。牧之義有三。有守、有養、有策。守者欲其不逸於外。養者欲其常有於中。策者欲其不落於後。孟子曰。求牧與芻。其養者歟。卜式曰。惡者輒去。毋令敗群。其守者歟。莊生曰。視其後者而鞭之。其策者歟。振明守太易之訓。用三氏之言。道德仁義。以爲之場圃。前言往行。以爲之芻秣。禮法以

爲閑校。敬恭以爲鞭策。夫如是。庶幾盡所以自牧之道乎。吁用牧畜之法以牧已。既馴且熟。然後推之以牧人。還又以之而牧物。本諸己以仁民。仁民而愛物。聖人之道也。謹以是記牧菴。振明宜服膺之毋敢。

世引堂記

古儋大姓符氏。世居其鄉之大里里。環其居數十里間。皆山菁谿洞。其中居民咸依焉以居。符氏之先系根紫貝。在勝國時。曾受符印爲守土官。國朝永樂初。符添慶者。率其人朝闕庭。文皇帝嘉其功。授宜倫縣令。以撫其人。世襲其職。及宗孫符節應。世其官。以俊選入昌化縣庠爲弟子員。今有司以充貢上春官。既引赴奉天門試中。例該陞進太學。循資出身。節歎曰。環我家村總總之人。恃吾家以有生。吾一旦名繫仕籍。游宦中州。吾之身榮矣。此數十百家。何所依乎。今幸朝廷有太學生不願仕者。賜冠帶。授散官之比。盡歸乎哉。以終我祖父之惠。乃以其情言于天官。天官卿爲請于朝。上曰如。比節將歸。謁予而言曰。節自幼有志世用。潛心經史。而專門于春

邱 文 莊 公 集

秋。初志固欲出一奮。以光大我宗祊也。但以祖父來。世官鄉土。節忝爲宗子。當繼其職。而爲一方人所附。土俗非其宗。不屬也。不得已舍己之所業。以締先世之所基。恒念自先考無恙時。爲屋數楹。中有黃堂。爲祖宗棲托之地。傍有列館。爲會友讀書之所。他日仕歸。將爲終老之計。今幸蒙聖恩未老。而榮歸故里。將終焉於其中。伏請大人先生。賜以一名。上述祖德。下示子孫。以爲不朽之託。非但符氏一族爲幸。凡吾一方之山林草木。亦與有光焉。予于節之大父元春。有一面之雅。知其家世爲詳。廼名其堂曰世引。蓋有取爾也。旣而節請所以名之義。予曰父子相繼爲世。引之爲言延也。長也。世世而引之。由一世而致千萬世。自義章祖引而上之。往者曰以過。自仁章親引而下之。來者曰以續。往者如水之歸海。愈積愈深。來者如泉之出山。愈出愈有。引之又引。曷有終窮。哉。且汝家歲時有事于其先。亦聞工祝之嘏辭乎。所課祭承多祖無疆。使汝受祿于天。宜稼于田。勿替引之者。卽予名堂之義也。夫古來聖賢遭際。不出卽處。不仕卽農。農者躬

耕稼稷以爲養。仕者膺爵祿以爲榮。稽乃祖乃父。世襲其官。不出其土。榮矣養矣。汝今奉恩錦旋。則所以榮而養者。不又引於無既耶。汝尙益懋乃德。延師儒以教汝之子弟。廣聖化以率汝之吐庶。使汝子若孫。若曾。若玄。若雲來。世世相引。敬承先志。不振家聲。善而繼之。光而大之。引而伸之。延而長之。永永勿替。以供汝祖宗之祀事。豈不偉歟。節再拜曰。敢不服膺至訓。以詒厥孫謀。請持歸刻之石。寘之家祠。以垂永久遠。

野花亭記

禮曰。天地溫和之氣。盛於東南。五嶺地當中國之南。而吾郡又居五嶺極南之微。天之暘明。貫通於四時。地之清淑。旁鍾於庶類。是以物之生於斯也。形瑰奇而色鮮華。味甘美而氣馨香。獨異而且多。凡他郡所有者多。有之。而其所無者。又有他郡所無者。予自蚤歲。屢知讀書。卽有意於物理之學。而於花卉亦傍及焉。凡名具於載籍文字間。徧即人家園圃求之。亦多有其所無者。無幾爾。而時又於載籍文字之外。得其無名者甚多。意謂方名不

邱 文 昇 公 集

同耳。他處或有。未可知也。及游郊野山澤中。所見愈多。中有甚奇特秀絕者。詢之士人。或有名稱。或無名稱。不止一類。意謂游歷未廣。安知他方無其類邪。既長渡海而北。歷高雷之境。抵于羊城。由是泝滇溪。踰庾嶺。沿章江而下。浮大江。歷吳楚齊魯宋衛之境。以達燕京。所至。遇士夫博雅好事者。往往詢之。所見不過同此數品。其間載籍文字所具者。亦或有未識焉。或此以爲是。而彼以爲非。迄不知所定。於是乎歎曰。花卉之生于中州。可謂幸矣。然人且猶有不盡識者。矧不幸生於遐外之域者哉。其不見知於人。無足怪也。是雖有瑰奇之容。華豔之色。芬芳之氣。亦無由以表見于世。惟自生自落於荒山野澤間。與蓬蒿榛荆伍而已。一何不幸之甚哉。使誠一日有所遇焉。將之而北與他方所有者相比較。固未必盡出其下。或超而出之者。亦未可知焉。而彼生得其地。遇得其人。方見植之於庭階之前。培之於盆盎之內。滋之以膏腴。沃之以潔清。慮其弱也。扶之以竹。恐其燥也。蔽之以蓬。虞其或爲物所傷觸也。而又護之以欄檻。朝視夕顧。以

邱 文 莊 公 集

觀其長成開發。迨其及時而開也。設具招客以賞之。分題賦詩以詠之。詠之不足。而或又寫之以圖。不幸爲風雨所摧敗焉。相與嗟悼之無已。若是者。豈其以一一皆足以動人哉。得所處也。歐陽子有言。凡物之幸不幸。視其處之而已。予與是花同處遐遠之域。目親見之者多矣。皆他方之所未有者也。其容、其色、其香。一皆出於天然。而未嘗假毫髮之人力。且猶如此。使其得與於人家苑囿軒墀之末。而受園丁之培養。爲士夫之賞識。殆將與之爭妍競秀。未必盡出其下也。其如所處不得其地何。予每見而憐之。思欲移入紫園中。因其類而命之以名。名有未雅者。爲更之。有志久矣。歲己丑。聞先妣喪。歸自禁林。明年抵家。又明年始免喪。乃謀於鄉友好事者。遍於野草澤間。遇草木之花卉。苟可以入目供鼻者。盡移植吾學士莊中。前後致數百種。爰於其中構一亭。以爲賞玩之所。名之曰野花亭。意將待其封殖既成之後。標其名繪爲圖。每種各詠以一詩。使草木之生吾土者。雖不見賞識於中州士大夫。而亦有聞於吾鄉之人。或可由是而傳播於四方。

焉。惜乎。客土新培。氣脉未屬。旣而萎槁者幾盡。予爲程限所薄。遂爾北上。竟未克如所志。而重歎是花卉之不幸也。雖然。予髮種種矣。不日上章乞骸骨。聖天子幸憐其老。而賜之休閒。尙當成其素志。安知其不終幸哉。朝回無事。坐願豐軒中。時春雨初霽。草木競茁。忽然動家園之思。信筆書此。寓歸俾子敦刻置莊間。以爲亭記。用著吾志。以示夫鄉之人。雖然。是記也。豈直爲野花發哉。

邱文莊公集

卷之五
記

五六

丘文莊公集卷之六

南海亭岡黃氏祠堂記

古人、廟以祀其先。因爵以定數。上下咸有定制。粵自封建之典不行。用人以能。不以世。公卿以下。有爵而無土。是故父爲士。而子或爲大夫。父爲大夫。而子或爲士。廟數不可爲定制。且又仕止不常。遷徙無定。而廟祀不能有所常所。漢魏以來。知經好禮之士。如晉荀氏、賀氏、唐杜氏、孟氏、宋韓氏、宋氏。或言於公朝。或創於私家。然議之而不果行。行之未久而遽變。或爲之於獨。而不能同之於衆。或僅卒其身。而不能貽於後。此無他。泥於古。便於私。而不可通行故也。至宋司馬氏。始以意創爲影堂。文公先生易影以祠。以伊川程氏所創之主。定爲祠堂之制。著於家禮通禮之首。蓋通上下以爲制也。自時厥後。士大夫家。往往倣其制而行之者。率閩浙江廣之人。所謂中州人士。蓋鮮也。嶺南僻在一隅。而尚禮之家。不下於他方。南海

亭岡黃氏。世有顯宦。其先世在宋爲奉朝大夫者。自凌江南徙以來。今若干世矣。其六世以前。惟單傳。六世以後。支庶始繁衍。自是又若干世至處士洪僧者。爲黃氏世嫡。乃謀于衆曰。吾儕承先世貽謀。以有今日。爲子孫者。人競殖產以自私。願使祖宗無棲神之所。於心安乎。盍相與建祠堂。衆曰然。於是擇地於所居之東。如家禮制。建屋一堂三室。以爲祠堂。堂之前有亭。翼以庖廚齊沐之所。外爲三門。繚以周垣。樹以松栢。專俾僮僕一人司啓閉焉。規制如家禮而少異也。置祭田。具祭器。晨必謁。出入必告。面正。至朔望必參。歲時伏臘及有新物必薦。有事必以告。四仲之日及忌辰。必有事於正寢。一一按家禮以行。蓋自天順己卯經始。明年庚辰成。而釁祀之。至是歲己丑。天運一周矣。處士子瑛。暨其從子瑾。以鄉貢進士辭校官。卒業太學。授例寧觀。將南還。介友人封部大夫馮君宗轍。來徵予記。按禮大夫士有田則祭。無田則薦。是有土者。乃得廟祀也。古者有田則有爵。今有爵者。未必有田。而有田者。往往多在於編民。今世拔士於民。苟

服章縫。習詩禮。是亦古之士也。矧又時有撥科躋仕。雖比古之大夫。亦未爲過。旣名爲士大夫。而又有世業之田。則立祠以妥先靈。置田以給祭需。私家之事。孰有先於此者。然世人果於殖產。而不果於行禮。急於貽謀。而緩於報本。有能特然興舉古禮。以報先德。以訓後昆。若黃處士者。豈非家之孝子。族之宗英者乎。是宜書之。俾琿持歸。勒於石。以示其後人。使知其所自。其尙繼繼繩繩。守而有之以弗廢墜哉。

闕下林氏孝友祠堂記

八閩著姓。以林氏爲第一。林氏尤著於莆中。莆中之林。首稱闕下。蓋自晉永嘉之亂。八姓入閩。林居其首。在唐九刺史竝仕。著名當代。然列名史傳。以大有聞於世者。則自福唐尉攢始焉。載在唐書孝友傳者。可徵也。攢以孝聞於朝。有司於其門立雙闕以旌之。世因號曰闕下林家。始立於唐貞元丁丑。其後歷宋嘉祐庚午。大觀戊子。紹興丙寅。乾道己丑。紹熙辛亥。凡五加修葺。舊有祠在闕之左。歲久祠廢。雙闕故址薄於社。且在城外。今成

邱 文 莊 公 集

化乙酉。翰林修撰燕山岳侯正，來知興化府事。從其遠孫孟和。請出白金爲倡。俾孟和率其族屬理宗懋等。協力鳩工。遷祠堂於郡城中烏山之陽。築土爲雙闕。如其舊制。仍其舊扁曰孝友。用唐書名傳意也。祠祀始來莆之祖饒郡太守萬籠公。而以福唐公配焉。自是而下。世昭世穆。列祀於左右。歲時族之長者。率其族人。祭告如禮。祠成。其宗孫翰林學士恒簡先生。旣爲紀其本末。今國子監丞大猷。復以記見屬。夫自唐人脩隋書。列孝義於傳。宋編唐書因之。以傳孝友。所謂孝友之士。著名一代之者。凡二十有五。人如李知本、張孝寬之儔。今世之望清河系隴西者。果孰爲其後哉。二十五人中。惟闕下一林。獨著于閩中。數百年如一日焉。此無他。文獻足徵故也。在當時有歐陽詹爲之甘露述其後。呂夏卿預修唐書。著其名孝友傳中。而又爲之表其門閭。與夫黃璞、陳俊卿、真德秀，皆有所著述。五人者。皆閩產也。而王十朋，又以閩中良二千石爲歌詩以讚揚之。我又廟、御纂古今孝順事實以爲書。亦具載焉。此其所以愈遠而愈彰者。有由然哉。噫。文章之傳。

既足以示遠。雲祔之賢。又能以紹美。孝友之祠。既廢而復興。夫豈偶然之故哉。謹按周禮春官。家宗人之官。掌祭祀之禮。則家有祭祀尙矣。蓋古之典祀者以宗名。在國爲宗伯。在家謂之宗人。宗以廟言。禮始於親親。親親非廟不統。有田有祿之家。所以別姓收族。以尊祖敬宗。必在於宗廟焉。故也。今世士無世祿。大夫無采邑。然而業爲士者。或任而爲大夫。其子孫或受祿。或宜祿。皆得以追養繼孝。故時制雖不立宗人之官。而人家則不可無宗廟之祀。然而說者。卒謂祀當止於四代。過則爲僭。蓋觀曾子之言乎。慎終追遠。民德歸厚。若祀惟四代而止。則世之玄孫。往往有違事高祖者。豈得爲遠哉。又何用追爲。子程子謂冬至祭始祖。立春祭先祖。文公載之小學書中。以爲範。茲蓋百世人通行之常禮也。況有孝德如林氏者哉。古稱盛德。必百世祀。孝爲百行之本。德莫盛焉。闕下之林。獨望于莆。閱六百年。其後裔猶合族以祀其十六世之祖。盛德之後。何其遠哉。爲其後者。其尙是繼是承。以勿替引之。拜祠宇者。萃渙敢之心。望闕門者。起繼述

之念。以孝友傳家。而移以爲忠。施之有政。則莆中之林。歷千百年。恒爲八閩之望。雙闕峨峨。世家封植。與史冊所著孝友之名。長赫煜香壤間而永存矣。大猷字子道。謹敏誠恪。崇尚古禮。克紹其世業云。

忠愛堂記

皇朝開國元勳。義兼親賢。德業竝隆者。首稱黔寧正家昭靖王。生際大明啓運之初。輔我太祖高皇帝。光復中國帝王之統。建萬世大功。爲一代全臣。子孫嗣守西南陲。世以忠愛傳家。上報國恩。下安民社。閱七朝。餘百年于茲矣。世及承延。昭穆繼述。人人同此一心。有如一曰然者。凡其所存所行。何者而非本祖訓以衍家傳者哉。然而循循然。終身爲之而匪懈。渾渾然。日用由之而不知。行乎已者習以爲常。施諸人者忘其爲惠。蓋已非一人一世矣。今太子太傅沐公琮。始揭忠愛二大字。顏于高堂之楣。蓋摘太宗文皇皇御製書中語也。用以示其後人。俾其知先世所以積累者。厥有本原。而有所效法。綿世賞於無窮。引廟享於不替。蓋據事理之要會。以示標準者。

鄧文莊公集

焉。問介侍御張泰以書來京師。徵濬言以爲堂記。夫自古創業垂統之君。必兼親賢而竝用。武王創周。分宗支爲五十三國。崇親也。高祖興漢。封功臣爲一十八侯。尙賢也。我聖祖膺天命。肇基大業。法古昔帝王。竝用親賢之制。列爵分土。崇德報功。衆建親王以爲藩屏。大封功臣以爲楨幹。非宗姓後。不得專土。生爵公者。卒乃追王。昭靖王於二十有二親藩之封。九公十八侯之列。雖若不預。然於玉版屬籍。有剝接花木之契。盟府丹青。有開拓疆宇之功。其於親賢之義。蓋兼之也。故卒受王封。配享合宮俎豆於六王之間。子孫世守西南一方。民兵錯雜。延袤數千里。視古諸侯胙土之封。連帥分閫之任。一時勳戚家無有也。於乎盛哉。濬待罪太史。於祖宗典故。竊輿有聞。伏讀太祖御製文集。其貴王爲西平侯也。錫以誥文有曰。當幸逢之初。釋難之恩。夢寐神交之報不忘。而結之以究心利濟。永爲多福之語。及讀太宗爲善陰隲書。敘王善行之實。有曰。處心仁厚。樂善好賢。小心慎密。恩信遠孚。豺獠畏愛。非忠君愛民之至。何以得此。而以嗣續昌盛。與

國威休。德厚流光之語終焉。嗚呼。聖言萬世如見。天下家傳而入誦之。荒
陬異域。庸人孺子。孰不知沐王忠愛之名。殆將見與天壤同休也。功庸既
已著效於當時。而又以遺留於後裔。子孫相繼。以爲傳家之學。忠國之本。
治民之譜。人人持循而不悖。世世遵奉而不疑。惠襄侯以是而克負荷。忠敬
王以是而啓國封。武襄伯以是而固封守。榮康公以是而靖叛亂。今宮傳
公主宗盟。膺朝廷重寄。位上公。總重兵。鎮邊方。於凡世家所傳。懿德茂
實。旣以身體而力行之矣。茲又申明前人之心事。昭示後人之軌範。非徒空
言而已也。二聖所以期望之者。於是乎信而有徵矣。爲林氏子若孫。若曾
玄。若來以子弟。若初以雲。廕授而祿食。耕采而復家者。登斯堂也。視斯扁
也。目擊而心惟。原祖宗之心。報國家之恩。一夫不獲。時予之辜。非但居大
業。秉重權者然也。苟有一命之秩。一塵之受。一力之隨。咸舉諸心而加諸
彼。雖兵農藏獲之賤。驪麋玃獠之蠢。昆蟲草木之微。必使之皆得其所。
而盡其天年。愛施乎下。即所以忠報於上也。互相講究。交相勸戒。推演昭

靖王之初心。體悉宮傅公之至意。則夫天語所謂多福。所謂流光。所謂與國咸休。於爾沐宗。永永無極矣。其念之勉之。毋怠毋忽。

永思堂記

八桂李君純。名其所居之堂曰永思。著不忘也。茲以安順知州秩滿考稱。陞江右之袁州府同知。過予。屬以堂記。泣而言曰。某以承義方之訓。出就外傳。叨以經學發身賢科。以有今日。皆吾先考妣積德教訓之所致也。享有祿位。積以年所。身晉榮而家稍裕。而吾親不待矣。嗚呼痛哉。譬則種樹焉。木既榮而就實矣。憩其陰而食其實者。非前日栽培灌溉之人也。興言及此。有人心者。寧不戚戚然於中邪。此吾堂所以名也。予聞君言而悲之。君之思。亦吾之思也。即吾之所以思者。以記君之堂。其殆有合哉。夫人子有此身也。合父之氣。母之血。以成形。形具而理寓乎其中。其主宰者謂之心。心之官。則思也。父母之於子。其初本一人之身。既而分焉。分則離。離則漸以遠。於是乎有思。思而不可復見。於是乎永思。永思云者。終其身之謂也。

吾有一日之身。則有一日之思。吾無此身。則無此心。無此心。則吾一念思親之心。方從而息耳。終天之痛。庸有極乎。是故禮之所謂。發於容體、言語、飲食、居處、衣服。思之寓於哀也。致於居處、笑語、志意、所嗜、所樂。思之寓於齊也。或見乎其位。或聞乎其容聲。或聞乎其歎息之聲。思之寓於祭也。然此皆因事而思。事過則已。猶之二也。盍思乎吾之身。果從何而有哉。吾之身。親之遺也。凡吾之身。形自一孔以上。氣自一息以上。理自一念以上。皆親之餘也。親亡而吾存。所以氣聚血凝。而爲此身者。固無恙也。親何嘗亡。吾何嘗存。是故無一體而非親。無一事而非親。無一物而非親。心心念念。恒在乎親。身之所在。親之所存。一息之存。一息之思。其斯之謂永思乎。吾之所思若是。君以爲何如。君起再拜曰。子之思。亦某之思也。請書以爲永思堂記。

重恩堂記

重恩堂者。右軍都督李公。顏其所居之廳事。以侈上恩也。公拓跋魏後裔。

邱 文 莊 公 集

唐賜氏李。爲河湟鉅族。公之大考諱南哥。率部落歸皇朝。以武功起同知西寧衛指揮事。世其官。公之考諱英建。功邊圉。受制諭專節鉞。錫誥券。封會寧伯。旣而中微。英廟復辟。詔天下復功臣失爵者子孫。錄公世襲都指揮使。今制。都指揮無世襲。此蓋特恩云。公感上異恩。盡心竭力。以圖報稱。遇有所任使。晝夜兢惕。以圖謀之。罔或少怠。用是名稱籍甚。會朝旨命文武大臣舉將材。於是太傅會昌侯孫公。吏部尙書姚公。合辭舉公堪大任。遂有都督之命。俾佐右軍。公雖生武胄。而雅尙文儒。一時所交游者。皆朝野知名之士。恒以先會寧公生平好易學。屢延經師以易授諸子。冢子玘果用是經領京闈薦。明年試中禮部恩。賜進士第。選授中書舍人。縉紳大夫榮之。立表以旌其門。過者竦然歎羨。咸曰入國朝來。武胄固有登名儒科者。然而侯伯子孫。未始有之。有之始自會寧伯之孫。於戲。事以希有爲榮。矧策武功而受誥券。登文科而掌絲綸。其爲榮也尤偉。然其所以爲榮者。非由上之人振作而錫予之。曷克以臻茲哉。是則一門之中。三世之間。冠蟬

珥貂。曳組鳴玉。屹屹武弁。烜赫於前。雖雖儒紳。委蛇於後。何者而非上之恩哉。夫恩出於一。固以爲幸。矧至於再。至於三。又將由是而底於百千萬而無已也哉。公也繼會寧之後。開中書之先。厥考勒功鐵券。爲國之勳臣。厥祠登名金榜。掌帝之外制。往者受恩於前。久而彌光。來者承恩於後。引而弗替。名堂以重恩。豈不名稱其實哉。雖然。莫大之恩。雖出於上。而其所以致其來錫。而致于屢施。而疊被者。則又在乎人臣盡心竭力於下。世世相承。而不已也。夫然。非但以盡人臣匪躬之忠。亦以衍人子不匱之孝焉。公之子若孫。若曾玄。若舅弟來。祊雲。登公之堂。瞻公之扁。尙體公之心。思有以濟其世美。延其世賞。以永荷聖恩於無終窮哉。予嘗主公家。有契誼之素。故爲公記其堂。俾書於壁。以示其後人。

存耕堂記

祁門汪君。字存耕。卽其字扁其所居。蓋摘唐賀知章詩。但存方寸地。留與子孫耕之語也。其子鄉貢進士恕隨計來京師。介其友康永韶謁予記。夫有

邱 文 莊 公 集

有形之地。有無形之地。阡陌連接。原隰界畫。畛域有廣狹。生息有厚薄。苟取之不以道。得之不以義。留之家。家不能受。留之子孫。子孫不能守。甚至豪奪強取。刑禍戮辱。不一再傳而失之者多矣。惟無形之地。基址本固。呵畦不立。不假鋤治。而生意常存。不待灌溉。而靈源自滋。水旱不能災。豪右不能奪。大僅方寸。而所收之利。倍於膏腴之壤千萬焉。比二者而觀之。其爲子孫計。慮孰遠哉。此古之君子。所以寧舍彼而取此也。汪故新安故家。世以積善相承。以春秋爲學。十二公二百四十二年行事。其世業之蓄畬。積善以爲基。存心以爲地。治經以爲蓄畬。先世所以植生產以遺子孫者。博且遠矣。而君又克承先世。標表以示後人。其知本哉。子恕果能拓善基。廣心地。收蓄畬之獲。以春秋登乙科進士。掌百里之教。謂非君存之之效可乎。雖然。存者君也。存之又存。又不能無望於君之後人。

經訓堂記

邱 文 莊 公 集

堂以經訓名。有取於韓子之語也。噫。世人之知菑畲其經訓者誰歟。竇安陳君志道。蓋有見於此矣。君。邑大家。世業以農。家學以儒。宋元以來。代有名德顯宦。至於今不衰。夫家道所以久昌者。以世守之有田也。家聲所以益振者。以家傳之有經也。世世莫不然。而未嘗明言其所以然。至君乃標出韓子此語。以名其堂。蓋以示其子若孫。若曾玄。以至於雲祚之遠。俾其咸知所守而服習之。以無廢其先業。真誠知所本哉。有唐之世。制民之產。有世業。有口分。予于君家。亦云所謂世有之田者。其君家世業歟。所謂家有之經者。其君家之口分歟。使凡爲君之子若孫。人分一經而治之。易三百八十四爻。則所得者三百八十四畝也。書五十八篇。則所得者五十八畝也。詩三百五篇。則所得者三百五畝也。春秋二百四十二年行事。則所得者二百四十二畝也。於禮之三百三千所得亦如之。居則資之以養身。出則挾之以濟世。以此爲口分之業。疏理之。灌溉之。芟夷纒崇之。以封殖夫世有之恒產。豈不愈久而愈遠。愈大而愈光也乎。志道名用原。捐館舍數十年矣。

而堂歸然不廢如昔時。堂不廢。則名不廢。名不廢。則凡所以登其堂。而親其名者。可不體其心。服其訓。而思所以究其心於聖賢之經傳。以不廢其業也哉。君之弟用貞。以吳江司訓秩滿來京師。需予文以爲堂記。予喜用貞不死其兄。而又能克大其兄之志也。於是乎書以歸之。俾其持歸。實諸其堂壁之。以示夫其後之人。

甘節堂記

無非無儀。婦人之常。不幸遭人倫之變。而得專節之名。豈甘爲是歟。不得已也。然其始終一節。忘其苦而以爲甘。至於死而不悔。蓋必有以見夫天理民彝之所當然而不容已。則又非不得已也。予於三山李母甘節堂深有感焉。母年十九。歸邑人李宗衡。十年。宗衡卒。時母年二十又八。止生子陞。甫六歲。家徒四壁。室如懸磬。內外期功之親。無一足恃者。且暮紡織以自給。百凡大小之事。無一不身任其勞。內而禮事。外而公家之賦。教子之需。鄉鄰往來之禮節。咸取給於已。艱難阨塞。儉嘗之矣。人視之以爲不勝

其苦矣。而母則未嘗告勞焉。非不知勞。忘其爲勞也。非獨忘於口。而且忘於身。非獨忘於身。而併與心忘之矣。嗚呼。芻豢之甘。而荼蘼之嗜。非不知荼蘼之苦也。蓋必有以甘之者矣。甘之、故忘之。忘之故安之。安之故能始終一節。至死不悔焉。彼嗜甘而苦之者。抑又何人與。李母於此。蓋必真有以見天理民彝之所當然者有不容已。非不得已然者也。用能持守門戶。教育子孫。至于今日。蓋始終五十餘年矣。今以希有之年。康健之體。得見二孫。同領鄉薦。而次孫廷美。又登甲第。蒙恩歸榮。李氏之門。自此駸駸光大。謂非母守節之效。可乎。廷美介其師林用清。求予文。以記其所謂甘節堂者。予以蚤孤。親見吾母太孺人之所以甘其苦者。無異於李母焉。故爲之記如此。俾廷美持歸。書堂之壁。若其守節之始末。則有以俟乎當代立言之君子爲之傳。

春和堂記

錫山周君濟廣。世業軒岐之術。而以瘍醫名于遠近。旣而有以其名聞于朝

者。選入上方。嘗扁其居藥之室。曰春和。隨所至而揭焉。適予家子得疾。或以君薦。予延而診視之。接見之頃。言溫而氣利。薰然陽春之可掬也。及其觀色、察氣、問証、用藥、七劑之加。則又有如春風扇和。凍者以解。稿者以甦。勃然生氣漸回而鬱達。有莫知其所以然而然者。曾未幾時。吾子之氣復和適。沉疴去。其體如一陽來復於隆冬沴寒之後。日復一日。今則馴至於三陽開泰之時矣。所以然者。蓋由其推腔中生意之春。以利煦之也。予生平止一子。宗祊所繫。感君之惠莫大焉。方圖所以報之者。知君者咸曰。君於世利無所好。所尚者文爾。盍爲記其居藥之室。嗟夫。一元之氣。流行天地之間。一陽而復。二陽而臨。三陽而天地交泰。則和矣。和則天氣下降。地氣上騰。而萬物之蠢然者。於是躍然以起。翕然以交。安然以適矣。豈非天地之至和者哉。君以是名堂。詩所謂惟其有之者乎。惟其有之。故能聚其所得於天者於一腔之內。又能推其所得於己者於一世之人也。何者天之德。元亨利貞。天之時。春夏秋冬。而時之用。則生長收藏也。在天之元。時

之春。物之生。其在人則仁乎。醫也者。仁之術也。蒙莊氏有言。醫門多疾。蓋以有疾者。必趨於醫之門。如積陰之物。競向於春陽。鬱結之氣。亟求其和適也。當夫春之三月。和氣發陳。天地俱生。萬物以榮。凡六氣十有八候。無非春陽布發生之令。天氣應人。養生之道。逆之則有所傷。而氣少不足。以奉夏長之令焉。夫春陽之氣既乖。則夏無以爲蕃秀而奉收。秋無以爲容平而奉藏。冬無以爲閉藏而奉生。是知一春之氣。三陽之和。流通於九月之中。散見於十有八氣五十四候之內。何者而非一春之和哉。古之至人。知乎此理。故保稷陽於來復之始。暢全陽於交泰之時。所以培三時之本。爲萬物之先。以固其根。以滋其苗。以復其命。有由然也。是知一春爲四時之本。一和爲萬物之原。人能歛天之春。以爲一心之和。和其運。調其化。析其鬱氣。資其化原。復其所主。先其所因。高者抑之。下者舉之。有餘者折之。不足者補之。佐以所利。調以所宜。治寒以熱。治熱以寒。氣相得者逆之。不相得者從之。如此。則不和者和矣。夫春氣之和。自然之和也。而人使

人身之和。亦如春之和焉。此其所以爲萬物之靈。而能輔相天地之所不及也歟。但其職有崇卑。故所及有廣狹耳。推原所自。雖由於神聖工巧。而實本于虛靈知覺之心。是故風寒暑濕燥火。天之六氣也。喜怒哀懼愛惡欲。人之七情也。六氣不爲淫所勝。則天之氣和矣。七情不爲欲所乖。則人之心和矣。和也者。天下之達道也。自謹獨而精之。以至於應物之處。無少差謬。而無適不然。則雖天下之大。萬物之衆。亦可使之各得其所。而懽忻交通矣。況夫一人之身也哉。予也以儒而論醫。旣本醫之說以爲堂記。及其末也。請以儒之道終焉。繼君之後者。居斯堂。誦斯記。尙存孔思之心。以衍軒岐之術哉。

鍾秀堂記

秀鍾於天平。地乎。人乎。鍾以天。若箕宿爲說。昴精爲何是已。鍾以地。若山以東相。山以西將是已。鍾以人。若高辛有元。高陽有凱是已。要之稟陰陽之粹和。孕山川之精華。襲先世之芳澤。妙合其三。凝結於一。儲蓄於

邱 文 莊 公 集

厥中。穎出於其類。夫是之謂鍾秀歟。昔歲在辛酉。祁門程公顯。擢秀京闈。來歸邑里。邑大夫顏侯。表其門曰鍾秀。蓋於二者之義。兼有取焉。後公果以進士乙科。掌百里文教。超拜王相。綽有令譽。顏侯所以表門之義。至是益驗矣。景泰甲戌。公之子泰。承其家教。登名黃甲。拜地官屬。乃者荷天子厚恩。錫誥加封其親。公於是時。亦以耆艾致事家居。泰因取邑大夫所以表門者。顏其所居之堂間。命余記。嗟乎。秀之所鍾。豈偶然而已哉。不得乎天。則其稟氣也弗醇。不得乎地。則其賦形也弗厚。不得乎人。則其爲德也弗類。然則程氏所以鍾厥秀美者。抑亦有由矣。蓋以方今聖明繼出。氣運還淳。化行於上。物生於下。無非得其清明淳厚之氣。公家新安。又在天子畿甸近地。山川之勝。宏偉非常。其所以舍靈發祥。又非偏州下邑比。而公之先世。自忠壯公而下。代有顯宦。所以鍾而秀美者。蓋兼三者而有之。不誣也。吾知秀之所鍾。不獨在公。固已見於公之子矣。由是而孫。而曾。而玄。以至百千萬世焉。蓋未艾也。是爲記。

思補堂記

古之君子。其心無斯瀕而不在民也。故雖處山林之深邃。廟堂之崇高。而其心恒周流乎荒涼蒙翳之野。陋巷窮閭之中。鰥寡孤獨。饑寒流離。疾苦悲啼之處。惻然如身在其間。耳聞其聲。目擊其事。爲之委曲思慮。必使之得其所。然後已。况親爲牧者乎。親爲之牧。則目親見。耳親聞。身親在其間。而不一動心也。以爲深思遠慮。則是忍人也。豈所謂民之父母乎。且父母之於子。鞠之育之。出入顧復之。念其飢寒。卹其勞苦。防其疾疹。而又爲之營貲產。以養其生。延師傅。以成其業。凡可以紓目前之患。而豫爲他日之地者。無所不用其心焉。今之爲民父母者。果能如是否乎。不能者。是冒父母之名。而不能盡父母之道者也。不能盡其道。而徒欲責民之盡子道。以事乎我。難矣。父不慈。子不可以不孝。在天屬則然也。吏之於民。非天屬也。受君命耳。受命而來。居其位以子乎民。民父母我。我不能用君命。以子之。且虐之焉。一旦奪其命以畀他人。則我塗人也。前則父母我。後則塗人

我。無他。視君命之去留焉耳。然則爲民父母者。可不思所以盡其道哉。淮陰畢君玉。以名進士。知曲陽縣之。又明年。政行惠流。民心浹和。乃爲燕居之堂。於廳事之後。扁曰。思補。蓋取前令朱君伯堅所改亭名也。亭舊名環翠。洪武中。朱君重建。而易以斯名。今亭亦廢矣。君距朱君後七十又二年。始爲此堂。而有取乎其舊名者。蓋思所以補報乎朝廷也。噫。知愛乎民。則知所以忠乎君矣。余因君之請。而爲之記如此。使凡世之吏茲土。而居茲堂者。尙因余言。以思君之恩於無窮。

冲和堂記

廬陵郡之北。有山巋然。紆徐而環抱。曰鍾山。山之下有壽藏焉。穴土而爲之以巖。又築室其間。扁曰仲和。邑之義官陳君勗讓。豫爲藏衣冠之所也。旣成。以書來京師。俾其從子秋官郎中時莊。求記其事。而屬筆於余。余聞老氏有言。萬物負陰而抱陽。冲氣以爲和。嗟乎。豈獨人哉。山川亦然。故凡天下之山。其脈皆發於西北。而連綿起伏以至乎東南。西北陰也。東南陽

也。而扶輿清淑之氣。實流行乎其間。如人之生也。面陽而背陰。而清明純粹之氣寓焉。人之與山。其抱負之形。冲和之氣。一而已矣。山而聚扶輿清淑之氣。其爲山也靈。人而得清明純粹之氣。其爲人也賢。人之所以賢者。以其鍾是山川之氣也。是氣也。出於天。凝於地。融結爲山川。而發露於人。人得是氣以成質。質由是氣以聚散。其聚也出於是。其散也亦必返於是。散清明純粹之氣。返扶輿清淑之原。冲和妙合。綢繆無間。殆將周流太虛。以復歸於太極無極之真矣乎。不然。則發而爲卿雲。蒸而爲靈芝。凝而爲貞石。不可知也。陳君以是名其室。其庶幾所謂復命之常。知常之明者乎。觀於此。可以知其爲人焉。於是乎書。

葑溪草堂記

古之君子。存心也豫。其志卓然。有以定乎其中。其理躍如。有以見乎其前。是以其進其退。皆豫有以爲之地而不苟。右都御史韓公。吳人。其生長于燕。旣仕而始復於吳。治第於葑溪之上。蓋豫以爲退休歸宿之地也。其園林

池沼之勝。甲於吳下。世擬之以李衛公之平泉莊。司馬公之獨樂園。君子謂其有西洛之勝。而無贊皇之奇云。中爲草堂數楹。公自記之。間以書來俾余記其後。昔諸葛武侯。隱居南陽。不求聞達。感昭列三顧之勤。奮然爲之畫策。凡其宰割山河。三分天下。其規模布置。一一皆草廬中語。非豫有定見。能若是乎。及其相昭烈。以區區一隅之蜀。當吳魏之強。身都將相。手握重兵。自校簿書。罰二十以上。皆親決之。固若不暇爲私計計者。然於成都置田十五頃。種桑八百株。固以豫爲退步之地。以見君子之出處進退。固未嘗有心。亦未嘗無心。當無心必爲之時。已留心於事中。方有心應用之際。已置心於物外。未進而豫進之之資。未退而豫退之之具。是以前進也。道前定。而運用不窮。其退也。志前定。而勇決無疑。古今豪傑之士。所見皆同。蓋如是。今都憲公。受朝廷委託之重。付以嶺海數千里之地。數十萬之人。凡居是邦。耕於野。戍於邊。處於室家。行於道途者。咸恃以保障覆育之。生者恃以養。死者恃以葬。喁喁然。嗷嗷然。仰公以爲命。惟恐一日公

去。而我無所恃以爲生。孰肯一日釋公去哉。矧上方倚注。將大用之以溥其澤於天下。天下之人求所願欲而不遂者。亦爭欲得公以專其惠於已而不可得。傾耳而聽。翹首而望者。在在而有。公炳幾先物。非不知人不已釋。而已無可去之理。然猶汲汲然豫爲決不可得之計者。其亦武侯之意歟。公自爲記。所以紀其創置之始末。布置之規模。與夫生平成立之艱難。後人保守之常謹者。固曰詳且盡矣。余毋庸置喙於其間。行將北上。道吳中。登魏公醉白之堂。以求溫公之所獨樂者。以致高山仰止之意云。謹先此以記。

東郭別墅記

太子少保戶部尙書殷公。世居涿城之西。其先考贈尙書公。以郡文學歸老故鄉。嘗於城東營別墅。以爲娛老之地。至是公以年至。乞致事。蒙恩來歸。乃即故址。起其廢而新之。四周有垣。中有亭。汲有井。蔬有畦。補其缺而浚其湮。凡昔所有者。悉復其舊。又加闢焉。曾未幾時。蔚然成林。遂擅涿郡一時園亭之勝。旣而以書來屬余記曰。某以正統己未進士。歷官戶部主事。兵

部郎中。進三通政。兩知府事。陞山西叅政。左右布政使。八副都臺。兩巡邊方。叨備六卿。再掌國計。輔儲宮。至是休致。終始仕途。幾五十年。或南或北。時內時外。大約通朝籍之日居多。所居之鄉。密邇宮闕。急馳之騎。朝發夕可至。然拘於職任。不敢顧其私。今幸天假我以年。佚我以老。皇上優臣以閒。使得以桑榆之景。遂其田園之樂。以終先大夫之志。幸莫大焉。向同朝時。曾屬吾子豫爲之記。既蒙以諾。今幸復其舊規。成其素志。幸勿食其前言。竊惟古之仕者。不出其鄉。家有定居。仕有世祿。王朝卿士。皆出自畿甸。大者食采地。小者給恒產。外自侯國入者無幾焉。故凡仕於國者。得以不廢其家。唐宋盛時。朝臣自還外入仕者。晚而休致。率居陪京。或別都。唐都雍。其士夫多居陝洛同華。宋都汴。其士夫多居洛雒陳許。其間亦有仍居輦轂下。遇行大禮。猶與陪位。我朝雖竝建兩京。而南北相去懸遠。士夫解官者。率遠歸其鄉。一出國門。瞻望闕庭。如在天上。回思舊游。如隔世人。人生何幸而生畿甸之間。列職朝行。雲山伊邇。歸老鄉邑。天庭

咫尺。仕不如仕。休而不休焉。一何幸哉。公家近甸。世有田園之樂。年甫弱冠。卽舍之而仕。今則年屆古稀矣。始得來歸。以復其故業。遂其初志。徜徉樊圃之中。偃仰林亭之上。席落落之長松。裊茸茸之豐草。易朱紱以山溜。代黃封以石泉。享夫清閒和樂之適。以償夫奔走叢糲之勞。嘉時令節。天朗氣清。陟崇丘以引領。立黃庭而延佇。瞻天闕於紅雲紫氣之中。仰宸居於太乙勾陳之上。目擊而心存。予固知公之心。無一日而不在國也。亦何異於公疇昔之在朝。而於其私家也哉。古之君子。不以遠近易其心。不以豐約改其節。公蓋有焉。故予今爲公記。略其景。而原其心。

半山亭記

廬江縣治之西。一舍許。有山曰黃銅。邑人丁氏世居焉。形勢迴抱。風氣環合。蓋一邑山川之勝處也。峰巒列峙。中一峰。巋然獨秀。出於衆峯之表。丁氏之居。正據其勝。遠而望之。蔚然深茂之中。而棟宇簷楹。蔽虧於林木之間。隱然爲一鄉望也。丁氏之彥繼仁甫。以爲既有幽深之地。以定其居

止。不可無高明之所。以廣其瞻眺。爰於銅山之半稍南處。盤石之間。占其形勝。構以爲亭。扁之曰半山。環亭四顧。萬景畢聚。仰而山顛。有龍王之廟。俯而林麓。有居士之詞。古木千章。喬松萬本。有隄堰以灌溉。有河堯以邇迤。真人世勝境也。繇亭而上。直抵山巔。允夫廬江之名山大川。山若天四馬槽冶父之類。川若巢湖黃陂沙河之屬。矚目之頃。皆可以一覽而無餘。嗟乎。居半山之間。而享全山之勝。非徒得此一山之景。而凡廬江一邑之奇。無不在焉。又非徒得其一邑之奇。而凡廬郡二州五邑之勝。無不盡焉。丁氏世居於茲。受其山川風氣之全。而專有一方之奇勝。豈非居得其地耶。居得其地。又能據其勝。而享其樂。丁君其亦可人哉。君名恕。繼仁其字。淳篤而坦夷。鄉里稱爲善人。蓋隱而有德者也。其子鴻臚寺序班某。介其姻地官主事王克常求余記。惟昔王文公以半山老人自號。而繼仁之名其亭。偶有以合之。蓋無心而冥會也。半山老人。一生汨沒於聲名榮利之途。迨其晚年。退居金陵。始得半山而憩息焉。豈若繼仁生于山。長于山。出

入起居。昕夕周旋于林泉澗石之中。未嘗一日離也。名曰半山。而實得夫衆山形勝之全。其文章功業。固不敢望古之人。然其所居之山之名。偶與之同。其山間所有。若雲若霞。若烟若霧。若水石。若草木。若花卉。若鳥獸蟲魚。有天然之趣。有自然之景。有適然之樂。取之而不見其窮。玩之而不厭其煩。用之而不知其虧。蓋自幼而壯。壯而老。無一日而不在茲山之中。身居其半。而目極其全。身享其實。而心樂其適。而又傳之子姓。世世無窮。古之半山老人。有是哉。無是哉。有與無不必計。姑爲之記。俾其子寓歸泉繼仁。勒於石。而實諸其亭之壁。以遺其後人。

松軒記

增城曾君三省。世居邑之槎岡。隱居自樂。平生於物無所嗜好。性獨好松。環所居樹。松千百株。構屋其間。扁曰松軒。朝夕吟嘯其間。歌曰。松葉拳拳兮花菲菲。花以釀酒兮充吾饑。我且醉飽兮。焉知是與非。又歌曰。松樹偃蹇兮陰檀爨。據樹以哦兮陰陰以眠。臥起其間兮聊以終吾年。歌罷。飲酒

獨酌。半酣。支頤以臥。如是者。日以爲常。熙熙然。陶陶然。不知天壤間物。何者。足以當此也。君之壻。進士吳君澹。觀政京師。每以語余。未幾。其子瑞來。視進士君。因承君意。以記見請。余聞人各有所好。而其所好者。往往皆其氣類之相似。意趣之相孚者。不苟然也。余雖未君識。卽其所好。以想所爲人。意者其人必稟受不偏。超出群類。如莊子所謂受命獨青者歟。禮以制心。確然堅固。如戴記所謂有心者歟。持守堅定。不爲物變。如夫子所謂後凋者歟。不然。何其於他物一無所好。而於松焉獨好之篤也如此。詩曰。維其有之。是以似之。君之謂矣。夫似之。斯好之。好之。斯樂之。樂之。之至。則物我兩忘。彼此交喪。物其我乎。我其物乎。混混然合一之矣。不可得而知矣。君之於松也。殆有得於此矣乎。不可知也。請書此以爲記。進士君曰。唯。遂書之授瑞。歸以遺君。寘諸軒間。

梅軒記

卽一物之微。而可以觀世變之大者。吾於梅有感焉。梅之爲物。著於書。詠

邱 文 莊 公 集

於詩。雜見於騷。人文士之所賦詠。然其初也。不過用其實而已。馴至於後世。始顯於華顯。而實之用微矣。嗚呼。天下物豈獨梅哉。梅其小者耳。由小可以觀大矣。有能於波瀾瀾倒之餘。而有歛華就實之見。豈非有志之士哉。寶安袁生秉彝。構軒數楹。以爲藏修之所。於軒之前植梅數本。當其盛開之時。恒指以示人曰。吾非有取於是。蓋將俟其實。以爲和羹之用也。噫。觀於是言。可以知其志矣。人皆務其華。我獨歛以實。人皆驚於文。我獨篤以行。不混俗以同。不隨世以趣。蓋有志之士也。嗟夫。天以陰陽五行化生萬物。而賦其全於人。有仁義禮智信之德。有父子君臣夫婦長幼朋友之倫。有聖賢以爲之師法。有經史以爲之軌範。顧皆置焉而罔知所以用功。乃指一草一木之微。囂囂然以號諸人曰。是物之趣。有契於予。予取而法之也。豈非妄歟。且冷蕊寒疎枝。何有於吾之性情。淡香疎影。何預於吾之身心。析枝以贈。何似乎簡書。踏雪以尋。何資乎日用。巡簷索笑何爲也。竹外一枝何好也。世之學者。動以師法孔子爲言。孔子刪述六經。而梅兩見於詩。

書。皆以其實也。而後世之所以愛乎梅者。則以其華焉。是則孔子不足法。詩書不足取。而何遜林逋之徒。真可慕也。豈不悖哉。君生也。可謂能學孔子者也。觀此一事。可以知其餘矣。他日用於世。幸毋易茲志。生之仲兄戶部君秉中。予友也。命余記其軒。故書此以復之。且以致吾感云。

林軒記

順邑之大羅鄉。文溪之上。蔚然衆木間。有宅一區曰林軒。邑人黎君平叔棲息之處也。文溪地宜木。木生其間者非一類。有其材可爲棟宇者。可作舟輿者。可備器用者。又有其實可供食茹者。其華葉可供觀玩者。凡地之所宜無不有之。君臥起。輒著屐持杖。循行衆木間。縱橫周折。隨其意之所如。且行且咏。少倦。則歸偃息軒中。嗚嗚然作吟哦聲。不少輟。旣而洞開八窗。憑闌四顧。喟然歎曰。天地如許之大。而我棲息。止於一軒。一軒之寓。止於一林。何其小也。又自解曰。我寓軒間。軒寓林間。林寓嶺海間。嶺海寓天地間。天地寓太虛間。由是觀之。吾軒亦豈小哉。且不聞地之五土乎。山林

邱 文 莊 公 集

其一土也。又不聞造化之五行乎。木其一行也。木以成林。而我之軒居林間。于焉以俯察地理。以仰觀天文。天之生。地之成。作酸之味。曲直之性。積小以高大之勢。其樂豈下於古人哉。古之人如孔子所植之檜。惠施所據之楮。莊生所稱之椿。吾之林有之。伯夷所食之薇。屈子所紉之蘭。商皓所茹之芝。吾之林有之。王子猷所種之竹。陶處士所採之菊。林君復所愛之梅。吾之林有之。以至楚頌之嘉樹。蜀賦之側生。漢史之薔醬。吾之林亦皆有之。然此之所有。皆一物之奇。一事之用。若夫南郭子綦聞大木百圍之竅穴。而有以見夫之調調之刁刁然。庶幾齊乎物歟。慶梓齊以忘其枝體入山林。以成見鑿。庶幾疑於神歟。有虞氏居深山中。以與木石居。庶幾忘乎我歟。夫然。是能以一而盡萬。精其麤。大其小。而會萬于一也哉。君之子選。以進士舉來京師。述君言請予爲林軒記。予不識君。而覩選之彥而有文。立志高遠。異時秀窮林。而風聲聞四海者。其在茲乎。於是乎援筆。廣君意爲林軒記。授選歸書于軒之壁。

博雅軒記

學不可不博。博而雅焉。斯爲可尙。羊城吳永年氏。構軒以藏修。左右列書籍。自六經以下。史傳子集。凡世所有。及力可致者。無不咸在。永年日居其間。蚤暮孜孜。口誦心惟。取凡古之聖賢格言至訓。名臣端士。宏規懿範。可師可法。可爲鑑戒者。識之於心。體之於身。行之於家。而又豫蓄以爲他日從政之用。若夫詭道悖德之談。荒唐繆悠之說。一切棄置。不復少寓目焉。嗚呼。其志可謂大矣。嘗求工書者。書博雅二大字揭楣間。今年爲有司勸駕來京師。介其姻林宗敬求予記。予惟自有書契以來。文籍之存於世者。日新月盛。出則汗牛馬。處則充棟宇。不爲不多矣。然而飾邪說。文奸言。齷字崑瑣者有之矣。縱性情。亂是非。恣睢利歧者有之矣。不法先王。不是禮義。而好怪說。甚至察而不急。辯而無用。多事而寡功者有之矣。劇目鉢心。揜擢胃腎。鍛鍊於一字一語之間。以爲工巧。取黃配白。神出鬼沒。聽之則固成章若可嘉。要其歸宿。則漠然無所用於世者有之矣。悖逆天理。滅

邱 文 莊 公 集

絕人倫。肆爲弘闊勝大之說。汗漫不經。妖誕幻惑。不言六合。而言其外。不言當世。而言世之未來者有之矣。若是者。大之不可以理天下。次之不可以爲一家。小之不可以理一身。縱無一不通。無一不知。奚以哉。此君子之學。所以貴乎博。博而尤貴乎雅也。是故道陰陽之書。莫雅乎易。彼京房焦贛之災異。非雅也。紀政事之典。莫雅乎書。彼汲冢竹書之奇怪。非雅也。理性情之辭。莫雅乎詩。彼風雲月露之無穢。非雅也。正名分之史。莫雅乎春秋。彼擊排冒沒之偏黨。非雅也。謹節文之儀。莫雅乎禮。彼委巷綿叢之駁雜。非雅也。是五者。雅正之經也。傳之萬世而可行。行之無弊者也。其他如儒先之駕說。史氏之紀載。詩人之詠歌。亦或有爾雅者焉。於此乎博而求之。求而擇之。擇而服之。以爲身心國家之助。斯不亦尤可尙乎哉。

清風樓記

清風樓。在蕪湖縣治之北。俯瞰大江。乃前御史黃公用遜所居也。其地舊名臬磯。宋人常建驛置于此。成化初元。邑令陳侯源始于此立臬磯。劉夫人行

祠。祀三國吳大帝妃。越若干年。星沙劉侯廷式以進士來知縣事。於祠前隙地。構樓四楹。取東坡清風閣記之意名之。功未就緒。召入內臺。而廣東林侯世遠繼其後。乃落成之。樓蓋爲黃公建也。而名之以清風者。豈非以公之平生風度澄澈。而有似風之行水乎。夫風無往而不在。於水也尤爲清焉。萬里長江之濱。構爲高虛之居。縱目以爲廣大之觀。處身既高。寓目斯遠。當天朗氣清之時。長天無雲。一碧千里。清風徐來。微濤蹙而成紋。旋流迴而成渦。湛波澄而徹底。眞天下之奇觀也。亦天下之眞趣也。天光雲影。徘徊上下。紆徐演漾。以沉之軒窗欄楯帷幔之中。出入懷袖披拂衣巾。透徹於胸膈毛髮之間。無一點塵濁氣。水旣清矣。風亦清焉。矧樓居主人。稟乾坤清氣。擺脫乎塵氣埃壅之外。清風高節。尙慕古人。而一時宦寓。凡爲創建及游從者。何者而非清高絕俗之士哉。夫江自岷山而下。至此萬里矣。放乎虛空。棹乎無垠。而聚此江潯尋丈之樓。矚目之頃。而風水之極觀於是乎備。方公年少時。乘長風。破巨浪。縱其所如。一日十里。所至

人仰望其風裁。蓋凜凜然。中年以來。收其湖海之氣於此一樓之間。風力劣於前。而目力則優矣。風聲雖不遠。而受用則無盡藏矣。以此較彼。略亦相當。雖然。與其得彼也。寧得此。余指日南歸。道于湖。方將登公之樓。以挹長江之清。而共享此快哉之風。尙期相與賦之。

長樂居記

出瓊城而南。微折而西。幾三舍許。有地名曰北衝。蓋古所謂羅源璞鄉也。有氏王者。自閩而來居于茲。不知凡幾世。至王君才者。淳謹而明爽。幼以民俊鼓篋鄉校。既而以親老宗單。主祀者乏人。言于有司歸隱焉。恒自歎曰。士大夫生天地間。當爲天地間用。然後爲不負天地之所生。進則表率乎天下。退則矩範乎一鄉。不但己也。吾少有志世用。然而卒不致其用。於天下。吾無其位。與地。與其時。固不得以行吾志。若夫由吾一家。而達於吾鄉井之間。吾身之所在。足之所履。耳目之所及。量其力可以爲。揣其分所當爲。卽其所居之地。隨其可爲之事。而樂其日用之天。志雖不行於天下。

亦可以行於一家一鄉也。鷄鳴而起。盥嗽之餘。即披衣持杖。循行階除間。迤邐而出於庭院園圃之中。左顧右盼。某地可畦。某地可畛。某地可隴。或宜于蔬。或宜于果。或宜于藥。或宜于竹干木。某種可蒔。或可以分。或可以移。或可以修飾剪剔。燥而灌之。瘠而糞之。穢而除之。柔弱而扶持之。欹側而植立之。然後呼童僕而命之。隨其宜。而施其功。朝如是。暮如是。今歲如是。嗣歲復如是。積之歲年。日計不足。月計有餘。閱歲久。乃大有所成就。遠而望之。蔚然而成林。近而即之。井然有條理。粲然相錯雜。竹樹列而成陰。野花發而幽香。真人間勝景也。乃引山泉做蘭亭遺製。爲曲水以爲流觴樂客之所。又於曲水之旁。鑿爲深池。池之中構亭以避暑。池上闢爲園。雜時百花。開軒其間。題曰適意。暇日與客徜徉園中。日以成趣。倚軒以暢幽懷。登亭以避煩囂。興闌而倦。則據石而坐草。泛羽觴於曲水。一觴一詠。以樂其自然之趣。自幼而壯。壯而老。無一日而不樂其間。其樂可謂長也已矣。非但自樂其樂。而又以是樂傳之子。若孫。若曾。若玄。百千萬

年無有窮矣。乃總名之曰長樂居。豈不名稱其實哉。君之家子冕。爲有司勸駕來京師。乃持君所述者。求予文爲長樂居記。予與君同生海隅。同爲庠生。予出仕。而君歸隱。今俱白首矣。凡予之所成就者。他人視之。固若有大可樂者。然以己視之。恒見其憂。而未見其所以樂焉。王君之志。雖不克大行於天下。而其所以安于一家。克于一鄉者。則固優游而有餘。寬綽而不拘。從容而自如。舉目之間。移步之頃。何者而非其樂哉。樂不徒樂。而且至于長焉。樂乎哉。王君足不出乎州里。夢不至乎市朝。生於斯。老於斯。聚親屬於斯。死葬祭於斯。禮不云乎。樂樂其所自生。而諺亦云人從生處樂。王君歛其所以不用天下之志。而用之於一家一鄉。聚景以成趣。卽趣以生樂。此其樂所以生生不已。而至於長哉。余不久歸老於鄉。行將訪君之居。而卽其所以樂者。而共樂之。君其肯分予以半席否。

雲軒記

山東漕司批驗大使朱珍公澤。顏其居曰雲軒。因以自號。蓋有取乎晉陶靖

邱 文 莊 公 集

節歸去來辭。所謂雲無心而出岫之意也。嗟乎。人惟無心。然後能應彼有心者。先橫一物於胸中。其未出也。豫期於將然之先。其既出也。取必於已然之際。卒之期者未必如所期。必者不能如所必。至於狼狽而歸者多矣。此無他。私心害之也。盡觀諸雲乎。觸石而出。膚寸而合。瀰漫乎虛空之間。山林之衝。草木之岑蔚。似砲車者。似赤鳥者。似擘如者。似車蓋者。似金柯玉葉者。似白衣蒼狗者。油然而作。奇形詭狀。體態不一。霽然而雨天下。澤萬物。何嘗有心乎哉。雖然。奚止於雲。天地之大。亦無心而成化也。聖賢法天時以屈伸。時行則行焉。嗚呼。物豈獨雲哉。而陶子顛顛歸之。蓋因其偶然之見。以寓其悠然之意焉耳。公澤摘是名軒。亦不可謂無所見也。余聞公澤少無宦情。偶爲公府所辟。遂循資以得今官。蓋庶幾所謂無心者。則取無心之物。以爲軒名。以爲已號。不亦宜乎。今年考滿來京師。持吾鄉人詩司知事馮君書求記。於是乎書。

留耕亭記

邱 文 莊 公 集

瓊大姓附城而居者。東則稱唐氏。唐氏世多賢。至履正翁。尤仁厚長者。嘗去所居一里。而近平田中。築土爲墩。墩上構草亭。日登其間。以督耕者。以觀稼穡。一日攜諸子遊焉。屢顧而歎。時子彥宜侍側。踞而問曰。大人何歎也。翁曰。吾悲夫人家之盛衰不常。而盈虛消息之理。恒乘除於其間也。天地間萬有。皆不可恃。所可恃者。吾方寸間耿耿者爾。試與爾觀之。嗚呼。而芄芄。環吾亭之址。以至於目力之所不可盡。藐綿蒼莽之際。何非膏腴之田乎。是田也。非一家所有也。有之者。固有世業數百年者矣。又有不數年間而屢易主者矣。或暫得而遽失。或失之未久而遽復。是雖無情之物。而人家之成敗興替。恒必由之。惟其得之也以義。則能相與悠久而不失。不幸而失焉。亦將不旋踵而來歸矣。彼得以勢以力以計者。卒反是。嗚呼。自某人席勢。以凌其人之卑弱也。而豪奪其田。自某人恃力。以欺其人之孤寡也。而吞併其田。自某人用計。以乘其人之愚暗也。而巧取其田。田今如故。其人安在哉。其子孫何如哉。惟仁惟義。可以久長。凡其世澤之遠。家

慶之長。昌衍而賢明。既廢而復興者。皆自其乃祖乃父方寸中來也。小子識之。彥宜再拜。時翁之弟復信。以衡州府倅。致政家居。聞翁言而題之曰。吾兄之意。其唐賀監詩所謂但存方寸地。留與子孫耕者與。請摘其語。以名其亭。曰留耕。翁曰然。翁既捐館。彥宜以事來京師。館於余。並以翁言見告。且曰。願有記。余、翁之通家子也。不忍辭。遂綴翁語。授彥宜。俾持歸以志諸其亭之壁。時以語館閣中。諸公咸歎曰。有是哉。各賦詩以美之。凡若干首。併附于左方。

進學齋記

穎州貳守清源高君之家嗣曰昕君。嘗名其讀書之所曰進學齋。今年春。昕侍君來京師。謁予文以爲記。嗟乎。進之一言。爲學之方。盡於此矣。余尙奚言哉。雖爲之言。豈能外於此哉。然不知生之所謂學。果何學也。所以進之者。果何以用其功也。苟徒以誦習古人之糟粕爲學。則生固知之矣。不必更求其說於余也。生侍親。宦游南北有日矣。請即生所見者。以爲生喻。

邱 文 莊 公 集

生閩產也。自閩至燕。其道路以里計者。殆將萬焉。其所經之郡若邑。不下百十焉。或舟以浮。或車以載。其所以爲濟行之具者。不知其凡幾易焉。其途中所有。身之所履。而目之所見者。山川之流峙。都邑之形勝。園闈之藝集。舟車之交互往來而不已者。不可以一二數焉。陸有岐徑。水有支流。或之南東。或之北西者。又不止於一焉。地如此其遠也。履歷如此其久且艱也。所見如此其廣也。水陸之塗。如此其多岐而可以旁通也。今生之來也。不中止焉。不他適焉。而必至於燕者。豈不以京師之所在乎。使生不由乎履歷。不假乎舟車。其能至此乎。今日行之。明日止焉。其能至乎此乎。無也。京師者。譬則聖人之道也。履歷經行。所以求至乎聖人之道也。岐徑支流。一技之能。異端之學也。生之進學。誠如生之來京師。行而不已。必至其至焉。立志之堅定。積累之非一日。聞見之廣且遠。而又不感於他岐。不安於小成。則學之至於道也不難矣。敢以是爲生記。或曰。生之於學也。特欲講習討論而已。予以聖人之道語之。豈所謂不凌節而施乎。嗚呼。學所

以學爲人也。人必如聖人。斯能盡人道。聖人人也。我亦人也。以人學人。何不可之有。或者退。因書以遺生。俾其眞諸齋壁。朝夕玩焉。

雪筠記

南海豐林鄺昱時裕、客京師。介余友林宗敬、求余記所謂雪筠者。且言其平生於物無所好。獨於竹深嗜而酷愛之。而於雪猶竹也。因取以自號。余惟嶺南固多美竹。而雪則非其地所有者。今時裕兼取而竝言之。豈亦有見於古人觀物之學。心其理。而不泥其迹者與。古之人有愛竹者。曰王子猷。其居吳時。每聞士大夫家有佳竹。徑造其下。諷嘯久之。及主人出延。則不顧而去。暨其在剡。雪夜乘輿。泛輕舟訪戴安道。既造其門。輿盡遽返。方其諷嘯之時。不必有雪也。乘輿之頃。不必有竹也。然而以一人之心愛。可以見二物之趣同。得其一。則其理固以均寓於其中矣。政不必兼而有之也。彼方外士。有爲雪齋者。乃灑粉於草木之上。以象飛雪之集。則是有見於目。無得於心也。然則所謂見者。豈眞見哉。時裕向之居越。環所居皆竹。固見

竹。不見雪也。今而北游幽燕。當盛寒之時。寓多雪之地。則又見雪而不見竹焉。夫不拘於迹。而惟理趣之求。假異以會同。因此而得彼。非真有見者不能也。噫。見所見於無見之境。非獨有所見。且亦有所得矣。予故不辭而爲之記云。

南溪小隱記

東莞陳景輝氏。世居其邑之圓沙面溪。而築室以爲藏脩之所。或顏之曰南溪小隱。間以事至京師。介其友某徵余紀。因詰之曰。古所謂隱士者。非伏其身而弗見也。閉其言而弗出也。藏其知而弗發也。時命大繆也。今君生明盛之朝。文獻之邦。詩禮之族。身際其可。可以見也。言當其可。可以出也。知適其可。可以發也。時與命兼通。非若昔人之大繆不然。所以興事造業。以立久大無前之基。茲其時也。願乃與遠人棄世者同流。何待而隱與。景輝曰不然。某非有待而隱。盡有賴而隱也。使某也生非其時。處非其地。出非其族。方且膠膠擾擾之不暇。衆械箠其口。百憂嬰其心。一搖手而

有柎楊接褶也。一舉足而有機械坑埒也。叫囂之聲。日盈乎耳。驅逐之役。日勞乎形。鷄犬不得寧也。室家不得有也。雖欲少憩以斯須焉。不可得也。尙何所賴以隱乎。是則古人之隱。有待而隱也。某之隱。有賴而隱也。此所以有大小之別也乎。余聞其言。歎其遭際之盛。而喜其識趣之卓也。乃筆其言而記之曰。溪之源。發乎某所。又若千里至圓沙。景輝之室在焉。室前則溪也。是謂南溪小隱之云。以所居者山林。異乎市朝之隱之大也。景輝名章。故約軒先生某其父。今霑化大尹景庸其弟也。

蒙溪清隱記

滇南有隱士。潘其姓。某其名者。家有別業。名曰蒙溪。曰以蒙溪清隱自號。客有萬里來京師。代永其記於翰林者。特以屬余。余詰之曰。古之人隱於溪者多矣。潘君之意。果何慕乎。唐人以竹溪。隱於酒者乎。其意或在是歟。客曰。此蔑棄禮法之所爲也。非端人莊士之道。君讀書好禮。豈屑爲是哉。晉人之武陵溪。隱於仙者也。意取諸此歟。曰此荒唐繆悠之說也。非人倫日

邱 文 莊 公 集

用之常。君信道明誼。豈肯爲是哉。然則君之意。無乃慕柳河東之愚溪乎。曰。此逐臣遷客。不得已而托焉者也。君肥遁丘園。無所慕於外。何有於托。然則有慕乎杜少陵之浣花溪乎。曰。此亂世孤臣。不得已而寓隱者也。君生際明時。足跡未嘗一出其鄉。何有於寓。然是四者。皆君所弗取也。而其所慕而隱者何居。殆將隱居求志。以待後車之載。如太公之釣於磻溪也耶。曰。子求之愈遠矣。子以爲太公之隱於磻溪也。有意以待文王之載乎。抑遇文王。不得已而受其載乎。子非獨不知君。蓋不知太公者也。先儒有言。即其所居之位。樂其日用之常。苟出位而思。舍日用而他求。知道者不爲也。子盍思溪之所以名乎。於乎。我知之矣。易之象。上山水曰蒙。是溪也。其水之出於山者乎。惟其出之於山。故即卦象之似者以名之乎。夫天下之水。其源末有不出於山。其初出也。未始不清蒙者。水初出山之象而清者。水之本質也。隱居之士。潔其身於塵垢之外。澄其心於汙濁之表。其有類於是與。君之所以名溪而自號者。其有在於是與。且將由是而果行育德。

以養正成聖與。抑其有子能繼其志。如蒙九二之克家故取之與。若君者。似亦有得於易者矣。客曰。君之志。誠有在於是。子之言。可謂得之矣。請書以爲記。客謂誰。余友武定軍民府同知潮陽葉君也。

可繼堂記

可繼堂者。瓊臺丘氏之正寢也。堂以可繼名。摘先祖思貽公所題堂楣對句語也。洪熙改元。公以臨邑醫官。滿考赴銓曹。留京師。又明年。是爲宣德丁未。先考學士公卒于家。時先祖年五十九。僅兄源甫九歲。溶七歲。明年公歸自京師。其祭學士公文有入門見棺之語。聞者傷之。先祖平生止一子。上無伯叔。旁無兄弟羣從。推而遠之。亦無宗族。煢煢然僅一孫存。上繫宗祊之重。如一絲之引千鈞也。鄉人有唁先祖老而喪子者。先祖指吾兄弟告以曰。吾先世。世以積善相承。然未有發者。今不幸而中微。然古人往往因微而大著。所以大發者。其在二孺乎。因手書二句曰。嗟無一子堪供奉。喜有雙孫可繼宗。命通家子陳曦書之。揭於寢堂之楣。鄉人多稱誦焉。潘兄

弟就外傳時。一日先祖坐堂上。兄與濬偕侍。公謂兄源曰。爾主宗祀。承吾世業。隱而爲良醫。以濟家鄉。可也。謂濬曰。爾立門戶。拓吾祖業。達而爲良相。以濟天下可也。時吾兄弟俱幼稚愚昧。不知先祖之言爲何如。然自是亦知惕厲自持。不敢失墜。兄年十有九。濬少兄二歲。而先祖棄去。時正統丙辰歲也。歲己未。濬始補郡庠生。甲子。領鄉闈首薦。己巳。兄爲有司薦。繼先祖職。濬登甲戌進士。選入翰林。爲庶吉士。除編脩。累陞侍講學士。國子祭酒。禮部侍郎。歲癸卯。蒙天子推恩。贈先祖爲通議大夫禮部右侍郎。自先祖捐館舍至是。四十有七年。題二語後。則五十有七年也。茲二語者。鄉人父老。至今猶能誦之。如昨日然。而是堂崩。以旣壓而更新之矣。濬兄弟佩服斯言。兢兢如一日。未嘗少置諸懷。濬於官次。嘗求能書者。書可繼堂三二字。寓歸以遺吾兄。俾刻而寘諸堂之楹。兄嘗命濬以記。濬領之而未果。歲丙申。不幸先兄亦棄濬。而從先祖於九泉。不及見天恩之降矣。嗚呼痛哉。濬鬢髮亦種種矣。久官于朝。而乞骸之情。尙未得如所願。因

邱 文 莊 公 集

述所以名堂之意。以貽子敦。及從子陶融。俾買石刻之。而立于堂隅。使後之子孫。知今所以名堂之意。而思所以繼繼於無窮。而又爲之言曰。繼之爲言大矣哉。夫非人不繼。父非子不繼。人能繼天。是爲聖人。所謂繼天立極是也。子能繼父。是爲孝子。所謂繼志述事是也。然天有可繼之道。然後聖人繼之。父有可繼之業。然後孝子繼之。有天而無人。則極不立。有父而無子。則世不延。此古之君子。所以創業垂統。必爲可繼之道。而承其後者。必持循遵守之。而不敢失墜。使其可繼者。世世接續而延長之。父作之於前。子述之於後。必如是。而後可。不如是。則不可。所謂可者。斷斷必爲之辭。非僅可而未盡之謂也。茲則吾先祖言外之意。謹用推廣之。以示後之人。爲吾子孫者。服膺吾言。其尙如吾兄弟服膺吾先祖之訓。然爲之先者。必爲所可繼。而不可繼者。弗爲。爲之後者。必繼其所可繼。而凡可以繼者。無不爲。如是。庶乎爲丘氏孝子矣乎。不然。則辱祖特親。其不孝也莫大焉。

丘文莊公集卷之七

東溪記

南海之佛山。去城七十里。其居民大率以鐵冶爲業。有梁氏者。世居其間。獨業詩禮。至名顯者。性雅好山水。其所居之東。臨溪水。無間暑寒。朝暮飽食後。輒着屐。踏晴沙。循清流。且行且歌。朝而歌曰。溪瀟瀟兮流之東。日光逆射兮。影漾其中。我欲尋其源兮。禹迹不可窮。暮而歌曰。溪瀟瀟兮來自西。顧兔下浴兮。桂濕其枝。我欲極其流兮。海若不可涯。歌竟。長嘯而歸。日以爲常。客有過而之聞者。歎曰。向臨流而歌者誰歟。蓋聞道者也。豈滄浪孺子之儔歟。及薄而視之。乃皤然一翁。非孺也。走而問之佛山之市。市人無識者。乃戶訪之。遇一儒生。生物色其人。與其所以歌者。乃笑曰。此吾友梁東溪也。斯人雖不甚讀書。而讀亦不求甚解。然其所行所言。與經書不合者亦鮮。故其形之歌詠者。渾涵而窈深。不用意而意

已獨者如此。蓋宣尼所謂善人者。客忻忻然亦歌而去。歌曰滔滔汨汨兮。天下皆然。孰沿其流兮。孰泝其源。斯人何人兮。獨契其天。其將爲魚兮。躍于淵。抑將爲藻兮。漾于漣。孰引之進于川上兮。我將與之後先。東溪之子。經。以鄉貢進士來京師。介其友林宗敬過予求記。其所謂東溪者。且道客所。以歌之故。予因筆之爲記。

鴈集瓊庠記

正統壬戌秋八月辛丑。余時肄業學宮。日亭午。與同舍生符鏗秀、陳汝諧、偶息游焉。有童子走報曰。有鳥集于學宮洿池之中。比鷓鴣而小。似鳧鷖而大。足指蹼屬。毛色蒼白。旁皇四顧。馴擾而不驚。蓋平昔所未嘗見者。蓋觀之。予偕二友往焉。顧謂之曰。此易所謂漸于陸。其羽可用爲儀者乎。書所謂隨陽以攸居者乎。禮之用爲大夫贊。其土昏攝盛以奠者乎。是鳥也。生乎沙漠之墟。隨陽南征。集于江湖漢沔之間。乃其所也。嶺海之南。隔山越河。蓋彼飛不能遠到之處。胡爲而至此耶。茫茫鯨波。百川斯委。四州之

間二三十里之域。其間之水。滙而爲湖。流而爲河。渚而爲沼。視茲洿池廣袤。何啻百倍。且此學宮。相去重湖。僅一堵許。彼皆不之集。而顧來于茲。謂其無意可乎。二友叩予以求其故。予謂之曰。禽鳥天產也。其得氣最先。而雁又隨陽之鳥。秋賓南而冬北歸。知時者也。其乘氣機而先動。尤非他鳥之比。昔人聞天津杜鵑之聲。而預有所占焉。矧茲陽禽表稱知時者乎。昔者地氣自南而北。果有南人以文字亂天下。今也地氣自北而南。安知無南人以文字治天下耶。昔既有驗。今亦有驗矣。二友戲謂予曰。安知非子耶。余笑而遙謝焉。雁聞人言。若對以臆。童子舉手。倏爾西征。歸而筆之以爲雁集瓊庠記。

槐陰書屋記

歲甲戌。余徹居京師。得十數楹于禁城之東偏。可一畝許。因闢一室以爲藏脩之所。聖以楮。中設几案。左右列圖書。外隙牖于牆面南。以迎陽明之光。牖蓋有古槐一。其大盈尺。其高僅丈。望之童童。若車蓋然。其陰半覆于

邱 文 莊 公 集

塔。半盖于瓦。而牖戶几案。賴以庇焉。自夏徂秋。蘊隆蟲蟲。若焚若烝。而吾一室之中。恒若挹清風。濯冷泉。不自知其在園園塵紛之內也。余日居其間。繙閱書史。口誦心惟。凡古聖賢所以用心而著於書。古帝王所以爲治而具於經史者。與夫古今儒生騷客。所以論理道。寫清景。而寓於編簡者。皆得於此乎神交夢接之。而肆吾力焉。使不爲炎歊所侵。以中輟之。則吾得於茲槐之助也多矣。因扁之曰槐陰書屋。或者過而疑焉。以謂有慕乎王晉公三槐之意也。嗟乎。公植槐以貽後。取必於天也。而蔭槐以讀書。取必於已也。取必於天也以德。取必於已也以學。讀書所以積學。積學所以成德。成德所以合天。又安知昔人所以期其後者。不可期於已耶。庸何疑。或者去。因書于壁。

願豐軒記

余少有志用世。於凡天下戶口、邊舉、兵馬、鹽鐵之事。無不究諸心意。謂一日出而見售于時。隨所任使。庶幾有以藉手致用。及登進士第。選讀書中

邱文莊公集

秘。即預脩寰宇通志。又於天下地里遠近、山川險易、物產登耗、賦稅多少、風俗嫩惡。一一得以寓目焉。是時年少氣銳。謂天下事無不可爲者。願無爲之地耳。得登名仕版。日暮援宮。可以行吾志矣。書成上進。凡同事者各隨給事中御史。獨畱四人者爲編脩。予與焉。編脩職專史事。本朝不設起居注。遇有纂脩。旋設館局。給筆札。惟官具。凡側是遑。遂事呈稿。筆削惟命。蓋官局脩書。復古然也。其中雖有所見。亦不敢盡用已意。入院首尾二十餘年。四轉官階。不離于言語文字之職。凡昔所欲資以爲世用者。一切寓之於空言無用之地。日斯征而月斯邁。今則頭顱將種種矣。非徒時不我用。縱有所用。則已精神衰爾。心志疲倦。亦不能有所爲矣。於是乎返觀內省而自歎曰。噫。濬自七歲入小學。十九補庠生。二十四領鄉解。又三年試禮部。得校官不就。卒業國學者六年。歲甲戌。始登進士第。入翰林。方其在學校也。有月廩之食。升冑監也。有日會之饌。官翰林也。歲有常祿。而又日給食。夫官翰林之職。專於講讀、纂脩、考試。亦猶吏曹之於銓選。刑

邱 文 莊 公 集

部之於推讞之類也。諸司曹務。未聞常祿之外。別有支給。而此入局。則有茶果之供。鎮院則有文綺之賜。進講。則有御廚之給。諺有之曰。經筵頭。史館尾。蓋以初開講必有重賚。既進書必有榮陞故也。詩不云乎。無德不報。潛生遐外之域。學無師授。仕無引援。一旦拔自草茅之中。進之天日之下。而又授便蕃之賜。優渥之恩。如此其厚且至。將何以報稱聖恩之萬一哉。且性愚而拙。蟲知人間廉恥事。不敢出其位而遐途於他。然則於此將奈何哉。無已。則亦瞻天以致其祠歟。夫人類之尊。莫尊於君矣。而居君之上。則尤尊者天也。天不言其所以。默相而陰定之者。又不必屑屑然露其聲迹。惟陰陽之順序。星辰之循軌。雨暘之時若者。人皆可得而見焉。然其尤效驗而最顯著者。又在乎雨暘也。是故當雨而雨。雨而不至於淫。當暘而暘。暘而不至於亢。則五穀豐登。萬物用成。將見家給人足。而禮義興行。禮義興行。則盜賊不生。盜賊不生。而禍亂不作矣。夫然。則君位之尊安。國勢之隆重。世祚之延長。與天地相爲悠久而無窮焉。區區報國之心。庶幾在

乎。杜子美云。憂國願年豐。此之謂也。謹摘其言以名吾所居之軒。而書此以記于壁。

藏書石室記

予生七歲而孤。家有藏書數百卷。多爲人取去。其存者蓋無幾。稍長知所好。取而閱之。率多斷爛不全。隨所有用力焉。往往編殘字缺。願無從得他本以考補。時或於市肆借觀焉。然市書類多俚俗駁雜之說。所得亦無幾。乃徧于內外姻親交舊之家。訪求質問。苟有所蓄。不問其爲何書。輒假以歸。願力不能抄錄。隨卽奉還之。然必謹護愛惜。冀可再求也。及聞有多藏之家。必豫以計納交之。卑辭下氣。惟恐不當其意。有遠涉至數百里。轉挽至十數人。積久至三五年而後得者。甚至爲人所厭薄。厲聲色以相拒絕。亦甘受之不敢怨懟。期於必得而後已。人或笑其癡且迂。不恤也。不幸稟此凡下之資。而生乎遐僻之邦。家世雖業儒。然幼失所怙。家貧力弱。不能負笈擔簦以北學於中國。中心惕然。思欲以儒自奮。以求無愧於前人。反求諸心。

似知所愛慕者。甚欲質正於明師良友。引領四顧。若無其人。不得已而求之於書。書又不可得。而求之之難有如此者。乃喟然發歎。自盟於心。曰某也。幸他日苟有一日之得。必多購書籍以度藏於學宮。俾吾鄉後生小子。苟有志於問學者。於此取資焉。無若予求書之難。庶幾後有興起者乎。歲己未補郡志弟子員。甲子領鄉書。戊辰上春官。卒業太學。甲戌第進士。卽入翰林。自此日積月累。所得日多。歲庚寅丁先妣憂。歸故鄉服闋謁先聖於學宮。怵然動其宿盟。顧南方卑濕。竹帛不可久藏。竭平生積業鳩工。鑿石以爲屋。凡梁柱楹瓦之類。皆石爲之。不用寸木。廣若干尺。長若干尺。經始於 年 月。落成于癸巳年七月。爲錢總若干。督其工者。鄉友吳雲也。中爲木櫃若干。內度以書。僅成。予卽北上。竊恐後人不知予得書之難。而易視之。或者又取之以去也。乃自書其事而爲之記曰。書之功用大矣。由一理之微。而可以包六合之大。由一日之近。而可以盡千古之久。由一處之狹。而可以通四海之廣。由一事之約。而可以兼萬物之衆。其惟書乎。

嗚呼聖人沒也。久矣。而道德萬世如見。古人往也多矣。而事業終古常新。合千萬世之心術。聚千萬世之治迹。傳千萬世之語言。演千萬世之理道。皆於書乎是賴。士也生乎千年之後。而知乎千年之前。具乎一物之形。而悉乎萬物之理。處乎一室之間。而周乎萬里之勢。非書曷以致之哉。人生天地間。不爲儒則已。有志於儒。以從事乎聖賢之道。未有舍書而能成者也。古語有之。通天地人曰儒。一物不知。儒者所恥。一書之不讀。則一書之事缺焉。書之在天下。自五經而下。若傳、若史、若諸子、若百家。上而天。下而地。中而人與物。固無一事之不具。亦無一理之不該。學者誠即是而求焉。則可以貫三才。而兼備乎萬事萬物之理。儒之道其在是矣。雖然。書不貴多。而貴精。學必由約。而後可以致於博。精而約之。以盡其多與博。則氣質由是而變化。心志由是而開明。德業由是而崇廣。析其精而至於不亂。合其大而極於無餘。會其全而備於有用。聖賢之道。夫豈外乎是哉。區區積書之心。誠有在乎。是所以期待吾鄉之後賢君子者甚遠。

且大。其必有副予望者乎。使誠有之。恨予耄矣。不及見也。雖然。冥漠之中。無知則已。萬一有知。亦將暢然快。輾然笑也。謹書此以俟。若其規條名目。則悉具于碑陰。

學士莊記

學士莊。在瓊城之西北二里。而近翰林學士丘濬仲深之別墅也。或曰學士。文學侍從之臣。在天子左右。載筆以視草者也。矧一登進士第。卽通籍金門。出入禁掖。幾二十年。始以太夫人喪一歸故鄉。服除卽行。蓋以官爲家。以文字爲業。固不待莊以居。用耕以食。胡以別墅爲哉。嗟乎。此正區區深意之所在也。予先世閩人。來居于瓊。世數久遠。自七世祖學正公以來。代有祿仕。惟先公早世。雖不仕。而亦有貲贈之命。世業雖以士。而率亦未嘗廢農。蓋仕者其暫。而耕者其常歟。予家依城以居。而先世多負郭之田。去所居一里而近有田一區。四際皆深窪。而其中獨窪然以高。其旁田皆歲再熟。而此僅一穫焉。始予少時。恒謂海外古無高人勝士。故其地無可以賞

心會意之所。藏脩之暇。求一息游之處。不可得也。是時卽有意經營之。力不能及。且弗暇也。會免太夫人喪。家居無事。思欲成夙志。而謀之吾兄伯清先生。先生曰。何用遠求。盍卽丹陽田爲之。卽日具圖。釐其田而三之。用其一爲村。而田其二。如故乃僱工起其二之土而畚之。築實其一以爲村基。周圍若干丈。爲畝者若干。餘田遂皆深窪。可再耕。歲會其所穫。登常數焉。環村之址鑿溝。引水繚繞之。村之背旁際爲長壘。壘上疊石爲三小山。山下有亭。環種野花。村前際爲方塘。周若干丈。塘心砌石爲釣臺。當其前積土爲圓堆。名小鼈峰。環村皆種力竹。雜時花果草木於其間。小三山下。繚以周垣。中構堂三間。翼以兩室。前爲圓亭。亭之前爲渠。九曲之。其下爲月池。各有扁。堂曰瞻玉。旁兩室。左曰曝日。右曰涼風。亭曰一曠。蓋摘歐陽子內制集序中語也。其他如所謂小鼈峰者。蓋擬館閣中之鼈石。所謂小三山者。則又以視道家之山蓬萊方丈瀛洲者焉。直堂之前。有門扁曰小瀛洲。其外門曰學士莊。又自村徑始涉田蹊。有石門焉。曰丹陽。

邱 文 莊 公 集

仙境。本其地舊名也。堂旣成。吾兄伯清會客而落之。試與客立釣臺之上而四顧焉。一城之景。咸會於斯。漠漠水田。四際山麓。直南。吾先人之廬。於是乎在。喬木岑蔚之間。華表簷牙。露出林杪。此朝廷旌吾先妣之守節不貳者也。而吾之登甲科。官侍從。有司所表之綽褻。亦於是乎見之。與凡吾廬之所有。若實敕樓。若可繼堂。若願豐軒。皆隱約可指示也。稍南而東。是爲郡城。雉堞連雲。樓閣倚空。衢道之交互。屋瓦之櫛比。闐闐之雜遝。或近或遠。斷而續焉。隱而見焉。蓋四州十邑之大都會處。舉目而東。不半里許。鬱有叢祠。祠之兩旁。翼以居民。極其目之所至。金碧輝煌。照耀林谷。是爲佛老二氏之所宮。其東北之近地。則州將都裨之所。月凡三校闕於斯。金鼓之聲。旗章之物。耳可聞。而目可見。斯則吾莊之近景也。試又登小三山而四望焉。一郡之景。亦莫不畢會于斯。蓋吾郡所謂主山者。西石也。中物而旁峻。有似馬鞍然。故又以形似名。原其山之所起。自海北之徐闡之石門。其脈穿海底而南。卽蘇子所謂地脈何曾斷者。橫亘郡城之西。勢

邱 文 莊 公 集

如奔馬。爲衆山之脊。朝夕日光霞彩。敷金抹翠。排闥而入吾堂中。有如屏障之列几案間然。引領而南。越吾居可六七十里。有橫黛隱隱然雲霄間者。陶公山也。道家所謂七十二福地之次二十四者焉。天宇空闊。烟霏之外。有峰巒累然。如貫珠列於東北雲海之涯者。七星嶼也。林木蔚然如壘。翠叢於東南坡陀之間者。靈山也。此二山皆有祠宇。有司歲時祀之。其他如蒼屹之幽雅。東石之秀拔。雷虎之躡伏。銅鼓松林之渺茫。隨陰晴而隱現。或有或無。或在有無之間。其水之大者。有南渡江。源發自五指山。經臨澄定三邑之境。繞城之南。而東之折北。會諸溪以入於海。距北半舍許。舟沿泝其中。往來檣帆其末。越林表面出。可數也。吾郡以海爲疆界。自此北至海。道僅十里。所謂神應。海口是爲港門。帆檣之聚。森如立竹。汪洋浩渺之間。山微微如一線。舟杳杳如寸葦。晨昏蜃氣。結成樓臺。峰岫千態萬狀。日光射之。錯雜如錦繡。光耀如珠璣。真天下奇觀。昔人所謂奇絕冠其平生。信非虛語矣。茲又吾莊之遠景也。凡吾一郡人物。邑居之繁。山水登

邱 文 莊 公 集

臨之美。皆可於此一寓目。而盡得之。伯兄與客、觀望既畢。謂濬曰、茲不可無記。宜詳書之以示後之人。使天下四方。知吾窮荒絕島之間。有此奇偉秀絕之景。顧不可哉。濬惟中國之在天地之間。如方舟之浮於池沼中然。吾郡以叢爾之地。居寰海之外。則又如浮一匱於方舟之側然。可謂微而微矣。今天子建都于燕。而吾郡在越之極南。何啻萬里也。眇末小子。無才無德。猥以文章小技。遭際盛時。實身金馬玉堂之間。側迹勾陳紫微之下。豈非幸之幸哉。雖然。出處有其時。而進退當以禮。苟知進而不知退。有以進之。而無可以退之地。以是而事君。則昧大易隨時之義。犯夫子患失之戒。大不可也。此區區所以預爲歸老之計。而即歐陽子之所云云者。以爲堂亭之名。非敢以誇諸人也。聊以志吾志焉爾。異時上乞骸之章。天子幸闕其愚。而以柔遠之禮優之。俾得以守其故業。遂其初志。歸與伯兄優游容與娛者。於是莊之上。炊稗而飯之。釀秫而啜之。又推之以及夫鄉人父老醉飽之餘。相與鼓腹而歌吟。稽首以祝頌。庶幾以報聖恩之萬一焉。不幸一旦浩

先朝露也。又以是遺子孫。尙亦有利哉。

錄

定興忠烈王平定交南錄

太宗文皇帝入正大統之初。安南國王陳日焜。爲其臣黎季犛所弑。季犛詭姓名爲胡一元。子蒼爲胡夸。矯稱陳氏絕嗣。夸其甥。請權署國事。上不逆其詐。從其請。未幾求襲王爵。許之。踰年。陳氏孫添平。始從老樞遁至京。愬其實。季犛聞之懼。遣使上表。請迎添平。還以國。永樂四年春。遣使者以兵五十人。送添平歸。達其境。季犛伏兵殺之。及使者。上聞之震怒。諭羣臣曰。朕爲萬國主。蠢爾蠻夷。乃敢爲不道。以戕其主。奪其國。朕不正其罪。如天道何。旣而占城亦告其侵軼疆界。強授以印服。又聞其僭號大虞。紀年號。蒼僞稱尊號。季犛稱太聲上皇。毀中國儒教。謂孟子爲盜儒。程朱爲剽竊。乃議興兵問罪。羣臣咸贊成之。乃遣大臣告于郊廟。分遣近侍徧

邱 文 莊 公 集

告天下山川。秋七月癸未。制諭太子太傅成國公朱能。佩征夷大將軍印。總統兵官。西平侯沐晟爲征夷左副將軍。新城侯張輔爲征夷右副將軍。豐城侯李彬爲左叅將。雲陽伯陳旭爲右叅將。敕大將軍。率右副將軍右叅將。又清遠伯朱友。領驃騎將軍朱榮劉筍出。鷹揚將軍呂毅方政。神機將軍程寬羅文。遊擊將軍朱廣王恕。橫海將軍魯麟劉清等二十五將軍。統兩京畿。荆湖閩浙廣東西之軍。從廣西思明府憑祥縣進。左副將軍率左叅將領都指揮陳濬盧旺等。統巴蜀建昌雲貴之軍。從雲南臨安府蒙自縣進。以兵部尙書劉備。贊戎機。刑部尙書黃福。大理寺卿陳洽。給事中馮貴督餽餉。於凡所過名山大川。脩祀事。乙酉出師。上親幸龍江。禱祭。將帥陪位。受服惟謹。訖事。駐蹕江滸。誓于衆曰。朕命汝等奉行天罰。罪惟元兇。尙體朕心。毋窮武。毋殺降。毋繫累老稚。毋毀壞室墓。雖一草一木。亦勿妄剪除。違朕命者雖勞弗勳。且底于罰。能等頓首受命。萬衆鼓舞。登舟以行。是年九月師次龍州。大將軍遣疾。以師授右副將軍。十月庚子。大將軍薨。衆議軍

邱 文 典 公 隼

機事重。不容以緩。請右副將軍代總其兵。行大將軍事。急驛以聞。上命輔就佩征夷大將軍印。代能總兵。且降敕諭之曰。昔太祖皇帝。命開平王常遇春爲大將軍。岐陽王李文忠爲偏將軍。率師共征。開平王卒於柳河川。岐陽王率諸將掃蕩殘氛。終建大勳。著名青史。爾宜取法前人。以建萬世之功。此定興忠烈王受命專征之始。先是王與大將軍榜示黎賊父子大罪二十。以明天討之意。數季犴兩殺其主。以奪其國。罪一。凡陳氏子孫殺之殆盡。罪二。淫刑以逞。視國人如讎。重斂暴征。民不聊生。罪三。世本黎氏。背祖更姓。罪四。既篡主位。乃詐稱權署國事。以罔朝廷。罪五。表請陳氏孫還以國。及朝命使送之。乃敢拘遏。罪六。殺國主孫。罪七。侵雲南之寧遠州七寨。罪八。殺土官猛慢。擄其女。徵其銀。罪九。威逼近邊土官。致其駭散。罪十。侵廣西之祿州地界。罪十一。擅據西平州。殺土官。罪十二。占城國王占巴的賴國新遭喪。興兵攻其舊州格烈等地。罪十三。又攻板達郎黑白等州。掠其人民。罪十四。勒取占城象百餘。仍加兵不已。罪十五。占城既受

邱文莊公集

天朝章服。輒僞造金印帶服。逼使其受。罪十六。責占城王惟知尊重中國。而欲其以所以事中國者事之。罪十七。朝使送占城陪臣還其國。以兵劫之於毗陵港口。罪十八。既奉正朔。又僭稱國號。僞紀聖元紹成。開大年號。罪十九。朝貢不遣陪臣。輒以罪人充使。罪二十。初。交人聞天兵南下。罔知所以。既聞榜示。咸知其曲在彼。及見榜未云待黎賊父子就擒之後。還求陳氏立之。莫不延頸跂足以待王師之至。王以十月丁未。至憑祥縣。禡牙入境。并望祀其國中山川畢。諭于衆曰。皇帝非利安南土地人民。乃爲黎賊害其國主。虐其黎庶。奉行天討。以繼絕世。甦民困。命我等以弔民伐罪。丁寧告戒。非臨陣不得殺人。非稟令不許取物。毋掠子女。毋焚廬舍。毋踐禾稼。爾等宜奉承聖天子意。以立奇功。不用命者必以軍法從事。無赦。衆皆歡呼用命。是日大軍入坡壘關。揭前榜。諭國中吏民。以朝廷伐罪弔民意。以招徠之。王詢知坡壘以南。由隘留關。歷鷄翎關。至芹站。山菁深險。林木陰翳。且多溪澗。慮賊有伏。先遣鷹揚將軍呂毅哨探。及檄都督同知韓

邱文莊公集

觀營於坡壘。脩道路。繕橋梁。督糧運。戊申大軍次丘溫縣。己酉。哨至隘留關。賊衆二萬。依山結寨。毅攻拔之。斬首四十級。生擒六十餘人。是日驃騎將軍朱榮等亦破鷄翎關。斬首六十餘級。生擒十一人。賊聞二關破。其屯兵設伏者悉奔散。壬子。大軍次鷄翎關。癸丑。次芹站。是日先遣鷹揚將軍方政。遊擊將軍王恕等。直抵富良江北岸嘉林縣。是時左副將軍西平侯。亦自雲南蒙自縣進兵。經野蒲蠻入境。都指揮朱溶等。奮猛烈關。俞謨等拔棚華隘。隨處築堡駐兵。伐木造舟。都指揮徐源孔斌等。突出宣光江口。奪其澳物等沙。左叅將豐城侯領兵渡其上游。都督程達等中夜舁舟越山。自問道以出逃水江。縱火焚賊舟。遂奪富良江。十一月乙巳。西平侯統軍至三帶州。與王所遣都督朱榮會。癸酉。橫海將軍魯麟。驃騎將軍劉劬出拔困吾寨。是日有僞三帶州僉判鄧原南。策州人莫遂等來降。因詢降人。知賊窠穴在東西二都。恃宣江施江富良江以爲險。自三江府施江南岸傘圓山起。由富良江南岸東下。直至寧地。泝富良江北岸。自海潮江。由希江麻牢

邱 文 莊 公 集

江。直至盤灘困拔山。立木爲柵。及增築土城。於多邦隘。樹柵立城。連橋接艦。七百餘里。又於富良江南岸緣江下木杙。悉國中舟艦泊其內。凡諸港汊可通舟處。俱下巨木。以備賊衆聚屯。守水陸者號七百萬。蓋悉驅中國老幼婦女。以助聲勢。非實然也。大軍屯富良江北岸。王以書諭季犛曰。予奉命統兵來問爾罪。爾罷戰。則率衆於嘉林以待。不能戰。赴軍門以聽處分。王意欲挑其急戰也。會朝遣行人朱勸賚敕至。諭犛賊以禍福。及許其糧金五萬兩。象百隻。以贖罪。行人至其國。季犛不出見。以詭辭答曰。文書比對原發。勘合不同。此必非上所遣。又云兵已入境。若兵回即貢。否則自有准備。王知此敕是欲以疑其兵。而賊亦無改過悔罪之意。乃移軍三帶州。屯箇招市口。與左副將軍西平侯會議。造船置銃。以圖進取。時賊有划船出沒江口。王命魯麟夜昇舟從上流下水。奪其船。斬首百餘級。自是划船不敢出沒。王與西平侯議於上流渡江。乃遣朱榮等於下流十八里嘉林置舟筏。爲欲渡之勢。以掣其肘。賊果分遣水軍於嘉林。奪我舟。榮等奮擊大破

之。十二月己亥。大軍與左副軍合勢。王與西平議曰。賊邊江立柵。勢逼地狹。難以列軍。惟多邦隘城沙灘上平闊。足以容軍。然其城峻濠深。守具無不備。而外設坑坎、布竹籤。賊所恃者此耳。蠻人綿薄。不耐苦。不足慮也。今我攻棧。若雲梯、仙人洞、之類俱備。攻而取之易也。乃召將士諭之曰。汝等報國成功。在此一舉。宜奮勇爭先。以立奇功。先登者不次陞賞。將士聞命。無不踴躍。乃議分地界。大軍攻其西南。左副軍攻其東南。己酉。各列軍沙灘之上。布置已定。別調軍距欲襲之處里許。作欲攻之勢。以出賊不意。於走出內府所製夜明火光火藥。散軍士俾執之。有先登者燃之。及吹角爲號。是夜四鼓。都督黃中。率官軍潛昇攻具。越重濠。抵城下。用雲梯先附城。都指揮蔡福等數人。先躡梯登。用刀亂斫。賊衆驚呼。城上火齊明。角應之。士皆蟻附而上。賊於城內列陣驅象來衝。成軍乃出內府所製獅子皮蒙馬。象見獅形。驚畏而顛。又爲銃箭所傷。倒回奔突。賊潰亂。自相蹂踐。及官軍殺死者。不可勝計。大軍乘勝長驅。明日追至傘圓山。又

邱 文 莊 公 集

明日循富良江南岸而下。縱火焚緣江一帶木棚。煙燄張天。辛亥直擣其東都。克之。王與左副將軍駐軍於城之東南。給檣招諭。吏民降者。日以數萬計。王召其父老。諭以弔伐之意。歡聲動地。乙卯議遣左叅將豐城侯李彬。右叅將雲陽伯陳旭。伐其西都。賊首聞多邦破。先已焚其倉庫。攜妻子遁于海島。我軍至。焚其宮室。據其城地。餘黨依天建山。困枚山等處。水陸據守。乃分遣清遠伯王友都督黃中。都指揮柳琮等。隨賊所在而征勦之。自是年冬至明年春。前後斬首二萬七千餘級。時王留交州鎮邊。聞賊子黎澄。聚舟黃江。左副將軍左叅將領軍循富良江左右。水陸竝進。次於木九江對岸下當。辛巳。賊船三百餘艘。來犯。我軍水陸夾擊。賊衆大敗。斬首萬餘級。溺死者無算。二月乙巳。王聞賊首。遁于闕海口。出魯江口與左副將軍會兵下膠水縣。賊聞大軍至。又遠遁大安海口。王謂左副將軍曰。賊聞大軍來。不敢敵。故潛遁他所。以覘我動靜。我若回軍交州。留兵于鹹水關兩岸。留戰船守備。彼必出闕海口以襲我。我俟其出。水陸併擊之。賊必成擒。

邱文莊公集

六月癸酉。大軍回交州。甲午賊果犯鹹水關。報至。巳酉。王與左副將軍兵。水陸並進。賊以海船橫截江中。而以戰船剗船。兩岸齊進。旣而登岸。植木爲柵。王乘其柵之未成。親督精銳攻之。都督柳昇等亦率舟師來奮擊。賊遂大敗。富良江水爲之赤。積屍數十里。右叅將雲陽伯。秉勢長驅。直抵閩海口。黎賊父子聞敗。船遠遁於靈源。王諭諸將。宜乘破竹之勢。追剿殄滅。乃回軍交州。留右叅將守鎮備禦黃江等處。四月乙亥。王與左副將軍。統軍由清化府倍道乘進。調柳昇魯麟土官莫遂等。分領戰船。由水路窮追。戊寅。舟師至清化之磊江。賊衆聚船以拒。昇等擊敗之。斬首萬餘級。五月丁卯。王至演洲。柳昇等舟師來會。途中降者相繼。詢知黎賊父子遁于乂安府之深江。王議與左副將軍兵從陸路。柳昇等率舟師由水路。追賊。壬申。大軍至乂安府土油縣。王從舉厥江東路。左副將軍從舉厥江西路進兵。兩軍俱至盤石縣下營。甲戌。柳昇率舟師至奇羅海口。與賊戰。大敗之。獲賊船三百艘。餘船分散。賊首潛竄草野。乙亥。昇所領軍士王柴胡等七人。

邱 文 莊 公 集

擒賊僞上皇黎季犛。黃中所領軍士李保保等十人擒僞衛國大王黎澄。丙子、莫遂下土人武如卿五人獲僞國主黎蒼。及其僞太子芮于高望山。凡黎氏親屬。俘獲無遺。安南地悉平。所得府州四十八。縣一百八十六。戶三百十二萬五百。象馬牛羊舟楫器械無算。遣都督柳昇等獻俘闕下。露布以聞。先是王等受命時。詔令求陳氏子孫立之。至是平定。主徧訪國中官吏耆老人等。咸稱黎賊於己卯年殺光泰王頤。立其子韻而殺之。遂篡其國。前後殺其近屬五十餘人。及其遠族又千餘人。血屬盡絕。無可繼立者。請依漢唐故事。立郡縣如內地以復古。王疏以聞。上從其請。乃於其地立交趾等處。承宣布政使司。都指揮使司。按察司。分其地爲十七府。四十七州。一百五十七縣。據其要害設衛十一。守禦千戶所三。又於交廣分界處。如潼關衛例。設立溫衛。及坡壘隘留二守禦所。軍隸廣西。民屬交趾。以相制馭。是歲大詔天下。以平安南。復古郡縣之故。并敕有司爲陳王贈諡。凡其宗親爲賊所害者。各贈以官。又爲之建祠立碑。葺墳墓。禁樵採。各給戶三十。凡黎

邱 文 井 公 集

賊苛政暴斂。悉皆除之。擢用賢能。優禮耆老。賑卹窮獨。革去夷俗。以復華風。使秦漢以來之土宇。陷於外夷者四百四十六年。一旦復入中國版圖。詔布天下。文武群臣。親王藩服。咸上表稱賀。六年春。班師入朝。秋。七月。策功行賞。進封王英國公。西平侯黔國公。清遠伯朱友進侯爵。都督柳昇陞安遠伯。餘擢官增祿有差。賜王詩券玉帶金帛。命子孫世襲。加祿米三千石。既大宴。上親製平安南歌。以褒嘉之。是年冬。安南餘孽。簡定作亂。定自稱陳姓。本前陳舊官。先已降附。既而遁于乂安府。與其黨鄧悉鄧鎔阮帥陳希葛等謀反。僞稱日南王。既而僭號大越。稱興慶年號。朝命黔國公充征夷將軍。從雲南往征之。久不能遏絕。廷議謂非王不可。七年正月乃命王佩征鹵副將軍印。往共勦之。王以四月至南寧會兵。五月入境。王躬督戰艦。破孔目柵。再破鹹水關。斬俘無數。賊退保黃江。乘勝擊之于太平海口。賊竄乂安揭江。冬十月。師至清化。越四日。生擒簡定於吉利柵之山。并其黨陳希葛等。檻送京師。明年二月王還。朝士嘉勞之。未幾。簡定餘黨陳季

邱 文 莊 公 集

擴。復嘯聚。僭稱重光年號。季擴乃簡定從子。簡定爲阮帥等所廢。而立季擴。定敗潛遠竄。聞王班師。復與陳景異等同反。九年春正月。復授王前印。往督師征之。夏五月師次東關。六月進兵。賊聞王至。以石填神頭海口。三十丈許。設拒木以抗。王督將士悉起其石。以通舟楫。賊懼。立堡常月江。王戒衆曰。此堡不足攻。其山南隱阻。彼必設伏以撓我。乃使驍將率士兵搜山。果得其伏者。斬之。遂奪其堡。賊遂遠遁。王隨所至而追之。賊或聚或散。竟莫得其要領。時關以東。群盜蜂起。所完者交州一城耳。蓋新設州縣。軍衛太多。交人久外聲教。樂歡縱。不堪官吏將卒之擾。往往思其舊俗。一聞賊起。相扇以動。賊首所至。輒爲之供億隱蔽。以故賊潰復聚。朝廷屢下詔招撫之。授季擴爲布政使。彼欲受命。制於其黨。服而復叛。僞稱王孫以復陳氏爲辭。大軍至。則深入山海避之。軍退復出。用是官軍不能成功。王旣蒞軍。始大明賞罰。而諸將疲於奔走。往往因循玩愒。都督黃中不用命。王以軍法從事。由是人人知懼。不敢辭難避險。是時賊恃荷花海險。

謂我師不能渡。於日麗海口立堡以守。王率舟師自奇羅海口洋。過荷花海口。直抵日麗。賊焚堡而遁。至茶揭江。連進兵破之。賊驚曰。天兵飛來也。遂大潰。奪其化口城。諜知賊悉衆守愛子江。復追至其境。賊伏巨象數十。以爲前敵。列人馬於後。盡力以抗我師。王戒將校曰。擒賊在此一舉。機不可失。乃鞭馬先進。象伏突起。王一箭落其象奴。再箭中其象鼻。象叫號退走。自蹂其衆。乘勢擊之。斬艾僵伏。填滿山澗。賊徒散遁遙蠻等處。王部分將領隨處搜捕。至暹蠻蒲幹等柵。山徑崎嶇。林麓陰翳。馬不能前。王乃下馬徒步履險。兼程趨之。士卒不能從。惟將校百餘人僅屬與賊遇。殺數千人。賊首陳季擴暨其妻子皆就擒。時十一年冬也。明年班師還京。自上出師至是首尾踰三年。始得渠魁。說者謂王此役。較之前平定之功爲難云。十三年四月初命王佩征夷將軍印。充總兵官任鎮交趾。有平陳月胡之功。十五年以上以王久勞於外。詔還京師。王以正統己巳沒於王事。至是二十有七年矣。嗣子太子太傅襲封英國公懋。出其家閭者福住。所錄王平安南

時前後所上奏啓見示。屬予次第之。予因叅考交趾郡志所載露布榜文。及胡文穆公奉敕作平安南碑。楊文貞公撰東平武烈士及定遠忠敬王神道碑。附以所聞。以爲此錄云。

傳

毛宗吉傳

毛君諱吉。字宗吉。餘姚人也。性剛直。尤嫉惡。自在邑校時。見鄉人顯宦者歸。或挾勢以凌鄉曲。而於郡之長吏。則卑卑以希合。輒毅然形見顏面曰。我得志弗爲也。歲甲子中鄉試。再試禮部。皆乙科。不屑就。歲甲戌登進士第。授刑部廣東清吏司主事。故事。十三清吏司。分理在京諸司刑獄。廣東司當錦衣衛衛卒伺察百官陰事。攬摭得分寸。書片楷以聞。不復核虛實。輒當以罪。公卿大臣皆惴惴奉承之惟謹。公行請託。莫敢違拒。甚至以罪被逮。法司亦不加箠。君在清吏司。有逮至者。一懲以法。略無顧忌。其人至

以俚語目君曰毛葛刺。時長衛者怙寵。大肆羅織。勢燄燦人。百官遇諸途。趨避惟恐後。君遇之。獨以一手舉鞭。彼愕然顧左右曰。此非刑部毛葛衛耶。益銜之。其徒百計求君短長。訖不可得。適君偶以疾誤。朝叅命錦衣刺鞫之。其黨走報其長曰。毛葛刺來矣。乃預簡卒之疆忍者。掄巨杖待君。君至。僅撈十又五。骨見矣。衆意君必死。適有僧同在繫。見君創甚。而無悲容。苦曲事君得不死。既而隨衆例得復職。衆咸曰。毛葛刺自此懲創改節矣。及蒞職。操法愈嚴。未幾。陞廣東按察司僉事。時廣城以西。流賊殺掠居民殆盡。其東。幸無事。而豪宗大戶。武斷吞併。積習成俗。君分巡惠潮。首知其弊。痛懲之。豪右斂迹。及其當代郡民。赴巡撫大臣願再借君一年。於是檄再往。先是程鄉民。羅劉寧者作亂。官軍平之。其黨楊輝者。遂往贛之安遠。招集餘衆。於閩廣江西之交。大肆擄掠。時官軍皆征廣西。君不得已招之。而輝等從命復業。比君還會府。而輝等復起擄掠如故。君再至。賊勢益大。輝據上下寶龍峒。其黨曾玉等據石坑峒。謝瑩據龍歸峒。破江西

之安遠。福建之上杭二縣。遠近騷然。謀報。賊期以十一月二十二日攻程鄉治。君曰。賊勢衆矣。與其臨時拒敵。孰若先事制之。乃命縣長吏。密集民壯。并召旁近官軍。僅得七百人。即日倍道行三百里。至赤碌坑。翌日。又行三十里。至石坑峒。賊數人負米出峒。衆欲奮擊之。君曰。舍之。毋驚動賊衆。少頃。賊知官軍至。以其衆三千人陳山下。賊衆我寡。士卒有懼色。君躬擐甲胄督戰。於是士卒爭奮。自辰至午。戰數十合。賊遂敗走。生擒曾玉。及其徒二千餘人。斬首三百餘級。乘勝破龍歸峒。獲謝臺。又明日直搗下寶。龍輝梁陳石崖上。我軍。陳水中。相持守之。君以戰不得地。亟分兵繞出其後。賊莫測。遂驚潰。前後擒斬一千四百餘人。餘黨悉平。是役也。我士卒不損一人。犒賞糧餉。皆出於臨時調度。不取於官。不歛於民。又獲白金。三千餘兩。悉以送官。巡撫大臣以其功狀聞。未報。而君又當分巡雷廉高三郡。人民爲賊所殺。鹵十七八。道路蕪塞。數百里間無烟火。君攬轡四顧。慨然以削平賊寇爲己任。既抵所部。城門晝閉。郡守猶鞭繫城中殘民。追徵不

邱文莊公集

已。君至。首命止之。百姓如獲更生。分守都指揮等官。嬰城擁兵。賊或十餘人。或三五十人。驅脇子女以千百數口過城下。不肯出一騎。發一矢。甚或燕飲酣歌。若罔聞知。吏民以賊告。輒加箠楚。有自賊中逃回者。輒誣以通賊。杖殺之。自是生民進退失據。無復生路矣。君至歎曰。此方之人。獨何辜哉。是雖一時守將之責。抑亦督責者之過也。時雷州海康知縣王麟者。獨奮不顧。爲衆所嫉。君獨獎勵之。適報賊至大體等村。君時在雷州。即移文都指揮出軍擊賊。彼畏縮不敢出。君又以大義激之。亦不從。君即督麒領民壯。躬抵賊所。戰敗之。斬首數百餘級。奪回被虜人畜無數。賊分三支犯吳川縣。君覘知其一近河道。卽命麒乘小舟。出賊不意。悉破之。得首鹵六十餘級。其二支聞風遯去。自是君所部稍寧。君以平賊方略來上。上嘉其勞。內批陞君本司副使。仍降敕獎諭。委以一方邊務。而麒亦陞本府通判。敕至君益感激思報。歲乙酉春正月。賊東出惠之河源。轉掠韶之翁源。君率官軍二千。兼程追之。斬獲百餘級。賊遂西奔。二月新會告急。君率都

指揮焦用。指揮孫璧等。官軍三千人至新會。又得民之自効者近萬人。明日行至火磴。與賊遇。戰破之。獲首二十餘級。乘勝追至雲岫山。去賊營十餘里。時二鼓矣。君號召諸將曰。賊營後挾菁而前。畝田。左右皆山隴。若敗必逐入後山。爾等明日分兩哨進據後山。我以精銳衝其中。爾兩哨左右合擊之。賊可盡圖也。約以鷄鳴蓐食。黎明進兵。是夜無星月。遂至後期。不得已三哨齊進。賊果敗走。棄營攜妻子上後山。君命潘百戶者。帥精壯千人據賊營。賊多遺財物。軍士競取之。賊據高瞭。軍士有爭奪者。遂擁衆馳下刺殺。潘軍士皆自營門擁出。賊自後追之。與右哨指揮闔華遇。力戰久之。君命某往援。某承命不赴。華馬蹶。亦爲賊所刺。諸哨遂奔潰。君勒馬持刀大呼曰。節駐節駐。衆以潰勢不可復。君從吏廖振等勸君宜隨衆姑避之。以圖再舉。君曰。吾誓不與此賊俱生。今衆多被殺傷。而我獨生全。可乎。汝等亟走。勿顧我。言未已。賊七八人持鎗趨君。君且罵且敵。猶手劍斬賊。斷一人臂。力支不能。遂被害。時三月一日也。是日雷雨大作。山谷皆震動。連

日陰晦。又八日始得君屍。面貌如生。昇歸廣城。官吏士民弔哭者相屬。事聞，贈君通義大夫廣東按察使。錄其子科爲國子生。是時仕嶺南與君同志者，惟麒一人。麒子某，雲南大理寺人。正統丁卯貢士。由冒監擢知海康縣。至官，日以忠義激其民。遇賊至，輒率衆奮擊之。前後多所殺獲。雷人賴以少安。而一時郡守邊將反惡之。君奏其有守有爲。同日陞不府通判。未被命，而先君死於賊。至是有司併以聞。朝命與贈君者。同日，贈麒奉議大夫雷州府同知。君死時年四十四。麒年若干。史濬曰：初君死時，或傳至京師，言藩司以白金千兩充行軍犒賞費。委驛丞余文者，從公行以司出入。已用十之三矣。文憫君死而貧，無以爲歸費，以所餘金七百兩，密授君僕持歸。是夜僕之婦，忽出中堂，據止席，舉止如公狀。顧左右曰：請夏憲長來。舉家驚惶。走告近居沈經歷。沈報僉憲胡希仁。亟來視之。瞪目視。胡曰：非也。頃之夏至，乃起揖而言曰：某受國恩，不幸死於賊，固無餘憾。但余文所遺官銀，已付某家。雖官府無所稽考。而某負污辱于地下矣。願亟以還。

官。母汚我。言畢。婦忽仆地。少頃始蘇。竟不知其所以云。予始聞此言。不敢以語人。及夏君來覲。予詢之。果然。嗟乎。君生而廉勁不頗。既死而英爽不昧。猶如此。而世之便已自文者。至或誣君以激變。讒君以賊私。是尙有人心哉。是尙有人心哉。

孔侍郎傳

公諱鏞。字韶文。姓孔氏。宣聖五十八代孫也。元季高祖克信。始自曲阜遊學江西。阻兵不歸。入居蘇州。父友諒。舉進士。知蜀之雙流縣。公幼孤。好學。甫弱冠。爲長州縣學生。時提學孫御史鼎教人。務先德行。學置一籍名敦本。首著公名於籍。公用是奮發。益力於學。登甲戌進士第。初知都昌。分民戶爲九等。以均賦役。設公於水次。以便收斂。縣濱彭蠡。每風雨波濤澎湃。若有物蜿蜒其中。舟多覆者。相傳以爲纜精。過者望而神之。偶歲大旱。公往驗之。乃巨木歲久爲行藻所絡。若鱗介然。公火之。其妄遂絕。尋以弟銘。選尙寧府郡主。例避嫌。改廣之連山。連山西連昭賀。獠獠出沒無寧歲。

邱 文 莊 公 集

公至縣治。無廨宇可居。俸給殆絕。父老間有至者。公詢知民所在。遣人招之。不來。公親詣其地。民見公至。驚走。既而公炊飲民舍。輒留錢米以償其薪水之費。乃相率運拜。伏道左。公一一賙恤之。俾復業。由是趨事縣中。縣治始復。踰年。大兵征廣西。巡撫葉都御史檄公率民丁隨軍征勦。公所至招徠。不事斬艾。賊聞風降附。諸將有欲殺人取贖者。公必力爭之。全活者甚衆。時廣東州郡之界廣西者。無不殘破。而高州尤甚。僉謂公有撫綏才。薦公試知府事。高州城外。四山皆賊壘。僅餘孤城。城外積屍如京觀。民外死于賊。內死于疫。城中軍民不滿百。公至。首呼父老問計。咸曰。城中人多有賊之戚屬。切宜防之。其來趨城者其心不可保。惟宜閉門固守。公曰不然。高州本無賊。而賊之來也皆自廣西。往時守土者無遠圖。民攜家屬千百里來投城。將以求生也。乃閉門不納。以致爲賊所相醜。其在城中者。又疑之。或加害焉。用是衆心攜貳。致外攻而內應。往時城陷。正坐此也。乃大開城門。來者無不納。而在城者。相染成疫。曲加撫摩調養。死者爲義塚。

邱 文 鼎 公 集

于城外以葬之。流亡聞風來歸者以百數。城不能容。公即城東北隅築土爲城以居焉。時賊屯高化境者。凡十餘。鄧公長、據茂名之茅峒。馮曉、屯化州之西北界。梁定、屯舍木嶺。鄧辛酉、屯于游魚寨。侯大六、屯于信宜界。皆劇盜也。惟茅峒距城僅十里。而公長尤結黨。公屢遣人撫諭之使退。不從。公不告之僚屬。不謀之妻子。黎明潛呼四疲卒肩輿出城。徑抵賊屯。公長見太守至。倉皇不知所以。亟呼其黨環甲出迓。怪公無騎從。遣人遠偵。回報無所見。乃釋甲羅拜。請公入坐定。公從容諭以逆順禍福。指天定約。公長意猶豫。而衆酋感悟泣下。恨公來晚。公長跪奉觴酒爲壽。公飲之不疑。衆齊喊舞約降。護送公回。夜四鼓。遠近見火起。賊自焚其巢也。黎明開門納降者。得數千人。公長既降。諸賊聞風次第納款。馮曉久屯化州界。結土民以爲內應。久招之不服。公詒以備他盜整兵夜進。遣部丁蒙浩率敢死士二百餘截其後。而公以前軍應之。一鼓擣其巢。曉遁去。執其妻子以歸。曉意必戮其妻子也。官軍屢招之不出。旣而聞公存撫甚厚也。遂以其黨

邱文莊公集

五百來歸。事聞。有文綺寶鑑之賜。特陞廣東按察司副使。賜璽書褒獎。俾仍守其地。於是梁定、侯大六、郡辛酉、皆受公招撫。處之內地。分地與耕。且爲我備他盜。公部下有黎浩、林雄、數人。皆有謀勇。而雄尤爲眷拔。後死於賊。公撫尸慟哭。親爲殮葬。一軍莫不感泣。用是民夷感畏。所至成功。高州人懷公德惠。立生祠祀之。公聞母喪。還守制。軍民泣送。有出千里外者。服闋。改官廣西。諸州猺獞。聞公名有素。相率遠遁。未幾。陞按察使。賊起自荔浦來寇。總督朱都憲、屬公督軍勦之。賊相顧愕然曰。高州此孔憲副耶。是不可敵也。亟趨去。公一鼓平之。事聞。進階食二品祿。賜文綺寶鑑。尋陞左布政使。蒞事甫半月。陞右副都御史巡撫貴州。賜敕許便宜行事。而益殫心力清平。都勻、衛苗人。據險肆掠。垂二十年。公至。適來爲患。公督諸將授以方略。次第勦平。邊徼無事。公釐革諸弊。奏請以貴州囚徒之戍雲南者。撥補本處沿途驛遞軍夫之缺。而給與月糧。增設布政司官一員。以專督糧餉。皆前來未有也。其他如省冗費。黜貪殘。減抑軍官之

邱 文 莊 公 集

侍從。平反冤獄諸事。皆足以厭服人心。公清心介行。所至人望而愛之。知其爲厚德君子也。故言出而人信之。事行而人無異議。今上初卽位。公上章言歷任三十餘年。無一任不在邊方冒觸瘴毒。積濕成疾。乞致仕。上不允。旣而念公久勞於外。陞工部右侍郎。召還。道浙河。而卒於富陽舟中。弘治己酉九月三日也。享年六十有二。訃聞。遣官諭祭。命有司營葬事。論曰。吾夫子有言。道不行。乘桴浮于海。解者謂夫子特寓言爾。豈肯欲浮洪濤。而居瘴癘之鄉耶。孰意其奠楹之後。二千餘年。而其聞孫。乃真以其却棗兵、墮三都之術。而施之桂海鬼方之間耶。公以神明之胃。誦詩學禮。乃其素業也。况軍旅之事。聖祖猶以爲未學。而不欲以施之齊衛之地。而又追及於聲教漸被之遐外乎。雖然。儒者之道。大而無所不通。王者無戲言。况聖人而虛言耶。吾知聖人所謂未學。蓋謂春秋之世。所從事者爾。唐虞三代。所謂神武不殺。所以戡禍亂致太平者。庸有不學乎。王者一視同仁。無間遐邇。所謂乘桴浮海。真誠有是言。必真誠有是事。特時無其事耳。設或

遇有其事。未必不實踐其言也。歷考史傳。孔氏子孫。顯者不過數人。光不足道也。安國穎達輩。皆以經術著名。求其以功名顯于中州者固少。而又況從事干戈以施之遐外之域乎哉。尤其鮮也。入國朝來。孔氏子孫。仕而官至卿佐者。僅公一人。足以爲聖門之光矣。朝廷以聖人之經術。取人而得聖人之子孫。而能實用聖人之言。以成聖人。千載已沒之志。豈但光孔氏哉。誠亦儒者之光也。予與公同科進士。情誼視他人爲篤。且生嶺海間。知公事特詳。故爲之傳云。

學拙先生傳

天下日趨於巧矣。所謂拙者世絕少。萬有一人焉似拙矣。而實寓至巧於其中。學拙先生。生而拙者也。願以學稱。此其異於人。而予有以取之也。學拙先生者。姓蕭氏。名旺。字應韶。其先廬陵人也。元末有起義保鄉井者。國初編入戶籍。遷戍廣東之惠州。今居惠三世矣。先生質實無他腸矢。口出言。無所避忌。凡所云爲。皆誠心直道。未嘗委曲遷就。或目之曰拙。先生笑

曰。予豈能拙哉。學拙者耳。大書宋周濂溪拙賦於壁。日三復焉。一出言。一動足。退輒喘然懼。且憂曰。吾得無過於巧乎。人因其然。遂名之以學拙先生。而先生亦欣然曰。稱吾者甚宜。故亦以自號焉。先生少無宦情。隱然居戎伍中。而名動一方。自郡將以下。咸敬重之。僉舉爲社學師。其教人也。甚有次第。一時子弟。經其指教者。咸徐言緩步。人望之。如其爲先生弟子也。先生平生善行。可稱者甚多。而事師恤隣二事。尤爲惠人所稱道。鄉儒有黃東野者。工於詩。先生自幼師事之。其人既老貧。且無子。先生事之。不啻所生。日供其飲饌。歲給其衣服。凡衾枕幃幔器用。無不備焉。既死。歛襲殮葬之具。一一如禮。又爲之服心喪者二年。鄰人有徐姓者。遭疫癘。死者十餘口。闔室出避。其祖母老且病。不能行。雖至親者。慮其傳染。過而不之顧。先生朝夕其旁。躬具價粥食之。至死。又爲之歛殮云。其平生所爲。大率類此。二事。皆世之號爲能巧者所不屑爲者也。先生歿時。年僅四十八。平生止一子。曰青。字庭翠。由進士起家。爲南京禮部祠祭清吏司主事。

今陞鄆中。朝廷以庭翠貴。贈先生如其子官。君子曰。先生非拙者也。拙於取利。而巧於取善。拙於得人。而巧於得天。先生非拙者也。雖然。取善遲。取利速。得人易。得天難。舍其速且易者。而爲其遲與難。先生豈非拙皆哉。先生歿十有九年矣。世之巧者日益甚。求拙如先生者。何可得哉。何可得哉。

無逸子傳

無逸子者。句容人。凌其姓。潭其名也。字曰永澄。先世以勤起家。至無逸子。五世矣。千指同爨。世守一勤。至無逸子。其勤益甚。恒謂人曰。我家之勤。亦猶張氏之忍也。彼以忍而相容。我以勤而相勵。茲其所以能久歟。無逸子。晝自且至夕。歲自春徂冬。生自嬰至耄。未嘗少逸。愛之者曰。子家衣食幸有餘貲。且多子姓童僕。胡自苦若是。無逸子曰。吾求逸爾未達。曰。人惟無逸。所以終逸。彼常逸者。豈得逸哉。觀之天。天未嘗一息停也。故能成夫物。觀之水。水未嘗一息舍也。故能底于海。人何獨不然。人特憊然

於其中。而不自覺耳。蓋觀嬰兒乎。方見其出胞胎也。既而可襁負也。又繼而可提步也。俄而髻且齡矣。突而角且弁矣。天所以生生長長之者。曷嘗息乎。彼其身不自覺也。終日與之處者。不之覺也。久別而忽相覲者。則驚且訝之矣。由是而推之。若動物。若植物。莫不皆然。是孰使之然哉。造物者所以生生長長之化。其機未嘗一息息也。天之於我。未嘗一息息。我何可自暴自棄。而苟安怠惰以自逸哉。彼遊方之外者曰。大塊息我以死。蓋知此矣。人苟未至於結纓易簪之際。皆非可息之境也。一息尙存。此志不容少懈。非但欲勤已成德業也。天道如是。而人理亦當然爾。吾之所以無逸我者。蓋求以息我也。無逸而至於息我之境。報天地以生成我之恩。還天地以生動我之機。斯可以長逸矣。吾之所謂無逸者。蓋如是。世豈人人知我哉。因以無逸子自號。人亦以無逸子稱之。太史氏曰。或有人傳無逸子言至京師。予聞之驚且駭焉。曰。茲豈今世人哉。茲豈今人言哉。恨未之能一見也。有一儒生謁予于所居。詢其姓名。乃無逸子子衍也。因質其詳。生告予

以乃父所以謂其無逸者。亦皆平平日用之常。無甚過人者。蓋自其幼而弱。弱而壯。而強。而艾。而耆。今且老矣。爲子而奉其父母。若伯叔父母。爲弟若兄。而友其弟若兄。若羣從兄弟。與夫處族姻友朋故舊。一皆無悖德。無違禮。治家殖產。樹藝字畜。事事皆不廢時。亦不違時。凡其所行。皆與人同。但人不能常而無逸。予則常常如是耳。噫。資近乎道。而自然存諸心。行諸身。施諸人者。不詭異而有其常。此無逸子所以合于聖人中庸之道也歟。是以傳之以表見于世。

題跋

跋江山雪霽圖

予友顧光祿廷瑞。一日出古畫一幅。示予題曰。謂川圖。乃其宗人宗仁氏所藏者。陳太史緝熙目之以江山雪霽圖。按謂川。乃唐王維別野。圖維所作也。新唐書備載其景。有所謂華子岡。欽湖竹里館。柳浪菜黃。淵辛夷塢之類。

予嘗見李伯時所臨本。每景皆有詩題其上。史所謂裴廸賦詩。相酬爲樂者也。今是圖、於所謂數者之景皆無之。亦無所謂詩者。其位置布列。固非維所作。亦非伯時所臨無疑矣。然其間有如所謂淺山礚礚。亂石轟轟。山石礚礚車碌碌。山勢盤斜隨澗谷。側轍傾轅如欲覆者。又有所謂樹老石硬。山路迴轉。高下曲直。橫斜隱見。妍媸向背各有態。遠近分毫皆可辨者。要之亦一代名筆。決非尋常模倣者所能爲。必求其人以實之。而強以附古人之名家者。則大不可。嗚呼。天下事豈但畫不可哉。豈但畫不可哉。

書楊文貞公墨蹟後

古書二幅。計二十字。字徑寸許。少師楊文貞公之心畫也。公以清德雅量。爲一時名臣。高文古學。爲一代鉅儒。其謨猷功業。著作議論。藏在秘府。播之天下。傳誦於人人之口耳者。在在而有。世世不忘。惟字畫之在人間者。恒少見。蓋公不輕以予人。其所予者。必其人之有以過乎人者也。今太子洗馬西昌羅明仲先生。其童稚時。公親書此與之。用環以名。又擬明仲二字。

付之。俟其冠。授之賓祝以辭。而字其名者也。於戲。公之於明仲。蓋以已許之。第標古人以爲的爾。古之名相。守正不阿。爲時所仰者。於唐有一人焉。廣平公瓌也。古之名儒。議論英發。爲世所宗者。於宋有一人焉。致堂先生明仲也。文貞公於古人中擇其尤者二人。以爲明仲名若字。其期待之意。深矣大矣。一以功業顯。一以文學著。有功業者。不必有文學。有文學者。不必有功業。合二人之名與字。以名字乎一人。公之意。蓋欲明仲兼二人之長。以名天下後世也。雖然。蓋自道爾。公遭逢聖明。荷四朝之隆委。擅一代之文名。其德其學。蓋有二公之所有於一身者也。公不欲自言。而即古人以爲的。明仲其願名與字之義。而思所以體公之心。以毋負其所期待哉。吁。爲學至於致堂先生。輔治。至于廣平公。則爲人於天地間。亦可以無愧矣。明仲其念之哉。

書百牛圖後

獸有百。而畜於家者六。惟牛最有功於世。於農、用以耕。於祀、用以牲。於

邱 文 莊 公 集

宴、用以享。於器與室之成。用以鑿。於戎、於畋、於輓運。用以駕。迨其斃也。其革用以甲、以胄、以履、以帶、以冒鼓、以貫編、以服箭、以包干戈、以緣席褥、以鞍若轡焉。其糞而凝之以爲膠。其用而敗者以醫。其筋、若骨、若角、若蹄。則用以弓、以觶、若簪導。其他雜器用之者甚衆。下至臭穢之遺。亦用以滋五穀。無一棄焉者。嗚呼。牛之有功於世也。其大且多如此。非但家畜之不如。而百獸亦無與之肩者。豈但獸哉。人之生也無益於時。卒也無用於後。尙亦有愧之哉。好事者繪爲百牛圖。狀牛之形與其牧。及其水草牧放之處。嚙飲、蹄觸、臥起、搔鳴、奔鬪、游行之趣。殆且十百狀。可謂曲盡其情態者矣。其意亦猶昔人以耕桑爲圖。欲世之高閑富貴之士。居於清幽安樂之地。觀於此其有以知稼穡之艱難也歟。雖然。耕而稼穡。牛之一事也。抑孰知牛之功之大且多如此哉。中貴徐君、以此圖求予跋一言。予故述牛之功有益於世也如此。而又系之以詩。

我本農家子。童年曾作牧。倒騎牛背上。簷笠吹橫竹。老大客京國。久不

見此畜。忽然覩斯圖。心若有所觸。泛觀天下物。無物似牛犢。既以駕犂
耜。又用轉車轂。爲我運百貨。爲我生百穀。論功固莫比。論苦亦良酷。云
乎世上人。甘心肆口腹。既而食其力。何忍食其肉。水陸珍萬品。物物可
充欲。孟子有遺言。不忍其穀鯨。

書潘克寬十八學士圖

有唐十八學士登瀛洲圖。予友潘君克寬所藏者也。君以工部正郎。出理河
道。偶於士大夫家見此圖。因命工臨之。裝潢爲冊。暇日以示予。俾識其後。
按史。唐高祖以秦王世民功大。前代官皆不足以稱之。特置天策上將。位在
王公上。以秦王爲之開府置屬。王以海內寢平。乃開館以延文學之士。其
府僚杜如晦。房玄齡等。十八人。竝以本官爲文學館學士。分爲三番。更日
直宿。秦王暇日輒至館中。討論文籍。或至夜分。使庫直圍立本圖像。褚亮
爲贊。號十八學士。士大夫得預其選者。時人謂之登瀛洲云。所謂文學館學
士者。謂其爲文學之士云爾。非官稱之。以學士爲官。稱始於玄宗開元十三

邱 文 莊 公 集

年。前此則未有也。是時高祖在。御建成爲太子。固無恙也。然高祖乃爲秦王。特置天策上將。開府置屬。而王又自開館以延文學之士。彼自延其府僚。而各以其本官。所謂記室、參軍、典籤之屬。相與講學論治。非不可也。君父在上。乃舍其職名。別知稱謂。至形於丹青。著爲贊頌。互相標榜。其意欲何爲哉。昔漢武帝爲戾太子立博望苑。使通賓客。從其所好。司馬公猶謂正直難親。詔諛易合。此固中人之常情。宜太子之不終也。夫太子爲國之儲貳。國乃其國。君父爲之立苑。通賓客。謹微之君子。猶以爲非。況太宗乃藩王。功高望重。在危疑之地。而可使之日夜聚徒乎。在太宗非遵養之道。在高祖非教子之法。而亦非所以定儲位。定國家也。今觀此圖。見所謂十八學士者。其遺像雖人人殊。然其環偉豪邁之氣。溢於衣冠面貌之表。宋人謂眞宗爲王時。其門下廝養。皆將相器。而此十八人者。在秦王門下。其氣如此。豈終在人下者乎。此太宗所以卒有天下也。雖然。唐家之社稷安危。其兆皆具於此。始也以房杜之能輔太宗。而唐遂以安。終也以許敬宗之

姦阿高宗。而唐幾於亡。一圖雖小。所係實大。予爲之慨然。書以歸之。

跋虞山圖

錢侍御承德。奉命往兩廣理邊儲。臨行出虞山圖見示。且曰。此先世所藏鄉先輩王均章所畫者。既失而復得之。蓋吾家百年前舊物也。敢乞先生一言以識之。予謂之曰。古人繪畫之作。所以模寫景像。必其物世所有。或有之而不常見。不然。則是其物可觀可玩。而不可以攜取者。又不然。則去其地而思其物。有不可以再致。故寓之筆墨丹青。假其似以存其真。君家海虞。爲邑中舊族。自祖父以來。長子老孫。出入起居。恒與山俱。舉目卽見其林壑。而步履周旋。不在其顛。卽在其趾。有事出境。踰百里外。回首望之。猶隱隱然見之於林霏烟靄之間。既有其真。又烏用其似爲哉。雖然。虞山橫亘海虞邑中。何止數十里。居民環其趾而居之。面其勢而向之者。何止數千家。有此山以來。自天地開闢至今。何止數千萬年。元人王均章者。始爲此圖。偶以適其意耳。非有意於傳世也。而適落君家。邑中人士。非止一家

而君家獨得之。得之不久而失之。失之不久而復歸焉。造物者亦或有意歟。吾聞錢氏。世居邑中之昆湖。其先世衣冠體魄之藏。皆在茲山中。意者其沖和清淑之氣。皆於此聚止。而有以養其先世之鬻骨。其子若孫。鍾其氣以生者。往往蕃衍而多賞。龐厚而長年。秀美而有文。冥冥之中。或陰有以相之者。故使斯人。爲斯圖。付諸其家。世藏之以爲符驗。若世之置田產者。必有質劑然。此又理之或然者也。書以歸之。俾持歸以質諸乃尊。未齋翁。及其季父方伯公。以爲何如。

雜說

木說送沙文遠

蓋嘗觀夫近郊之木矣。出於上也僅數尺。苟可以搨。或可以把。極大而至於可以拱。則固已掄於人。列於肆。登於匠氏之門。隨其才質而成就之。無所遺。有弗中焉。則揉曲以直。束小以成大。非甚朽腐破折。不之棄。其種之

邱 文 莊 公 集

良。質之堅與否。不暇計也。若夫深山大谷之中。材之生。非不魁然大也。脩長且直也。矧其種良質堅。文密緻而臭馨香。全用之。可棟可梁。拆而用之。可車可舟。凡宮室器具之用。若大若小。用之無不宜焉者。然而僵立萬山之中。地險巖而水湍駛。雖有可用之材。卒莫自致。萬一致之。非積以歲月。不可得也。及其至也。又往往有後時之歎。士之生遠方。出而仕也。可以異此。吾友沙文遠。使其生畿甸之間。吳楚淮汴之域。出其所有之一二。以用於時。固已登臚仕。而著美稱也久矣。然而奔走名利之途。年踰強仕。而此志竟弗克遂。是豈其才力學問之罪哉。地也。世之論人之出處者。咸曰時。時固然矣。然彼之所以乘其時。而我之所以違其時。而不偶者。得非以其地哉。方其時之需才。才之見售於時。時之所急用。人之所爭趨。而我方漠然於窮荒寂寞之濱。罔聞知也。及其知而至。然時已後矣。遠方之士。其艱於進取也。往往如是。雖然。在我者。雖有艱進之歎。而亦免夫倖進之譏。吾之材。誠中宮室器具之用矣。用之。則必有實效。不用。亦足以全吾之天。

其視彼之苟且以備用。假合以爲資。亦既有間矣乎。文遠將卒業南雍。予惜其有才而滯於用。作木說以解之。於乎。豈獨文遠也哉。

說舟贈林宗敬

景泰甲戌。五羊林宗敬。偕予就禮部試。予辱在選列。而宗敬得校官。辭不就。又三年。是爲景泰元年。宗敬復應試禮部。又得校官不就。買舟將爲歸計。予適得告。與古岡蔣希舜。送之都門之外。指其所艤之舟而告之曰。若知舟之爲器乎。始之欲作之也。苟不採材於山林。取鐵於冶。煉灰以蜃。其可以成舟乎。曰不可也。衆物備矣。不責其成於工師。不假之以歲月。不依其度。而以意創焉。其可以成舟乎。曰不可也。舟成矣。而樓櫓之不具。檣柁之或闕。與夫艤艗維繫篙司之屬。有一弗備。其可以爲全舟乎。曰不可也。用備矣。而或艤之非其地。所由者乃斷港絕潢。其可以達江河乎。曰不可也。艤得其地矣。然或衆舟集然。而互繫以相軋。其可以行乎。曰不可也。材具而工良。制合而用備。其艤也得其地。其行也無所礙。若可以達河

邱 文 莊 公 集

入海矣。然而風不順焉。則亦不可行矣。士之爲學。何以異諸此乎。方其在學校也。固嘗博習夫詩書之文。講明乎古今之變。印正之以明師。積累之以歲月。其製作也。惟恐不合有司之程度。其強記以待問也。惟恐一理之不明。一事之不知。其進也。既由其道。其用也。又適其時。若可以得志矣。及其羣試有司也。則有利焉。有不利焉。其利也。固若舟之遇風。一日千里。真易易耳。其不利也。夫何以異於舟之阻風。而不得行者乎。行不行。風也。非舟之罪也。利不利。命也。非學之尤也。雖然。有舟矣。然後可以歸其咎於風。使吾材之不良。制之不合度。器用之不素具。雖之非其地。行之有所礙。風雖順也。其能行乎哉。舟。譬則學也。風。譬則時也。有舟。而無風。固不可行也。有風。而無舟。將何以行之哉。然世固有駕駛舟。綴敗帆。遇順風而僥倖。以遂岸者矣。然不可常也。卒然遇魚龍之出沒。風波之洶湧。吾其於愴惶而歸無全舟矣。甚者或至於覆溺焉。幸烏可常乎哉。嗟。人患無舟也。風之不順。非所患也。患無學也。時之不利。非所患也。吾之舟備矣。器用足。

邱 文 莊 公 集

矣。惟不過順風。則已矣。苟待之以歲月之久。而不輕試焉。豈終無一日順乎。使一日得借風濤之便。張飽帆於長江大河之中。鼓柁而歌。振柁以行。縱其所如。無不如意矣。士之稽學以待時也。何以異諸此乎。然此就一舟而言。非所以論衆舟也。舟之製也。稍異其形。則其所從來也必異其地。有來自浙者。來自江者。來自虔吉者。自鄞越來者有之。自荆襄來者有之。其遠者或自川蜀來焉。所來非一地。而作者非一人。其創也未必同一時。其發也未必同一日。其爲形也或大或小。或長或短。或深或淺。其載也有人。有物。所載之物。或多或少。而物之值。或貴或賤。其間萬有不同。而期必至於此也則同。然其行也。或遲或疾。或先或後。有先發而後至者焉。有後發而先至者焉。有一路順風。直抵乎此者也。有初發卽阻。而後無不如意者也。亦有或行或阻。有復行而復阻。不知凡幾而後達此者也。或有發之日同。其至也。或有發之日不同。而其至也則同。有先發旬月之間。有一時之久。或至於暮年。而後發者。乃先焉。由是觀之。行止遲速。皆天也。非

邱 文 莊 公 集

人所能也。達之先者，不足喜。達之後者，不足悲。苟吾有舟。而又得操之之要。今雖未達。安知終不達乎。彼雖先達。安知吾不及乎。抑過之未可知也。惟無其舟。或有舟而無具。有具而不能操。則終焉而已矣。雖然。此特舟之小者。非其大也。特可行之江河也。非所以施之於海也。舟之大者。長至於百尺。大可以千圍檣。如竟大之虹霓。帆若垂天之鵬翼。上可以達五丈旗。中可以容萬斛粟。其爲器也大。其爲用也廣。如欲作之也。非得瓊林人盈之材。秦天合抱之木。付之以公輸子之手。假之以數十年之久。不足以成之也。其成也有非尋常船師所能操焉。苟小試於江湖之間。則非矣。必待夫排山倒海之風。吞天沃日之濤。然後從容乎渤海之中。出沒乎滄溟之表。以收萬全之功。以享無窮之利。回視船楫之在江河間。真不啻泛一芥於坳堂之上也。風之或順或逆。行之或遲或速。皆不足以動吾心矣。孟子曰。觀於海者難爲水。士之學也。誠以聖人之道爲準的。期必至焉。不易其志。不已其功。不狃於近利。不責其近效。則吾之所造也深。所成也大。所以出而應

世也。無適而不可矣。功名利祿。得喪遲速。夫何足以介吾意哉。宗敬積學有素。其文又足以中有司尺度。然累試輒弗偶焉。予恐其自沮也。而以功名利祿動其心。故說舟以贈。用以慰其不平。且進之於道云。

卞和三獻玉說

卞和三獻玉。或疑之曰。吾石、果玉也。一獻不售。歛而藏之。以待識者。或自斲而用焉可也。奚必至於再以取辱哉。使三獻復不售。而三刑焉。吾恐無全軀矣。以其外殘其內。知者固若是耶。予曰噫。是吾所以見卞和之知者也。古人所謂知者。知之弗去是也。使知之矣。而去之。是未足言知矣。必知之真。守之固。斯可言知焉。和也。惟真知石之爲玉。故再獻再刑而不悔。使其知不真。則或人厲聲色以臨之。方將疾走之不暇。況千乘之君加以刑乎。惟其知之真。守之固。故是玉也。不終爲石。不終在野。而終入於君王之匱。器輕九鼎。價重連城。而千萬世傳之以爲受命之靈。使和也雖知之而不能守之。則是玉也。一石而已矣。或小用之。則是玉也。一器而已矣。千萬

世之後。烏知所謂秦璽。烏知所謂下和。嗚呼。古人於外物。守而弗去且如此。况吾身乎。

字說

林弁宗敬字說

禮曰皮弁祭菜。示敬道也。嗟呼。至靈者人。至貴者道。至微者物。人而敬道。心焉足矣。必假物以示其所以敬。聖人制禮之意深矣哉。是故擊拏曲跽。皆足以朝。必爲琚瑀珩璜之制。致誠盡慎。皆足以祭。必爲冠冕黼黻之儀。辟踊哭泣。皆足以喪。必爲衰麻袒免之節。豈固爲是縛節哉。蓋以有形之物。形無形之理。使之內外相符故也。鄉貢進士林弁。旣冠。而賓字之曰宗敬。其取諸此歟。宗敬。敦敏士也。予以丁卯歲隨計之京。道羊城。曾識之友人甘筠鳳所。時猶童艸也。已若老成人。予心奇之。歲庚午閱鄉書。見宗敬名。衰然於九十二人之間。意或偶然爾。明年歸自京師。再晤焉。則已

巖然出頭角。容止端飾。言論英發。非復昔日阿蒙矣。爲之悚息者移時。嗟呼。若宗敬者。其無忝乎若名與字者乎。名者、父母之所命也。字者、賓師之所表也。不忝乎其名與字。則是不忝乎所生所教矣。然則所以不忝之實。果何如。曰端乎外者如其名。直乎內者如其字。如斯而已。程子曰整齊嚴肅。其端外者歟。朱子曰主一無適。其直內者歟。尙慎旃哉。則聖賢地位。可幾矣。功名利祿。云乎哉。如或名然字然。而其人不然。非惟名字之羞。抑亦名之字之羞之羞。

李時芳孟春名字說

天下之理一也。而其所以爲理者。其名目義類。萬有不同。人之始生也。於萬理之中。而摘取其一言以爲己名。及其冠也。又採其義之近似於吾名者以爲之字。噫取一二於千萬之中。認以爲己有。顧乃茫然不知其名義之所以然。可不可乎。此近世名字之說所以作也。羊城李碩夫之冢子曰時芳。旣冠而賓字之以孟春。其舅氏林宗敬。徵予爲之說。予惟人之生也。自幼

邛 文 莊 公 集

而弱。弱而壯。壯而強。強而老。亦猶天時之運。自春而夏。而秋。而冬也。人之一生。其事業皆基于幼少之日。亦猶物華之敷。必在於春陽之時。傳曰。春者開闢之端。養生之始。蓋萬物於是乎發生。以甲。以折。以華。以舒。以夭。以包。以碩。以萼。而蕃且郁。夫然後夏而盛也。秋而成也。冬而實以固也。何者不本於春哉。人之有生。何獨不然。故禮謂人生十年曰幼。二十曰弱。三十曰壯。四十曰強。五十曰艾。六七十則謂耆者與老焉。十年一變。皆有所事。而所學者。乃在幼穉之時。蓋學不可不豫也。要必養其心以義理。飾其躬以禮節。陶其情以詩樂。端其志以經術。博其習以藝文。使之有其德。有其言。有其容。而又有其服。內外昭融。文質相稱。郁乎燦然。如春陽和煦之時。而草木之英華芬敷穠麗也。夫然後壯則見諸行。老則收其功。而終身用之有不盡者矣。時芳年少而質美。勉勉循循。以爲他日受用之資。此其時也。其尙顧名思義。及時奮發。俛焉日有孳孳。弗行則弗止也。則夫壯之所行。老之所傳。皆具乎此時矣。予因宗敬請。謹以學之一言。

爲時芳勉。勉之勉之。非但以無愧其名與字。而天下之萬理。皆可由是而得之矣。

蔡國珍字說

物之可貴重者謂之珍。珍而繫之以國。則其所貴重。有非一身一家所得專者矣。竇安蔡氏子名珍。而字以國珍。厥父若賓。所以期待之者至矣。國珍得是名與字。夙夜祗懼。奉以周旋。如執圭、如拱璧、如握徑寸之珠。藉承蓋襲之惟謹。不肯輕出以示人。旣而因其質而追琢之、切磋之、磨礱之、雕鏤之、緣飾之者。甚周且緻。溫然而津液滋。煥然而文采章。瑟然而聲韻清。渾然而規制備。固已成器。而可以適於用。亦嘗效楚人之獻。而未獲連城之價。今年春。爲有司勸駕。進之於天子之庭。羣試于奉天門玉堂。校文優其等。將育之辟離之中。以大成其才而大用之也。未行。天官卿又請試而用之。國珍得樂昌文學。夫以貴重華美之器。而置之詩書禮樂之區。雖若小用之。固其所也。將之任。以予鄉先達也。求爲申其名與字之義。以爲終身訓。

傳不云乎。儒有席上之珍以待聘。所謂珍者。非世所謂荆璆也。魯寶也。昌城之藥也。西城之圓龍方虎也。亦非所謂夜光、明月、眞白、洞光、三棘、六異、九品、之奇也。其惟吾身之所固有者乎。是珍也。匪金玉而金玉。匪珠貝而珠貝。得之天而具於人。身有之則。明德內炳。家有之。則厚德外潤。國有之。則朝廷以重。府庫以充。宗廟以華。四表以光。是則儒者之珍也。藏之方寸之間。列於几席之上。其氣上徹而旁達。無高弗格。無遠弗妥。無幽弗屆。無深弗入。必如是。然後足以當國珍之稱。國珍其尙遵父師之訓。顧名字之義。反求諸身心。益自敬謹。而思有以爲天下國家之所貴重也哉。

韓儉克慎字說

文昌韓儉。領鄉書。試春官不偶。卒業太學。適其同學林徽時文。亦應貢來京師。儉謂徽曰。某名儉。而字克用。未有發揮其義者。幸在大司成先生門下。欲得一言。以爲終身佩服。敢煩吾子達之。徽以爲言。予惟儉。而字用。其義狹矣。是就一事而言。非所以進之於遠大也。乃取伊尹告太甲之言。易

邱 文 莊 公 集

其字曰克慎。而又爲之說焉。夫儉有兩義。有節儉之儉。有儉約之儉。所謂儉約者。不侈然而自放之謂。雖以孔子之聖。亦必有是儉德於溫良恭讓之間。然後得備於已。而光輝著乎外焉。況衆人無聖人萬分一。而可以不儉乎哉。然聖人之儉德。自然而有者也。衆人無聖人之有。其於是儉也。可無慎哉。尹之言曰。慎乃儉德。惟懷永圖。噫儉之一言。求遠圖謀之本。慎之一言。收斂身心之要。儉也其尙顧汝之名。凡事以儉約爲本。如禮所謂言必稽其所從。行必稽其所蔽可也。念汝之字。凡事以謹慎爲心。如傳所謂戒慎乎其所不覩。恐懼乎其所不聞可也。儉乎。因其名與字。而反求諸其身與心。兢兢焉。常念孔子以約失鮮之言。慎儉德以懷永圖。期必幾乎商阿衡所以告其君者焉。慎之慎之。念念在此而不已。等而上之。則雖慎厥身脩思永。如臯陶所以告大舜者。亦有可馴致之理也。自古聖賢。進德之方。不外乎此。勿謂聖賢非衆人所能學。而乃自暴自棄焉。語不云乎。取法乎上。僅得其中。於是乎爲韓儉字說。

邱 文 莊 公 集

蔣冕敬之字辭有序

清湘蔣冕。予故人河西縣令希玉之子也。年十五。領廣右解首。明年試春官。卒業大學。與其兄昇。以故人子來見。未幾。又忝其父執陳郡博先生。執贄求從予學爲古文辭。又明年。昇爲之加布於其首。旅邸草草。雖弗能戒賓備禮。然名必有字。字必有辭。不可缺也。旣冠來拜予求字。乃命之曰敬之。又爲之補其祝辭。於乎。予老矣。而冕年方艾。予不日歸老於山窮水絕之處。不能旦夕常相教益也。冕乎聞人呼汝之字。恒如聞予之聲出於心而宣於口。誦乎此辭。恒如予之丁寧告戒。以親臨乎汝之前也。聖賢事業。基於敬之一言。其尙念念不忘。而進進不已也哉。辭曰。

人之有身。首爲之元。身之有章。冠爲其尊。戴冠在首。法天之象。冠中有冕。人君所尙。其上有紼。前後有旒。文而得中。孔子從周。居衆禮上。人所具瞻。惟敬斯尊。惟敬斯嚴。內存外形。儼望而畏。一弗敬焉。則戾乎是。名爾以冕。式克似之。父命斯在。烏乎弗思。旣冒冕名。當實冕德。冠雖非冕。

視冕爲則。首容必直。心德惟欽。如大君在上。如上帝是臨。戴天以行。念念斯在。出入起居。罔敢或怠。字汝以敬。祝以斯言。終身服之。奉以周旋。

馮顥子充字說

吾邑之鉅家曰馮氏。馮氏之彥曰仕魯。仕魯第二子顥。予長女子婿也。從其姑之夫鄉貢進士王克信來京師講易。以爲進士業。將歸。克信謂予曰。顥名而未字。盍字之。予字曰子充。復請申其義。按字訓顥、大也。而又謂之顥者。大兼形氣而言。顥則似專以氣言焉。人、天地生者也。天地、至大者也。人、至小者也。人以至小之形軀。而欲全天地至大之氣體。其道何繇。亦惟充之而已矣。充得盡時。則上下四方之宇。古往今來之宙。皆吾分內事也。然則所謂充者。夫豈易盡耶。必有其本。如孟子所謂先立乎其大者。必有其漸。如孟子所謂知皆擴而充之。則充實有光輝之地可造而顥在我矣。自有書契以來。已有此顥之一言。至於有宋程太中。始摘以命名其子。所謂明道先生者。自是以來。凡讀書者。至於斯言。末有不惕然起敬者。蓋字以

人而重也。今顯承其父命。用大賢名以爲己名。其所以惕然起敬者。宜何如哉。蓋思之曰。我之名。大賢之名也。大賢之所以爲大賢。不過盡人道而已。人之道。天地之道也。人道盡。則天地之道盡矣。道有未盡。必思所以充之。涵養用敬。進學在致知。此程門教學者入道之要也。充之道。莫先乎此。顯其勉之哉。勿徒諉曰。此大賢事。非我所能爲。嗟乎。旣受其名。烏可不任其實哉。

瑯文莊公集

卷之七 雜著

七

丘文莊公集卷之八

貪泉對

景泰辛未。予歸自金臺。舟次羊城之石門。舟人曰。嘻。此貪泉也。慎勿汲之。予聞之。舍舟觀焉。歎曰。古人云。飲此水者。一飲則懷千金。又云。飲之者。見金寶之多。思以兩手攫而懷之。信有之乎。予試飲焉。以驗其如何。既而自念曰。濟水可以墜痰。菊泉可以延壽。遼之侵瀾。能使人多髮。晉之饜不泉。可以愈疽。泉以貪名。理或然也。設入肺腑而易吾僕焉。豈不爲終身之累乎。遂中輟而不飲。歸而臥諸船窗之下。恍惚之間。若有聞者曰。僕。石門之神也。受污辱之名。數千百於茲矣。未有爲表白者。幸子之來。爲我一洗之。而予之所見。無異庸衆人。予將何望焉。請爲言之。若謂泉之果能貪人也。吏於茲土之多。孰若居民乎。民之飲茲水者。日以百計。歲以萬計。自有此泉以來。民飲茲者。豈可數計哉。吏之更茲土者。不及民百之一。

邱 文 莊 公 集

而又不皆由茲道而行。而道此者。或數日一人。或閱月一人。或數月一人。總其歲之久。不過數十人而已。然其過也。或憩焉。或不憩焉。其憩也。或飲焉。或不飲焉。然所謂貪者。恒見於吏。而民不與。豈不識不知者其心能常。而讀書明理者其心易變也。抑豈常飲者習而不覺。而暫飲者即動其心耶。不然。則泉之貪。人亦有所擇耶。皆不通之論也。僕聞古之貪者。有藏金以塢者。夜算牙籌者。胡椒五百斛者。黃金至五橐駝者。豈皆官額南而飲此泉耶。不然。何貪也。嗚呼。滔滔者天下皆是也。不誣之以貪。而獨我誣。不亦冤哉。彼其以廉以清名者。一又何幸歟。今夫官吏之所宅者。會府也。郡邑也。城市鎮坊也。而吾僻在郊關之外。且一舍許。特過道焉耳。過者孰若居者之多且久乎。大凡官署必有井也。日日以汲焉。飯水漸也。酒水釀也。湯水熱也。手水盥也。面水頰也。口水漱也。髮水沐也。無一日無焉者也。彼之用久且數也如是。顧不能使之貪。一歎吾者。即欲手攫珠璣。心懷千金。何神且速哉。豈彼冥頑不靈。而吾獨靈歟。噫。有其實者無其

邱 文 莊 公 集

名。而名乃加於非其實者。何居。必欲其名實相符。必有歸矣。僕聞之羊城之中。越臺之下。有九孔泉焉。色清而味冽。最宜於茶。汲者。日以千數。請以是名加焉。庶乎稱其情也。竊聞吾子以文翰稱。毋惜一開口之勞。以辯我千載之誣。豈不有補於名教也乎。予唯唯而覺。起而錄之。嗟乎。貪者。人心陷溺然也。果何預於泉哉。不此之咎。而彼咎焉。宜其忿忿不服也。有人於此。穿窬而盜也。爲吏所獲。將實於法。則方自解曰。非某敢爲盜也。吾之井泉使然也。則爲廷尉者。將信之乎。其不信也決矣。由是觀之。則泉不能貪人也審矣。大抵嶺南之地。多黃金珠璣玳瑁犀象海貝異香奇物。皆他方所無者。見者鮮不爲之動心焉。且又去中國特遠。吏之贓否。鮮或上聞。而其民素柔懷。甘受害而不辭。故吏得以恣其溪壑之欲。貪風恣行。上下交利。漸染成俗。一或屹中流之砥柱。則怨讟叢之矣。是以士之素負名節。守廉恥者。未入其境。固嘗非其人。一躡梅關。泛洧溪。則其心與昔所非者。合爲一矣。人見其然。因以水目之。是豈水之罪哉。嗟夫。使人皆吳隱

之也。雖曰飲石門之水。不害其爲廉。使人非吳隱之也。雖不飲石門之水。不害其爲貪。貪與廉。在乎人心。不在於水也。雖然。是泉也。不幸爲貪人所飲。亦猶冉溪因柳子而愚也。雖名之以貪也亦宜。

書貪泉對後

嗚呼。貪人真可畏哉。飲於泉而泉汚。世因以惡名加之。則夫官同僚。任同事。居同室者。豈不爲所汚哉。然人知以惡名加諸彼。而反遺乎此。何哉。

鏡喻送李景脩

景脩爲令于江山。將行過予願豐軒。告別。坐定。起而言曰。某奔走仕途逾十年。幸得一官。惕然反思。所以免罪累而未能。締交子最久。宜相厚。何以教我。時予座隅適有鏡懸焉。乃指而告之曰。若之處世能如是物。則可以善勝而不傷矣。景脩曰。何謂也。予曰。是物也。明而不用其明。非不用也。不自用也。應物而生其形。隨形而與之影。物來不迎也。而亦未嘗拒也。物去不將也。而亦未嘗留也。妍者應之以妍。媸者應之以媸。其妍其媸。其固

集 公 莊 文 郎

有也。吾隨而妍媸之。非有心於妍媸之也。直者應之以直。曲者應之以曲。其直其曲。其本然也。吾隨而曲直之。非有心于曲直之也。本媸也。而欲吾應之以妍。不可得也。本曲也。而欲吾應之以直。不可得也。始以媸來。繼而易之以妍。吾亦遂其妍。不咎其往也。始以曲來。繼而代之以直。吾亦遂其直。不泥其迹也。以至於大小、長短、方圓、肥瘠、深淺、莫不皆然。各形其形。而所以形形者。未嘗無定形。各色其色。而所以色色者。未嘗無正色。面焉斯照。背焉吾弗知也。近焉斯照。遠焉吾弗知也。不察察以爲明。不規規以求照。未至則弗逆。既至則斯應。既應則不藏。如是。則於物也無忤。而在我者無傷。而鏡之妙用。止於此矣。雖然。用之之妙。由其體之之全。體之所以全。固本乎鼓鑄之功。而用之所以妙。則在乎磨拭之勤。使在我者無其體。固無以應物矣。有其體矣。而所以拂拭濯磨之功。須臾有間。吾見其垢翳昏蝕。則雖泰山頽乎其前。而不之見矣。況秋毫之末哉。此古人大學之教。所以必先乎明其明德也歟。景脩再拜曰。敬受教。予曰。未也。是鏡

也。所以置之者在阡危之地。所以懸之者無堅韌之物。其能久照乎。曰不能也。予亦曰不能也。夫君子之處世。固不可以有其心。亦不可以無其心。虛者、其隱物之要乎。敬者、其守身之本乎。特是二者。大而天下。遠而異域。無所如而不可矣。邑令云乎哉。子其勉之。

考隸送張正夫

字有五體。曰篆、曰八分、曰隸、曰行、曰草。古所謂八分。即今之隸。古之隸。即今之所謂楷。世俗傳舛襲僞。往往反稱之。其來久矣。字學之興。自蒼頡始。三代以前。率用古文。至周宣王始有大篆。秦始皇爲小篆。秦既用篆。奏事繁多。篆字難成。始令隸人佐書。謂之隸字。漢初王次仲又爲八分。其法在篆隸間。自秦漢以後。唐宋以前。凡典籍所載。文章所紀。皆謂楷爲隸。未嘗易也。至宋歐陽子集古錄。凡漢刻皆自爲隸。世人見漢隸稍異於鍾王。遂謂八分爲隸。相承至今。世之通儒學士。因之有不暇考者多矣。間爲士大夫言之。或爲所嗤。因考秦漢以來儒先之言。次第如左以證之。按

邱 文 莊 公 集

漢崔瑗草書體曰。爰暨末葉。曲籀彌繁。惟作佐隸。舊字是刪。草書之法。蓋尤簡略。成公緣隸體曰。蟲篆既繁。草書近僞。適之中庸。莫尙於隸。庾肩吾曰。隸今之正書也。強懷瓘亦曰。隸書者。程邈造。字皆真正。亦曰真書。辭亦曲籀。字有五體。有古文。大小篆。八分。隸書。而不及楷。任分言五體。有篆。八分。真。行草。而不及隸。郭忠恕亦云。小篆散而八分生。八分破而隸書出。隸書悖而行書作。行書狂而草書舉。其言八分與隸。先後雖異。然亦只言隸而遺楷焉。由是以觀。則隸爲楷書。而八分爲隸無疑矣。延平張端正夫。甫畱心古學者也。今年以薦來自八閩。過予。因論字學。偶及於斯。正夫曰。曩某道旰江。拜程奉常先生南雲。其言亦若吾子也。忻然領會。予喜其眞用心於古。而有得焉。非徒然者也。於其行。作考隸一篇以送之。

賦

石鍾山賦 有序

石鍾山、在湖口縣。東坡居士遊山記。千古無改評矣。曩予嘗遊其地。誦其詞。而又竊有所見焉。夏官鄧中王君尙忠。縣人也。近出示其圖求賦。盱江何秋官廷秀。旣爲君賦之矣。大率本坡意而廣之。意盡而語工。余無容其喙。乃即所見爲後石鍾山賦云。

巍乎高哉。茲山之天造地設也。扼彭蠡之口。拉岷江之脇。鼓天聲而震動。橫地軸以鎮壓。豈非東南之巨障。湖江之奇絕處乎。爾其氣勢龍嵒。岡巒嶮嶮。衍駸駸之幾里。崇崛巒之萬疊。危臨深而欲墮。直倚空而如截。下瞰馮夷之府。上峙瞿曇之宮。洞空明兮穴竅。蒼蒼翠兮杉松。余嘗臚舟其下。履險陟崇。爰窮幽而探微。盡詭狀兮奇蹤。望天塹之渺茫。極岳洞之穹窿。適晴空之過雨。晃晨曦之昭融。雲澄澄其歸岫。波沄沄其戒深。萬籟聞息。一

碧連空。於斯之時。但見石爲石。千態萬狀。怪外而空中。而竟莫得聞嘈呖之無射。竅坎鏗鞳之歌鍾也。余乃悠然以思。悚然以興。揆厥山之所元兮。始於鄴註之解桑經。繼以少室山人之博兮。終以東坡老仙之精。曰古人之名山兮。多惟其形。夫何獨茲一拳兮。乃不以形而以聲。矧石之在水兮。不能自鳴。必風濤之搏激兮。然後滂濤而訇砰。風或有時而息。波亦有時而平。名山者。顧舍其大然常有之巍巍。而下取夫適然作輟之涇涇。吾恐君子之正物名。以明民不如是之浮緩不情也。於是呼兒挹酒。注之巨觥。釃江流。酌巨靈。起而問諸。以訂茲山之所以名。

別知己賦

有序

尚書戶部主事袁君秉中。出知梧州府事。命下。同朝卿大夫士。咸以君爲不當去。駭愕歎惜者累日。甚至齋咨涕洟。如失左右手。然予之於君。情好深至。尤非泛泛者比。故於君之去也。其戀戀之情。視諸公有加焉。朋友。五倫之一。孔子答魯君問政。於四者之倫。直舉其目。獨於朋友以

交言之。交之爲言。道相合之謂也。道不相合。則情不相孚。故其來也迥然。其去也漠然。其去其來。皆不足以動吾之欣戚也。吁。其來也忻忻。其去也戚戚。非平日道合而情孚者。其能然乎。予與君皆出自嶺南。均以禮學起家。同試南宮。游太學。而又聯官朝著。非但道合情孚也。其出處大略。又相似焉。今君一旦舍予以去。南北相望。天各一方。出入無朋。會聚不常。歲月幾何。老將至矣。在他人尙齎咨涕洟之不已。况知己之深至者乎。不揆非陋。竊效昌黎韓子之意。作別知己賦。寫予情以送君。政事之餘。試一誦焉。庶幾千里如對面也。君其念之哉。君其念之哉。余生五嶺之南兮。嗟側陋而寡儔。驅余車以北征兮。行取友於中州。匪其人

之弗交兮。惟直諒多聞之是求。紛總總其衆多兮。咸言立而德脩。亦有良朋兮。如弟如昆。薄金石之匪固兮。謂蘭芷之弗芳。夕連牀以共語兮。朝竝焉以周旋。足縮縮以相躡兮。袂翩翩以相聯。所與者非海內之名賢兮。則天下之善士。情亦或吾之同兮。道亦不吾之異。惟夫君之知己兮。乃千百之

一一。皇天賦之以昭質兮。塞好脩而練安。扈蕙節與菌桂兮。芬菲非其遠到。青天白日粲其光兮。孰不仰其清明。麒麟鳳凰之昭于世兮。人皆知其爲瑞。頑信一世之偉才兮。匪直海內之英。嗟子亦越之產兮。追浼足以超騰。心不約而自契兮。德相麗以有成。期追逐於前脩兮。洗山川之穢腥。馳鯤鯨隨人後兮。相後先以同升。亦旣聯袂於金門兮。曰終遂此情懷也。夫何一麾而出守兮。羌別余以去也。躡提貞于孟陬兮。載雙旌以揚揚。指斗牛之故墟兮。驅五馬以周行。蒼梧邈其何所兮。歷雲山之蒼茫。盼京國之日遠兮。喜咫尺乎故鄉。悲余心之戀戀兮。亮君心之亦然。惓鬱悒之無解兮。悵臨歧以永歎。幸歲月之未晏兮。尙矢言以慎旃。慕淵路之贈處兮。罄中情以申言。諱曰始與終兮。志不可渝。內與外兮。道本不殊。惟忠與孝兮。臣子之楷模。白首相期兮。毋中道而舍諸。

懷鄉賦 有序

每因送人處。憶得別家時。此唐人詩也。嗚呼。爲此詩者。其能深體人情

邱 文 莊 公 集

哉。某去家今十有六年矣。鄉土之思。無日而不展轉于懷。徒以國家之制。馳封之典。必限以歷官之歲月。以故情事尙未申也。去年冬。友人劉君尙德、應進士舉來京師。久別而晤。不勝空谷足音之喜。今歲試禮闈。不合而去。某於尙德。鄉曲交游中最厚者也。因其別而動乎情。方寸惻然。有不能自己者。因述中心所懷者以爲賦。一以寫吾鄉土之思。一以慰吾母兄之望。一以志吾朋友之別云。

懷吾鄉兮何所。渺雲山兮萬里。界鯨波之浩漫兮。途有梗之未通。曰吾心之切切兮。無日而不南征。晝神想以遐鶩兮。宵夢寐而靡寧。母氏垂白之待養兮。伯兮獨立以煢煢。雖顯揚之足慕兮。恒喜懼以交并。桑梓蔚其深茂兮。昔可把而今拱。耆舊日以凋謝兮。哀纍纍其多壟。朝吾登乎金門兮。夕偃蹇乎玉堂。置身非不高兮。信美非吾之鄉。入結羣仙之綬兮。出聯七貴之鑣。游從非不多兮。匪吾髻齒之交。退默默以獨處兮。念平生之往事。宛山川與閭巷兮。默其可指以示。恨無縮地之術兮。孰插予雙翅。馳寸心於萬里。

郎文莊公集

兮。幾將歸兮猶未。惟人情同於懷土兮。豈以窮達而異。彼志得而情遷兮。乃獨非人之類。年洋洋其日往兮。百歲幾何。較富貴之與名節兮。所得孰多。苟情義之不申兮。焉用其他。幸吾子之茲來兮。若聞足音於空谷。申中告吾以鄉曲之故兮。語再三而不以爲瀆。或爲之忻忻兮。或爲之戚戚。或可愕而可駭兮。或可矜而可惜。或慙而爲之忸怩兮。或傷而爲之怵惕。颯然而興兮。俄然而衰。奄然其去兮。儻然其來。歷寒暑十有六變兮。恍如一瞬。天人倚伏有必然之理兮。孰云邈而難信。每正膝以劇談兮。輒歎息而不休。情悁悁而不自已兮。涕或浪浪以橫流。方資其朝夕以箴規兮。胡數奇而弗售。彼惟索驥以其圖兮。曾莫知神駿之求。君子出處惟其時兮。樂天知命夫奚尤。又將別予以去兮。仍海上之仙丘。闡天人之妙理兮。傳嗣子以箕裘。翩翩然以遐征兮。嗟欲挽而莫留。矢吾辭以志別兮。因以寫吾之心。行何以處我兮。毋金玉乎爾音。自蘄北而越南兮。閱半載之光陰。既沿復邇止且行兮。查不知山高而海深。抵瓊臺而見鄉人兮。道予心之永懷。慰吾親倚闥之

思兮。曰不久請告而歸來。

南溟奇甸賦 有序

伏讀太祖高皇帝御製文集。其勞海南衛指揮敕。有曰。南溟之浩瀚。中有奇甸數千里。地居炎方。多熱少寒。是時瓊郡人職方。僅再拜。其地在炎天漲海之外。荒僻鄙陋。而我聖祖即視之以畿甸。而褒之以奇之一言。豈無意哉。謹按文集若干卷。其中勞天下軍衛詔敕。何啻百數。大率絃其邊徼險遠。將領勤勞征戍。艱苦而已。未始有褒美其疆域若此者。噫。聖人之心與天通。物之美惡。必豫有以知其後之所必然於千百載之前。則夫吾郡之在今日。民物繁庶。風俗淳美。賢才彙興。無以異乎神州赤縣之間。且復俊邁奇詭。迥異常儔。有由然哉。濬世家于海南。北學于中國。偶有所見。謹拜手稽首而爲之賦。曰

爰有奇甸。在南溟中。邈輿圖之垂盡。綿地脈以潛通。山別起而爲崑崙。永畢歸以爲溟渤。氣以直達而專。勢以不分而足。萬山綿延。茲其獨也。百川

邱 文 莊 公 集

灑茫。茲其谷也。豈非員嶠瀛州之別區。神州赤縣之在異域者邪。有一奇士。全鍾其氣。北學於中國。韻頡乎天下之士。於是叫閭闔。呈琅玕。翱翔乎玉堂。徘徊乎道山。肆言六合之外。馳騁百氏之間。自詫所生之奇勝。敢爲高論。恣爲大言。翰林主人聞之。該而訝焉。曰吁。子來前。子生寰區之外。漲海之邊。學何所受。道何所傳。何所從而至此。何所見而云然。試爲我一言之。吾將即子之所云云者。以紀載於簡編。士曰唯唯。乃作而言曰。自夫天一生水。融而爲川。地十成土。結而爲山。川者天地之血脉。山者天地之肌骨。血脉流行於肌骨之中。浹于中而外出。出乎外而環其中。是爲一大堪輿也。具元氣之渾淪。容日月之出沒。然而大堪輿之外。突起於浩浩之中。而爲小堪輿者。又不知其凡幾窟穴也。是故其大而顯者。爲帝王之宇。其小而幽者。爲神仙之丘。帝王之宇。是爲神州赤縣。神之丘。是爲員嶠瀛洲。一則非骨蛻羽化莫能到。而非常理。一則雖聲明文物之所萃。而非眞游。惟走所居之地。介乎仙凡之間。類乎島夷而不夷。有如仙境而匪

仙。以衣冠禮樂之俗。居閭風立圃之嘆。勢盡而氣脉不斷。域小而結扇斯全。九州一大宇。茲爲其輿。四海一通用。茲爲其鈹。上至北極。僅十九度。於天爲近。遠至神京。幾一萬里。於地爲大。茫茫且浸兮。與天爲界。漢漢平川兮。壯地之介。豈非天造地設。藏此奇勝於遼絕之域。用以見天聽之孔卑。表王化之無外耶。其爲甸也。可謂奇矣。然奇而不怪焉。翰林主人曰。子之言辯矣。豈其然歟。載考諸古。茲地禹貢之所不載。職方之所不書。郡縣始漢武之世。分野僅星紀之餘。在漢七世。固嘗棄之。蓋不以之爲有無也。且甸者王畿之名。非所以爲遐外之域。奇者殊常之稱。不可以加寂寞之墟。子之言。何所據而云乎。士曰。茲豈走之言哉。於是乎惕然興。悚然懼。舉手加額。北望向天。百拜稽首而颺言曰。此我太祖聖神文武統天大孝高皇帝金口之所宣也。大哉皇言乎。自吾茲地而得茲言。地益增而高。物若加而妍。山林草木。濯濯然如在昆吾御宿之近。封疆畛域。整整然加與侯服邦畿以相連。嗟夫地以人勝。從昔則然。蘭渚以養之如著。天台以

邱 文 班 公 集

孫綽而傳。夫以殘山剩水之勝。一經騷人墨客之所賞詠。尙揚芳於四外。流美於當年。矧茲奇甸。環海以爲疆者。餘二千里。縱步以行兮。地雖甚遐。仰首而觀兮。天則伊邇。一經大聖人之所品題。山勢駸駸而內向。波光躍躍而立起。物則且然。人可知已。然則走所言者。豈無所以邪。主人乃仰然而思。俯然而歎。曰。良有以也。願聞其所以。士曰。走也少而游庠序。壯而走四方。雖生於是甸之中。而甸之所以爲奇也。容有所不能詳。蓋嘗歷考夫禹益之紀。緬想夫章亥之所。步古往今來之宙。上下四方之宇。天左舒而起牽牛。地右闢而起昴舉。天有四維。地有四極。東至於泰遠。西踰於邠國。南訖于濮鈞。北底于祝粟。管子言名山三千。墨氏云名川三百。三百之川。總歸滙于東南。三千之山。皆發源於西北。是則海者。川之所委。嶺者。山之所積。茲甸也居嶺海之盡處。又越其滙而獨出。別開絕島千里之疆。總收中原百道之脉者也。原夫天下之山。皆自夫崑崙而來。越戎而夏。出險即夷。分爲兩界。折爲三支。其中一支。自中條經淮越江。而極于衡霍。

遂散亂而分披。至此而地勢將盡。乃益險巖。嶺巖 巖巖。嶺嶺 嶺嶺。孰知
一脉透出於瀛海之外。其地可畫而井。無以異於秦晉之近圻。觀夫天下之
川。皆至於溟渤而止。滔滔汨汨。雖日趨於東。然皆折於南西。而後已大
起而爲國都。小起而爲洲坻。其尾閭收萬水而灌衆流。遂浩漾而無涯涘。
自此而水勢益下。弱莫能起。漶瀾沆瀣。渺污灌濟。孰知一島孤峙于瀛海之
中。其地可葦而航。無以異於湖江之流水。海可度兮。不踰百里。山可登
兮。不踰尋丈。舟之行也。朝斯往而夕斯返。人之游也。足可履而手可
杖。意其巍巍礧礧。乃爾坦然夷曠。意其汙汙油油。乃爾悠然平漫。曩爾小方
外之封疆。宛然大域中之氣象。陽明勝。而氣之運也無息機。土性殊。而物
之生也多奇相。草經冬而不零。花非春而亦放。境臨乎極邊。而復有海洩
其宛氣而無瘴。地四平以受敵。無固可負。歲二穫以常穰。有積可仰。通
衢絕乞丐之夫。幽谷多耆老之丈。古無戰場。賦語信乎有徵。地爲頗善。
符言斷乎非妄。民生存古朴之風。物產有瑰奇之狀。其植物則郁乎 其文

邱 文 莊 公 集

采。馥乎其芬馨。陸摘水挂。異類殊名。其動物則彪炳而有文。馴和而善鳴。陸產川游。詭象奇形。凡夫天下之所常有者。茲無不有。而又有其所素無者。於茲生焉。歲有八蠶之繭。田有數種之禾。山富薯芋。水廣鱸鱖。所生之品非一。可食之物孔多。兼中外之所產。備南北之所有。木乃生水。樹或出耐。麵包於椰。豆筴于柳。竹或省人之面。果或像人之手。蟹出波兮。凝石。鱈橫港兮堆阜。小鳳集而色五。竝饜遊而數偶。脩蝦而龍鬚。文魚而鸚鵡。鱗登陸兮或變火鳩。樹垂根兮乃攢金狗。跼緣樹杪而飛。馬乘果下而走。魚之皮可以容刀。蚌之殼用以盛酒。波底之砂。行如郭索。海濫之貝。大如玉斗。花梨靡刻而文。烏櫛不涅而黝。椰一物而十用其宜。椰三合而四德可取。木之精液。藪之可通神明。鳥之毳毛。製之可飾容首。有自然之噐具。有粲然之文繡。天下皆有於菟。茲獨無之。豈天欲居民之蕃息於此。常夜戶不閉。而無觸藩之虞乎。江南皆無蚺蜥。茲獨有之。豈天欲寓公之久居於此。使照壁見喜。而無北風之思乎。噫。斯地也。近

隔雷廉。僅一水耳。而物之生也。乃爾不同。遠去齊晉。殆萬里兮。而氣之通也。胡爲無異。若是者雖云生物之偶然。安知造物者之無深意也。然則茲甸之所以爲甸。而奇之所以奇者。庸有在於是。主人曰然。此物之奇爾。如人何無。乃奇之爲奇。獨鍾于物。而遺于人耶。士曰不然。天地盛大流行之氣。始於北而行於南。始也黃帝北都涿鹿中。而堯舜漸南而都于河東。其後成周之盛乃自豐鎬。又南而宅于洛中。蓋自北而漸南。非獨天地之氣爲然。而帝王之治。亦循是以爲始終。蓋水生天一。而坎位於北。而艮之爲山。又介乎東北之間。自北而東。折歸于南。其氣之所以融結而流行者。非止乎一水一山。山之餘而爲嶺。水之委而爲海。而是甸居乎嶺海之外。收其散而一之。透其餘而出之。所以通其鬱而結其解。其域最遠。其勢最下。其脉最細。是以開關以來。天地盛大流行之氣。獨後其至。至遲而發也遲。固其理也。亦其勢焉。是以三代以前。茲地在荒服之外。而爲路越之域。至于有漢之五葉。始偕七郡而入于中國。南蠻之習未易也。椎結卉服

邱 文 莊 公 集

之風未革也。持章甫而適之。尙禮而未之識也。魏晉以後中原多故。衣冠之族。或宦或商或戍。紛紛日來。聚廬託處。薰染過化。歲異而月或不同。世變風移。久假而客反爲主。廟擴悍以仁柔。易介鱗而布縷。今則禮義之俗日新矣。絃誦之聲相聞矣。衣冠禮樂彬彬然盛矣。北仕于中國。而與四方髦士相後先矣。策名天府。列迹縉紳。其表表者。蓋已冠冕佩玉。立于天子殿陛之間。行道以濟時。而堯舜其君民矣。孰云所謂奇者。顛在物而不在人哉。主人乃離席而立。拱手而言曰。神矣哉。聖神之見乎。其所謂奇者。蓋至是乎驗矣。士曰不然。何地不生才。而才生不擇地。人才之生。何地無之。奇哉奇哉。豈止是哉。當我聖祖肇基之初。輿圖際天地。兵衛極邊鄙。絲綸之音。雲漢之章。無日而不下。無處而不至。然而奇甸之言。乃獨以專美乎茲。地非甸而謂之甸。未奇而豫期以奇。豈無意哉。蓋王帝之言。代乎上帝。聖人之心。通乎天地。故能握乾符而妙奪神功。闡坤珍而轉旋厚勢。遠移而近書。軌合以皆同。質變以文聲。教璣而靡異。咫尺之間。振舉乎萬里。

斯須之頃。流通乎百世。化庸腐以爲神奇。易雜駁以爲精粹。遐兮如邈。未
焉如既。凡其所期兮。罔或不遂。引而弗替兮。終古如是。是則斯地之所以
爲旬。而旬之所以爲奇。雖造設於天地。然所以表而章之。昭示於萬世者。
實本乎奉天啓運。宰制山河之聖帝。翰林主人聆茲言也。輟然以哈。憮然
以喟。曰秘矣哉。天之藏此地也。遠矣哉。聖人之期此地也。自夫天開
地闢。以至今日。不知凡幾。運幾世矣。自夫開疆辟土。以建此區。不知凡幾。王
幾帝矣。然而多視之以窮荒。或遂至於遐棄。孰謂其今日有是哉。不假詞
臣之代言。不出輔臣之建議。一旦無上。事發淵衷。運啓睿思。形之於言。以
爲絲綸之製。夫豈無所爲哉。皇之言。天之意也。士言及此。亦奇士
哉。於是三復士言。而繼之以歌曰。明明我聖祖兮。載闢地而開天。惟上
帝眷顧兮。付以其所覆之全仁。周八表兮。顧獨惓惓於窮海之一垓。奇哉斯
甸兮。何幸得聖人品題之言。千秋萬祀兮。長炳炳琅琅乎天地之間。

頌

瑞菊頌

有序

予友何東樊景瞻。以禮科都給事中。出佐汴藩。是歲秋九月。菊呈祥於其公宇之庭。一帶三華。一時寮屬咸詠歌之。傳至京師。予聞瑞不虛生。其生也。必有所為焉。況菊之為物。芳香清冽。稟天地之正氣。純粹不雜。得天地之正色。高潔閒雅。全天地之正性。有幽人逸士之操。有忠臣貞士之節。蓋非他草木所可比者。予嘗評菊之品。當在橘上。而靈均之於橘。乃特為之頌。至謂其可以參天地。而儼之於伯夷。而於菊。特取其落英之可餐而已。而又雜之杜蘅申椒。薰匝之間。每為菊怏怏不平。恒有意欲頌之。庶其儼於橘。而未果。適聞景瞻瑞菊之事。而有感焉。夫菊固可頌。矧此又非常之菊也哉。則美其德而告其功也固宜。

爰有嘉植。號曰精兮。受命獨正。天之經兮。非黃白不御。地之恒兮。特立

不遷、人之貞兮。有尹之任、夷之清兮。和如展禽、介則魯兩生兮。三才之會、衆德之凝兮。物皆春茁、乃獨秋榮兮。兩露不能發、霜雪不能零兮。凡厥有生、一華一莖兮。胡獨此本、參秀竝馨兮。一星在天、下炳其明兮。人之三壽、于此作朋兮。就曰無知、殆亦有靈兮。不于其他、而生此藩服之庭兮。豈天之意、假物以呈兮。晚節之符、壽之徵兮。頌以美之、以繼楚聲兮。

贊

瓊州郡侯徐公畫像贊

詩曰。凱弟君子。民之父母。濬嘗三復斯言。而繼之以流涕焉。方濬少時。吾州之民。質朴而謹愿。有老死不識城邑者。雖貧下戶。亦有所蓋藏。是時之爲守者。率多循良。豈弟之君子。予所聞者。西昌王公。所見者。義興徐公。二公者。以寬仁之德。涖古朴之民。如洪荒之世。而治之以大庭赫

氏也。噫、民生斯時。一何幸哉。二公之後。吏于茲者。輒遠視其地。而愚視其民。而民不勝其害以貧。而俗亦日之於薄矣。嗚呼。安得爲吾人之父母者。恒如二公哉。二公不可見已。見公之子若孫。則如見公焉。王公之子。有抑菴尙書。徐公之孫。則時用。官僚循良之報。天之於二公。可謂厚矣。彼以誅求爲事者。吾知天彼不輕恕之。時用出其祖畫像見示。濬童稚時。曾隨先大父恩貽翁拜公於座下。今餘四十年矣。猶能彷彿其形似之一二。今幸與時用交好。拜瞻遺像。不勝愴然。故追而爲之贊。

此公何人。曰古君子。天德好生。而公是體。視愚以智。處遠知邇。公何能茲。德備諸已。溫溫其恭。外見者爾。中之攸藏。不可涯涘。公形化雖。心則不死。所不死故。在人口耳。公不人責。天乃厚畀。畀之伊何。有賢孫子。彼誅求者。今安在已我拜公像。悲極而喜。圖臨以歸。祠于故里。

邢克寬畫像贊

五嶺之南。大海之外。山川秀氣。于此焉萃。立朝著蹇蹇之節。出守敷優優之治。總憲綱。存法外之仁。制國用。寓利中之義。衆方俟其有爲。乃急流而勇退。斯人也。介而有執。直而不肆。不徇時之好。必行己之志。匪但秀出於嶺海之間。殆所謂天下之士。

彭學士書像贊

大彭之裔。昔有龜年。其德不爽。充象其賢。安成之彥。昔有雲龍。斯文在茲。綽有古風。我觀古人。今世則有。杜其德機。神巫見走。志之所至。如求必東。氣之所嚆。如冰斯融。功名固有。文章餘事。望而畏之。孰窺其際。

許道中四像贊

世有大老。居東海濱。出而應世。千億化身。身且千億。像何止四。莫測其真。姑貌其似。九門洞開。咫尺天顏。於斯之時。朝衣梁冠。有事秦壇。

邦禮是執。於斯之時。玄端素鞞。或具袍笏。直承明廬。或常衣巾。紬金匱書。服稱其容。容稱其德。不肆不拘。各有其色。外四其像。中一其心。我思古人。默默愔愔。愔愔希聲。默默至道。魯有君子。天遣一老。

李立之先生畫像贊

於戲。此吾立之先生之畫像也。肖耶否邪。雁真邪真邪。力其少也。渾乎在璞之玉。具珪璋瑚璉之贊。而未漓其淳也。迨其壯也。茫乎出治之金。礪豪曹巨闕之用。而不露其神也。今則老將至矣。懸秋空之霽月。閱西郊之密雲。屹乎泰山。雖未嘗見其運用也。然觸起於石者。有霏然之澤。浩乎長江。雖莫能判其過績也。然渙散於風者。有自然之文。是其少而壯。壯而老也。蓋三變焉。而區區之畫工。乃以其一時之見。而欲形容其百之身。又烏足以形吾立之先生之爲人。

張汝弼畫像贊

視雖短、而見則長。容若墮、而氣則揚。藏精神於內。而外不露。歛華彩於外。而內斯光。海內詩名。世共稱乎短李。吳中草聖。今再見於顛張。混俗而居。初不通而不芥。師心自用。亦非狷而非狂。斯人也。豈詩所謂不伎不求。何用不臧者乎。

李時習畫像贊

謂爲越產歟。則長身脩髯。酷似乎河朔之士。謂非越產歟。則鍾英挺秀。實生乎嶺海之間。有鄭虔之文章。而不隨官以冷。有孟郊之才思。而不爲詩而寒。志剛而勁。行介而端。屹乎若山。而無崖與谷。沛乎若河。而不波以湍之人也。宜致身於鳳閣。蓋筮羽於鸞班。吾知其鵠起有日。而不終老於校官。

蕭士高畫像贊

求先生以名。不若求以貌。求先生以貌。不若求以道。鑒其貌而后知其名。

之稱情。審其道、而后知其形之克肖。是蓋具天地之委形。而不伐其和。闡聖賢之門牆。而期臻其奧者也。

兄伯清先生贊

儼乎吾兄之容也。直乎吾兄之躬也。炯乎吾兄之瞳也。坦乎吾兄之胸也。然皆貌吾兄之外。而不能心吾兄之中。吾兄之中。其事親也孝。其事君也忠。其愛弟也友。其處已也恭。雖吾兄不知其所以然。而況區區之畫工。

大司馬王公像贊

世之偉人。國之重臣。如虎豹在山。如山川出雲。如金之百鍊。如弩之千鈞。在漢爲汲長孺。在宋爲包希仁。居廊廟之高。則憂其民。處江湖之遠。則憂其君。昔聞其語。今見其人。

劉紹和祭酒先生畫像贊

此予友劉紹和先生六十歲像也。弧簪之峰亭亭。晚翠之松鬱鬱。景變情遷。

而閱於目者孔多。憂深思遠。而見於容者可掬。浸光精而潤之。歛鋒鏷而不
出。向之雄辯者。發而爲咨嗟。向之深憤者。形而爲哀恤。不求人知。而求天
知。不爲物屈。而爲理屈。將無同于遽伯玉之化。殆有契於蒙莊氏之佚。回
視昔日容臺禮樂之司。史館春秋之筆。與夫今日太學之尊嚴。異日廊廟
之密勿。嗚呼。若是者。皆先生身外之長物也耶。

謝大韶尙書像贊

坦然其平。無崎嶇也。朗然其白。無幽陰也。聽其言而信其行。覩其容而見
其心。其爲器也。肉好之璧。其應用也。從革之金。鑿鑿乎濟時之具。颯颯乎
鳴世之音。文不離乎質。古則宜於今。故魁多士而震平地之雷。位六卿而兩
早歲之霖。其燕居則神閑而氣定。其立朝則思遠而憂深。噫。斯人也。斯世不
可得而見已。求之秦漢之上。惠焉鄭國之僑。和焉魯國之禽。

梅峰先生贊

梅。爲百花之魁。人爲萬物之靈。若人與梅。妙合而凝。不色而白。不氣而

馨。節不雪而後見。影不冰而自清。觀厥貌。肖厥號。審其名。稱其情。人皆曰先生有取於梅。余獨曰梅有似乎先生。

某處士贊

其容偉然。其髯脩然。置之丹崖碧水之間。人望之以爲遺世之仙。坐之華堂廣廈之上。人擬之以爲輔世之賢。心安而體舒。氣完而神全。隨所游衍之地。樂其情性之天。我欲狀之。莫知所言。風月雙清。度微雲於河漢。水天一色。漾寒藻於漪漣。

贊甘汝霖行樂像贊

斯人何人。獨樂其樂。某水某丘。琴一鶴之挺乎。一鄧林之材。渾乎荆山璞。而彼哉畫工。曷不圖其形於巖廊。願乃置其身於巖壑。

韓敬夫遺像贊

嗚呼。此予友韓敬夫之真也。其人不可見。而其貌空存。貌雖得其彷彿。而

言則不可得而再聞。想夫抵掌笑談之頃。蹙額憂思之辰。執而不泥。朴而有文。爲人則直爲吏則循。不子子以立義。不煦煦以爲仁。其平生之志嚶嚶然。曰古人之入。曰古之人。今則親爲古之人矣。眞作古之人矣。噫。

自贊四首

天賦汝以性。而汝不能盡。地全汝以形。而汝不能踐。謂汝全無用耶。則似乎亦有所爲。謂汝了無知邪。則似乎或有所見。噫我則汝也。尙不知汝之有無。人非我也。又安能測我之淺深耶。

中遐僻之鄉。學何以能博。無指授之師。道何以能覺。蓋適有所見。而求之以類。偶有所得。而守之以確。所見雖不多。而有寡中之益。所得雖未深。而之淺中之樂。限於地。善固未能以盡行。畏乎天。惡決不敢以少作。由百世有下。雖未出歸古聖賢之途。論一世之人。亦或可側今士夫之末。

謂其爲我邪。而我又在此。謂其非我耶。則又酷我類。蓋人承父母之遺體。爲天地之委蛇。有形而動。不可久恃。願乃丹青是資。絜素是寄。雖曰不是。

而實則相似。雖若相似。而實又不是。噫此影也。而非形。形也。而非氣。不出於自然。而出於有意。徒得其形之彷彿。而不得其心之真至。雖然、氣體之真。有時而歸之造物。畫圖之假。幸可存於人世。後之人有見之者。尙曰此瓊山之丘仲深氏。

汝生無載籍之鄉。何以能博。汝學無師友之資。何以能覺。蓋黯黯中忽有一點之明。紛紛內如幸解四肢之縛。偶然由徑以達康莊。庶幾出塵而升寥廓。噫奮自嶺海。登乎館閣。雖不能爲一世之人龍。敢自咤爲一方之鷄鶴。方之於人。固不能如。求之於已。亦足以自樂也已矣。

程尙書像贊

偉哉此公。萬夫之特。神鑿而幾。風勁而力。淬礪百鍊之金。屹立萬仞之壁。不翕翕以求苟同。不煦煦以爲德色。施於事。不違其心。居其官。必任其責。是以謀謨於內者。王諒其忠。經營于外者。民被其澤。未滿七旬之年。暫爲六月之息。人方望其再興。天願奪之何亟。嗚呼不有君子。…何能國。景瞻

令儀。爲世道愷。

西昌楊君像贊

生廬陵忠節之邦。爲關西清白之冑。源源世澤之長。濯濯儒林之秀。早含芳而咀華。遂蜚英而騰茂。發龍光射斗之鋒。銳騁天馬行空之步。驟斯人也。國倚之以爲屏翰。家賴之以爲堂構。其尙朝兢夕惕。以合易所謂或躍在淵無咎。

無心石贊

雲行於天。…根在地。既無心而出岫。豈有心而應世。惟此雲根。溫潤峭厲。磴磴立辨之聲。巖巖具瞻之勢。不鑿而成。不求而至。名曰無心。夫豈無意。

墓誌銘

都察院左副都御史盛公墓誌銘

邱文莊公集

英廟復辟之初。權臣之冒功者。朋比爲姦。鑿空起邊釁。欲樹奇功以蓋其迹。率師闖塞。卽還鹵因乘之以入。十三道御史欲有言。同事有洩之者。彼先入愬于上。誣御史中有與被繫內臣張永同族者。欲爲之報復。以激上怒。卽逮所誣御史下獄。明日衆御史章始上。上御便殿。召衆入。盛氣待之。擲章五御史誦之。誦之至半。上曰。止。摘章中所條事折之。令其分疏。復諭之以終誦。上意稍悟。然重違權臣意。姑從輕典。凡列名者俱調外任。其一人、錫山盛公也。時掌河南道事。出知保定之束鹿縣。先是權臣啓邊釁。其勢燄可畏。人無敢言者。公首與同官涑水張公鵬謀。謂事于軍國。某等官台憲。烏可畏禍不言。張公以爲然。卽謀之兵科都給事中王鉉。約以章交上。機事因之而失。時聯官者。皆未知也。亟召入。永平周公賓、倉卒誦所上章。音吐洪亮。略無阻滯。及對上之言。詞直理正。天下聞而壯之。而不知首啓其謀者。盛公也。同日出補外者若干人。其後、惟盛公年最高。官最顯。而能以令德終。嗚呼。天於忠直之報。固獨厚之耶。公諱頤。字時望。常之無錫人。

邱文莊公集

正統辛酉。以尙書蔡氏傳。得備京闈。在太學十年。所交皆海內知名士。景泰辛未。始登進士第。首擢河南道監察御史。尋以老成掌道事。時初經己己之變。朝廷懲前政委靡之夫。稍開言路。一時言事者毛舉細故。攻訐陰私。以張直聲。公獨顧大體。惜人才掩其疵疾。不爲已甚。善類賴之。嘗兩奉命出按汴。按淮時。值歲大歉。發倉賑貧。全活甚衆。按閩時。適當大比。拔賢振滯。是科得人爲盛。及是首謀摧折巨姦。直聲凜凜聞天下。其知東鹿也。邑多顯宦。往往怙勢爲不法。聞公至。相戒曰。是嘗劾奏石總兵者。其人不可犯也。公變搏擊以爲撫循。吏畏而民安之。未幾。丁內艱去。民留之不可。俟其服闋。相率詣關乞公。公得再任。不復用刑法。有爭訟者。諭之以理。輒叩首聽受。不復辨。鄰邑聞之。訟多年不決者。各來請判於公。公折以片言。各心服而去。時人有清如水。明如鏡之謠。邑介真保間。四境之民。雖非所治。亦聞風趨赴。郊外有荒落地。自然聚而成市。邑人因目爲清官店。既去任。民築亭。爲立去思碑。請文士爲作記。至今存焉。歲甲申。擢守邵武。行

邱文莊公集

所無事。不動聲色。而郡民大化。旣而巡撫都憲以延平、民狡而事繁。請于朝。移公治之。延平與邵境。聞公政聲有素。莫不革心向化。巡按御史錄公兩郡政績。請旌異于朝。進公一階。封贈父母及妻。歲癸巳陞廣西叅政。專督糧餉。丙申陞雲南右布政使。丁外艱。服闕。改陝西。尋遷左。時廣西殘破之餘。公委曲措注。民夷賴以不擾。陝西地臨三邊。公在任日。邊報無虛日。適歲多歉。公調度有方。而餽餉不缺。入爲刑部右侍郎。佐其長以明刑。恒舉歐陽公求生不得、則死無憾之語爲僚屬告。有深文巧詆者。輒不樂之。刑用是平。僅再閱歲。調公南京。蓋當道者之鄉人。有欲得公處者。或以爲言。公曰。吾南人往官于南。固其所也。明年山東旱饑。盜賊將乘之而起。廷議建遣大臣巡撫。僉曰無如盛時望者。改公都察院左副都御史。乘驛往。命至。公卽日就道。甫下車。露禱于天。雨即大注。枯槁復蘇。公多方設法。凡前人救荒之政。於今有益者。次第舉行。而又因時之宜。條數十策。行下所司。民賴以濟。賑恤之餘。所儲尙百餘萬。又有餘方。以致於前代聖賢、有功

邱 文 莊 公 集

于齊魯者，爲建祠宇。以報祀之。公山東之政。大抵以黜貪暴。表忠良。除苛政。以固民心爲本。在山東者三年。齊俗翕然以變。年近七十。以老疾上章乞致仕。上以其情詞懇切。從之。馳驛歸。至徐州。適所部有大獄。以公知其始末。有旨命鞠之。獄成後歸。公自家食時。家事一以付其弟頤。至是抵家。伯仲怡怡。友愛加篤。公家事一不問。頤爲之構方塘書院。疊山鑿池。時花植竹。以爲娛老之地。公時靜坐一室。焚香讀書以自適。泊如也。歲丁未。以上皇太后徽號。因進公一階。家居者六閱寒暑。以歲壬子正月二十六日卒。享年七十有五。訃聞。賜葬。祭如例。卜以是年十月二十四日。葬于惠山之原。弟頤命其子虞。持狀來京師。求予銘。按狀盛氏。常州右族。世多聞人。曾大父諱茂之。大父諱子實。父諱珪。俱以公貴。贈都察院左副都御史。祖妣吳氏。妣馬氏。俱贈淑人。公凡三娶。殷氏贈淑人。顧贈恭人。何封淑人。子男二。唐義官龍廡補國子生。女二。王洛強朴吳玉。其壻也。孫男二。欽。釗。女四。曾孫女一。銘曰

邱文莊公集

公爲循吏。仁中有義。公爲憲臣。義中有仁。公撫邦國。變荒爲熟。公佐邦形。於死求生。最其功業。所在烈烈。曰巨而艱。摧折大姦。因銘及之。補史之遺。

中順大夫都察院左僉都御史邢公墓誌銘

都察院左僉都御史致仕邢公。以成化十七年五月甲午。卒于家。有司以聞。皇上命禮部備牲儀。翰林撰文。遣官諭祭之。其子頊。以予與公交莫逆。求予文志其墓。先是公無恙時。以書畀鄉人林徽抵予。豫以銘文爲託。得書未幾。而公遽捐館舍。公長予五歲。予幸後死。安敢負公托耶。乃拉淚。序而銘之。序曰。公諱宥。字克寬。其先由汴徙瓊之文昌。其七世祖章煥仕元爲縣尹。曾祖某。祖世賢。父文廣。封文林郎監察御史。母許氏。高安知縣虔祚之女。贈孺人。公以永樂丙申生。自幼聰敏。稍長補邑庠弟子員。甚有時名。臨汀曾先生。蘭分教邑中。於諸生中。獨加器重。同里溪西林氏。爲邑中宦族。異其不凡。以其妻焉。歲辛酉。領鄉薦。戊辰登二甲進士第。觀政刑部。已已

邱文莊公集

擢四川道監察御史。明年改元景泰。太監王振敗。籍其家。有告其家人孫太安、匿其財者。公與錦衣官于信者。鞠之無實。于必欲沒入之。且曰不然禍立至。公曰、無其情。而文致於法。是我殺之也。竟辯白被誣者二十人。又明年。邊事方興。儲餉不給。是年適當百司朝覲。建議者請免來朝官被劾之罪。俾運通州見儲糧四十萬石實宣府。命公督運。公措置有方。不盈月。邊事悉足。是冬、出巡福建。先是巡按御史許仕達。與鎮守尙書薛希璉交惡。延聞。因命公代仕達。且覈其事。公至一斷以心。無所回互。時沙寇甫平。或言平衛多其親黨。欲以鎮東衛互易之。章下會議。薛尙書力主之。公獨曰。山海異習。輕動或生他患。卒得不動。巡海官獲犯禁入海者十數人。請于朝。以梟首示衆。而冤號之聲震地。公獨疑其非眞盜。請緩之。未幾。果得眞爲盜者。亂後。增築永安等四城。民力有不堪者。公奏畱八郡之匠。赴役工部者協助之。城得以亟成。甲戌出按遼東。時御史寇深巡撫其地。副將焦禮有克敵功。寇上其功狀。乃先於主將曹義。事下覆之。寇爲曹私屬。公不從。

邱 文 莊 公 集

遂民成隙。戊寅。巡按河南。奉革舊驛。由黃河。出潁上。以達南京者。數十所。友便之。得代還京時。寇入總內臺。憾公在遼東時事。多方攬撫之。無所得。及公滿秩。需選銓曹。適知縣甄鐸有故。勒之命獄。有言忠國公石亨納其賂縱之者。命下勒之。衆畏勢無敢往者。寇以公奏。召委覈其實。蓋欲假是以中傷公也。公審覈允當。訖莫能害之。庚辰。陞知台州府。台俗。健訟。公治之。一惟緣情據理。民自信服。居台四年。兩以巡按時事就逮。台民爭持金帛出數百里外贖之。公無所受。又有耆民數十人赴京告留。然公竟坐是降職。爲晉江縣知縣。任未三月。會赦復職。改知蘇州。蘇之田賦甲天下。丁役雜辦。視他郡蓋倍蓰焉。而俗尙澆浮。公治之。一本情理。不出奇。不立苛。惟省糶均賦。節浮費。以便民爲主。不期月。政化孚洽。歌頌之聲。播聞遠近。公性不樂華麗。且厭浙西俗尙過侈。凡百有爲。務從簡素。神祠。惟消潔其在祀典者。廨宇。惟脩葺其切於用者。成化丙戌。江南大水。而蘇尤甚。公發官儲。及勸富民。得米八十餘萬石賑之。然猶不繼。饑民百十。持券

邱 文 莊 公 集

入富室借之。不與即強奪。公卽帖示。俾饑民指其閉糴者名赴官。官爲之借。明年爭持狀赴府。官爲署券、付鄉老。俾同保借。又得米八萬石。又不繼。乃會計軍餉一年之外。餘二十萬石。發以賑之。同官有以事未上聞難者。公曰。民命在頃臠。奏允而後給。則無及矣。專擅之罪。吾自當之。是歲稔。活饑民殆四十萬口。事聞。加陞浙江左叅政。仍掌郡事。降敕褒獎。是年秋再陞左僉都御史。巡撫江南。總理兵民財賦。并理嘉湖杭三府糧儲。提督屯種。公受命後。汲汲於培植拯救。採察咨詢。於官吏。則獎廉能。黜貪懦。於民。則杜奸宄。抑豪右。浚孟瀆丹徒二河。增築奔牛一牖。以便運道。又奏減歲課之重者。凡十餘事。戊子。奉敕飭理兩浙鹽法。己丑。又敕考察文武官員。凡軍民利病。悉聽便宜處置。庚寅秋議事來京。上章乞致仕。不允。章再上。始得請。時年五十有五也。家居者十有二年。至是卒年六十有六。公配林氏。封孺人。生子三。長瑱。林出。次璋。次理。少房劉氏出。女三。馮洛雲霸。陳繼宗。其壻也。孫一曰。瑱。將以卒之明年某月某日。葬公於

邑中銅斗山之陽。公稟性廉介。於人少委曲。言論之際。是是非非。不少假借。性好讀書。於詩文雖少作。然所作有意趣。不爲無益之語。字畫亦道美有法。晚年家居時。尊翁踰八秩。公奉養備至。友愛諸弟。其田產多以讓之。足跡未嘗至城市。凡一切外務。略不介意。暇日杖藜徐行田圃。自樂而已。構草亭於所居之前。顏之曰湄丘。因自號湄丘道人云。銘曰

極天南隅。環海一區。孰知其中。有此鉅夫。爲邦司直。凜其不誦。明憲之典。而不傷乎物。爲民師帥。不赫厥聲。盡牧之職。而必遂其生。出處以正。進退惟禮。君子之心。大臣之禮。鄉邦是賴。焯有其光。幸我後死。爲銘其藏。

贈翰林院編脩費公孺人朱氏墓誌銘

京口費氏。世以德義相承。始發于今國子司業廷言。廷言之父曰直菴。▲儀觀偉甚。性勁直。是是非非。無所假借人。至有所不堪者。或勸其少委曲。公曰。吾性爾也。人之生也直。吾豈爲人而罔吾生也哉。因自號曰直菴。人

邱 文 莊 公 集

咸謂名稱其實云。公諱昇。字淑。高曾祖諱軍。祖諱周。父諱榮。母王氏。配朱氏。生子五人。長讓。次詳。次詮。次詩。其季閻。即廷言也。女一人。適士族祝升。公身延言貴。敕贈翰林編修。階文林郎。朱氏贈孀人。費氏世居潤浦中。家數百指。以貨居爲業。而繼于其長一人。凡出而有所感違。皆有所稽考。時季學家政。獨於公一無所問。或求其說。季父曰。小三。吾家御史也。尙須防閑耶。蓋公行年三。故云。公客江湖三十年。一錢尺帛。不爲私有。所至。與其賢人君子游。高臨清主劉子中。中父亮。富歛畢。鄰火起。將延及其家。于中時避。母急驅于中。公爲資其出。同商者十數人。昇其極于他所。得不爲煨燼而已。所與游者。則不復顧。又於河之兩岸。我有以女鬻溲家者。則之。知其前代有仕元爲御史者。田翁金贖之。猶涕泣。妻於遼河丞。丞以父母所鬻爲辭。公曰。彼適于我。不啻已也。今已知之。安忍以女鬻。辱于我。世之爲官者。又孰皆能保其後之不渝落耶。丞悟。以金付媼。其女卒歸于良家居之。鄰有鬻姓者。以符竿黏鳥

邱文莊公集

雀爲業。公屢勸之改業。不從。時游卒有掠小兒者。公因令僕呼其幼子出。潛誘之。匿他所。黏鳥者歸。不見其子。偕其妻號於道。誓不獲。與俱斃。公給曰。得非游卒掠之去乎。乃益昏仆地。久之稍蘇。翁曰。人與物。受命等爾。汝失汝子。心痛如此。安知禽鳥之失其子。其心不痛乎。汝能改業。吾爲汝物色之。頤使僕呼其子出。贈以緡錢。其人拜謝。卒改他業。公平生善行。如此類者非一。不能悉舉也。公性節儉。不好華靡。初墾外氏時。答以襲衣中有錦綺。公曰。我布衣也。可衣此乎。却之。公無他嗜好。惟好讀書。晚年病痿。兩年顫痺。不能舉物。猶以資治通鑑置案上。目之不倦。病劇。忽舉首呼其子闇小字。侍者問故。曰。某尙讀書耶。言訖而卒。時正統乙丑十二月二十九日也。距其生洪武乙亥。得年五十有一。孺人朱氏。同里朱景榮女。景榮以旁累。謫戍邊。以書歸索乾魚。召鄰生讀之。生讀乾如。乾坤之乾。時孺人十一歲。竊聽曰。得非要乾魚乎。母大奇之。以語其兄臧同知。同知爲擇壻以歸公。母以愛女。故厚其嫁資。孺人力辭曰。吾父在邊方。方受

苦。忍攜家所有以適人乎。何用以資贖送。僅受其半。歸費氏既踰月。卽親操井臼。躬澣濯。時家食口衆。娣姒番次直庖。孺人當直。其飲食必精潔俱足。家人與食者。輒知其爲孺人。不待問也。家廟祀及數世。凡十八主。其忌辰。孺人皆一一能記憶。至日。必先期率子女拂神位。滌器具以俟。不待翁之命也。翁既沒。經理家事。恒如其存日。既葬。卽責諸孤以事生業。遣闈爲郡庠生。俾從鄉先生畢孟輝受經。暮歸。卽問闈所業。稍怠。則諭之曰。汝忘汝父垂絕之言乎。繼之以泣。闈悔過。讀或踰夜半。恐其勞瘁成疾。則又泣以止之。孺人平生懿行。如此者非一。不能以悉舉也。孺人性至孝。事舅姑。能先意以承其志。舅既沒。事繼姑。益謹。姑老病。時時索飲食。孺人謹備。以俟其不時之需。父景榮晚歲宥。還自謫所。旬必一歸焉。曰定省久曠。姑以是補之。景榮死無子。其母就養娣家。孺人數數過事問安。每有一味之甘。必遣人致奉。將死之夕。母夢見孺人純素。泣拜牀下。連以手拍胸曰。我不孝。我不孝。遂不見。覺以語孺人之娣。語未竟。而訃音至矣。

時景泰乙亥二月十五日也。距其生洪武己卯。得年五十有七。公以卒之某年某月某日。葬于邑之華蓋山。孺人亦以卒之某年某月某日祔焉。銘曰

嗚呼昔人有言。造物之報人也。不報其人。而報其人之天。人能順天之道。則天必報之以其倫。然天之報人也。恒不必在其人之身。蓋身之所事者有限。心之所存者無垠。直哉此公。舉事以義。存心以仁。矧有內助。心同行均。以人而合天也。蓋有因矣。身之所享食者。雖有所不逮。而心之所存者。則延及於子孫。有崇其阡。風氣溫淳。留骨不朽。與天地長春。

處士周公墓表

吉萬安有善士。曰周公尙信甫。諱曰仕明。生元至正丁酉。得年僅三十有二。卒大明洪武戊辰。葬於其鄉之倉背園。至是蓋八十有五年矣。其孫廣東布政使鐸。始以其爲刑部郎中時所述行狀。來丐表墓之文。布政君生而孤。不及事其祖。而能詳其祖之行事者。有所受於祖母陳孺人也。陳之言曰。

吾年若干，歸汝家。事汝祖，僅若千年。方其無恙時，日熟其行，耳熟其言。意謂其所爲者，夫人能之，無異焉。自汝祖死，今數十年矣。歷世久，而閱人多。然後知其爲人。世亦不多有也。初汝祖每晨出，輒戒吾曰：善事吾父母，有所欲，必先承之，勿待其有所需也。吾意其姑以是相戒耳。所行未必爾也。及察其平日，所以奉其親者，先意承志，惟恐少有拂逆之。自始至終，無一不然者。居嘗無事，恒謂吾曰：人貴有子以承宗祀，娶婦所以助之。物不必豐厚，以孝爲主。吾嘗相其祭，見其進趨拜起，持捧薦獻，勤勤懇懇，儼如其親之存而食飲詔告之。然與人謀事，不輕然諾。既許之，必盡其心。或有中沮者，則曰：我業已許之，言不可食。人有患難，不啻若在已然。勢有不可爲，力有不能及者，輒爲之不寧者移日。嘗有盜其耕牛者，或勸執之。官曰：此蓋爲貧所迫耳。一旦繫獄，無所將送，必瘦死。烏可以一牛之故，而實一人於死乎？卒縱遣之。其存心仁厚，此類者尙多。餘不能盡憶也。此皆汝祖平生之行。汝其志之。又曰：汝祖爲人，有器量，處鄉曲，平心下

邱 文 莊 公 集

氣。與人未嘗有怨惡。適里人有相搆訟者。辭偶連汝祖。逮繫京獄。論輸工作。忽得疾。臥金陵邸舍中。謂從者曰。我病必不起。汝幸負我骨歸。語我妻。我死。命也。勿作無益悲。幸養我母。鞠我孤。我卽死。不恨矣。又指牀頭書籍。謂之曰。是蓋我平生精力所鑽研者也。世如我用。執此以往。今不幸齋志以歿。汝其持是歸。以屬吾妻。謹付臧之。以遺吾子孫。萬一有能成吾志者乎。此汝祖臨終之言。汝其念之。吾恒以此語汝父。汝父不幸蚤逝。不能成汝祖志。使其德善不白於天下。汝幸以經術起家。官朝著。所以成先志而章明表揚之者。其責在汝。汝勉哉。其毋忽。布政君數數受斯言。謹服諸心。而不敢忘。爰於政務之暇。次第所聞。以爲行狀。距今又二十有三年矣。始以屬予俾表其墓。豈所謂有待者耶。昔歐陽公作其父崇公瀧岡阡表。議者謂非特可以見其父之德。而亦可以見其母之志。至今天下之人傳誦之不少衰。蓋以其言有徵而足信也。嗚呼。事必有徵而後可信。信而後可傳於天下後世。予不容別有所撰。謹掇其狀中語於右。而綴其世次於末云。周

氏邑故家。世居邑城北倉前。曾大父南甫。大父景德。父同憲。母任氏。生子三人。公其季也。配卽陳孺人。子一人存敏。以子貴贈德安府知府。女二人。適蕭孟魁。劉仲昇。孫男二人。長藻。次鐸。今有曾孫八人。女五人。

樂遊處士陸公墓表

人與物竝生天地間。而物爲人所用。人心之存與否。事之宜與否。恒必因物之取予見之。一取一予之間。義利判焉。古之君子。其觀人也。不必皆於其大與顯。雖其人微。其事小。而其事之行苟合宜焉。而無所私於已。即以義與之。知其心之有恒。而占其後之必將久且大。雖然。豈獨人予之哉。而天於於冥冥之際。亦予之矣。予觀海鹽樂遊處士陸君。於其外氏之所有。有之。而不終有焉。殆有合於義哉。即是而觀。則其生平存於心。行於事者。皆可於是見之矣。初處士同邑。有潘必甫者。家故饒於財。嘗遠戍邊。顧家產厚。且衆攜之則不勝攜。置之則無與守者。時一女已笄。乃以女處士。而館於其家。悉付之以家之所有。操縱周舍。惟其宜。必甫有二子。借其長者以

邱 文 莊 公 集

行。而畱其次之幼者。處士撫而教之。底於成立。後十數年。必甫歸。處士籍其數以歸之。凡前所有及所有之生息。一一具焉。未嘗利其分毫。必甫強與之。一無所受。乃出居於別所。嗚呼。世之人。利人之所有。越數千里而攘之。歷數十年而謀之。一入其手。頃刻之間。變幻百出。矧身與其間。既爲己所有。而又肯歸之人乎。萬一有之。而能無所侵牟者蓋鮮也。予之而不受者尤鮮也。若處士者。謂之義士。非邪。雖然。豈特處士之能義哉。爲其配者。其相助之功。尤爲難矣。婦人稟陰柔之資。而性吝嗇。其於財利尤甚。若潘孺人。亦賢也已。夫義婦順。一門之中。吉德參會。是宜表而出之。以爲世勸。處士孫愈。予考春闈時所取進士也。由江都知縣。擢監察御史。間持其鄉人過郎中所作行狀。來求予表處士墓。按狀。處士。姓陸氏。諱成。字彥澤。別號樂遊。世家海鹽之東陸塘。祖萬四。考世榮。妣王氏。世隱于農。弗仕也。處士生而孝友。頗讀書。知道義。嘗挾所有。梁游沛間。所至。交其賢豪。潘。卽必甫女。居嘗布服。不事華飾。在外氏時。知舊有所乞貸。則

以已物與之。或言其吝。則曰、吾夫婦爲吾父守耳。豈敢用彼物哉。其存心與處士若一人焉。處士生洪武丁卯。卒正統甲子。得年五十有八。孺人生洪武辛未。卒成化己亥。得年八十有九。子男一桂。女一、適張承宗。孫男三人。長懋、次即愈、次志、女二人。曾孫男四人。女五人。處士旣以卒之年。葬在本里之原。今孺人卒。愈將啓處士之藏以合葬焉。嗚呼。理出於天。而具於人。人之行之得其宜者謂之義。是義也。非獨宜於人。且宜於天。宜於天。故天祐之。宜於人。故人稱之。陸處士所存所行如是。是以秀之人。無貴賤老少。至今稱之。不以其久遠而衰少。而天又爲之生賢孫。以大其門閭。而顯榮之。於其身沒、三十七年之後。予故書以表之。以示夫世之行義者。

桂林處士梁公墓誌銘

予承燈暇之賜。休於私。適鄉貢進士順德梁和、持其二世祖行狀求銘、言於予曰。和先祖。墓葬于番禺抱奇林屋坑甲向之原。迄今幾三百稔、凡九傳矣。雖有田以供墓祀。然瑩石碑文。日就圯泐。天順丁丑歲。和奉例南還。省

邱文莊公集

于墓下。盡然念曰。吾宗。子姓不下二千餘。指田業無慮二百餘頃。書香綿綿。引而勿替。皆先澤也。茲墓石傾頽。禍刻漫滅。雖曰古不修墓。寧忍愀然而立。俟其墮哉。矧歷年既久。前事多失。今弗圖。則愈遠而愈忘其本矣。肆謀諸族。捐祀田租。積石鳩工而新焉。惟誌銘未補。敢于治朝史筆。以闡華代幽光也。嗟夫。祖孫世遠。鮮念厥先。今和能敦本追遠。永言孝思。良可嘉也。按狀。公諱仲欽。字志鳳。先世閩之晉江。宋贈大師越國公諱格者之裔。由閩徙廣。萬祖丹崖公。拜大理寺評事。致政避金人難。由保昌球瓊巷。遷居南海之奇石。父諱延泰。別號文嶺。爲雄州方正。再遷順德之桂林。母顏氏。於宋紹興辛亥十一月二十七日生公。夙負英敏。孝友克敦。年十三而母歿。二十五而父亡。孀孀一身。非道不狎。非義不取。博究群書。尤遂性命之學。以真知實踐爲事。隱處桂林。不求仕進。或薦舉之者。則善言辭之。終身以儒道自娛。老於林泉已耳。享年八十有三。於嘉定癸酉三月十六日而終。眞西山誌其墓。稱爲純儒云。配嚴氏。生子一人。卽世稱端

懿先生。名百揆者。登宋嘉泰甲子鄉試第一。嘉定丁丑進士。歷奉議大夫。退隱禺山。闢異端。彰聖學。有功名教。著於當時。贈公一如其官。德業聞望之隆。皆本庭訓之善也。嚴氏贈宜人。別葬于青螺第九峰。孫男四人。靖、厚、智、彪。今分爲孟仲叔季四房。子孫蕃衍。遍南番順邑間。科第繼起。文章偉業。有光史冊。嗚呼。沒世而名不稱。君子所疾。公之沒後。因賢嗣以贈其爵。有先正以表其墓。茲復新斯墳塋。用垂悠久。則公之名。誠稱於沒世遠矣。敬爲之序而銘歸之。銘曰

人之學。夢夢而弗思。孰如公兮。極深研幾。人之行。孌孌媚於時。孰如公兮。令色令儀。道萃於身兮。性命真知。德晦於時兮。後嗣恩推。有封若堂兮。有崇者碑。歲月幾何兮。以夷以隳。斯今復銘兮。聞而竇之。噫嘻厥裔兮。永念在茲。

丘文莊公集卷之九

進階榮祿大夫

兵部尚書

致仕王公神道碑銘

天地間有大義。因循之久。則沈鬱而不明。必得夫身任天下之重者。遇事激發之。然後大明於斯世焉。國家承平日久。道協乎中。治循乎軌。大義非不明也。然而因循之久。恬愉之極。馴至於已已之變。公義鬱而至於晦也。甚矣江夏王公。於是時奮不顧身。以先天下。世之君子。深於公有感焉。是歲八月。英廟北征。有蒙塵之變。景皇帝以親王介弟監國。御午門。左門六部并利道官。文章劾王振誤國之罪。帝曰。卿等言是。朝廷自有處置。言甫畢。百官皆趨進跪。慟哭不起。颺言曰。聖駕留外庭。皆振專權擅政所致。若不速斷。何以安慰人心。錦衣衛指揮馬順。喝逐百官。公奮臂捽順髮。嚙其面曰。順平昔倚振爲惡。禍延生靈。今日至此。尙不知警。真姦黨也。律有姦黨之條。罪在不赦。百官聞公言爭以手足捶死順。衆猶哭未退。帝起入

邱 文 莊 公 集

卷之九 神道碑

二

宮。令太監金英問所欲言。咸曰：內宮王毛二人者。皆振黨。請寘諸法。遂從門隙出二人。衆又捶死之。百官乃再拜而退。是月庚午也。公義激於衷。捐其身以爲天下明大義。由是天下士大夫。莫不曉然知公義所在。而皆振作其氣。以興起事功。然而矯枉者。或過於直以爲訐而迄于今。然則公之斯舉。其世道升降之會歟。公諱竑。字公度。其先江夏人。曾大父諱景。仕元爲水軍翼萬戶。大父諱俊卿。洪武中以軍功起爲福州衛百戶。坐事謫戍河西。遂爲河州人。父諱佐。俱以公貴。贈都察院左副都御史。祖母趙氏。母周氏。俱贈淑人。公幼篤學。有大度。年二十一。補衛庠生。二十五。以禮經魁陝右鄉薦。明年禮部會試第五人。賜進士出身。觀政戶部。連遭家喪。凡八年。始授戶科給事中。居官又三年。適國家有北狩之變。是時明興七十餘年。承平日久。一旦事起倉卒。上下惘然罔知所措。忽聞公有廷擊權姦之舉。莫不驚駭。旣而事定人安。公之名遂由是以起。是歲十月。北敵擁駕南還。直犯都城。景皇帝命都督孫鏗禦之于高粱橋。分遣都督毛福壽、高禮、

邱 文 莊 公 集

王敬、王勇、武興五軍策應之。以公有時望。命偕太監興安等。督守九門。或言福壽番將也。非公不能鎮壓之。乃陞公僉都御史。提督各營軍務。是時王敬等軍出彰義門。爲敵所敗。武興卒於陣。內官有報效者。或死或傷。四散奔還。京都大震。公督餘軍將往援之。遇敵於菜市。日與之戰。敵敗去。放火燒廬舍。公帥軍士撲滅之。擐甲胄入朝而陳其故。因奏高禮被創回營。毛福壽不知所在。乃命錦衣衛指揮呂貴制二營。不許遠出。既而有旨命福壽聽公節制。敵尋遁去。朝命孫鏗范廣統兵五萬追之。命公與侍郎江淵提督其軍。追至涿州。與敵戰于祁溝。敵敗去。既出境。衆議恐敵復來。推公守備居庸等關。景泰改元。秋車駕南還。公以疾乞還。是冬用薦總督漕運。力疾以行。明年兼理巡撫江北諸郡。時徐淮大祲。民死者相枕籍。公盡所以救荒之術。凡可以救一時之急者。莫不畢舉。既而山東河南。流民猝至。公不待奏報。大發廣運倉所積京儲賑之。近者人日餉以粥。全活男婦九萬七千七百餘人。遠者量散以米。全活男婦一百二十九萬四千餘人。流徙者給以

邱 文 莊 公 集

米。以爲道食。四千六百餘人。被鬻者贖其人以還其家。二千二百四十四人。共用米一百六十餘萬石。六月濱河有麥舟來。公以官價易麥四千餘石。分給軍民一萬二千三百戶。擇醫四十人。空廩六十楹。處流民之病者。凡活一千四百人。死者給以棺。爲叢塚。凡葬二千三百有奇。公窮日夜竭精殫慮。事事躬理。有所委任。必委曲戒諭。出於至誠。人人爲盡力。或述公行事。爲救災錄。世傳焉。歲甲戌入覲。特陞左副都御史。丁丑英廟復辟。權姦用事。左遷公爲浙江叅政。尋除名爲民。還江夏。居半年。英廟於宮中閱景泰時臣僚章疏。見公所上疏。有正倫理。篤恩義等語。顧左右曰。竑爲朕也。乃命中官傳旨。遣戶部官送公歸河州。辛巳敵寇莊浪起。公以舊官叅贊軍務。公感激思奮。聞敵犯靖邊之郭城。公率十騎先馳。會兵擊敗之。明年班師。仍命提督蘭縣以東一帶邊備。尋召還。入見英廟。慰勞至再。言者謂漕運自公後。政多廢弛。今西陲無事。請命公往起其廢。從之。公奉命至徐揚。老稚迎舟羅拜。歡聲載道。會旱。公齋禱於神。卽日江水泛漲。公私舟

邱文莊公集

楫通利。人以爲忠誠所感。甲申，以科道會薦。陞兵部尙書。命下，朝野躡傳。天下想望其風采。公亦矢心思報。疏條時政。令天下邊將各陳戰守方略。簡京兵。復武學。一切庶務。以次脩舉。時兩廣峒獠火肆劫掠。北敵在黃河套。時出侵寧夏延綏。境民不聊生。而四川德陽人趙鐸又作亂。邊報日至。公居中調度。允合機宜。而兩廣功尤偉。蓋往時廣西猺獞。惟犯廣東城邑。斯時則越江西湖南界矣。公因御史王朝遠建言。遣都督趙輔往征之。起都御史韓雍於浙藩爲叅贊。凡軍中一切事。公皆預爲規畫。諸將奉之而行。果能成功而還。先是京軍統以五軍三千神機三大營。有部分而無兵數。天下莫能測。景泰中，用言者分爲十二團營。營軍萬。公疏請復三營之舊。使人知軍數多寡。因以革將多私役之弊。不報。會理軍職貼黃缺官。公薦脩撰岳正。都給事中張寧。內批出二人于外。公遂以疾辭。章凡五上。始允歸養病。時年僅五十有二。公抵家又二年。上章請得休致。公歸河州。絕口不及時事。惟日課童僕耕藝田圃。以爲終年之計。躬營兆宅。自誌其墓。且

邱文莊公集

戒其子。死後毋循衆例乞祭葬。以弘治元年十二月初三日卒于家。訃聞。有司循故事爲請葬祭。皆予之。公配孫氏。封淑人。有賢行。丈夫子八人。曰經。曰純。曰約。曰徽。曰續。曰纓。曰絳。曰繹。經爲山東按察司僉事。純錄用爲太學生。續纓絳俱入太學。公性剛毅。少豪雋。尙氣槩。義所當爲。奮往直前。生長西陲。有志功名。旣舉進士。居言路。見事有不平者。輒爲之扼腕不平。自廷擊馬順後。所至令行禁止。人望而畏之曰。此捶死馬順者。公名自是滿天下。然亦以此得謗。蓋順死于衆手。公特爲之倡耳。二長隨之死。則以平日巡視街道。爲衆所惡。乘間號呼出之。非公意也。後有譖公者。率以此爲激怒之具。故公不盡其用云。公登第時。年二十有六。又八年始授職。甫二年超拜都憲。用僅七年卽退。退四年復起。又四年致其事以去。家居者二十有三年。計公平生。爲朝廷所用者。首尾僅十有四年。公之用雖不久。而公之功在國家。澤在生民。名在天下。士大夫世有柄用四五十年者。稽其成功。或未能過之者也。若公者。豈非一世人豪哉。公之子經。嘗從

邱文莊公集

予學。故公之行事。知之爲詳。嘗記公歸江夏時。經詣予辭。予寄聲請公閱漢書張敞傳。意公有復起之日也。及公來本兵柄。有事於兩廣。不以予迂僻。凡有規畫。亦使預知。時兩廣守臣。以賊爲諱。養成禍亂。而同事者。傾奪其位。蓋各有失也。公專主其一。遂致中忤。所請多不遂。又因岳張之出。遂決于行。然二人之出。意初不在公。觀公伏病上章請老。上屢遣醫治療。及章五上。始得請可見矣。公行時。予適考士南畿。歸復命。會公辭朝。以故不及一言而別。嗚呼。豈意遂永訣哉。予因經請。旣爲序其事。復繫之以銘。銘曰。

天下生人。異氣與理。理具一心。氣充百體。心有所令。體則從之。把握連用。弗假兵威。烈烈王公。百世之士。理以養心。氣以行義。目擊姦兇。心爲不平。敢於公庭。黨庇其朋。怒氣勃然。挺刃烏有。旣摔以手。復嚙以口。臂指唇齒。受命于心。如發硃刀。如出冶金。雄名大義。蓋于天下。段笏罔功。朱劍徒借。天爲國家。生此偉人。人心以愜。士氣以伸。人人得

誅。亂臣賊子。義切于衷。曷論彼此。彼何人哉。黨邪害正。弗竟公用。匪公不幸。偉哉是舉。足蓋平生。矧有功績。赫赫可稱。賑畿甸饑。殄門庭寇。坐計籌策。躬擐甲冑。公用不久。公功則多。人衆雖勝。如天定何。有穹其碑。龜趺螭首。我作銘詩。昭示不朽。

都察院左僉都御史恭惠楊公神道碑銘

正統己巳。車駕北狩。外寇乘機犯我畿甸。時廣東左叅議楊公。坐事居京邸。朝廷用言者起公守白羊口。是歲廣東都司囚越獄。有司不能捕。遂至嘯聚。守土者閉門自守。召邊將禦之。至則爲所敗。報至京師。廣人士寓京者。聯名上章乞公。朝命授公都察院左僉都御史。乘傳往。至則廣城被困者數月矣。城中軍民。喁喁然朝不謀夕。見公至。始有更生之望。先是民之居鄉落者。避亂趨城。至則閉門不納。及歸。盡爲賊所戕。脇從者日益衆。公下令有司。用木爲牌。任民從其出入。又榜示於外。遣官招撫之。於是歸附者。日以千萬計。賊勢日孤。公偵知其有嚮順意。遣使往諭之。賊首黃肖養

邱 文 莊 公 集

曰。吾輩得楊大人一言。死不恨矣。尅期來見。賊果至。公毅然欲往。藩臬以下皆沮其行。曰。賊意叵測奈何。公曰。吾以誠待之。毋慮也。公出見。賊羅拜泣下。公諭以禍福。且示以更生之路。賊衆以大魚獻。公受之不疑。遂謹謙而去。期以再會。未幾。董都督統大軍至。賊遂中變。歲庚午三月五日。有大星墜于城外對岸之河南。十二日。質明都指揮姚麟者。來白事。公出與之語。姚既出。公忽病作。扶入臥榻。即呼其子玠曰。我死矣。不能終始王事。知我者其天乎。語訖。瞑目而逝。城中居民聞公。遂信疑相半。既得實。爭走哭館下。雖老嫗稚子。亦至失聲。滿城縞素。具牌位奠哭者相屬。陷在賊中者聞之。亦曰楊公死。吾屬終無生理矣。訃聞。天子悼惜。遣官諭祭如禮。公卒後。僅閱月。大軍即平賊。凡賊所經之處。盡屠之。民受刑者。輒仰天號曰。使楊大人在。吾人豈受此禍哉。既而。耆老黎善聚等。赴京乞立公祠。從之。事下爲忌者所沮。忌者既去。有司始立公祠于廣州府城隍廟之旁。水旱疾疫必禱焉。民有事訟於官。不得其平者。輒具詞焚于祠下。廣

邱文莊公集

人至今過其門者。輒舉手加敬。嗚呼。古所謂生爲豪傑。死爲神明者。公非其人耶。公諱誠。字信民。紹興之新昌人也。少遊鄉泮。領永樂庚子浙江鄉薦。宣德庚戌。由上舍選工科給事中。丁內艱。起復。改刑科。正統癸亥。吏部尙書王文瑞公。薦佐廣藩。陛辭受旨。許以言事。公既抵任。時按察使郭智。奉敕整飭兵務。事多自專。公首疏其不法事。郭遂去任。而黃翰來代之。黃所爲益甚。公復上疏發其姦。詞連僉事韋廣。廣亦誣詆公。俱逮下獄。公就逮。啓行時。廣人爭攜金帛就船相贖。公一無所受。而黃船則爭以瓦石擲之。既至。法司鞫得實。黃坐除名。凡奏公他事皆涉虛。惟鹿鳴宴簪銀花一事。行勸尋白。廣之軍民。狀公德政。相率赴三司保留乞。備其事上聞。亦有跋涉萬里直詣闕庭者。前後以數千計。及公在白羊既受命。邊城官軍不忍其去。亦赴官保留之。公之所至。得人心如此。公宅心仁厚。見人有患難。不啻在己。汲汲然爲之惟恐後。疾惡太甚。見人有不平事。輒扼腕爭辯。用是見疾於人。方在學校時。見儕類有過舉者。輒切切不置。及有

邱文莊公集

當爲事。衆方推避。公即奮先爲之。人多以矯激目之。久之。見其事事皆然。亦皆帖服。葬母時。倩夫舁塚石。每夫公代其舁數百步。人遍乃止。或曰。何自苦如此。公曰。葬吾母。而專役他人。於心安乎。居家時。聞鄉隣兄弟有不睦。或搆訟者。輒至其家勸之。不從。明日復至。人雖拒絕之。不厭也。必從而後已。邑有朝妃渡。每歲爲暴漲所阻。公率衆督工堰石爲步。至今行者過之。必曰。楊給事中方也。官禁近時。嘗一奉敕整點江西軍伍。所至。求民瘼。除宿弊。事竣。回條上所詢民情五事。皆當時急務。及佐廣藩。善政在人者尤多。方是時承平日久。禁綱疎闊。嶺海之間。民物殷富。仕者類以贖貨殃民爲常事。上下交征。恬不爲恥。公至。一以廉潔爲心。而凡事行之以寬。公退之暇。即出公署門。徐步街衢間。詢問父老。以民間利病反覆歎曲。必得其情而後已。嘗有民以公事至。長藩者欲訟諸獄。公曰。彼無罪。姑遣之去。至期自來可也。長曰。彼無保認者。公曰。僕保之。民感公恩。信縱之去。至期皆自來。公爲政。所以感人心者。大抵此類也。嗚呼。今世之爲政。

邱 文 莊 公 集

者。豈復有如公者哉。公卒後二十年。是爲成化己丑。朝議凡大臣有功德在人者。皆加謚。贈賜公謚曰恭憲。又七年。公之鄉人王溢者。仕爲昌邑教諭。始介其鄉人禮部侍郎俞公欽。僉都御史丁公川。屬予紀其行事。將纔于石。溢少嘗受業於公。念公平生志節。不下古人。特以居官清白。身後無贏餘。至今墓石未立。恐遂泯於世也。以予出嶺南。知公事爲詳。特以見屬。謹按狀新昌楊。出漢太尉之後。世居其邑之彩煙山。曾祖某祖某。皆不仕。父文吉。以公貴。贈給事中。母丁氏。封孺人。公生洪武庚午某月某日。享年六十有一。歸葬於本縣上王山之原。配石氏。封孺人。子男四。玖瑄玖瓊。玖以公廕。錄爲國子生。任桃源縣丞。女一。適張柔。予也於公嘗有一面之雅。而於鄉邦之受惠也。亦未嘗不與焉。矧以紀事爲職業。無溢之請。恒欲書公之績以傳於世。况重以溢之請乎。既紀其實。復系以銘。

楊公烈烈。特立揭揭。惡彼沓沓。不茹不吐。何懾何懼。靡追靡拒。介而能通。拘而有容。隨而不遲。生爲正人。任爲直臣。死爲明神。愛而畏之。思

郎 文 莊 公 集

而企之。廟而祀之。德則有矣。名則久矣。死則不朽矣。

浙江按察司副使陶公神道碑銘

天下承平日久。變起倉卒。智者不及謀。勇者不及禦。有能奮身其間。以爲民蔽。繼之以死。卒能作吏民之氣。以取遏絕之效。其功顧豈小哉。當宣德正統之盛。大江以南。民不識兵也久矣。歲戊辰。劍寇起于閩。旣而括寇相挺以起。猝然竊發。如風盛火猛。延燎于枯草燥荻之場。無有障蔽限隔之者。當是時。郡縣密邇于寇者。其民蓋岌岌然矣。一時官吏。罔知所措。往往驚畏走避。雖以朝命將領。亦皆觀望以爲進退。無有立一定之計。決必然之策者。而浙江按察副使陶公者。獨能以身嬰賊鋒而死之。嗚呼。豈非毅然大丈夫哉。公始以易經中廣西鄉試第四人。以親老愿仕遠方。得交趾某縣典史。改鳳山縣。時黃忠宣公。兼掌藩臬司事。知公有學行。俾掌諒江府教授事。秩滿陞按察司檢校。丁內艱。起復。改山東憲司。未幾按察使虞公信。以有守有爲。堪任風憲薦。公起至京師。試如所舉。擢大理寺右寺評事。

邱 文 莊 公 集

尋用戶部尙書劉中敷薦。超拜浙江按察司僉事。會倭寇犯邊。公以計殲之。朝廷有綺段寶鈔之賜。至是寇起處州。將薄金華。衆議曰。蘭溪乃賊所從出之路。蘭溪不守。則兩浙震動矣。陶僉憲有謀略。非得之以遏其衝。賊不易弭也。公至蘭溪。首率民壯因故城址。立木柵。晝夜警備。又於縣南五十里。立山足蘇村太巖諸寨。以扼其要害。屢用計略擒賊黨數百人。聲震遠邇。賊不敢犯境。百姓爲之歌曰。僉憲陶公。賊聞震驚。始爲民患。今則逃生。由是諸邑晏然。而鄰境亦恃以無恐。時總兵官都督徐恭。尙書石璞等。屯師日久。賊深入險阻。乘間時出。官軍詎知。又復遠遁。撫捕之計。皆莫知所施。會議遣藩臬臣僚一人抵賊巢招諭之。莫敢行者。公毅然請任其事。至則感之以誠。諭之以理。賊首葉宗留、陳諫胡等。環聽竦動。咸翻然悔悟。率其黨出降。朝廷嘉公績。陞本司按察副使。仍守金華。賊黨陶得二者。尤號桀黠。嘗僞以名降。總戎諸公。授以冠帶。俾招其黨。得二殺使者不受。招。官軍莫能制。公以計用賊之來降者殺得二。黨前後共數百人。生擒百餘。

邱 文 莊 公 集

人。而來降者又三千人。得二僮餘四十人。深遁山谷中。其勢日孤。指日可就擒矣。同事者有忌公成功。而沮抑之者。公計不得行。賊勢復起。公與都指揮崔源往武義。謀所以備禦之者。至甫數日。賊至矣。武義無城。惟水爲柵。時兵民無幾。而賊勢張甚。或勸公稍却以避其鋒者。公嚙齒厲聲以諭衆。誓不與此賊俱生。既而賊近城。公麾兵極力與戰。自卯至申。俄而城中火起。蓋賊有潛入城爲內應者。衆回望見火起。遂大潰。公竟死之。時景泰元年五月十七日也。公時年六十有一。兩浙人聞之。如喪其親戚。諸郡縣皆遣人致奠。蘭溪民相率言于憲司。塑公像。立屋祠之。又各出已田以爲經久計。事聞。朝廷遣官諭祭。誥贈公浙江布政司右叅政。官其子魯新會縣丞。公諱成。字孔思。西廣鬱林州人也。曾祖諱某。祖諱某。父諱某。母鍾氏。公五歲而孤。與兄弟源相友愛。娶某氏。繼某氏。生子三人。長卽魯。次然。魯以公卒之某年月日歸葬鬱林之某原。厥後都御史崑山葉公盛。巡撫兩廣。復以鄉人意。立屋祠公於鬱城。如蘭溪云。魯累官廣東按察司僉

邱 文 莊 公 集

事。以公墓道之碑未立。徵文於予。予惟自南方有事以來。死事之臣。爲國家所旌褒者。僅四人。其三人。予皆有所紀述。獨於公缺焉。矧四人中。公與二人者。皆出吾嶺南。予叨官太史。表忠義以翼世教。其職也。重以僉憲公之請。何辭以辭。嗚呼。風霜別草木之性。禍患顯忠臣之節。自古死封疆之臣。多見於季世擾攘之秋。而此數公者。獨能於四方無事之時。一遇倉卒之變。以身試之。使狃安久參之士夫。知所感發興起事功。以救生民之禍。成安集之功。而公於衆人中。又獨爲之帥先。其功蓋莫大焉。是宜表著之以爲世勸。所謂三人者。永豐知縣鄧公頤。死于閩寇。慶遠同知葉公禎。廣東憲副毛公吉二人。皆死于廣寇。頤與禎。皆廣東人。吉則浙人也。其死義與公同。於法得牽聯。書銘曰

死國之臣。多在末季。公獨死義。於承平世。奮其一身。爲民屏蔽。我衆雖有。匪怯則脆。一聞風聲。晝擲夜悸。鼓不能起。不待金退。四無救援。百莫可恃。所恃區區。曰忠與義。公惟一身。以死自誓。食君不祿。豈無他

輩。所以全身。亦豈無計。公之此心。則不在是。受人之祿。則死其事。身雖漸盡。心則孔熾。以我之死。作彼之氣。彼弄兵者。獨非人類。亦或因之。革心易志。天爲民殲。於是乎至。往古來今。孰能百歲。爲臣死忠。於天無愧。帝誥以褒。民廟以祀。芳名流傳。百千萬禩。史臣作銘。昭告來裔。

哀辭

陳莊靖公哀辭

我太祖皇帝始簡儒臣入內閣司王言。遂預機密。故事。非負宿望、通經術、有文藝者、弗得與。列聖相承。率用翰林儒臣爲之。其選至嚴也。一時臺省臣僚。雖有奇才異能。亦皆安然遜避。不敢萌毫髮覬覦意。近世乃有以攀援來自他途者。於館閣故事。多有所更革。幸而襲齋先生。由官端復歸禁林。稍稍復其故。衆方欣幸之。而先生不幸以歲戊子四月丁巳薨於位。於

邱 文 莊 公 集

乎惜哉。衆皆爲辭哀之。予亦附其後。辭曰。峨峨禁林。距天咫尺地密勿。代王出言。居帝左右預機密。匪徒用文。實以道德任輔弼。古相之權。隱然寓中泯其迹。默契潛孚。啓沃一人化八極。百僚具瞻。禮接情通不赫赫。匪德匪望。匪有文學曷以入。惟公挺秀。生自廬陵忠節域。高科盛名。筮屬史館任方伯。英皇當寧。侍講經幃多啓迪。簡在帝心。復位之初首詢及。起身外藩。入長宮端率群職。進握樞機。寵以嘉名進清秩。領袖群仙。闡明經訓正史筆。衆方翹翹。期以壽考永終吉。天不憖遺。一疾弗瘳遽終畢。訃音四聞。九重震悼衆於邑。矧在官聯。清言光範日延挹。曷寓我哀。效古陳詞寫胸臆。

蘭湖先生哀辭

嗚呼。科舉興。而草澤無逸儒。儒之書。如五經四書。非不盛行於時。然而孜孜講究者。惟用於文詞以假途榮宦。不仕而能究心於聖賢之學者。蓋亦鮮矣。若蘭湖先生夏良輔者。豈非世之絕無而僅有者歟。先生

邱文莊公集

名相。餘姚人。宋文莊公竦裔孫。生而天資近道。年十六七。即慨然有志於孔孟之學。年益長。於道若有所得。謂學孔孟者。當自朱子始。朱子平生著述雖多。其大且要者。論孟集註。學庸章句。或問四書。而小學一書。又所以立大學之基本也。其言明白雅馴。初非難曉者。而初學之士。或不能以的然無疑也。於是本先儒之說。而附以已意。文以淺近之言。名曰四書小學便覽。或爲之梓行。予得而觀之。嘆曰。草澤之中。科舉之外。世乃有斯人耶。後獲與其從子刑科給事中時孟寅。同舉進士。選入翰林爲庶吉士。孟寅每爲予言先生之爲人。凡其居家庭。處鄉黨。所言所行。可稱述者非一。又知先生於聖賢書。不但訓其義。說其理而已。於是益歎世之如先生者。何其少也。未幾時。而先生捐館舍矣。於乎而今而後。豈復有斯人哉。乃爲辭以哀之。辭曰。受元陽兮明以清。承貞則兮順以寧。嚴古道兮在躬。不汲汲兮利名。世紛鶩兮詞藻。羌獨畱心兮聖經。溯其源兮洙泗。戒途兮紫陽之庭。慨斯世兮鮮儷。冠玉蓉兮佩紫衡。思其人兮何所。虞山峨峨兮舜江冷。

冷。氣雖云散兮。名弗可滅。後千祀兮。其人如生。

彭處士哀辭

吾友彭彥實。聞其伯父東軒先生之訃。命予爲之哀辭。予於先生無一日之雅。哀心何生哉。昔程伊川狀明道之行。謂識與不識者莫不哀傷。夫識者哀之。固也。不識者哀之何哉。噫其必有不面而神交。非情而義感。而出於聲音容貌之外者矣。故不辭而爲之辭。辭曰、維少微之垂光分于吉之野。有美一人兮。隱居其下。葆醇熙兮。服儒雅。環里之人兮。薰德以化。德不形兮。知我寡。山椒水湄兮。以遊以治。水可酌兮。田可稼。溯風流兮。心獨寫。宜壽考兮。介純嘏。羌胡爲兮。天下假。生教于鄉兮。沒祭於社。嗟若人之雖亡兮。中有存者。

祭文

祭西昌蕭先生文

邱 文 莊 公 集

於惟先生一世令則。出處關世道之升降。言論示學者以標的。其在太學也。示教以身。愛人以德。文不取奇。學必先識。其在內閣也。代言必醇。乘筆必直。言不苟同。事多裨益。民方荷其陰受之賜。士多賴其提拔之力。胡姦人之詆誣。乃無事而生隙。仁賢盡爲之掃除。氣勢亦隨之蕭索。或伏歐刀之慘。或受邊塞之謫。幸其善不至於盡忘。猶俾先生全歸於鄉宅。嗚呼。彼獨何心。肆行胸臆。貪天之功。空人之國。嗟所得之幾何。流惡聲于無極。天有時而終定。人至靈而難惑。天目一旦開明。曖昧于焉昭晰。乾元奮獨斷之剛。雷雨霽作解之澤。仆者以起。疑者以釋。雖先生之身。不幸溘然先逝。而先生之心。則既坦然明白。嗚呼。一自先生正容易簣。士氣日淪於卑卑。事勢日阡乎岌岌。講經者穿穴。出於大道之旁。摘辭者雕刻。壞其本然之質。道德分裂。鬼怪百出。是則先生之出處存亡。關乎世道之盈虛。升降之消息。念惟小子。生於遐僻。一經品題。遂爾超軼。念誨言之如昨。緬儀形而不忒。心常切於几筵。跡久拘於仕籍。期以歸省。道經貴邑。貝一瓣之心。

香。酒兩行之清泣。曩守制以南還。拘於禮而未克。茲免喪而北上。謹陳辭而寓感。望佳城而致奠。報殊知於萬一。伏惟尙饗。

祭韓都御史文

嗚呼。自及古今。人才之生。曰德曰才。爲賢爲能。位皆隨時而可致。望非積久而不成。所謂望者。必由歲月之積累。夫豈旦夕之經營。良以國家用之而屢著其效。遠近聞之而皆識其名。如久旱之雨。人望之知其爲澤。如積陰之星。人見之而知其必晴。其處也如在山之虎豹。其出也如逐雀之鷂鷹。用之固足以成天下之事。不用亦足以繫遠近之情。泛觀一世。斯人無幾。公其庶乎。今又已矣。公年弱冠。卽振風紀。僅及立年。遽總憲體。首按江西。令行禁止。如霜之嚴。如風之靡。再殿嶺南。民安盜弭。如防斯遏。如水斯止。禁革之政。在江人口耳。保障之惠。淪廣人肌髓。聞之者膽懾。見之者氣餒。轟轟然於一世之依阿。昭昭乎於衆人之譎詭。以此致譽。亦以此致毀。喜固以此。怒亦以此。嗚呼自古聖賢。亦或如此。人之小人。天之君子。

天乎天乎。蓋緩公死。才之生也固不易哉。望之成也尤爲難爾。已而已而。九原莫起。更幾何年。有此英偉。嗚呼哀哉。哀哀曷已。哀雖衆同。痛實切已。因令子歸。緘辭千里。英英之靈。庶其鑒只。尙製

祭周廷參編修文

嗟嗟廷參。謂君不壽耶。則已年踰四旬。方之顏子。固爲過矣。謂君爲不貴耶。則官居七品。方之王令。固爲多矣。所可恨者。七旬之父垂老。六尺之孤尙稚。學已優。而未得可行之位以濟時。道已明。而未成一家之言以傳世。善人命薄。從古則然。彼哉何脩。富貴長年。豈見德於人者。顧得罪於上天。天道茫昧。無從質焉。嗟嗟參廷。天也奈何。考其平生。樂少苦多。雕肝鏤腸。以爲文章。特施之於風雲花草。未見用於清廟明堂。矩行規步。以端操履。特稱之於親舊僚友。未見知於乘鈞當宸。嗚呼。士之不遇。乃士之常。今雖未達。後尙可望。惟未下壽而遽死。在善人則深爲可傷。然反於心苟無愧。則命雖短而若長。百歲亦死。何以較量。某生嶺南。君居浙西。均

擢鄉魁。均游虎闈。繼入翰林。又爲寮友。每聞君言。如飲醇酒。觀君之持守莊重。步履舒徐。恒私心之竊念。是皆壽考之符。豈意以游言之故。遂飲恨以長殂。嗚呼哀哉。嗟嗟廷參。何至於斯。天耶人耶。尙忍言之。河冰既解。旅櫬載歸。臨行致奠。聲吞涕垂。尙饗。

祭吏部侍郎楊公文

嗚呼先生。人中之鳳。文中之虎。其人則今。其道則古。一家之父子兄弟。濟美聯芳。一世之經學文名。蜚聲獨步。屢紬金匱之書。專掌玉堂之署。擢貳天官之卿。兼處官宮之副。於德可謂不孤。所志允爲無負。所惜者澤未洽於黔黎。恩將推於祖父。前朝之史垂成。當守之眷方注。胡一疾而不起。動四遠之哀慕。喪我良朋。居然寡助。幸而後死。行將歸去。率僚屬以酌一觴。表平生之衷懷。尙饗。

祭姚江戚編脩文湍墓文

嗚呼。文湍剛勁之資。豪放之氣。高誼激切。直上薄於雲天。巨眼空闊。每下

邱 文 莊 公 集

視夫塵世。凡衆人之嗜好。不足以動其心。舉一世之交遊。少足以當其異。於人之惡。雖若不容。於人之善。未嘗有忌。時發驚筵之辨。臧否罔不稱情。聞有罵座之狂。毀譽皆有所試。醉言無異於醒。面質不違於背。有憤世嫉邪之心。有勇往敢爲之志。嗚呼。文湍之爲人。殆古所謂陽必剛。剛則必明。而當夫陰必柔。柔則必晦者耶。僕也於君。若有夙契。特於衆人之中。假以一頭之地。始落落而難合。終僂僂以交勵。奈何用之不盡。期而未遂。命與心違。中道而逝。老我後死。餘二十禩。孰知冥漠之魂。猶有舊交之誼。老妻北來。舟次江滙。夢中彷彿。如見報以風濤將至。預告以期。使知迴避。既而果如所言。幸免顛躓。嗚呼。文湍。人傳君之爲神。洩膏濤而享祀。卽今所至而徵之。無乃兼司夫江湖之事。原其神之所以有靈。政由其心之無愧。氣之聚也。旣落落其不凡。氣之散也。尙昭昭乎不昧。其生也不盡用於明時。其死也乃見錄於上帝。嗚呼。文湍。友道之廢也久矣。曰友曰朋。如兄如弟。指金石以爲期。刑鷄犬而設誓。腰首稍殊。情態頓異。靈泥隔則易交。勢位

邱 文 莊 公 集

軋則相忌。對面如九疑之峰。跬步有千丈之勢。火炎炎於顯盛之時。冰清清於困窮之際。半臂纔解。遇諸途遽轉面而過。宿醒未醒。諭其闕。即膽口以刺。過門不入室。又爲操戈之舉。落穿不援手。忍施下石之計。親其身也違卹。況仇儻乎。生爲人也尙然。況下世乎。文湍始終無二心。生死同一致。不忝爲聰明正直之神。真可謂英邁傑特之士。緬想奮游。稠人廣會。一飲百十鍾。揮毫數千字。故即平生之素好。用答故人之陰惠。詩以寫不盡之情。酒以侑有從之淚。具別紙以焚化。就宿草而澆酌。伏惟英魂如在。來鑒於是。不鄙人世之凡言。特款御醒之醇味。嗚呼痛哉。尙饗

祭妻弟金鼎文

嗚呼鼎乎。其何以死乎。天賦汝以清粹之資。不宜死也。帝降汝以聰悟之性。不宜死也。心孔仁而不傷乎物。不宜死也。學方進而未底於成。不宜死也。不宜死而之死。豈非命乎。百年之宗神傳於汝。不可死也。千金之基業屬於汝。不可死也。父已老而望汝以養。不可死也。母已逝而冀汝以承。不

邱 文 莊 公 集

可死也。不可死而死之。豈非天乎。天乎命乎。無從致詰。天不可諶。命不可必。靜言思之。我心如刺。想汝平生之音容。念汝平生之恩義。愛我敬我。情過兄弟。盡心教汝。期以有成。誰知老天不從人欲。姊兮既亡。弟也隨歿。一雙愛刃。併割我腸。我猶云可。汝父可傷。有屋渠渠。誰其與居。有田畝畝。誰其菑畬。空一生之辛苦。竟今日之何如。嗚呼鼎乎。汝其忍棄我而去九泉之下。儻逢汝姊。應道我之傷心。情切切而不已。憶其臨終之言。類囑我以覩汝。今也汝亦繼亡。我欲報之無所。茲者試期已逼。我欲北行。不能臨壙。以盡我情。聊寫斯文。以表我哀。嗚呼鼎乎。尙鑒此哉。

邱 文 莊 公 集

卷
之
九
祭
文

二
八

邱文莊公集卷之十

古意二首

千金買寶刀。百金買角觶。寶刀頭有環。角觶能解絲。慙勤寄遠人。用以慰所思。所思不見察。幽獨甘自怡。

客從天上來。贈我雲錦章。五色光奪目。上有雙鸞翔。秘之不自用。篋笥謹什藏。幸然遇良工。爲我裁衣裳。結以紫霞綬。佩以鳴玉璫。服之朝九重。文采何赫煌。盛服今所尙。令德古所藏。珍重鵬鷖詩。三復不敢忘。

逝川無回流。落日不再午。人生百歲間。役役徒自苦。朝爲樹上花。暮作花下土。去住無常勢。庵忽成今古。反袂問蒼天。天平奈何許。

感興

人生會有老。老至不自知。壯心恒未已。外貌忽已移。青青巾中髮。俄然成素絲。灼灼鏡中顏。忽覺如枯梨。盛年不可恃。行樂湏及時。有酒且痛飲。不

醉將奚爲。

天際多剛風。滄溟隔弱水。相思不可極。之子在萬里。萬里各一天。恍惚在我前。區區偷見察。敢不輸中情。

過友人園居

愛此林泉勝。載酒時來過。芳樹發春華。方池激清波。嘉魚爭出躍。好鳥鳴相和。天氣旣已暄。景物亦已多。主人雅好客。相對酣且歌。歌竟各歎息。人生能幾何。

夜坐和曲江感遇詩韻

空齋坐幽獨。夜氣澹以清。冥心古聖賢。悠哉怡我情。天機一何深。神理亦已精。云胡契其妙。勉旃惟思誠。

鳳凰翔千仞。枳棘安足顧。一朝覽德輝。棲止梧桐樹。飛鳴恒自由。羅網豈能懼。三靈爲我儔。百鳥莫予惡。笑彼冥飛鴻。猶爲弋人慕。

邱文莊公集

南極有名相。風度邈難得。鷗臯羣刺天。孤鳳戢其翼。韶石佳山水。因之增
秀色。班班青史間。流譽靡終極。莊誦感遇時。臨風三歎息。
深源無淺流。高樹無卑枝。人生天地間。奮發須有爲。不見東注波。逝者恒
如斯。心中苟自盡。意外非所知。嗟爾亡羊者。紛紛多路歧。

擬古四首

江南秋風至。草木變焜黃。淅淅吹妾衣。使妾增悲涼。悲涼知爲誰。良人在
沙場。暮聽邊馬嘶。朝看邊雁翔。饑飧風中塵。渴飲雪下漿。羊角衝地起。沙
礫爭飛揚。回首望故鄉。長天但茫茫。豈無肥與甘。亦有衣與裳。妾心空惻
惻。路遠莫寄將。北望長太息。涕淚如雨霧。幾欲往從之。河廣無舟梁。仰天
籲上帝。矢心期不忘。但願南風競。吹君來妾旁。

客集高堂上。衆味羅珍羞。觥籌互交錯。樂矣其忘憂。清醕飲桑落。妙聲發
吳謳。寶燭噴清煙。芬芳襲輕裘。肥腴正厭飲。文錦何溫柔。獨念良人苦。遠
成陰山頭。黃茅連白沙。風雪寒飈。凍雀飛不起。依樹鳴啁啾。馬毛縮如

蟪蝼肉胝生周。羔裘煖如烘。澆醑清如油。君身千萬艱。妾心千萬愁。夢寐或見之。道路阻且脩。願言早成功。諸將各封侯。良人章章來。紅日照九州。

依依重依依。不忍生別離。別離已可悲。况值秋風時。柳衰不堪折。情苦不堪說。願妾爲小星。君身化明月。明月貼天飛。小星恒相隨。月出星隨出。月歸星亦歸。莫學秋胡妻。相逢不相識。生者固可慙。死者亦何益。白日日已晚。行人日已遠。秋風又重來。行人猶未返。颼颼朔風寒。行人衣應單。世無杞梁妻。千載徒悲酸。

秋興

秋來百蟲號。各自悲其生。物情尙有感。况乃骨肉情。幽幽堂背花。歲晚雲色零。忘憂更不忘。日夕憂思增。嗟爾客遊子。胡爲常遠行。

孟秋雨初霽。虛館生晚涼。悲風振木末。激烈流清商。寒蟬抱葉悲。哀鴻叫雲翔。蚯蚓出其窠。蜘蛛鳴在房。螢螢鳴我前。蟋蟀鳴我旁。物各感其時。豈

必皆不平。而我於此際。兀然坐欲殫。凄然動我心。冥思搜枯腸。壯哉秋聲賦。三歎思歐陽。蘭臺一何卑。戚戚徒爾傷。

小景

川光涵遠空。山色淡平野。危樓夕靄間。高樹涼雲下。久客厭塵紛。羨殺舟游者。

送廣東夏廉憲

當宁念遠氓。塗炭日以極。詔東在廷臣。往振風紀職。僉曰御史某。秉德剛且直。屬耳按江右。風聲甚輝赫。兵政既以舉。吏弊亦以革。謠言聞遠近。公論推第一。無如斯人可。拜手答明敕。天子曰命哉。超授三品秩。天語重丁寧。綸命光島奕。百僚無間言。相見咸暗暗。而我嶺南人。喜幸倍千百。預爲鄉人喜。從此得蘇息。特恩許乘傳。陛辭行有日。走也官禁近。早有半面識。中心久有懷。臨分忍緘默。聊爲陳本末。幸與垂采擇。惟茲東廣地。富麗自

邱 文 莊 公 集

古昔。秦初已內附。漢後益廣斥。東西數千里。十郡六十邑。衛所錯其間。小大五十七。憶昔全盛時。承平久寧謐。家家有蓋藏。人人各安適。士著少流徒。世業足資給。士族尚詩禮。農家務耕織。先期輸賦稅。俛首供力役。民不受箠楚。兵不識鋒鏑。行旅不齎糧。遠出不待吉。晝夜絕剽竊。歉歲無行乞。况復天氣暄。地利多所獲。三冬著苧衣。五月收新植。山畚少汙萊。水田有潮汐。舟游泛滄茫。火種燒劣崩。曉包趁墟飯。晴著登山屐。海錯富蚌蜆。家畜剩豚軀。文木生山林。珍貨來番舶。荔奴然火樹。橘柚垂金實。閭有食素封。田圃盛嘉植。愛身寧破產。終訟羞珥筆。遐邇總安恬。公私舉豐殖。邈彼廿年前。長吏恣胸臆。厚利動其中。甘言誘其側。欺彼民柔愚。藐茲地遐僻。遂決禮義防。大肆搏噬力。把臂褫其衣。抉口奪之食。溪壑填不滿。氣餒撲難熄。上下相師成。前後遞沿襲。豈云無鷹鷂。方自爲螽蟴。天門遠萬里。無地訴冤抑。致令仁厚性。化作兇險質。弄兵潢池中。延息苟旦夕。外邪尋卽除。中虛遂成疾。蠢茲洞山猺。窺伺乘間隙。始惟掠近地。稍稍出復匿。迹彼

案脆懷。頓異戎與貊。制伏本非艱。而我狃安逸。武胄恥言兵。文吏諱申賊。縱虎出薄林。延鬼入居宅。路有橫草虞。關無一夫搃。長驅捲村落。乘夜盜城壁。豈彼智有餘。乃我法不立。歲歲轉猖披。邊境遭轆轤。脅從日漸多。徒類日增益。居民就流散。人烟渺蕭瑟。已身不自卹。何暇問家室。田蕪乏犢耕。井渫無人汲。萬家春草青。一望秋地赤。禾麻種殆絕。鷄犬聲亦寂。昏雨鬼火青。涼月死骨白。內地幸苟免。因之困供億。相扇咸弗靖。濡沫聊戢戢。方今堯舜朝。大臣總臬稷。萬國俱時雍。一方獨艱阨。九重赫然怒。遣將搗其窩。天道信好還。王師本無敵。鼎魚姑假喘。穴蟻難藏迹。行當見掃平。腥穢永蕩滌。却愁火燃崗。罔辨玉與石。嗟爾嶺徼人。罹此殊可惜。賈父來每晚。謝令去不亟。由來非一朝。往者何嗟及。幸茲天日開。光景方昭熠。草木回生意。山川增秀色。福星離紫垣。甘雨隨舟軾。指日下須江。持節鎮南國。先聲一以聞。父老懼以泣。迎拜古道旁。應以手加額。願言明使君。代天布仁德。爲我招殘魂。爲我肉枯骼。爲我作保障。爲我剪荆棘。爲我開喉吻。爲

我插羽翼。醫我眼前瘡。除我腹中匱。我寒衣以裘。我饑食以粒。生者愛我塵。死者與我裨。一夫或失所。孰非使君責。使君今已行。行行去須急。齊民正倒懸。異類尙反仄。如病望醫師。如旱望雨澤。寄聲報吾人。此公古難得。瘴海行將清。貪泉不能惑。佇看凋弊區。復作全盛域。

雜詩

義翮行太空。海宇仰其光。咫尺滄海隔。群鳥集扶桑。乘時競奮飛。引脰鳴朝陽。衆鳥欣有託。後先低回翔。冥鴻弔孤影。四顧慙且傷。

南國有珍木。中含要妙音。匠氏一顧之。斲削爲素琴。緝以朱絲絃。寄以太古心。時時橫膝上。山水託意深。別鶴爲翔舞。游魚躍幽沉。云胡世俗耳。不如魚與禽。雅鄭竟莫分。吾心安所任。

冀北產良馬。未必皆駒駝。乘之惟其良。何必以地拘。我聞開國初。羅鬼生龍駒。貢之入天閑。用以駕鼓車。疾徐皆中節。步驟何雍如。紛紛內地產。不能竝馳驅。安知今所良。在昔非其驚。按索久成俗。誰爲焚其圖。世無丸

方臯。歎息還挪揄。

秋懷

草木忽變衰。惻然感我心。鳥飛日向暮。豈不懷故林。閱人日以多。涉世日已深。高官世所慕。直道古所欽。青青海中山。層層山上岑。行行即可到。決意須在今。有山不歸去。何勞憶山吟。

送劉紹和還南京

交游徧寰宇。契合無幾人。駸駸入老境。落落星在晨。鼎鼎百年間。會晤能幾旬。況復限區域。世務縈其身。久別喜相見。見疎情轉親。俄頃又復去。寧不含酸辛。緬懷古賢哲。未必生同辰。道同心自契。千里如比鄰。溶溶天上月。湛湛空中雲。舉目即見之。光景常如新。

劉草窻輓章

劉均癖於詩。老大意轉豪。舉目一世空。振衣千仞高。左顧少陵杜。右盼彭

澤陶。瑣瑣兒女語。咕囁徒嗷嗷。仰天肆大嚼。對客揮長毫。劑量古與今。
鍼砂詩與騷。一一中膏肓。豎子焉能逃。惜哉抱所見。白首竟莫遭。已矣
勿復道。落日悲風號。

兀坐有感

兀坐一室中。蕩蕩天地寬。坐看百世上。宛在瞬息間。開眼無間隔。身如生
羽翰。頓然忽有悟。不覺喟然歎。女織爲我衣。男耕爲我食。豈但我一身。
全家賴資給。我身乃大蠹。何以報天德

送鄭通判還襄陽

我昔游新河。君時猶未冠。有如金在鎔。氣燄已光爛。京華再見之。風采殊
舊觀。青松旣出壑。勢愈凌霄漢。對庭違夙心。佐郡試新宦。政聲如江潮。
日日臨堤岸。況當有事秋。一日百趣辦。事機紛以杳。無不迎刃斷。驥足
雖可展。猶自困羈絆。去去宜努力。莫起賢勞歎。時方需異材。九重正宵旰。

送蒲進士赴鉛山縣

科名進士重。仕宦幸邑難。羨爾英妙姿。致身青雲端。牛刀初小試。遽爾泣劇繁。一朝謝師友。恍然更民間。衆目胥唱喏。萬口譁以譁。寒者待我衣。饑者待我餐。晦者賴以明。鬱者賴以宣。一身百責萃。事事來相關。所貴各當理。事安民斯安。况當江閩交。孔道多往還。一事胡可苟。頃刻寧暫閑。時時懷隱憂。念念斯民艱。民乃吾子姓。財乃民腎肝。民身即我身。心肉何忍剗。聖期待士厚。發策親臨軒。何以報國恩。民者君之天。愛民即愛君。慎勿忘斯言。

聽琴爲柯狀元乃尊作

幽人事佳遯。開軒對陽明。興來拂瑤軫。暢我平生情。心中有真趣。指下無繁聲。上弦叶風薰。下弦諧鳳鳴。坐覺胸襟開。塵滓頓以清。紛紛濁世中。入耳皆琵琶。何當謝塵務。枕流階下聽。

題畫爲蕭考功作

愛此春山秀。微雲淡悠悠。蒼松俯深澗。翠篠媚清流。結屋者誰子。獨占雲山幽。抱琴循側徑。引領仍歸舟。歸舟天際來。何時經丹丘。丹丘多羽人。爲問相見不。春景

入夏草木長。林壑迴幽雅。雲際川光浮。石罅巖溜瀉。誰當三伏中。高會江亭下。倚席和棹歌。縱目極平野。鷗波浩蕩間。羨彼舟游者。臨淵空有言。結網人何者。夏景

題竹送高博士使高麗

青旌懸翠旄。龍竿綴鳳尾。持出大明宮。搖搖向東指。氣節橫九秋。風聲揚萬里。坐使三韓人。快覩古君子

擬古樂府

採蓮曲二首

蓮花紅。蓮葉碧。紅似妾容妝。碧如妾裙色。輕紅易落碧易衰。情人道來竟不來。停棹轉棹日過午。藕絲斷盡蓮心苦。荷花香。荷葉長。紅妝奪儂目。綠刺牽儂裳。纖纖玉手搖蘭槳。傍葉看花恣遊賞。湏臾採得滿船歸。一曲清歌隔江響。採蓮採蓮難療饑。不如採桑堪作衣。

搗衣曲 己冬寓北京作

涼颼透窻紗。蕭蕭弄秋色。妾在江南尙不堪。況君遠在陰山北。風吹妾衣寒。妾念君衣單。起來搗衣明月下。不辭齊力摧心肝。一聲孤悶添。兩聲雙淚墮。三聲四聲情轉多。無數離愁搥不破。須臾搗到千萬聲。中有萬恨千愁并。不知遊子在萬里。今夜魂神寧不寧。

對酒行

我有方寸地。中涵萬古天。幾回欲施布。地步狹且偏。起來自摩挲。天地萬

物如我何。天地苦不寬。萬物苦不多。滄海沿蕩蕩。而豈蟲能測。碌碌伯倫輩。何止容數百。欲作郝隆晒。却恐金烏歛影。陽光敗。欲作仁裕洗。却恐天吳震懾。波濤起。韜鋒晦迹且隨時。磊磊落落徒爾爲不如。放出別腸三百仗。停蓄丹田爲酒池。鸞頭飲醉鸞底臥。開口笑歌拍手和。倒囊傾出千黃金。鑿取仙人劉白墮。

短歌行

一日生。一日落。明日不如今。今日不如昨。短歌行。聲苦惡。人生行樂須及時。腰纏何必揚州鶴。

花游篇 和楊廉夫韻

雲樓霧閣深濛濛。弱流萬丈號天風。姓名久注丹臺裏。浮槎直泛銀河水。凌空八翼飛天門。若木不霄蛟綃裙。天衢空闊舒禹步。俯瞰人寰惜丘墓。一聲鐵笛下天來。擬借重湖爲酒杯。珍珠落槽冰在椀。雲兒歌唇玉奴板。天邊

一任鳥輪西。拂塵掃石題復題。鸞儔鳳侶隨蝶使。爛熳芳遊日三四。醉揮彩筆掃雲箋。試寫神遊八極篇。

登高丘而望遠海

登高丘。望遠海。身居岷壘間。目極蒼茫外。神游八表縱大觀。氣噓千丈發長慨。直從混沌鑿破初。大徧虛空無盡界。天於子會開一元。地自坤隅分兩戒。山萬重。水千派。神禹勞勞躬四載。野外脩途。七聖迷海。上神山。六龍戴。波濤洶洶泛蒼溟。沙漠茫茫連紫塞。豈不欲鼓柁登瀛洲。却愁弱水難勝芥。豈不欲振策赴瑤池。恨無神駿能歷塊。不如振衣千仞岡。老眼空明無障礙。近山列翠屏。遠山抹青黛。大華三峰勢若蹲。黃河九曲流如帶。舜功封濬四海同。禹蹟平成萬世賴。三十六洞天。處處藏神怪。七十二福地。一一異姿態。驅山走海入雙瞳。阻今嶠古供一嘔。山嶽降神生異材。景物因人成勝槩。安期竟不來。漢武空相待。峴山依舊存。杜子今安在。掛劍殊非昔日境。釣魚乃是今時瀨。赤壁人尋折戟磨。涪溪客打殘碑賣。往古來

今。條成忽敗。物理不齊。時光難再。扶世教者何人。歷變故兮幾代。古蹟日已湮。昔人日已邁。瓊樓玉宇不勝寒。民墮頭崖苦凋瘵。重衾春暖夢無魚。破釜塵生色如菜。口談詩禮半盜儒。醉擁韜鈴多債帥。惜時感事氣填胸。以手撫摩聊一慨。君不見。地爲輿。天爲蓋。人在其間稊米大。分明芥子納須彌。毛孔真能容渤海。逐日何須隨夸父。步地誰云有章亥。請學尼丘古聖神。越過東山登泰岱。（客有繪登高望遠圖獻鄉先達大司徒薛公既遠者故即古樂府題爲擬此）

浩浩歌

一室如斗大。兩膝僅可容。轉身若有礙。奮志無不通。玄穹蓋我頭。厚壤承我足。前有往古過。後有來今續。藐然一身天地間。後萬萬載前千千。所居之地纔數尺。所生之世無多年。粵從混沌初開到今日。生人何止千萬億。醉生夢死奄忽盡。幾許名畱在方策。上天下地。往古來今。散之萬事。收以一心。浩浩歌。歌浩浩。俯仰人間發清嘯。春陵南去是昭潭。荒天窮海誰能

料。

七言古詩

讀東坡詩

東坡居士真天人。文章豪邁如有神。光燄豈但長萬丈。筆端真可幹千鈞。萬斛源泉隨地滾。五盤明珠無定準。虢國夫人控玉驄。淡掃蛾眉却胭粉。風靈滄歎一時來。須臾雨霽烟雲開。虹收電戢星斗爛。一天明月光昭回。此翁落落不可得。謫仙少陵乃其匹。小兒淮海秦少游。大兒豫章黃魯直。前生自是永禪師。後學宜稱韓退之。玉堂金蓮不足貴。羅浮瓊海真瑰奇。誰云賦詩不中利。餘子碌碌真么麼。眉山至今草木枯。五百年來生一箇。海南遺跡有雙泉。我家依約雙泉邊。雙泉湮沒不可見。山城落日生雲烟。

題李將軍四時行樂圖 四首

日華淡淡雲陰薄。兵衛森森擁鈴閣。旌旗不動柳風輕。劍戟無聲花雨落。將

軍新試越羅衣。兩袖春風拂地垂。閱遍三軍超距樂。晚涼乘興詠歌歸。（春遊細柳）

松風流響團涼影。翠薄翻空火雲冷。一軍無事枕戈眠。萬馬不嘶清晝永。將軍燕坐凝清香。靜對珠鈴萬慮忘。不用更揮諸葛羽。溶溶心月自生涼。（夏坐松林）

霜染楓林秋氣肅。潦水收痕山露骨。蒼鳩一夜化爲鷹。百鳥含羞傍林麓。將軍小隊出西郊。金環壓轡青驄驕。霹靂一聲軍吏賀。半空雲外落雙鷗。（秋郊挾彈）

凍雲不飛朔風直。野獸畏寒出還沒。角弓鳴騶趁蟲飛。霜鏢吐芒驚鬼哭。將軍自控五花驄。翩翩雲騎爭追從。射殺南山白額虎。碧油幢底夜論功。（冬野行圍）

雲山清趣圖爲歐陽道人所作

山盡處。雲漫漫。雲容山色微茫間。一天淡月秋空靜。滿地落花春雨寒。道

人愛此有清趣。穿雲結屋依山住。一縷茶烟午夢餘。兩腋清風欲飛去。欲飛不飛無限情。拂絃時作太古聲。驚猿吐月淚澗墮。老鶴知更相和鳴。夜深萬境俱岑寂。兀然虛室生寒白。回頭人世隔紅塵。雲山慘淡無顏色。

嚴子陵圖

長笑劉歆頭。不及嚴陵足。厥角稽首勢若崩。况敢橫足加帝腹。嚴先生。何壯哉。釣臺豈但高雲臺。清風遼邈一萬古。落日頽波挽不回。

丁卯過采石弔李白

采石江頭。黃土一坏。東有蛾眉亭。西有謫仙樓。謫仙仙去不復返。惟有江水日夜流。人生一世幾何久。不如眼前一杯酒。饑來文字不堪餐。死後虛名竟何有。請君看此李謫仙。掀揭宇宙聲轟然。長安市上眠不足。長來采石江頭眠。百世光陰一大夢。衾天枕地無人共。寧知浩浩長江流。不是糟丘春酒甕。此翁自是太白精。星月自合相隨行。當時落水非失脚。直駕長鯨歸紫

清。至人雖死神不滅。終古長庚伴明月。

卷之十 七言古詩

二十

送伍天錫

天錫棹頭歌且吁。拔劍斫地呼烏烏。酒酣興逸雙耳熱。仰天舉手長廬胡。斯人豈是噲等伍。磊磊落落非凡夫。濠梁五車不足讀。取黃配白羞拘拘。長江一瀉千萬里。雲濤變幻時有無。鄧林掀天白日動。春風着物枯槁甦。丈夫卓犖有如此。置身合在承明廬。年來一擲金注拙。日光五色成糝糊。無人爲薦阿房五。舉世空仰靈光孤。一朝得係聖賢籍。攜經載道之荆湖。渠渠高堂據中席。洗洗英俊趨座隅。鈎玄纂要說道義。巍冠大帶談唐虞。名教由來有真樂。功名富貴皆土苴。范金合土無躊躇。不須北望生鬱紆。

瓊林醉歸圖爲同年長垣李溥作

奉天殿上傳臚罷。日熙金門榜初掛。中使傳宣敕大官。明朝賜宴南宮下。張天爲幄雲爲茵。金盤犀箸羅八珍。宮花剪彩來中禁。御苑分香出上尊。鼙鼓

邱 文 莊 公 集

掀天播欲破。梨園法樂喧相和。妙舞清歌次第呈。幻形奇技紛紜過。承恩侍宴皆貴臣。繡金孔雀銀麒麟。焚香望闕北面拜。共賀官家新得人。白面青年三百五。人似神仙氣如虎。烹泉浮酒不知數。兩袖翩翩欲飛翥。瓊林宴罷日斜時。馬蹄得意去如飛。團團皂蓋空中舉。短短絲鞭柳外揮。微風不動香塵軟。十二街頭簾盡捲。衣裁草色碧將流。旗拂杏花紅尙淺。金環搖轡穩於車。笑拍吟鞍不用扶。恥向平康問花柳。還歸槐市枕詩書。明日半醒扶醉起。吮筆題詩謝天子。就中醉者誰最豪。中原才子長垣李。

望雲祝壽圖

昔賢望雲憶親舍。雙日熒熒逐雲下。今君望雲祝親年。一心炯炯依雲邊。舉頭見雲如見母。獨立蒼茫凝睇久。輪輪困困鮮且明。浮光呈瑞表壽徵。觸石遙從泰山出。雨下土兮滋萬物。有如春暉煦草心。亦似凱風吹棘針。母恩如此莫可報。望雲再拜情何任。情何任。意無已。目極天南萬餘里。越王臺上陽生時。焦子初黃蟹螯紫。高堂綺席倚雲張。紛紛兒女羅酒漿。就中獨少

讀書子。挾策多年遊帝鄉。帝鄉迢迢歸未得。對此佳辰應惻惻。馳心直與雲天高。恨不將身在親側。蒼天漠漠雲愁愁。雲色還如親白頭。孝誠一念感穹昊。雲影爲之凝不流。何事良工心亦苦。筆端寫出心中語。紅雲朵朵捧天庭。白雲片片迷江樹。紅雲影裏望白雲。白雲如舊紅雲新。裁雲作衣兩爲酒。共祝君親千萬壽。

淮之水送淮安林馬判三首

淮之水清瀾瀾。山陽古郡淮之涘。逋仙之孫古君子。似是馬曹官自理。何以況之淮之水。

淮之水清湜湜。郡疆遠跨淮南北。林侯秉心淵且塞。民不知勞馬繁殖。誰其致者侯之聽。

淮之水清徹底。沮洳浸潤幾百里。山陽太守差可擬。一時僚佐皆肖似。餘波漸漬良有以。

題林以善畫送王珙

近代翎毛誰最工。邊家父子誇獨步。羊城林氏雖晚出。筆勢飄飄有天趣。仁智殿前退直時。虛窓盤礴窺天機。毛生點頭墨卿舞。意氣所至皆神奇。飛者自飛宿者宿。色形神氣無不足。等閑尺素落人間。坐使山林在華屋。嗟嗟百鳥皆天生。結巢穀哺方成形。胡爲獨奪造化妙。眼前倏忽飛且鳴。我從故人得此幅。每日朝回洗塵目。吾家外弟別我去。輟贈慇懃表衷曲。故鄉南去更千岑。對此還思別意深。物類尙知相聚樂。矧伊人矣不如禽。

竹庭爲袁秉中作

綠雲垂空寒欲滴。窗外蒼龍作人立。有時鼓鬣風中號。有時垂涎雨中泣。既如軒轅遊洞庭。鏗鏘仙樂天半鳴。又如李靖發田舍。滴瀝大瓢雲外傾。中有書生負奇志。千金學得擾龍技。辛勤十載謹護持。坐使騫騰滿庭內。只愁天作雷雨風。斯須變化出九重。雲收雨散斂神功。但見萬丈深深深。

秋窻詩爲羊城義士袁鑑作

一年之氣秋最清。窻涵霽色偏澄明。萬條疎朗斜碧入。一點圓空虛白生。坐間四時如一日。凍雪炎風不相及。筠簾晝捲寶幄微。細帙午寒金薤濕。千崖氣肅天宇高。紛紛木葉飄林臯。丹桂涼蟾香散亂。碧桐疎雨冷瀟瀟。浩然幽獨者誰子。終日栖遲此窻裏。平生志節明如霜。一片精神淡如水。霜明水澹秋更宜。凜然相對清以淒。孤高遠慕伯夷聖。搖落不作宋玉悲。秋行屬金德爲義。見說承家多義事。十尋雲棟敞旌門。五色天書金作字。義聲久著越天涯。冠蓋過門每軼車。何日南歸經錦里。爲渠重放筆頭花。

題友人陳汝諧璞墩其家舊有桐墩

昔君築墩當近林。種桐十載期製琴。今君築墩向遠壑。移石千山期得璞。晨昏來往兩墩間。功名富貴皆等閑。有時哦詩石上坐。有時拂軫桐陰彈。鳳凰枝老秋蕭索。却傍雲根事耕鑿。琅玕箇箇拂雲長。玉屑霏霏逐風落。一溪

流碧彎半瓊。泉聲琤瑤鳴珮瑤。山含輝兮水含潤。人言此地如崑岡。瓊枝奇樹羅階砌。夜深疑有白虹氣。藍田餐法曾試無。北平種子應生未。我家城西君城東。梯雲石磴遠相通。別來茫茫隔煙海。置身遠在羣玉峯。何時對子廬胡笑。把酒同燒磊砢胸。

岳王墳

我聞岳王之墳西湖上。至今樹枝尙南向。草木猶知表蓋臣。君王乃爾崇奸相。青衣行酒誰家親。十年血戰爲誰人。忠勳翻見遭殺戮。胡人未必能亡秦。嗚呼。臣飛死。臣浚喜。臣浚無言世忠靡。檜書夜報四太子。臣構再拜從此始。

輓羅都御史

正統己巳。北敵深入。當道者建議。趣召宣府總戎官率兵入衛京城。或欲遂棄其城。衆紛然。爭就道。時羅公爲都御史。巡撫其地。

乃毅然仗劍坐。當門拒之。且下令曰。敢有出者。手斬之。衆遂定口。外人至今能言之。而脩宣府志者。亦載其事。公平生事業固多。而此舉猶爲卓偉。抑菴先生作墓誌略不及何也。潛初來京師時。嘗拜公於寓所。極蒙獎諭。及潛登朝。公已致仕家居。不久損館舍矣。瓣香致敬。其道無由。茲因其壻鍾轅應貢來。致其子泰。命求輓章。因次第完城事爲韻語。以補公志之略云。

六飛北狩無消息。邊城四望狼烟赤。敵馬長驅去復來。何人却建捐邊策。鎮朔將軍生入關。北門鎖鑰空餘鏤。強兵健馬盡南走。黃塵蔽日天漫漫。白首憲臣南海客。手持一劍當門立。誓與孤城同死生。怒髮衝冠氣千尺。車輪生角馬駐蹄。居人不動行人歸。叱咤之間樓櫓具。金城鐵壁湯爲池。雲州失守赤城破。健兒躡足城邊過。老妻稚子盡登陴。公亦援抱雪中坐。山前山後無數城。此城屹立如巨屏。敵騎南來資扼塞。王師北出恃屯營。屏蔽京師功卓偉。護有長城長萬里。江淮果賴張真源。河朔僅餘顏御史。憂國勞邊兩

鬢霜。事成乞骨歸故鄉。肘金腰玉者塞路。無人上書訟陳湯。一葉扁舟五湖水。漲海邊頭亂山裏。拆簡不通朝貴書。抱膝長吟聊爾爾。羅浮山崩天墜星。乾坤一夜收英靈。公兮生死已無愧。邊人至今嗟未平。邊人能言不能紀。慙我鄉生官太史。聊述人言作些詞。書罷長歌淚如洗。

海屋添籌徐助教

茫茫瀛海浩無津。弱水無力勝纖塵。中有仙山三萬八千里。平地拔起凌蒼旻。瓊臺玉宇金銀闕。罡風盤旋舞香雪。琪花不落瑤草芳。天氣長如二三月。朱橘如斗蓮如舟。脯蒼鱗兮駕紫虬。木公金母互來往。天鹿人鳥時嚶呦。銀濤凝碧漫山麓。山麓渠渠列華屋。黃金布地玉爲階。五色雲霞長蓋覆。屋中挿架皆仙籥。非金非木非琳球。連楹充棟十餘屋。堆積高竝崑崙丘。山中老人若童孺。洗髓伐毛知幾度。桑田變海海成田。下得籌來已無數。仙境變幻無定居。仙人綿邈不可呼。誰知仙凡了不隔。人中亦有列仙儒。列仙之儒服仁義。不乘風兮不御氣。辟雍環水如道山。袷佩趨庭總仙

齋。考古直溯盤古時。積書多與桃核齊。仁人自爾享遐壽。海屋添籌徒爾爲。

題山水圖

昔年棲迹雲林下。舉頭見山不見畫。如今置身朝市間。開眼見畫如見山。山耶畫耶孰真假。具眼之人世間寡。景當好處背起樓。趣到佳時急驅馬。居山不見山中佳。厭飲林壑輕烟霞。一朝別山出城市。黑風黃日昏塵沙。廣庭曲巷通幽處。壘石栽花脩勝具。眼中彷彿雖逼真。畢竟人爲靡天趣。回思舊隱隔世間。欲一見之千萬難。殘縑斷素纔尺咫。傾囊倒篋不復慳。君從何處得此幅。十里雲山數間屋。遠山淡淡橫翠眉。近山亭亭削青玉。山頭處處飛白雲。樹頭樹尾晴輪囷。平林忽斷天光露。暝色遙連雨氣昏。蒼苔白石羊腸路。平麓盤盤幾家住。就中老人華陽巾。手把瓊芝滴清露。山光水色相渺綿。漁舟泛月江吞天。長風浩浩起天末。高堂白日生雲烟。興來却憶竹鶴老。見畫何如見山好。人生即景須盡歡。尋仙何必蓬萊島。

蟬聽軒爲常州謝同知題

世間何物聲最清。秋高嘒嘒寒蟬鳴。常州別駕日無事。公餘徒倚軒前聽。物聲妙與人心合。聲入心通無限樂。鼓吹何須兩部蛙。淒清絕似三更鶴。初聞一聲如撥絃。含商轉羽如有言。一聲未已一聲續。千聲萬聲斷復連。夕陽欲下雨初霽。樹影不搖風細細。奏出千腔雅樂聲。帶得九秋元露氣。有如伯牙鼓瑤琴。鍾期聽音知其心。又如南郭聞天籟。至理在心不在音。天機氣到自然應。隱几坐忘真聽瑩。承蜩手與此耳同。用志不分神乃定。忽然飛去君不知。目中彷彿常垂綬。聲殘響絕寂無有。但見委蛻黏高枝。

送張茂蘭黃自立二同年回南京

前年棹鞅翰墨場。英雄三百齊翱翔。青雲滿眼多契合。就中最厚張與黃。二君英氣如如虎。明日掀眉論今古。酒酣拂劍落霜花。興發揮毫灑秋雨。今年同自江東來。我一見之心眼開。長鯨吸海海欲竭。巨靈擘山山爲摧。摧山

竭海懸河口。風雲變化龍蛇走。盤古以來二百二十餘萬年。一一成敗興亡如指手。相看一笑氣味投。典衣沽酒鎮日留。鄰翁侍吏共驚訝。平日見我會有此客不。此客何昂藏。此主大癡絕。牙關齟齬戛金聲。口角霏霏灑瓊屑。帝城春暖百花香。輦紅塵土飛悠揚。明朝馬首向東去。燕雲一碧天茫茫。燕雲不斷吳雲起。兩京相望四千里。桃葉渡頭生碧波。清夢隨君渡江水。

四友圖爲安成劉進士秩之父作

三友松竹梅。其間一友我。萬物於人同一理。意契神交無不可。君不見。明月在天光在尊。李白對影成三人。又不見。書酒琴棋集古錄。醉翁與之合成六。古人將身混物中。游心太古窺鴻濛。此翁妙得古人意。白首山林無物累。每將富貴等浮雲。却與幽貞結深契。左挹大夫袂。右拍君子肩。羅浮美人相後先。翁居其間吟且嘯。一笑相看同歲寒。市道豈所論金石。未爲堅耐。久且莫逆。忘形更忘年。

題李都督虎

陰雨颼颼振林木。百獸魂飛草中伏。舉首爲旗尾作旌。白晝橫行誰敢觸。汝虎雖猛何如人。慎勿夜逢李將軍。將軍射石尙沒羽。薄肉淺毛何足數。

題楊廷玉忠義

幽燕自古多奇士。勃勃胸中抱奇氣。要留世上不朽名。羞見人。金臺峨峨易水寒。相看意氣何桓桓。君臣義大此身小。寧問鴻毛與泰山。生不還田生死。地氣翻爲時勢使。西風吹散壯歌聲。百鍊鑿鋼柔繞指。文皇建國來全燕。風聲震地雷轟天。聲名獨出百王上。風氣還回三代前。關西後裔范陽客。二十辭家侍君側。出入勾陳太乙間。一片丹心曠如日。落身無七尺長。忠肝義膽無他腸。前年持矛刺狂賊。去年上書論流賊。有勞不伐言皆應。四民安堵三邊靖。丹心自結明主知。時時持節衛王命。禁庭之獄非等閒。生死都來掌握間。昨日九重親錫命。二軍百姓總開顏。好生惡殺天之

道。聖主仁明法天造。楊君楊君聽我歌。臣心盡處君恩報。

送嘉禾伍公短歸桂林兼問訊海鹽張靖之

平生故人伍公矩。少年學文今學武。胸中豪氣老更豪。境變情遷寧少沮。酒
酣耳熱歌烏烏。手執如意擊玉壺。興來拔劍爲我舞。電光燿歎雲披敷。仰天
大噉向人語。顧儂豈是噲等伍。筆端一萬丈虹霓。胸次三千歲今古。憶年
二十三十時。風中快鷗囊中錐。廣寒紫桂白手斫。滇池緣駿赤脚騎。奉天殿
下丹墀底。頃刻雲烟生滿紙。瓊林宴罷馬如飛。一轡穿花三十里。功名富貴
皆等閑。致身承明殊不難。覓得一州如斗大。又被秋風摧紫蘭。瑤簫玉
笛山如畫。靜荷韜鈴意閒暇。堯山祠下拜放勳。干羽兩階祈日化。絳灌之武
隋陸文。今人未必下古人。長籌入手一運轉。溪山失險鬼不神。李廣數奇
顏驕老。跋弓束書遵舊道。英雄回首卽神仙。忙處人多閒處少。青天浩蕩雲
渺茫。吳山高兮粵水長。南歸若見張給事。引杯燒燭歌我送行章。我亦頭顱
如雪白。每憶故人心惻惻。明當歸棹過嘉興。看劍檢書話疇昔。

靈壽杖壽徐庶子乃尊

我聞仙山有奇木似木。還非又如竹。參就天池走陸龍。削成玄圃輝山玉。天生尺度齊人長。清如冰雪堅如鋼。偶然爪甲相擊觸。鏗金戛玉函宮商。赤城九節殊怪詭。蜀江桃竹未爲美。不知漢家何處得此枝。骨格不凡足文理。經年閱代何靈奇。在處神物常護持。上端或炳太乙火。節間容刻丹書辭。天子用優老。老臣恃扶危。夸父寧忍棄。長房不敢騎。變化去來寧可測。既失千年今再得。當時北闕賜師臣。今日南州壽仙客。南州仙客高士孫。白頭鈎隱荆溪濱。至人傳與養生訣。步履如飛不動塵。聞道今年年七十。拄杖趨朝此其日。玉堂令子阻稱觴。望拜南雲寄詩什。緘題寄遠祝長生。共願年高身轉輕。曉起撥雲穿竹逕。夜深挑日扣松扃。歲歲年年持此杖。長伴神仙地上行。

梅窗琴樂

高人好琴得天趣。開窗靜對梅花樹。江空歲晚夜深時。丁丁似共南枝語。淡

香疎影太古音。箇中樂趣清且深。等閑三弄梅花曲。花不在梅花在琴。

赤壁圖

烏林赤壁江東注。千載曹劉爭戰處。黃州遷客雪堂成。水落山高天薄暮。扁舟一葉泝流光。洞簫吹月鶴橫江。自從兩賦留傳後。世人不復談周郎。

笠澤圖

我聞在昔天隨翁。浮家浪迹笠澤中。筆牀茶龜隨所寓。潤物搜腸情興濃。七澤三江通甫里。一葉扁舟五湖水。年來遜世避風波。不知長在風波裏。

彭澤圖

幾年作縣山城裏。只緣五斗官倉米。終朝汨沒簿書間。矮屋擡頭頭不起。可堪時事日已非。賦歸豈爲鄉里兒。候門童子望我久。奮飛不得嫌舟遲。

五言絕句

客中對月

萬里思歸客。傷心對月華。願憑今夜影。回照故園花。

題扇面小景寄鄉友

遠樹平連野。微雲低度山。黃龍青雀艦。不似鈎舟閑。

明妃曲 三首

塞雪彫宮鬢。胡霜裂漢裙。畫工雖可恨。不似奉春君。
嬌態能傾國。蛾眉解殺人。妾身亦何幸。爲國淨邊塵。
骨已成邊土。魂猶戀漢庭。千年遺恨在。孤塚草青青。

明妃圖

生長陽臺下。分明見漢君。孤絃彈破夢。恍惚一行雲。
使回煩寄語。莫殺毛延壽。君王或夢思。留畫商巖叟。

閨愁

歲暮風霜勁。路長山水多。聞郎駕船去。願作楚江波。

春江曲

雨過水添波。鴛鴦來漸多。春江深可愛。其奈別愁何。

秋風

客裏渾無賴。樹頭俄有聲。倚窗頻側耳。無限故鄉情。

征婦

君身上船去。妾目送帆飛。江空人去遠。猶自立殘暉。

春日即事

蝶趁飛花舞。鶯和睡柳酣。日長人境靜。聊爾試春衫。

九日有懷

寂寞重陽節。籬邊菊未開。倚門空悵望。不見白衣來。

五言律詩

閑居雜咏

鼎鼎百年間。誰人未老閑。古心惟自得。塵事少相關。風定一花落。簾開雙燕還。簞瓢隨處有。不是故希顏。

村行

萬里勞行役。驅車趁晚晴。鴉邊殘照遠。雨外斷虹明。山徑高低路。村春遠二里。橋林人語寂。一犬吠相迎。

村居

郭外幽居好。橋邊水逕斜。紅飄桐井葉。黃落菜園花。淺淺浴鳧水。團團宿鷺沙。板扉青布旆。記取舊東家。

夜泊近漁舟有感

漁舟何處泊。淺水荻花邊。風月全家樂。江湖到處田。烹魚邀買客。乞火與鄰船。自笑謀生拙。臨淵却爾憐。

晚泊

風定帆初落。籬根泊晚晴。寒潮隨月上。秋水共天清。隔竹見燈影。橫江聞鶴聲。有懷愁不寐。坐數驛樓更。

夜到山莊

草徑直穿園。溪流曲繞田。村春應谷響。炊米散林煙。雨過池添水。雲開樹露顛。主翁聞犬吠。迎客出門前。

輓全州蔣隱君友人蔣良之父

高人厭世氣。一夕歛天真。花落閒庭晚。鳥啼空谷春。藥囊餘舊劑。茶籠冷香塵。埋玉湘江上。悲風起白蘋。

書房四幅爲新河許生作

鎮口掩書窗。心閒萬境忘。汲泉烹苦茗。添火試沉香。琴韻清霄遠。詩聲白晝長。青編長在手。倦倚竹方牀。
一室清如洗。儻然絕俗囂。字臨春景蚓。畫辨午時猫。烟淨芸香細。風微竹汗消。還期太乙老。藜杖燭清宵。

廬山瀑布

何處飛泉好。廬山自昔聞。懸空一水立。蒸地兩山分。直瀉崖前月。平霖樹杪雲。源頭如可到。乘興訪匡君。

寄題金山寺

岷江萬里下。梵刹半空開。吳樹風吹斷。淮山水蕩迴。潮聲雜鐘磬。波影動樓臺。千載張公子。題詩會雨來。

人日有懷

七日逢人好。三年作客賒。塞雲晴度雁。城日繞翻鴉。雪化經冬水。梅開隔歲花。欲歸歸未得。惆悵惜年華。

早朝 二首

落月傍西山。初開虎豹關。銅壺龍滴水。朱戶獸銜環。玉佩趨馳道。香烟拂近班。去天纔咫尺。不敢望龍顏。

曙色催仙仗。祥光繞禁闈。門開雙象侍。鐘動萬鴉飛。江漢宗滄海。星辰拱紫微。疎愚亦何幸。每日近清輝。

送人入蜀

嗟君萬里去。孤棹下雲安。地濕天常漏。時清道不難。江流春泛雪。灘石午生寒。如過臨邛令。琴心莫浪彈。

都下逢友人問訊

京國忽相見。蒼茫問起居。如何三載別。不寄一行書。共訝鬢毛改。自憐生計疎。故人應笑我。未得賦歸歟。

題空上人方丈

地僻少風塵。僧居即隱淪。烟霞方外境。水月定中身。長日飯畱客。夕陽鐘送人。他年如結社。還許醉相親。

秋日寄友

雲海懽遊地。別來今幾何。壯心隨日減。歸思入秋多。細雨滋蒼蘚。寒風剪敗荷。有懷誰與共。搔首短長歌。

雨中有懷

風雨晝冥冥。閑愁不自寧。只宜長日醉。何可片時醒。花落隔簾數。鳥啼歌枕聽。願言頭蚤白。歸去候農星。

秋晚答友人

朝罷歸常早。官閑客自希。少書隨處借。多病與時違。訪舊憐俱老。逢人厭說歸。傷心秋又暮。未寄北堂衣。

送杜侍御出宰英德

墨綬綰銅章。還乘下瀨航。重沾新雨露。猶帶舊風霜。官舍依山淺。溪流到海長。邑人遙爲喜。令尹得張綱。

洞庭圖

八月潮面闊。天低地盡浮。四山通潦水。萬里聚重樓。木杪仙人過。雲中帝女遊。何時乘雅興。徙倚豁吟眸。

除夕

歲去何勞守。春來不用追。明朝想今夕。便是隔年期。歲月添中減。人情點處癡。元正與除夜。相去幾多時。

偶成

往事今如此。前途已可知。但求身健在。屢遇歲豐期。自分爲人拙。誰來問我痴。朝回高枕臥。夢見孝文時。

過峽山飛來寺

三過飛來寺。今朝始一登。恍疑山是客。頓悟我會僧。鐘響出幽壑。猿聲啼古藤。本無來與去。明日問南能。

客有談龍太初沙詩者或謂其有體無用因足

成之

茫茫黃出塞。漠漠白鋪汀。鳥去風平篆。潮回日射星。築堤連相府。度磧到龍庭。聞道西河裏。漂流不暫停。

送謫宦者放還揚州

曉日都門道。西風酒一卮。幾年悲玉後。萬里賜環時。古水前朝寺。殘花后土祠。淮南風景好。歸去莫教遲。

送友人涂景旻下第歸五羊與同船來

曉日都門道。春風酒一杯。爲憐君獨去。却憶我同來。楊柳春堪折。芙蓉秋始開。臨岐凝望邈。目斷越王臺。

送朱忱之弟

南人不識雪。况此北風吹。桑梓久違後。弟兄相見時。歸雲孤度影。老樹短垂枝。一別又萬里。重來未有期。

送梁叔方行人養病還嶺南

使節行初返。君恩許暫還。聊爲六月息。且得幾年閑。白繞飛雲舍。青連過海山。自憐家更遠。臨別憶鄉關。

晚適

向晚乘殘興。穿林透水隈。林空客鳥過。樹動覺人來。山戴雲頭日。風傳澗底梅。村居多石磴。步步踏蒼苔。

梅溪處士輓章

惆悵清溪上。梅飄雪後枝。茶煙無鶴避。梁月有人思。披篲經行處。巡簷索笑時。空餘陳迹在。風雨草離離。

雨後過訪友人山居

竹杖穿雲過。柴扉冒雨開。好山如洗出。幽鳥似呼來。感舊哀絲結。開懷醉玉頰。人生歡會切。欲去重遲回。

感舊偶書

憶昔歡遊處。青林翁翠茅。竹皮消舊粉。椰腹犀斤立。少愛鳥乞谷。尼希紫濕巢。故人誰復在。夢裏或神交。

五言排律

寄題南華寺大鑿禪師

佛法來東日。禪宗肇嶺南。一溪香氣水。萬縷藕絲衫。結子花開五。先人棗

示三。心燈受弘忍。梵派演瞿曇。山頂青螺鏡。波心碧玉函。衆流歸大海。孤月印寒潭。藹藹花雲煖。瀟瀟法露甘。未廻煙水棹。空費葛藤談。奏樂皇岡石。讀書張相巖。也知祖堂近。無暇一登參。

六言

春日即事

晴日花開蝶拍。暖風柳畔鶯聲。沂水詠歌氣象。前川隨傍心情。

秋思

水落淺灘石出。霜冷疎林葉丹。天外數聲過雁。人在高樓倚欄。

江行

翠竹白沙村逕。落霞飛鷺江天。倚仗夕陽影裏。翫看江上鷺船。

即景

天通屋漏生白。日映紗窗透明。掃地焚香坐處。湛然心地清平。

客窗三景次友人韻 三首

明月欲上未上。烏鴉東飛西飛。物類皆知所憩。何事遊人未歸。黃昏漏滴銅壺恰半。月到天心正圓。大在子規聲處。幾回欲眠不眠。半夜樓上更傳五點。鄰家鷄叫三聲。正是銷魂時候。倚牀坐待天明。五更

廂房前有一檜樹夏熱甚向晚散堂閉門倚之
而坐頗有林間清趣

午睡醒來無事。斜陽轉過松陰。倚樹科頭箕踞。宛然身在山林。

七言絕句

過梅關題張丞相廟

平生夢想曲江公。五百年來間氣鍾。行客不知經世業。往來惟羨道傍松。

題希夷長睡圖

墜驢一笑便歸山。衾枕乾坤分外寬。一汴二杭閩又廣。依然春夢未曾闌。

春閨怨 二首

春雨池塘草發芽。春風庭院柳飛花。韶光尙有歸時節。何事遊人未到家。
舊歲花殘今又開。去年人去幾曾來。不知明歲花時節。人在天涯回未回。

古意 二首

簾幙沉沉宰地垂。重門十二掩斜暉。慙慙更把殘機理。待剪征夫寄遠衣。
獨守空閨不自憐。憐郎歲晚尙防邊。秋來莫作還家夢。妾貌于今異少年。

題小景

石橋流碧水潺湲。千樹桃花萬疊山。謾道仙家有靈藥。看來終不似人間。

晚感

寒鷄日日晚投林。却憶山家隔萬岑。豈是不歸歸未得。暗風吹淚落衣襟。

爲林學士題十二紅畫

丹杏香邊翠竹中。幽禽兩兩立東風。不知毛羽紅多少。却得人呼十二紅。

送樊景瞻河南大叅

天光近處地蒲青。記得君王問賈生。謾向河南望河北。碧天涼露滴金莖。

送馮副使士定之廣東憲臺

百雉層城雁翅開。陰陰古栢擁霜臺。登臺正好頻西望。千里荒煙接野萊。

時廣城以西被盜寇

春風不到海邊天。喜見皇皇使節鮮。料得吳兒心似鐵。不妨多飲石門泉。
家在天南地盡頭。白雲歸處海悠悠。君行是我家居處。莫謾逢人歎遠遊。

時老母在南士定之親在北

春寒

九十春光將過半。淒淒猶似舊冬天。依稀記得江南景。小扇輕衫戲水邊。

過某氏園亭有感

危牆荊棘鎖重關。不許游人取次攀。一夜西風零落盡。牛羊成隊下空山。

經舊遊有感

當年同醉習家池。歌舞流連醉不歸。今日獨來牆外望。亭臺依舊主人非。

南行途中見北人

旅食京華數十春。飽諳霜雪慣風塵。南來忽見幽燕客。還似當年遇越人。

客中夜雨

旅館秋風夜雨聲。思家愁路憶神京。寒蛩亦似知人意。相伴哀吟直到明。

題程彥實尙書晴洲卷

舉世昏昏夢裏過。晴明時少晦時多。一生日月光中老。閑向沙頭弄碧波。
少居河北老江南。風月隨身到處參。最是芳洲晴景好。泥融沙煖水光涵。

一片溪山景最奇。空濛歛豔兩皆宜。青天白日好歸去。不待沾裳濕足時。

題傅巖圖

何事君王感夢頻。騎箕天上有星辰。自從版築形求後。惟見丹青畫美人。

寄題釣臺

祚終四百已無漢。灘歷千年尙姓嚴。終古祠堂釣臺側。水光山色擁高簷。

題墨梅

老龍半夜飛下天。蜿蜒斜立瑤階裏。玉鱗萬點一齊開。凝雲不流月如水。

松月

素娥夜駕玉蟾蜍。來訪雲亭五大夫。十里人家總驚訝。老龍擎出夜明珠。

題虞美人墓

自古英雄數霸王。暗嗚叱咤萬人亡。只消幾句悲淒語。柔盡平生鐵石腸。

春思

暉暉初日照窻明。風定飛花落地輕。境靜不聞人語笑。隔林鶯囀一聲聲。

詠史

萬人叢裏擊龍車。說道民愚却不愚。天下簡編焚毀盡。圮橋依舊有遺書。

一作簡編總成煨燼未圮橋猶有未燒書

小景

行過山邊又水邊。眼中非樹即寒泉。囊琴謾道樵青抱。流水高山不在絃。

題寄南華寺三首

達摩傳得藕絲衫。浮海東來到嶺南。人向西回法東轉。曹溪溪上建伽藍。
佛法興從漢永明。始傳四十二章經。當時未有禪和子。縱有花開子未成。
紅梅過去到黃梅。正遇曇花五葉開。當日傳衣從此法。又從此處轉回來。

七言律詩

五指參天少時曾作瓊臺八景郡侯程公已刻
之梓今不復存惟記其首一章謾錄於此

五峰如指翠相連。撐起炎州半壁天。夜盞銀河摘星斗。朝探碧落弄雲煙。雨
餘玉筍空中現。月出明珠掌上懸。豈是巨靈伸一臂。遙從海外數中原。

送趙公子還蜀

柳花飛白綴征袍。擊筑酣歌別思豪。老氣逼人雙劍古。好風送客一帆高。五
湖烟水歸程遠。三峽雲山入夢勞。別後相逢更何處。引杯燒燭諭龍韜。

過沛縣弔張克勤

青山迢遞綠蕪深。欲弔孤墳何處尋。萬里遊魂今古恨。百年交誼死生心。雲
霄竟折升天翼。文彩空餘擲地金。幾度泗河河上過。悲風淒慘動哀吟。

春日郊行

三月韶光滿帝都。郊遊士女競歡呼。五花戰馬馱紅袖。百結柔絲絡翠壺。畫
困柳眠鶯急伴。春濃花醉蝶爭扶。書生對景愁虛度。也學乘風咏舞雩。

寄張練師

辭家學道入青冥。曉汲清泉晝斲苓。衣染春雲同鶴色。劍涵秋水帶龍腥。吟
成白雪風生席。歌徹青天月在庭。幾度緘書寄仙侶。蓬萊空闕隔滄溟。

多景樓

多景樓前景致多。倚闌吟眺奈愁何。浮雲京國生春暝。落日鄉關起暮波。浩
蕩乾坤心共遠。蹉跎歲月鬢空皤。醉來擊碎玉如意。仰面看天發浩歌。

輓張處士

少微星殞海天秋。漠漠悲風起暮愁。郡乘定書耆舊傳。仙遊眞訪羽人丘。雲
中鶴去茶煙歇。架上書成竹汗收。盛德不隨身共化。百年有子紹箕裘。

金陵卽事

六朝城闕久蒿萊。紫蓋黃旂帶運開。鷓鴣漏傳雲外觀。鳳凰簫奏月中臺。千峰山勢連吳遠。萬里江流自蜀來。此日江南非昔比。子山詞賦莫興哀。

寄題虎丘可中庭

玉宇澄清寶界平。一庭寒影恰相應。柱頭千載歸來鶴。石下三生過去僧。蟾窟依然光滿滿。虎丘空有氣騰騰。生公說法神聽處。此日來遊記我曾。

辛未歲過揚州懷古

秋風歸棹倚蕪城。一片閑情對月明。錦纜起鷗傷往事。青錢跨鶴笑狂生。吳公塘路已陳迹。后主觀花空有名。欲訪平山舊闌檻。有無山色暮雲橫。

歲庚午來自金臺。寓新河有金陵卽事之作。明年復至。因觀高槎軒詩。不意暗與之合。有如剽竊然。初實不知也。用廣其意。爲離詠二首云。

雲中雙闕俯秦淮。天外三山對鳳臺。二水合流趨派去。六峯飛翠過江來。金陵王氣千年盛。鍾阜晴雲五色開。愧我才非班馬匹。可能無賦奏蓬萊。父老依稀說六朝。當時伯氣已全銷。新亭別淚何須墮。古井妖魂不可招。瓜步客帆朝帶雨。長千僧艇晚隨潮。行人不用誇天塹。南北輿圖總屬堯。

和李太白韻寄題金陵

昔年曾作鳳臺遊。萬里長江人望流。龍虎峙形長拂闕。金銀厭氣謾成丘。眼空八表人間世。興寄三山海上洲。却笑古人多事在。烟波雲月起閒愁。

和李子搆都門春日韻二首

碧桃花底共鳴珂。雲淡風柔氣候和。輦路雨餘生嫩草。官河冰泮動微波。近天樓閣逢春早。向日園林得暖多。我有新詞三百闕。興來呼酒對君歌。寶馬雕鞍白玉珂。花雲淡蕩柳風和。梵宮密密關金剎。海子深深湛碧波。郊外踏青遊客醉。水邊脩禊麗人多。誰憐寂寞楊雄宅。門巷無人白嘯歌。

哭唐珊

珊時應舉道亡

洗耳沿途聽捷音。健音未到訃先臨。苗生南畝初成秀。雲出西郊未作霖。天上遽傳宣李詔。世間空有鑄顏金。青年妙質歸冥漠。負我平生望汝心。

舟中遇重九示同行友曾光啓

秋水蘆花似故鄉。客中無那又重陽。籬邊摘菊人應異。蓬底看山興更長。把酒不如前會健。登高無復少年狂。同行賴有曾光啓。共買村醪醉一場。

初讀書中秘與脩天下志書柬陳宣之

五鳳樓頭百八鐘。萬鴉飛動曉天紅。玉繩影轉瑤階日。金薤香生紫閣風。奪錦文章清禁裏。登瀛人物玉堂中。回看人世仙凡隔。弱水浮埃迥不同。

崢嶸傑閣殿東頭。聖代儲才禮數優。四庫有書資檢閱。九關無禁任觀遊。日華暖暎三珠樹。雲氣晴浮五鳳樓。海上仙山真浪語。玉堂深處即瀛洲。

寄所知

晉人風度楚人騷。不爲悲秋歎二毛。席地夢回雲氣濕。仰天歌罷月輪高。風兮覽德翔千仞。鶴也揚聲出九臯。有約蓬萊清淺處。碧桃花底聽雲璈。

南京給事中童志昂和李商隱無題詩韻南京

諸公多和之意蓋有寓間出命予屬和予村

學究也不能外題以爲詩姑詠史以復之

四首

大雅無人繼古風。周家轍迹一朝東。越裳白雉音塵絕。庸蜀金牛道路通。烏首百年終不白。宮烟三月尙餘紅。淳風死去無回日。天下紛紛類轉蓬。

莫向鴻溝覓舊蹤。一場春夢五更鐘。也知賜醢緣情薄。豈是分羹愛味濃。萬里使槎來苜蓿。半空仙掌出芙蓉。濛濛黃霧連天起。不見秦關百二重。

一自銅仙入洛來。天開草昧幾雲雷。千年晉水飛龍起。午後周宮控鶴回。山下玉環啼粉面。嶺南金鏡憶良才。繡袍華帽開金統。眞信人間有劫灰。

紛紛國步苦艱難。汗簡千年往事殘。夾馬營中香氣散。黃龍堆上凍翎乾。金

源運去讐方復。起輦魂驚骨已寒。日月齊肩終古見。照天光彩萬方看。

輓李克述先生之表叔

其子重遷其墓合葬

天上仙遊去不還。深林暮雨落幽蘭。庚桑過後鄉猶稔。賈誼亡來井未乾。五父衢開防墓合。九歌聲斷楚山寒。通家有子今文伯。爲發潛光石上刊。

輓茅山隱者

三茅峰下華陽洞。鶴怨猿驚失隱君。載酒無人問奇字。招魂有客賦騷文。塵埃長鎖楊雄宅。車馬頻尋白鶴墳。曾記題詩詠高致。不堪哀詎此時聞。

送尚寶漆卿使交南

旭日初升萬國明。鈿函玉札下南溟。符臺自昔瞻卿月。遠道于今望使星。老樹古香生桂蠹。亂山殘雨帶龍腥。茲行萬里真奇絕。好把新詩紀所經。

春日田園雜興

四首

二月春融土派甦。趁時農圃正耕鋤。曉犁破草翻新塊。晴甕分泉養嫩蔬。論

駘飛來牛背立。鷓鴣對向樹頭呼。老妻攜酒花間勸。醉倒殘陽手就扶。
生意津津樂趣深。一犁春雨萬家金。繞畦菜蕒初生甲。出水秧苗漸露針。藻
漾池心魚撥動。花藏葉底蝶穿尋。就中興思知多少。盡是東皇發育心。
二頃湖田五畝園。百年世業遺兒孫。風和鶯語笙簧巧。雨過蛙聲鼓吹喧。木
屐穿花沾露濕。桔槔澗水帶泥渾。老妻報到茅柴熟。相約鄰翁醉竹根。
漠漠平疇沙鷺飛。酌酌樊圃野鶯啼。緣針白水秧千畝。黃蝶青苔菜幾畦。脚
踏莓苔隨意往。手持竹杖與眉齊。興來獨得幽閒趣。滿眼春光取次題。

送王給事中使交南

中原才子稱華簪。萬里翱翔快壯心。論俗好傳司馬檄。歸裝寧載尉陀金。川
原遼邈荒唐縣。父老依稀說漢音。莫過遺墟問前事。鷓鴣啼處亂山深。

聞人說海北事有感

二首
天順癸未

故鄉歸路隔高雷。見說年來事可哀。村落日中眠虎豹。田園雨後長蒿萊。海

隅久已無春色。地底真成有劫灰。荊棘滿山行不得。不知當日是誰栽。
四海平寧獨亂離。轉頭已是十年期。獸蹄旁午侵城郭。燕壘縱橫傍樹枝。遠
客歸來前路失。遺民假息故城危。荒郊白骨宵飛燐。風雨啾啾正怨誰。

病起寫懷

寸心千里日懸懸。歸計今秋又似前。身似凍翎飛不去。事如春蔓苦相纏。還
家路梗須浮海。報國才疎只望年。幾度自憐還自笑。羨魚何事屢臨淵。(時
廣西搖侵海北界道路不通)

送陳緝熙修撰使高麗

海上天風吹節旄。玉堂仙子錦宮袍。詔頒龍闕恩初下。詩到鷄林價倍高。萬
頃鼇金浮曉日。一江鴨綠漲秋濤。遠夸未見熙朝鳳。爭看文章五色毛。

分得都門曉日送彭閣老歸省

承恩歸省出蓬萊。曉日都門祖席開。三尺陽烏離海上。九苞威鳳下天來。霞

光流彩朝宮錦。雲氣浮香注玉杯。此際道傍誰不羨。幾人親在位三台。

都城春日

宮闕巍峨紫氣高。西山東去碧周遭。天晴魚躍龍池藻。春老鶯銜御苑桃。映日暖雲流似水。捲塵香雨潤如膏。太平有象尋常醉。不用攜樽倒濁醪。

秋興 七首

楚客多悲况值秋。都將心事付東流。病來豈有空青石。寒到兼無粹白裘。丘隴纍纍多宿草。江湖泛泛總虛舟。芙蓉零落空洲暮。一夜間情白盡頭。
木葉蕭蕭下樹柯。御河流碧送晴波。西山鳥雀飛鳴遍。內苑菱荷積漸多。日映鳳凰新出穴。雲迷烏鵲舊填河。寂寥燈下悲秋客。懷古思鄉奈病何。
西風吹鬢冷蕭疎。宦况無多客影孤。海燕知時辭舊壘。塞鴻趁暖就新蘆。渴懷甫里烹茶竈。醒愛高陽醉酒徒。百尺高樓千里眼。岸連蕭艾水沉菰。
曉色蒼涼日色新。小窻睡起鳥聲頻。千秋蕭瑟三秋景。九陌紛紛萬井塵。雲

氣乍生猶淡淡。波光將動漸粼粼。都門共悵多離別。誰是臨歧贈策人。
六街晴色散秋光。一片浮雲接大荒。塞雁隨陽如有約。嶺猿叫月已無腸。寒
雲花下愁沾露。散步林間怕履霜。此日不妨多酌我。壺中廣大醉鄉長。
風掃長空積雨晴。短槐疎柳亂蟬鳴。沙頭鷗鳥尋常去。江上蘼蕪日夜生。嘉
樹有蹊荒蘚合。好山無數斷雲橫。却懷九曲餐霞客。獨抱寒蟾遡紫清。
秋風秋雨夜淒其。凭几沉吟有所思。驚鳥故投曾宿處。開花還是已殘枝。喜
看淡月穿雲出。靜數遊絲墮地遲。萬里鄉心千古意。興來聊誦少陵詩。

舟次直沽簡彭彥實同寅

潞河燈徹衛河渾。三水交流下海門。直北回看龍闕近。樓東遙望蜃樓昏。孤
城近水舟多泊。列戍分耕野盡屯。我有好懷無處寫。欲沽尊酒對君論。

送昆陵蔣容卒業南雍

東書攜劍去匆匆。此日眞成點額龍。天意不孤清苦士。世間寧有轆耕農。春

回南國鴻飛急。雲滿西郊雨氣濃。莫謾相逢嗟未遇。秋江隨處看芙蓉。

送王給事中使占城

銀漢清秋泛使槎。節旄晴拂海東霞。扶桑水接南暎關。析木天遊北斗斜。鷁首衝風龍伯助。鳳毛瑞世島夸誇。皇明威德今無外。莫諱中朝第一家。

送吳克恢南歸因柬王用先生

話別匆匆欲去遲。送歸因憶別來時。平安有信因君寄。竊祿無能報母慈。風雨十年多舊約。雲霄萬里更深期。寄聲爲問王夫子。何日相逢慰所思。

輓羽士

十二樓頭海月空。朝元人去藥珠宮。形銷忽作良非子。物化真成亡是公。玄牝養來神不死。庚桑過去歲猶豐。牀頭一卷黍同契。謾有彬彬萬遍功。

郊行日占

閑來策杖出城隈。信步徐徐踏翠苔。林下聞鐘知寺近。溪邊待渡喜舟來。一

聲清淚橫江鶴。幾點寒香映水梅。老我歸來機事息。等閒鷗鳥莫相猜。

蘇武歸朝圖

茂陵煙樹碧蕭疎。白首生還志不渝。面目依稀猶似昔。節旄零落已無餘。歸期不待羝羊乳。遠信真成雁寄書。頗有幽懷忘未得。夢魂時或到穹廡。

運籌亭爲韓都御史題

五嶺中間數仞亭。海雲山月總關情。三千稷下諸姜客。十萬胸中小范兵。談笑已看功業就。指麾能使鬼神驚。先憂後樂平生志。須仗忠貞答聖明。

春興 二首

塞雁乘春又北飛。越人何事未南歸。十年館閣虛糜祿。三月庭闈阻換衣。樹背時時勞夕夢。草心寸寸戀春暉。幾回喜懼交并處。屈指親年近古稀。百計思歸未得歸。夢魂夜夜到庭闈。愁心苦似丸和膽。淚點多如線在衣。愛日每憐駒易過。臨風却羨雁能飛。朝來聞報高涼捷。萬一歸程或可幾。

和童志昂給事自蜀督軍還貶壽昌令留別韻

纔捧綸音出禁闈。潢池赤子遽來歸。安邊自謂無遺策。平地誰知有伏機。送客江亭休贈策。逢僧野寺謾留衣。從來六月鷓鴣息。不久乘風又奮飛。

哭童大章庶子

萬里歸來不見君。老懷拍塞向誰論。素車白馬違心約。黑樹青林感夢魂。契誼半生情最厚。相思幾度淚潛吞。死生一盞論交酒。忍痛來澆宿草根。

過舊遊處有懷袁秉中

昔年曾向此中遊。把酒談詩夜未休。別後交遊雲四散。閒中歲月水東流。哀絃淒斷聲難續。醉墨淋漓迹尙留。却恐鄰家更吹笛。老懷哀颯不禁秋。

送祁至和郎中使高麗

鸞鷟天簪五色裁。中原使者下天來。白山祿水立菟境。玉珮瓊琚繡虎才。絕域膏沾新雨露。遠人驚見古罇臺。懸知不是乘槎客。肯帶葡萄首重回。

和楊維新學士先子除夜高詠詩韻

閑中日月靜中過。孤竹清風柳下和。文解送窮聊自劇。詩成泣鬼不須讎。頭顱種種遠如許。世態悠悠能幾何。不朽只消賢子在。尋常名利孰爲多。

輓沈時陽大叅之祖

青衫白髮老一鄉。人人薰德多循良。醉仙或過沈東老。惡少怕聞王彥方。黃鶴一去久汗漫。青山千古成荒涼。高年厚德已足羨。況有諸孫能顯揚。

輓淮安畢義士

江淮都會楚州城。過客咸知尙義名。晉鄙盡薰楊子德。邾人不愛魯侯盟。漆園千歲椿何在。蒿里三春草又生。多少鄰家需舉火。至今聞諱尙吞聲。

送陳宗堯侍講署南京院事

南北于今兩玉堂。儼如東壁望文昌。趨朝暫免通門籍。視事兼看給院章。竹

汗消青春晝靜。槐龍屯祿午陰涼。輕紅塵土長安道。還憶聯鑪傍苑牆。

題山水

山色空濛樹色深。人家住傍碧溪潄。半江月照天在水。五月風來秋滿林。遶世獨輸高士隱。披圖因見昔賢心。人間何處有此景。我欲因之寄越吟。

送李立之赴南京太常

奉常自古號清卿。君去南京分外清。案牘盡懸周典禮。官僚竝列魯諸生。函香每月朝鐘阜。訪古常時到冶城。却恨無由追驥尾。鳳凰臺上聽簫聲。

輓劉員外

以謗累謫戍死遼東

遷客年來盡賜歸。獨憐君去杳無期。春秋斷獄古今少。暮夜辭金天地知。遶鶴空聞留語在。燕烏堪歎白頭遲。百年公論今初定。欲擬招魂托楚詞。

醫士輓章

業精岐扁更能文。不出門庭自遠聞。常笑宋清書藥券。每非徐孺謁邦君。窗

前生意餘春草。江上愁心結暮雲。他日生芻何處奠。松間碑碣竹間墳。

秋日有懷

木落風高九月天。一聲塞雁叫霜前。黃花冷落愁殘蝶。紅樹淒涼咽暮蟬。夜沈雨聲添別淚。晴窗雲影伴孤眠。故交契闊成今古。俯仰令人倍愴然。

送畫竹屈生

東風吹散漕河冰。旋買吳船載酒行。野樹依依連故國。雲山點點引歸程。郢中誰和陽春曲。吳下多傳子夜聲。白首奉常無恙在。纔才應已付鄉生。

謁文丞相廟用老杜蜀相韻

泮宮西畔偶來尋。香火祠前氣肅森。柴市陰霾存積恨。崖門驚浪鼓哀音。更無地滴包胥淚。祇有天知豫讓心。我爲綱常連下拜。清風颯颯襲衣襟。

歲丙申六月伏中雨中待朝偶成

二十年前入禁闈。朝朝侍立看朝儀。頭顱種種疑非我。世道悠悠責付誰。人

到衰年情頓減。天將陰雨骨先知。可憐歲月閒中過。年少功名異所期。

得家書

老來肌骨怕寒侵。無夜家園不上心。萬里路行經半載。一封書到值千金。抗顏壁水知無補。營老菟裘念愈深。預報吾兒掃門逕。乞骸早晚便投簪。

九日次友韻

重陽無酒堪惆悵。況是東籬未有花。草木變衰人感物。關河迢遞客思家。秋容不斷天無際。晚景無多日易斜。白髮故人今我在。相逢不用惜年華。

歲己亥正月十日大祀郊奉旨分獻中鎮

聖皇秩祀蒞郊壇。分獻今年得霍山。奠璧禮行金闕下。燔柴煙起彩雲間。清風颯颯隨神至。瑞雪飄飄擁駕還。明日慶成應賜宴。奉天殿上侍龍顏。

送顧廷瑞赴袁州太守

交朋落落苦無多。臨老其如又別何。賓館自應長寂寞。詩壇誰與共吟哦。江

湖獨往情難忍。冰雪相看養聰瞶。佇聽嘉聲來闕下。玉河還擬竝鳴珮。

夢起偶書

秋來歸夢到家園。景物分明在眼前。樹挂碧絲榕蓋密。籬攢青蘂竹城堅。林梢飄葉重堆徑。澗水分流亂落田。乞得身閑便歸去。看魚聽鳥過殘年。

送人遊嶺南

君行是我來時路。贈別因思舊所遊。綠柳春風巢翡翠。碧蕪寒雨叫鉤鷗。三冬氣暖人揮扇。八月天清蜃結樓。風度祠前拜唐相。爲言早晚便歸休。

送張養正都憲巡撫宣府

清朝邊鑰付儒臣。坐倚鞞鈴護北門。帥閫得人重有范。將門生子果如孫。烏臺憲度新威振。鸞掖文章舊價存。共喜禁中頗牧出。臨分無惜醉芳尊。

楊叔瓚哀輓

弱冠相逢今白頭。別來又是十餘秋。他年舟過期重會。前日書來未及酬。無

命遠成終古訣。有才可惜半生休。朝來忽得江南計。老淚臨風不覺流。

送董倫矩庶子頒詔朝鮮 戊申年

天王出震紀新元。又值高皇建極年。詔使遠從天上下。綸音遙向海東宣。四方專對詩三百。兩月經行路五千。好爲天朝全大體。篇章珍重莫輕傳。

思歸偶書

歐公思穎終歸穎。老我懷鄉不得歸。剩水殘山俛我久。老妻稚子竟誰依。在陰獨鶴鳴無和。向晚棲禽倦尙飛。手植故園松與竹。綠陰盈茂昔成醫。

遊山寺寺僧攜卷求詩因次人韻

暇日來遊祇樹林。焚香話久落花深。竹光日透成金界。鳥語風傳雜梵音。草繡嶺頭成紺髮。月沉潭底印禪心。老僧攜卷求詩句。乘興揮毫試一吟。

朝退偶書

一生辛苦事經綸。待得時來志已湮。乾鵲結巢寧爲已。春蠶作繭自纏身。相

逢謾說明朝話。自分甘爲此世人。強曳病軀循壁走。老來無復舊精神。

客有談及家林者偶成

八月秋高露氣涼。悲時感物倍思鄉。白頭倦值文淵閣。清夢頻歸學士莊。椰殼脂凝將減水。椰子出正分房。尙方珍饌徑嘗徧。却憶家林野味長。

重陽 三首

滿城風雨近重陽。籬菊含滋欲放香。明日陰晴殊未定。先時歡會又何傷。茶萸細看今還健。竹葉新醅且預嘗。幸免催租人敗興。不妨連日醉壺觴。八日滿城風雨作重陽。籬菊滋滋濕更香。不用登高狂落帽。正湏開口笑傳觴。村醪彷彿宜城醞。田舍依稀崔氏莊。乘興盡歡同一醉。明年誰在又誰亡。九日滿城風雨送重陽。不獨蜂愁蝶已忙。乘興還來聯斷句。開懷重與盡餘觴。湏知佳節難常遇。未必寒花遽減香。笑殺牛山垂淚客。逢時不樂却悲傷。十日

江行

緩步沙頭散晚愁。行隨流水向東流。山吞落日紅垂沒。樹接飛雲白暫留。暝

色入林天向夕。涼風飄葉景初秋。閒中却憶滄浪叟。高臥忘機對白鷗。

迴文

夜宿江館有序

歲庚午，歸至金陵。寓新河客邸，鄉友馮元吉誦宋人周明老龜山迴文詩，命予兩和其韻，以夜宿江館爲題，明老詩曰潮隨暗浪雪山傾。遠浦漁舟鈎月明。橋對寺門松徑小。檻當泉眼石波清。迢迢綠水連天碧。藹藹紅霞映日晴。遙望四郊雲接海。碧波千點數鷗輕。用意曲拆，命辭瀏亮，信爲難及矣，但其中潮浪浦泉波水等字太多，不免重復，旣曰綠水連天，而又有雲接海之句，一意而兩出矣，當漁舟鈎月之時，又安得紅霞映日乎。

潮生海岸兩崖傾。落月江楓映火明。橋透白波流水遠。屋連紅樹帶霜清。迢迢漏盡寒更曉。片片雲收夜雨晴。遙望楚天江渺渺。荻蒲盡處落鴻輕。

集句

集唐句送魏孔淵御史謫判潼川

鳴玉朝來散紫宸。鳳樓回首落花頻。鷓鴣得路爭先翥。鸚鵡才高卽累身。直以疎慵招物議。不趨權勢正因循。只因宋玉閑唇吻。自保曾參不殺人。謾說簡書惟物役。猶將談笑出風塵。眼前好惡那能定。夢裏輸贏總未真。芳草有情皆礙馬。江湖何處不通津。長空淡淡飛鳥滅。客舍青青柳色新。東澗水流西澗水。錦江春似曲江春。長沙不久畱才子。莫厭傷多酒八唇。

行路難

蜀道難。難於上青天。蜀道易。易於履平地。行路難。不在水。不在山。只在人情反覆間。

悼亡

芙蓉肌骨綠雲鬟。傷別傷春更萬端。去日漸多來日少。別時容易見時難。春

蠶到死絲方盡。滄海揚塵淚始乾。無可奈何花落去。五更風雨五更寒。
一別音容兩渺茫。不堪端坐細思量。雲收雨散知何處。燕語鶯啼亦可傷。誰
愛風流高格調。我憐貞白重寒芳。愁來欲奏相思曲。只恐猿聞也斷腸。

歌行

竹林七賢圖

炎精無光蜀燼銷。當塗墜地馬蹴槽。矯時之枉遂過正。棄置禮法如毫毛。太
行之陽富脩竹。猗猗萬竿似淇澳。一天爽氣風聲清。滿地涼陰雲影綠。風流
醞籍三四子。適從何來聚于此。中有一人龍鳳姿。土木形骸出泥滓。神交
一世皆名賢。渾金璞玉人中仙。攜琴沽酒對青眼。欣然神解皆忘言。或作絕
交書。或爲大人傳。窮爲途中哭。同向樹下煨。頌酒有德。以酒爲名。羣豕每
同飲。五斗乃解醒。寓情廣陵琴。感舊山陽笛。黃公爐畔互酣歌。廣武觀
前閑歎息。作者七賢矣。一去不再來。荒山旣無舊墟落。枯株豈有餘根荖。

邱 文 莊 公 集

我觀竹林圖。爲作七賢歌。晉人曠達尙玄語。其源起自王與何。二人開其端。七賢爲之倡。自從決去禮義防。狂瀾頽波莫能障。後人欲知七賢誰。稽山兩阮劉王向。

題山水

我本山中人。老作朝中客。玉闕金門非不戀。碧水丹丘也須憶。每當騎馬想牽牛。幾聽鳴鑿思棹謳。夢魂不怕江山遠。夜夜飛歸海上洲。欲歸未歸止惆悵。偶見新圖心悒悒。恍如去國見似人。閨若逃空聞足響。上題一塵不到處。境靜人閒多雅趣。彷彿疑爲舊所居。分明似識曾行路。記得山中睡起時。倚閣停雲有所思。忽然來我平生友。心欲急見嫌舟遲。圖中便是心中意。風流畫史何多致。半幅輕綃萬里思。無乃筆端能縮地。對此融心神。居然念鄉曲。江上愁心千疊山。雲間遞迹三間屋。憶年十五心尙孩。十八年前曾夢木。木已合抱孩白頭。某山某水。何日重釣遊。爾時江村竹屋下。却望紅雲在天際。漂渺五城十二樓。

剡溪圖

誰人寫此滄州趣。逸出高人隱居處。千疊坡仙心上山。半壑丁公夢中樹。江天漠漠雲悠悠。一塵不到境更幽。阿誰青天白日裏。却駕山陰乾輿舟。舟從天際來。人倚窻前立。心急恨到遲。興盡愁歸亟。人生百歲須臾間。交游心事千萬端。不如意事十八九。朋簪會合良獨難。所以豪傑士。神交反千古。未見恒相思。既見愁遽去。幸此太平世。有此數日閑。拏舟時相訪。罄我平生歡。心交苦不多。好會亦云罕。如何未相見。中道俄然反。晉人虛浮固可嗤。王戴交誼薄可知。須知朋友五倫一。請看此圖歌此詩。

詩餘

寄題岳王廟

爲國除患。爲敵報仇。可恨堪哀。願當此乾坤。是誰境界。君親何處。幾許人才。萬死間關。十年血戰。端的孜孜爲甚來。何須苦把長城自壞。柱石潛摧。

雖然。天道恢恢。奈人衆將天拘轉。回歎黃龍府裏。未行賀酒。朱仙鎮上。先奉追牌。共戴仇天。甘投死地。天理人心安在哉。英雄恨向萬年千載。永不沉埋。（右調沁園春）

秋思

雲散嶺頭光。葉落山形瘦。目斷遙空雁不來。正是悲秋候。

兩點水痕圓。風蹙波文皺。顧影徘徊落小池。頓覺人非舊。（右調生查子）

江村

鷺破青林。鳧分碧藻。江村景致天然好。一塵不到萬緣空。人生只合閑中老。

古樹巢雲。落花繡草。四山絃管啼幽鳥。醉來白眼望青天。人間別有坤乾小。（右調踏莎行）

春日會友人梁氏園遊賞

城闕峨峨禁禦重。梁家池館鬧春風。韶光盡在花畦畔。生意都來草徑中。

天廣大。日從容。十分春色萬枝紅。醉中記得西楊語。莫待銀蟾生海東。（右調鷓鴣天）

昔高榭軒作水龍吟詞、詠紅竹、予誦而喜之、欲擬作一詞、未有以起其

意者、適余友志昂奉常、以松雪翁釣勒竹卷求題、故爲作此詞、

住人空谷。隕落猗猗藁。淚盡粉乾銷膩玉。翠袖僅餘邊幅。

興與公子清狂。臨池不學鍾王。聖帚掃成飛帛。雕鏤金薤琳瑯。

（右調清平樂）

和東坡韻題赤壁圖

黃州遷客意翩翩。不是風塵中物。一葉扁舟凌萬頃。氣蓋烏林赤壁。孟德雄才。周郎妙算。到此俱銷雪。橫江一笑。眼中誰是英傑。

一自兩賦成來。山川勝槩。倍增輝發。鶴夢簫聲隨水去。只有聲華難滅。靜對新圖。閑歌古句。豎起衝冠髮。何時載酒江心。重沂流月。（右調酬江月）

題情慰奚原啓下第

佳人薄命。歎江粉幾多黃土。豈是老天渾不管好惡。隨人自取。既賦嬌容。又全慧性。却遣隨凡苦。不平如此。問天。天竟無語。

可惜國色天香。隨緣流落。飄泊今如許。借問繁華何處。在多少樓臺歌舞。紫陌春游。綠窻晚繡。過客驚眉嫵。人生失意。從來無問今古。

邱文莊公集

卷之十
歌行

八二

32
7/12

南海集叢書一覽表

瓊臺耆宿集	明朝詩選	白真人詩	關道堂	松筠堂	楊齋集	三賢詞錄	中秘遺稿	張事軒	天池草	陳檢討集	傳芳集	鷄心集	消丘集	嶺海詩話	嶺海合集	冊名
-------	------	------	-----	-----	-----	------	------	-----	-----	------	-----	-----	-----	------	------	----

白真人	雲茂琦公	張岳松公	王承烈公	唐胄公	陳是集公	張子翼公	王宏誨公	陳緝公	唐西洲公	王佐公	邢宥公	丘文莊公	海忠介公	丘文莊公	著作者
-----	------	------	------	-----	------	------	------	-----	------	-----	-----	------	------	------	-----

編輯者

王堯雲先生

已出版
已出版
以下十四種
俟參攷校訂
及發售預約
後方陸續翻
印

海南叢書第一種

丘海合集
下

後學王國憲題

◀ 行印局書南海口海州瓊 ▶

24615

海忠介公集

跋

昔讀明史至公諫世宗一疏。竊歎其立言正大。發乎至誠。雖拒諫之君。亦爲之感動太息。至於宦官宮妾。咸心折其忠。此豈中無士取辦於一時血氣者哉。同治歲在己巳。予奉命來守是邦。得讀公與邱文莊集合刻。即府志所謂備忘集。欽定四庫全書提要。稱其振頑醒曠。爲救時藥石。尤愛滌穢解結。非大黃芒硝。不能取效數語。道盡公生平心事。蓋公之學問。以剛爲主。得孔孟惡鄉愿集義養氣宗旨。觀其司鐸南平。不愧曹月川霍州之教。滔安叅評。首啓呂新吾明職之箴。嚴師教戒一篇。得力尤在不自欺。雖平日罕言性理。而致知力行。其造詣固已深矣。夫生死出處貧富取舍之間。在聖賢祇靈其所當爲。而胥於是乎徵道力焉。公志孔孟之志。故發著者若是。瓊之士庶。靡不樂道其事蹟。以爲鄉里光。而或未窺公之深。予因讀斯集而闡明之。俾取法者知所趨向云。後學馮端本謹跋

集 公 介 忠 海

發

二

彙引

許文正嘗語人。有書也。湏焚一遭之說。夫坑儒焚書。秦之所以爲暴無道也。而文正之言。若秦之與。文正非與秦也。自炎漢以迄於元。紀錄之繁。文籍之盛。汗牛充棟。災木費紙。不足咎也。其聲實不中。乖違正道。爲古先聖賢累。爲六經語孟蠹。誠若莠之亂苗。鄭聲之亂雅樂。鄉愿之亂德。君子不容不深惡之。自元迄今。殆有甚焉。使文正見之。又不知當何如其爲言也。然文正與秦。至文正之身。則又有魯齋文集行於世。夫文正之與秦。不得已也。文正之不免於爲文。亦文正之不得已也。稱平昔安有所作。濫稱文章者。欲效近代唐山人置瓢。棄之江流之中。以還造化。而又私念以爲出之吾心。本諸性命。造化賦予於我。而我爲洩之。或於六經語孟有輔翼焉。且今時俗議論。自以爲是。牢不可改。亦或有以破之。暴秦有作。不居可焚之列。夫吾人有言。莫非造化。置江流以還造化。不可謂無見也。然天下之人。賦予稟受。出之造化。猶之我也。或惑焉而踐之有未盡。或反焉而行之有不

中。操造化之予於我者相與覺焉。且同志之士。得有所執。凡我言之未當。議之未詳。取爲我規焉。我也人也。互相砥切。均得以還夫賦予稟受之故。較之唐山人所爲。有大焉不猶爲可耶。近時文人有作。必求名人君子一言置簡首。謂蠅附驥尾。亦一日千里。而借其言以信之天下後世也。夫使吾言無當。雖聖人吾與焉。天下之人。其心其性。原之造化。是非有公。不能飾也。使吾言於道亦有合焉。聖人不吾與。天下後世不吾與。吾心具一造化。自有的見。不可轉也。夫人有言。亦求之吾心。質之先聖。以參考焉而已矣。不信之人心。而信之人言。非信也。用是不自嫌忌。取平昔所作。自編叙。自爲一語。識之以告同志。嘉靖壬戌仲夏朔日瓊山海瑞國開甫書

海 忠 介 公 集

海忠介公傳

海公諱瑞。字汝賢。一字國開。其上世未詳。在國初以軍功世廣州衛指揮某者。隸籍番禺。洪武十六年。答兒從軍海南。著姓瓊山。不數傳。族氏蕃衍。有諱寬者。領鄉薦。知閩中縣事。卽公大父。寬子稟生諱瀚。卽公父也。公生而秀挺。稍知識。直欲學做聖賢。以聖賢教人。千言萬語。只是欲人識其真心。率其真。而必爲聖賢。不爲鄉原。力破夫無害從俗之說。居室間。人所易忽。公獨謂此正君子造端之道。位內位外。飭已刑家。一切男女僕役。至老死不踰閭閻相往來。處伯仲嫻嫻。肅肅離離。坐立跪拜。惟禮是閑。從子鵬與公年埒。同鉛槧。同上春官。言必名。事必稟。母稍假。司徒郎二溪楊公。鄉先達。年最長。於公爲姪婿。公纔弱冠。必持叔丈禮。不以長故。貴故。少貶。在郡庠郡博且嚴敬之。其論文。則曰不過如畫師之寫神耳。窮一生讀書作文。於家國身心。毫無補益。何異宋人所謂可惜一生心用在五字上乎。故公之用心。匪特恥爲聲詩。卽古今文詞。要以闡發性靈而

止。不稟古則而自成一家。大率如其人云。嘉靖丙午年督學林公。刮目公文。廉其行誼。大加獎賞。適出婦某訟公。且誣裝資。林公詰問。以出妻令其可嫁對。至所誣裝俱不辯。惟待償而已。林公益重之。己酉督學蔡公試題。有不曰白乎之句。手公卷。珍翫移時。因詢公隱事。歎曰。茲所謂涅而不緇者耶。壬子舉孝廉。會試不第。卽毅然曰。士君子由科目奮跡。皆得行志。奚必甲第。遂就教。而瓊方平剿黎岐未定。公始舉于鄉。所對平黎策。有開道立縣之議。得者已才公經濟。至是伏闕上書。復中前說。聞者避之。下兵部議。覆獻圖說。計便宜。燦若指掌。而議竟寢。授南平學教諭。首揭朱子白鹿洞五規。輔漢卿會粹六條。並摘鄉原忠信廉潔之似。孟子不見諸侯之守。孔子申棖剛者之辨。反覆啓迪。以發真心。諸生講讀升散。必宿號舍。家有冠婚諸事。稟請循禮而行。甚而減年微細。亦曰即此陷於不誠。更學何事。相見拜揖外。不許更持一貨物進。叅謁禮儀。斷斷執會典憲綱。力以其身爲標幟。明倫堂不跪。道傍不跪。迎送國門不出。上官至。一見後。不

海忠介公集

復同有司作三日揖。郡守諸大夫視學升堂。教官謁左右跪。公居中挺立。諸大夫色艱。語侵曰。安所得山字筆架來。蓋指公也。公志在行道。謂區區禮節不見諒。此闕陷世界。何能有濟。遂告休。郡丞某。恚公甚。欲聽去。太守某獨媿悔。曰。彼所執是。吾誤也。時大司空朱鎮山公爲閩學憲。聞之。再三慰留。聘赴正學書院。修書。按院至。率諸王侯郭門。有分子道某先進見。公長揖不跪。叶舌曰。世有若教官耶。會典憲綱。故事久廢。獨創舉于公。更相歎服。抗顏南平。四年如一日。守相臺祭。咸交稱之。閩中驛傳。不命有司。獨檄公酌議。公謂驛道千瘡百孔。盡由近年關文冒濫所致。番一切裁其不合法例者。復國初五馬三驢之法。此爲上策。若因職級崇卑。應付多寡。而借關不行。中策也。禁止迎送勞擾。就中稍爲調停節減。下策也。蓋中策下策。公已謂非國初之舊。而公之由縣令至巡撫。則從上策矣。戊午。擢知漳安縣事。履境。睹病苦萬狀。歎曰。天下事都被秀才官做壞了。豈直不方食。殘剝充囊橐者。即賢者亦鄉原正道。交戰胸中。用是申飭所行事宜。由縣

而丞、而尉、而師儒、而里老、而生員、而吏胥、著爲令曰。淳安政事。相與執守之。其自奉也。俸薪外。絲毫不侵。家僮下令樵採。庭甚清閒。吏書無事。聽其從農從商。里甲故用銀每丁至四五兩。公只徵一錢有奇。百凡用度。取足於是。上官檄縣取金餽。舊多委曲應之。公惟於贖鍰內辦有則送。無則已。撫按出。例陰遺其吏書。無則禍至。公獨曰。充軍死罪寧甘受。安可爲此穿窬舉動。外官入京有交際。謂要做官不得不如是。公獨曰。盡天下而不爲上官之賂。豈盡不遷。又盡天下而惟上官之賂。豈盡不黜。安可身居下流也。淳故多淫祠社學。獨缺公殿祠宇。爲社學振興士子。以道義不以勢利。時都御史鄢氏。挾權相。總制八省。威燄甚。其子過淳安。索夫馬。不與。怒。捉輿臺。非理凌虐。公不顧。密執鄢關防詐僞中所云申文得鄢批。悉捕按如法。先是鄢憲令巡歷所至。務爲節省。而其實不然。大率有司皆窮極淫靡事之。動費千百計。程當一日至嚴。嚴守相戒。盛供具以待。公獨上稟曰。傳聞所至與憲牌異。欲從憲牌。懼招尤。欲從傳聞。恐

海 忠 介 公 集

違憲。下邑疲敝。未知所從。鄙按稟。怒甚。然素聞其強項。亦歛威去。嚴守知公具稟。故慮禍且不測。迨鄙事竣。嚴諸官故無害。太守謝曰。好了淳安百姓。難爲汝。難爲汝。然鄙雖陽屈公。陰嗾私人袁巡。謾曰。不驅海疆項。何以持風憲體。袁既受頤使按淳。又見公迎送不遠。供應不隆。有所鈞付。不唯唯應。諄曰。汝卽欲學府官樣。還未還未。已而公給由申呈駁云。方呈給由已爲陞任狀。不准考。竟論公。然公無事可摘。尋有通判嘉興命。又以袁論故。仍以原職改調。公聽調赴部。朱鎮山公貳銓曹矣。隆冬盛寒。公見猶服絲布。且敝。朱公曰。卽貧不能製一官服耶。公始易一黃石絹。朱公爲言公清望於家。宰嚴公。其隣邑興國適缺令。遂改公補之。公抵任。察地瘠民貧。歲徵不滿什之伍。弊在浮糧。乃條八事。上南贛都御史吳堯山公。次第請行。獨急清丈。清丈甫畢。陞戶部主事。蓋鎮山公力也。公以太恭人怯北寒。發王恭人攜二男隨歸。輕身北上。旣視事。見肅皇帝一意立修。綱紀廢弛。慷慨上陳。責皇上以父子君臣。夫婦之薄。土木醮修。服食桃藥之

妄。散爵祿。耗精神。君道不正。臣職不明之失。批鱗逆耳。侃侃數千言。疏始入。訪問鄉庶吉士王公于玉堂公署。自分必死。所遺後事。惟白金二十兩。曰死於爾乎殯。還我首丘足矣。對酒論文。談古今治亂興衰甚悉。語及士大夫立身行己。惟以事事認真集義養氣爲主。徐曰今之醫國者。只一味甘草。處世者只兩字鄉原。正道何由而復。語畢。從容赴朝房席藁待罪。鼎鑊自甘。絕無纖微可憐之色。乙丑季冬疏入。逾年丙寅數月不下。時有厥衛人在公左右。偵探公終日子。無所顧畏。一日忽下公獄。論死。中外失色。聞公疏入時。上創覽。怒甚。抵其章於地。已復取置御案。日再三讀。感動太息。稱有比干之忠。又密諭輔臣云。他說的都是理。但言過激爾。遽加刑戮。恐後無此人了。讞獄雖上。竟留中。莊皇踐祚。首奉遺詔。出公於獄。復原職。尋改兵部主事。丁卯晉丞尙寶。旋丞大理右。七月轉左。適有波羅之役。奉使回省。公遵令。申行出使禮。三司諸公。率以鄉官忽之。而公自處甚峻。十一月。陞南京右通政。復迎太恭人就養。己巳春正月。改通政司

海忠介公集

右通通政提督贍黃。六月陞右僉都御史。總督糧儲。巡撫應天。撫故與按並彈壓一方。欲有規畫。必衝隲後行。公則謂撫按各有專責。不得相侵。獨以昔所爲教南平。令淳安與國者。潤色擴充。爲督撫憲約。意蓋主於黜貪墨。擿彙強。矯革浮淫。釐正宿弊。令既布。郡邑吏凜凜競飭。賄者望風解印綬。權豪勢宦。斂手屏息。至移他省避之。有顯者赭其門第以居。聞公明日至。一夜遂易而黜。監造中貴某。素驕橫。出入肩輿八人。一見公。即貶損肩輿。人遂減半。吳故有淞江匯震澤入海。瀕江田畝。灌溉弘多被潮嚙。淤爲陸。議濬者屢迄無就。民有謠。惟海龍王始開得耳。至是公議開。實應民謠。按院某者。素惡公壓已。故爲相左。且欲按劍尋其後。公毅然任之措處。公羨召募丁。作乘輕舸。往來江上。督畚鍤。不旬月報竣。役成而民不勞。按院某驚歎曰。萬世功。被他成了。至今吳民德之。江以南。貧富相傾。弱者率投獻田地豪家以爲奸利。而此離瘠苦之狀接於目。侵占壓奪之訟聚於庭。公令受獻者悉退還。或許贖。恩厚如華亭相公家。亦義勸其退田不

已。蓋公嘗論欲天下太平。惟行井田。井田壞而不復。惟有亟奪富民田一法。至不得已而限田。而均稅。下下策矣。然猶井田遺意。故兩宰疲邑。皆用清丈。茲又令獻鬻還贖。意亦仁哉。顧勢豪沿襲。腹誹唇稽。竟以奪富民田中公。而舒戴給事章交至。解撫事。專督南京糧儲。方巡撫候代。而糧儲裁革。實以計去公也。公以庚午四月回籍。閉門却掃。爲終焉計。自始仕至此十八年。祿入僅買居第一區。祖田十畝外。無益。惟治太恭人葬事。兵憲陳公助贖金。始置墓田數畝耳。居恒不給。交際所入。輒周戚里貧乏。邦大夫造廬。諮民瘼。問行政得失。必纒纒正言之。恥面諛。亦罔及其私。曾有吏書算田畝。陰爲公減一畝八分。公清出。不謂其厚已。面正之。山水諸癖一無好。惟喜讀書。所著述如泰伯等論。多破除俗謬。尤樂引進後學。家居十餘年。日爲課執論說經義不輟。平生有用世志。嘗讀嚴子陵傳。至足加帝腹。歎曰。吾人一身備萬物之理。當以萬物一體爲己任。有君如此。安忍負之。歸未幾。薦者踵至。都諫雒涇坡等會薦有忠貫日月。望重華夷之語。兩

奉上命。遇清散員缺起用。嗣是御史若詹。若夔。若梅。若王。都御史若郭給事。若王。各具疏薦。甲申冬。鄧按院純吾報命。如會薦然。乙酉正月。起僉南臺御史。未至。以爲南吏部右侍郎。海內聞公起。莫不舉手加額。公是時年已七十有二矣。聞命束裝就道。自瓊至峴岡。家僕皆徒步。有一小僮。亦祇攜附前輿。不與馬。又自五羊至上新。惟坐一小船。寂無知者。五月履任。冢宰丘月林尙未到。公署部事。見兵馬司票取辦公謙百物。又見該坊送各衙門取應票。共三百餘紙。歎曰。以五城當一京千百官出入用度之擾。誠難而苦矣。吏部長六曹。安不可念。先百姓。遂張示。禁革故辦事官吏。有輸銀公費新任賀禮。一切革除。并疏治安要機。謂欲安百姓。先守令。欲督守令。先司道。欲督司道。先撫按。而致望于閣部諸大臣。歸本於君身治安之要。誠無易此。顧獨憤貪殘滿載論劾不止者。蓋起於改枉法。贓八十責絞律。從雜犯准徒許贖。非重刑。決不能懲。以故援霍文敏請復枉法律疏。因及國初尙有剝皮囊草。特以明其言必可信。觀者不察。遂謂欲剝皮令焉。且歷

舉今政以責難於君曰。願皇上以矛茨土階之心。居九重金闕。持智者行所無事之術。御一日萬幾。見堯舜。毋見天子。言真語切。而近於懇。卽帝心亦且難之。甲申二月。疏上。則有南右都御史命矣。公用世極鏡。上用公亦極鏡。決歲三遷。咸屬睿眷。自此疏出。忌信參焉。梅房御史。遂憑藉雌黃。大使詆擊。惟彭君遵古。諸君壽賢。顧君允成三疏。乃足昭正氣。植善人耳。公雖拜命履都御史任。而歸志已決。屢疏乞骸骨。第國是未清。主眷未衰。火甲夫差題議未定。時且大計。愛憎叢煩。是非難一。公獨與冢宰李公。秉公持正。毋縱毋苛。衆咸服之。至火甲止爲地方防守。原無襍差。今一京千百其官。率於茲焉取用。雖節經題革。亦竟廢公。乃一正之。使官不侵民。民不病官。總之爲簡可照煩一冊。上以稽。下以應。畱都民。若弛重負。出湯火矣。比夫議既定。歸志益決。六乞骸骨。不允。丁亥秋。率於畱都。前三日兵部送柴薪。多耗七錢。猶扣回。病不藥。臨危。男僕猶不入內。無一語及身後事。檢篋內。僅祿金一十餘兩。綾紬葛各一。子姓兄弟無一在側。二媵四

海 忠 介 公 集

僕又愚弱。不任便衣。沐浴含歛。悉都御史王公。與諸御史左右襄治。噫。公何以得此於諸公哉。南都諸縉紳相顧悼曰。天不佑善。俾正人氣奪。百姓悲號。若喪慈母。上聞之。咨嗟纏惻。申命秩宗著典禮。祭八壇水衡致金錢。庀窀穸。遣行人治葬。贈太子少保。諡忠介。

集 公 介 患 海

傳

十六

海忠介公傳

閩中何喬遠撰

海瑞。字汝賢。瓊山人。自其爲舉人時。則上書。言其本土兵事。謂瓊州一府。顯獨海中。其地綿亘二千餘里。黎岐中盤。州縣旋外。譬之於人。黎岐心腹。州縣四肢。黎岐爲寇。心腹之疾也。古先王治夷狄。寇亂征討。去不窮追。蓋施之要荒地。若瓊之黎岐。與州縣百姓。雞犬相聞。魚鹽米貨相通。其間雖多峻嶺叢林。彼之出入往來。自有坦路。自國初以至今日。戍守整飭之費。姑且未論。若弘治十四年。則征昌化縣黎矣。嘉靖二十年。則征陵水縣黎矣。興師十萬。餽餉以數十萬。動以三四年之力。然竟不能使黎寇羈服。劫邨殺人。無歲月無有。臣生長於瓊。飮聞黎患。痛瓊民歲月罹害。虛費兵糧。迄無一臣爲地方長久計。以舒陞下南顧之憂。夫瓊地。瓊山縣處其北。崖州處其南。萬州處其東。昌化縣處其西。自瓊山縣轉西。歷諸縣至崖州。計程千百里。自崖州轉東。復至瓊山縣。計程九百四十里。是瓊州府。自南徂北。自東徂西。以圍三徑一計之。大約七百里程也。而黎岐盤踞。其地不

過方四百里而已。區區方四百里地。自國初至今日。害我赤子如此之毒。費我兵糧如此之多。文武臣。無人竭力盡忠。爲瓊遠計。爲陛下當事者。是以黎寇移去。大兵一退。旋耕其田。旋處其地。生長積聚。旋又寇害。若使兵後再計。開通道路。設置縣所城池。峙其中間。則崎角形立。蠶食勢成。日摩月化。無復黎矣。夫黎人所居。皆寬廣峒場。膏腴田土。非得其地。不可耕而食也。諸黎有輸賦役者。有習書能正語者。非得其人。不可蓄而使也。向弘治中。開道立縣。可無嘉靖大征。嘉靖先後開道立縣。可無歲歲鵬勦。奔年守戍。諉之曰地險且惡。勞師無功。藉口聖王。不治夷狄之說。皆苟祿偷安。不爲陛下當事者也。今距大征。僅三歲許。黎人尙懷我威。遺黎尙未生聚。開道立縣。正惟其時。惟陛下勅下兵部。使兩廣撫按熟計之。卒不施行。一再落第。便就授南平教諭。曰豈必甲科。乃行所學哉。既至。御史行軒詣學宮。令長以下皆伏謁。瑞平立不跪。曰若至臺院。當以屬禮見。此堂乃師長教士子地。不當屈體。兩訓導夾瑞而跪。瑞立其中。時語之筆架博

海忠介公集

士。瑞教諸王以古聖賢道。束脩饋遺盡却去。上官始怪之。後知之。反加禮
踰等。遷淳安知縣。所以爲縣革去常例之無名者。俸薪外。不取絲粟。僮僕
出縣。舍艾楚中林。吏胥公事畢。各還家爲農治生。從其木業。其治縣精詳。
凌襍煩苛。無不明清。至於丈量之則。兵陣之法。濟饑之物。草木之實。悉出
示民。總督都御史胡宗憲子。還自父任。索驛夫。不給。倒懸驛吏。傳亭
下。瑞曰。胡大人清廉。無二出教。當其行縣時。屬官不得侈帳具。續食。今其
裝重甚盛。必非胡大人子。發裝金數千納之藏。馳告宗憲。宗憲無罪也。都
御史鄒懋卿。以總理鹽法行部。携妾自隨。妾裝五綵輿。十二女舁。令長
跪上。食廁飾文錦。溺器用白金。至瑞縣。供帳甚疎。言邑貧不能容軒蓋。請
遂行。懋卿怒甚。故聞其發。胡總督裝。斂威去。瑞之言曰。知縣者。知一縣之
事。一民不安。一事不理。皆知縣責也。上而朝廷。吾父母。中而撫按藩臬。
僚屬過客。鄉士夫。吾昆弟。下而吏書。里老。百姓人等。吾子姓。遇之各有
正道。若謂只可潔己。不可潔人。人人生謗。若謂不可認真。認真取禍。不願

朝廷之背否。以鄉愿自待。以鄉愿待人。棄吾子姓。欺吾昆弟。莫甚焉。加派增賦。取民之財。以奉過客。悅卿士大夫與士子者。能此謂通。不能謂拙。其言曰。不過一開口而已。不知此口一開。惠私一人。害千萬人。不可閉也。曰。不過費一紙而已。不知此紙一發。惠私一人。害千萬人。不可發也。夫絹出於桑。糧出田畝。朝廷取民。不爲厲也。加派增賦。動以朝廷爲口實。爲欺與謗。抑何甚哉。竊見今天下人才。嘉靖不如正德矣。正德不如弘治矣。弘治又不如成化矣。先朝待士以薄。今以厚也。待士以薄。非薄士也。重道義。不重勢利。雖有饋遺。取成禮而已。故其時士子勢利之心輕。待士以厚。非厚士也。勢利矣。士子未出門。而勢利之心先生。及得一官。何所不至。然則先朝待士之薄。乃厚士也。今日待士之厚。乃薄士也。夫所謂待士之厚者。非從天降。非從地出。取之民而已。昔之士子。勢利之心不生。故人皆得殷殷屯屯。今之士子。生其勢利之心。較之昔人居官。所得十百千萬。然則小民之多困憊。士大夫多富足致之也。士生先朝。何幸遇待士之薄。使已無

海忠介公集

媿於士民。生今日。何不幸待士之厚。奪其衣食。日就困憊哉。瑞居淳安三年。遷嘉興通判矣。與同時爲慈谿知縣者霍與瑕。亦粵人。其清鯁不屈類瑞。鄢懋卿嗾巡鹽御史劾之。瑞與瑕俱落職。瑞以故秩調興國。治如淳安。擢戶部主事。是當世宗末年。既至。上疏曰。臣請直言。天下第一事。以正君道。以明臣職。以求萬世治安。臣聞人君。天下臣民萬物之主也。位任至重。故養君之道。宜無不脩。而責之臣工使盡言也。過爲計者。乃曰君子危明主。憂治世。夫世治矣。不治憂之。主明矣。不明危之。將無使人眩瞽。莫決趨舍。臣請執有犯無隱之義。美曰美。過曰過。披肝擣膽。以忠憂危。昔者漢臣賈誼陳策文帝曰。進言者皆曰天下已安已治矣。臣獨謂未也。夫是非愚則諛。夫漢文帝慈恕恭儉。有近民之心。多未遑之理。不究所不勉。以安且治當之所名愚也。不究所不能。以安且治頌之所名諛也。陛下英斷睿識。可爲堯舜。可爲禹湯文武。何有漢文。即位初年。敬一箴心。冠履辨分。除孔廟之像。立啓聖之祠。瘞斥元世祖於國門之外。宦官外戚。悉奪其

權。天下忻忻。仰大有爲。謂太平之治。可指日致。然文帝能充其仁性。節用愛人。一時民康物阜。粟陳貫朽。三代而後。稱爲賢君。陛下銳精未久。妄念牽惑。反剛明之用。馳空蕩之思。想望長生。一意脩立。土木興作。至二十餘歲。久不視朝。法弛名濫。二王不相見。人謂陛下薄於父子。以猜疑毀謗。戮辱臣下。人謂陛下薄於君臣。淹留西苑。不復宮居。人謂陛下薄於夫婦。隔并屢臻。盜賊滋熾。吏貪民困。賦役煩增。萬方則效。破產禮禘。至於室如懸磬。十餘年來極矣。天下因卽陛下改元之號。而臆之曰。嘉靖者。言家家皆淨。無財用也。邇者嚴嵩罷相。世蕃極刑。差快人意。然而世俗世論。尙未清明。則陛下不及漢文遠甚。天下之人。不直陛下久矣。陛下過舉。群臣謬順。修齋建醮。相率進香。天桃天藥。相率表賀。建室造宮。工部則極力經營。取香覓寶。戶部則旁求四出。愧心餒氣。前有詔辭以頌陛下。退有後言以從陛下。若是者。臣以爲大欺。夫諸臣顧身念重。得一官多以欺敗。以不事事敗。有不足當陛下心者。其不然者。君心臣心偶不相值也。遂謂陛下賤

海 忠 介 公 集

薄臣工。諸臣所言。或不免己私。或不詳審。撓亂政事。有不足當陛下意者。其不然者。君意臣意偶不相值也。遂謂陛下是已拒諫。執陛下三事之不當。臆陛下千百事之盡然陷誤。陛下終於不釋。諸臣欺君之罪大矣。記曰。上人疑。則百姓惑。下難知。則君長勞。今日之謂也。陛下之誤。大端在修醮。夫修醮所以求長生也。臣聞自古聖賢。修身立命。順受其正。堯舜禹湯文武。未有久世不終。下之亦未見方外之士。自漢唐宋至今存全。陛下尊陶仲文。號之爲師。仲文則既死矣。其身之不能謀。陛下獨何爲求之。至謂天賜仙桃藥丸。怪妄尤甚。臣聞伏羲御宇。龍馬圖河。大禹隨山。神龜書洛。天不愛道。實有此瑞。九疇八卦。顯之聖人。開示天下。猶日月星辰昭布森列。焉可誣也。宋眞宗獲天書。乾祐山孫爽諫曰。天何言哉。豈有書也。桃必採乃得。藥必搗乃成。茲無因而至。有徑行耶。云天賜之。有手授耶。陛下立修多年。靡有一獲。左右奸人。揣逆聖意。投桃託藥。以謾長生。理之所無。斷可見矣。太甲曰。有言逆於汝心。必求諸道。有言遜於汝心。必求諸非道。近

觀嚴嵩。遜陞下者也。而平居貪竊。戶部尚書梁材逆陞下者也。而歷仕有聲。然而有位諸臣。尙鶻突依違。寧希嵩之順。不敢效材之執者。陛下所爲有以牽制其心也。陛下誠翻然悟悔。日日視朝。與輔相九卿侍從言官。講求天下之利害。洗數十年君道之誤。置身禹湯文武之域。使諸臣亦洗數十年阿君之恥。置身臯夔伊傅周召之列。明良喜起。吁咈都俞。重四民。舉富教。端士習。清仕路。裕邊儲。蘇敵困。久任將吏。選練軍士。內之宦官宮妾。外之陰恩叙勞。多有無事而官者。上之內厨內庫。下之寶物貨賄。多有無用而積者。諸臣必有爲陛下言者矣。諸臣言之。陛下行之。在一節省間爾。官之侵漁。將之怯懦。吏之爲奸。諸臣必有爲陛下言者矣。諸臣言之。陛下行之。在一振作間爾。陛下爲此非勞也。九卿總綱。百職分任。諸撫按科道。糾舉清肅於其間。陛下持體而稽絜焉。如天運於上。四時六氣各得其成。無爲之恭也。天地萬物。合爲一體。固有之性也。民熙物洽。薰爲太和。陛下性中真樂也。道與天通。命繇我立。陛下性中真壽也。此理之所有。可旋至立

效。乃懸思服食不終之餌。鑿想遙興輕舉之方。切切然散爵祿。竦精神。求之終身而不得。大臣恃寵外爲諛。小臣畏罪面爲順。君道不正。臣職不明。此天下第一事也。於此不言。更復何言。伏惟陛下。反情易嚮。留神省察。帝故自比堯舜。以堯名齋。而瑞謂其不及漢文。疏上。大怒。抵之地。已。又再取讀。太息自悔。留中者數月。始帝怒時。拍几叱咤。一日撻諸宮婢。宮婢嚙曰。皇帝受譽海瑞。而泄忿我輩。帝密訪外誰與瑞同商者。同官見瑞。皆避去。宦者黃錦以恭謹幸。上問海瑞何如人。對曰。瑞自知謗觸。當萬死。諛妻子。待朝次。鬻棺一具。伺入木而已。願其人剛直有聲。居官絲粟無所取。上亦爲動。曰。忠哉是臣。可比比干。第朕非紂耳。是時天子春秋高。惡言立太子事。其春移疾西苑。數月煩悶不樂。因召大學士徐階議內禪。曰。畜物諫朕是也。願朕老矣。安能視朝如曩時。階力諫止。亡何手筆瑞奏。詈主毀君。送錦衣長。繫之。上有旨。皆名瑞畜物。然心知瑞切直。無窮治意。錦衣讞上刑部。比子罵父律。竟留中。郎中何以尙者上疏救瑞。帝怒。杖之百。下

獄禁錮。亡何上崩。莊帝卽位。以遺詔出瑞。復故官。累遷至僉都御史。撫治蘇松。命下。賊吏望風解印。蘇故有監織太監。出昇八人。聞瑞至。去其四。吳中有顯者赭第居。一夜勦。瑞爲政。一以通民隱。抑強橫爲主。訪知民間產業多被鄉官白奪。裁抑過當。吳中刁民。訐告紛然。鄉官亦自退出還民。於是諸大家絕不便瑞。給事中戴鳳翔劾瑞。沽名亂政。大乖憲體。瑞言蘇松四府。鄉官賢者固多。厲民致富。殊不爲少。小民怨詈非一日矣。訐告紛紜。尋求其故。皆曰。今而後得反之也。鳳翔不考厥初。論臣今日謂民爲虎。卿官爲肉。不知鄉官二十年爲虎。小民二十年爲肉。先奪今還。先奪其百。今償其一。臣恐鳳翔居鄉。亦是此等鄉官也。若臣之罪。殊有可言。臣任官九月矣。賦役未見均平。軍民未聞強壯。禁誣訟。而訟未息。禁靡俗。而俗如初。謂扶弱。而貧者自貧。謂抑強。而富者自富。鳳翔誣臣小。而忘臣大。營營止婪。臣誠懼焉。吏部竟因吳中諸公不便瑞。調瑞。仍以都御史總督南京糧儲。瑞上章求退。復言。言官論臣。皇上不加罪責。復得遷秩。臣

海忠介公集

蒙聖恩。廣以大矣。臣竊謂今日皇上有銳然望治之心。而羣臣絕無毅然當事之意。苟且因循。排獎牽制。動自諉曰。時勢則然。哲人通變。人無奮志。治功不興。臣兩經論劾。衆口喁喁。臣尙執是實見得是也。孔子曰。施於有政。是亦爲政。總督巡撫。大小不同。施之有爲則一。臣尙欲以身爲障。回旣倒之狂瀾。以身爲標。開終古之門路。蘇軾有言。破庸人之論。開功名之門。而後天下有爲。臣日夕念之。但任事在君臣孚契。尤在年力精強。而臣則衰矣。惟聖上賜臣歸休。永終田里。臣再有言。臣叨任巡撫。凡所施爲。竭盡心力。一皆採訪民言。考求成法。民利與興。民害與除。不可易也。伏願皇上仍勅繼臣之臣。勿以臣受謗。輕易臣事。勿謂鄉官過客日大難犯。不可不原小民口小。不得上聞。不行體恤。仍勅閣部大小臣工。不得如前虛應故事。挨目待遷。必求仰副皇上求治之心。毋負平生學古之志。不求合俗。事必認真。閣部臣之志趣定。而後言官之是非公。閣部臣若以徇人爲是。不然臣言。是庸臣也。是不以堯舜之道事皇上也。宰相奉行臺諫風旨。

多議論。少成功。皇上何賴焉。宋胡銓告其君曰。詩云勿聽婦人之言。今舉朝之士。皆婦人也。皇上勿聽之可也。亡何。解任。瑞自始仕至此。凡二十八年。日食飭蔬。冬不具裘。韜穿至一再葺。家居累被薦。萬歷中大學士張居正。有意深求海內正直之臣。私授意廣東御史撫察之。御史直至山中。視瑞。瑞殺鷄。食御史。無他饌。御史嘆服去。居正死。上特起爲南京副都御史。未至。尋以爲南東部右侍郎。時七十二歲矣。即日就道。客或勸曰。盍姑辭。瑞曰。凡辭而進者。爲名耳。老臣耄矣。受天子特達之知。當有特達之報。豈嫌以犬馬餘齡。避帷蓋恩哉。既至官歲餘。治如其前。平生居頃之疏。治安之要。大要謂欲安百姓。當先守令。欲督守令。當嚴貪墨。今貪吏滿載。論劾不止。蓋起於改枉法。贓八十貫絞律。而隨雜犯。不威刑。無以懼淫。太祖高皇帝時。有剝膚實草之誅以大墨。而先臣霍韜嘗議復枉法律絞之條。請今倣爲令。因力舉時政。責備司道撫按。以及內閣六部諸臣。而總歸儉德於天子。雖天子亦難之。瑞所言復枉法律。蓋極言貪吏之

當威。論者遂謂瑞欲以新國重典行清平之世。有二御史劾奏瑞不近人情。極詆爲奸。進士彭遵古。諸壽賢。願允成。皆駁。二御史言不是。保舉瑞。坐視職爲民。瑞竟以南京都御史卒官。年七十四。亡子。賜祭葬。居久之左都御史。吳時來卒而得謚。禮部郎中于孔兼言時來蚤以論劾嚴嵩杖戍。顧其晚節不終。不宜予謚。諡宜瑞。遂賜謚忠介。瑞平生極服孟子鄉原之論。嘗謂聖賢之教。欲人得其真心。率真心。卓立俗表。聖賢也。味真心。自餒浩氣。鄉原也。今天下人心。患入鄉原最深。其所爲僻行奇節。蓋古中行之士。而稱賢士大夫善游世儕俗者。乃鄉原也。作嚴師戒自箴曰。師召神立腔。余下而誨之。瑞而不知之乎。天與爾完節。而當完而心。母疾中餒氣。母矜能諱鍼。母外爲強舌。而內愧影衾。母洵洵易操。而未流靡淫。母質冕參裳。嫻恥於中襟。母妻妾宮室。動念而自底陸沉。有一於此。不如鹿死之音。葉夾及者。嶺南名士也。莊帝初。嘗上萬言書。平居爲瑞主祀之。凡事禱而後行。曰嘉靖。朝諫者。楊爲盛。其季則海瑞。瑞上疏時。予方爲童子。里

巷皆言瑞名。夫四君子者。其平生所學。有不苟然者矣。豈一時慷慨烈丈夫也哉。瑞巡撫江南。大不滿吳中巨室之口。王世貞爲作直中丞詩。而于孔兼爲瑞請諡。固吳人也。蓋瑞意則善。而江南刁巧。固未易與爲道爾。王世貞直中丞詩。死事易。成事難。君不見。直中丞。批龍鱗。食馬肝。胸中無黑白。止有徑寸丹。中丞未下馬。安得中丞與白日俱出來照我。中丞旣按部。安得中丞與白日俱向暮。中丞嚙貴豪。不能令貴豪助弱民。但縱讒口猜猜。中丞寬租稅。不益甲家體粥。但飽吏胥腹。小家裏乾餓。日日寫訟詞。大家不得寢。金錢米帛出參差。一分賄吏胥。一分賄小民。一分充緩贖。從此轉無涯。訟師人人富。但恨無十腕。兩腕指節痛。吏胥人人富。但恐作富人。復來小家訟。小家人人富。作富不得均。展轉自爲閹。江南百萬戶。戶戶泣且訴。生不愛冰與雪。但愛得雨露。中丞自廉亦自直。百損不得希一盆。咄嗟哉。齊景魯桓未可忽。龍逢比干非俊物。

重建海忠介公祠記

莆田彭 鵬撰

品行之高。由於學問。公之忠貞耿介。公之學問爲之也。世乃以爲血性之剛。不知公矣。今觀備忘集。文章經濟。皆足千古。而治安一疏。尤言言至情。言言至理。非有大學問而能然乎。故夫以末秩而折權要。非妄也。以小臣而觸天威。非狂也。以盛位而甘清苦。非矯也。於理見得真。於心存得正。於氣養得充。蓋自藏修之年。卽著嚴師教戒。而凜凜於鸕影辱先。則學問固超然遠矣。余不敏。學問不逮遠甚。然區區之心。時欲以公爲法。吾師乎。吾師乎。豈有歷其里。登其堂。見其廟。模狹隘。而不亟爲更新也者。願是役也。翔之者余。成之者黃副使國材。而董修不辭勞者。賈太守棠。姚郡丞哲。是皆有志師公。且欲瓊之士庶。皆知取法乎公者。嘻。人盡師公。天下何事不可爲哉。天下何事不能爲哉。庸書於石以俟。

海忠介公集

前編

三三

海 忠 介 公 集

公以南京都察院右都御史。於萬歷十五年秋八月卒於官。年七十四。
贈太子少保兼吏部尚書。益忠介。賜諡祭。

御祭文

萬歷十五年歲次丁亥秋八月二十五日

皇帝遣禮部左侍郎沈鯉。諭祭於南京都察院右都御史贈太子少保兼吏部
尚書諡忠介海瑞曰。惟卿高標絕俗。直道視身。視斯民由已饑寒。耻
其君不爲堯舜。矢孤忠而叩闕。抗言增日月之光。出百死以登朝。攬轡
勵澄清之志。迨起家於再廢。乃浹歲而三遷。巖石具瞻。卓爾舊京之
望。素絲無染。哀然先進之風。綜銓務而議主懲貪。領法臺而政先釐
弊。若金在冶。百鍊彌堅。俟河之清。九泉莫及。特頒祭葬。爰賁始終。
卿靈不昧。其歆鑒焉。

公卒時。僉都御史王用汲入視。葛幃敝衣。有寒士所不堪者。歎息泣
下。啓其篋。僅十餘金。士大夫有具歛。百姓哭之。罷市者七日。

海忠介公集

祭文

皇帝遣與公同里行人許子偉護喪歸瓊安葬。喪出江上。白衣冠送者。兩岸無隙地。簞食壺漿之祭。數百里不絕。

三四

海忠介公集

海忠介公集目錄

卷之一

奏疏

平黎疏

乞正赦欺疏

改折祿米倉糧疏

開白節河疏

革募兵疏

被論自陳不職疏

卷之二

策

治黎策

目錄

治安疏

辨黨邪疏

開吳淞江疏

處補練兵銀疏

乞終養疏

告養病疏

海忠介公集

目錄

訓論

訓諸子

參評

知縣參評

主簿參評

教官參評

醫官參評

里長參評

吏書參評

申文

申海南道陳雙山文

稟帖

稟鄆都揭帖

縣丞參評

典史參評

陰陽官參評

老人參評

生員參評

二

海忠介公集

告示

勸賑貸告示

禁革積弊告示

示府縣嚴治刁訟

示府縣狀不受理

禁印書籍

保甲告示

保甲法再示

招撫逃民告示

條例

鄉飲酒禮

杜絕送迎

聽訟

開礦

卷之三

序

壽南瀛吳公八十一序

壽王堯山六十一序

壽顧母何氏八十三序

賀兵憲忠庵陳公榮膺三朝錫命序

賀衛趙侯軍政視篆兼督屯序

賀大尹趙三山榮獎序

目錄

三

海忠介公集

目錄

四

賀二守陳後溪榮獎序

賀李東城榮獎序

賀景竹王千兵榮膺軍政序

賀屈元禮生子序

賀廖錦臺膺首薦序

贈高將軍陞指揮使序

贈東梧馬侯榮獎序

贈趙三山德政序

贈顧肖坡獎序

贈鍾從吾言灌陽掌教序

贈參戎以吾晏公改西海序

贈定安博莫君署澄邑事膺保薦序

贈顧弘宇榮獎序

贈丁敬宇父封君壽誕序

贈那侯肖野郭公膺保薦序

贈郡節推大東劉侯膺榮獎序

贈吳頤庵二尹句容序

卷之四

序

贈大尹吳秋塘德政序

贈恒所劉侯膺榮獎序

贈養齋蔡太守撫黎序

贈總督府凝齋劉公平八寨序

海忠介公集

贈羅近雲代丈安定田序

贈文昌大尹羅近雲入觀序

贈李太守母七十壽誕序

贈霜柏陳先生得獎勵序

贈黃村趙先生陞靖安大尹序

贈林東臯考績序

贈喻遂川得撫按獎勵序

贈毛帶江陞天台大尹序

贈陳侯丈畝成功序

贈喻遂川獎勵序

贈蒙生德範還遺金序

贈史方齋陞浙藩大參序

黃廣臺思親百詠序

贈王朋江陞寧波太守序

贈史方齋陞浙藩大參序

贈陳元山任古田司訓序

贈顧懷東晉京兆丞序

贈黃體齋陞南京國子監助教序

贈周柳塘入覲序

崖州太守蔡養齋致仕序

汴水尋源卷序

註唐詩鼓吹序

卷之五

記

目錄

五

海忠介公集

目錄

六

脩學宮記

樂耕亭記

誌銘

黃恭人林氏墓誌銘

龍南令鴈峰吳公墓誌銘

梁端懿先生墓誌銘

贊

贊蕭氏一門二節

書簡

啓劉石圃誠意伯

啓譚次川侍郎

復郭夢菊

復史鴈峰太僕少卿

啓史方齋瓊知府

復葉立齋陳熙齋諸年丈

復熊鏡湖軍門

啓熊鏡湖軍門

復周柳塘瓊州知府

復趙大洲閣老

再啓閣部高中元諸公

復淳安大尹鄭諱應齡

海忠介公集

復侯星吾潮州知府

復徐繼齋尙寶少卿

啓劉帶川兩廣軍門

復胡杞泉都掌科

奉二守陳南川書

復巡按龔懷川

與博白大尹林仲和

議論

嚴師教戒

卷之六

論

出處

朱陸

目錄

復史方齋瓊分巡道

啓譚次川侍郎

啓殷石汀兩廣軍門

復歐陽相庵掌科

與瓊鄉諸先生書

復總督凌洋山

復分守道王川吾

嚴光

泰伯論上

七

海忠介公集

目錄

秦伯論下

周公使管叔監殷

孟子道性善

其嗟也可去

孟子爲貧而仕議

使畢戰問井地

鄉愿亂德

八

詩

游絳嘆

樵溪行送鄭一鵬給諫

七夕立秋值雨

送諸生小試遇雨

呂梁洪

陳子達院中賞榴限韻

聞警和顧心新三首

樂耕堂

題峽山飛水寺

午日草明堂議修築北泮河口

立鶴篇

贈竹園隱者

游滴水巖

秋日王龍津觀物園

春日隔風部中限韻

晚霽謁張水南翰讀歸復簡此

病中立秋

倭犯鍾司徒墓雷震遁去

貞節周母莫孺人

海忠介公集卷之一

平黎疏

廣東舉人臣海瑞謹奏。爲區處兵後地方。以絕後患。圖久安事。臣竊見瓊州一府。顛顛獨居海中。其地綿亘二千餘里。黎岐中盤。州縣濱海旋於外。譬之人。黎岐心腹。州縣四肢。黎岐爲寇。是心腹之疾也。心腹之疾不除。將必浸淫四潰。而爲四肢之患。州縣無久安之理。古先聖王之治遠方。寇亂征討。去不窮追。蓋施之要荒之外。與吾中國有所阻隔之地。若瓊。則內之黎岐。與外州縣。百姓鷄犬相聞。魚鹽米貨相通。其間雖多峻嶺叢林。彼之出入往來。自有坦夷道路。自國初以至今日。除戍守軍民兵截殺。并整飭兵備道督兵勦不計外。兩廣巡撫都御史上請。弘治十四年征儋州昌化縣黎。嘉靖二十年征陵水縣崖州黎。嘉靖二十九年征感恩縣崖州黎。凡三大舉矣。每舉調兩廣官兵十餘萬。費銀數十萬兩。前後屯兵防守。騷害居民

海 忠 介 公 集

或三年。或四年後止。然竟不能使黎寇襲服。迄今劫村殺人。無歲月無有。臣生長於瓊。飲聞黎患。痛瓊民歲月權害。虛費陛下兵糧。迄無一臣爲地方長久計。以紓陛下南顧之憂者。請爲陛下言之。夫瓊地。瓊山縣處其北。崖州處其南。萬州處其東。昌化縣處其西。自瓊山縣轉西。歷澄邁縣。臨高縣。儋州。昌化縣。感恩縣。至崖州。計程一千一百里。自崖州轉東。歷陵水縣。萬州。樂會縣。會同縣。文昌縣。復之瓊山縣。計程九百四十里。是瓊州府自南徂北。自東徂西。以圍三徑一計之。大約七百里程也。臣嘗博訪附黎居慣行黎村人氏。近日大征踏路官兵。皆稱自崖州羅活峒。抵瓊山縣大坡頭營。三日可至。是黎岐盤踞地。不過方四百里而已。區區方四百里地。自國初以至今日。殘害國家赤子。若此之毒而無已。調用國家官兵。若此之衆。費用國家錢糧。若此之多。兩廣有巡撫都御史總其權。瓊州有兵備副使專其事。嘉靖十九年以來。又有守備叅將之設。迄不能一施勦撫。安輯吾民何故。武臣憚難畏寇。文臣養望待遷。圖目前苟安。不爲地方永久謀

海 忠 介 公 集

慮。黎小寇害。則隱匿不申。黎大寇害。調兵又苟且奏功。姑以應事塞責。瓊郡誌書。歷載識者開道立邑之議。又載弘治十四年大征。議及此。而未行為深憾。彼非不明知之也。而莫或行焉。間有志立功業者。亦慮事掣肘難行。欲舉而止。無一人竭材力。盡忠實心。爲瓊遠計。爲陛下擔當事者。黎寇稔知之習。竊卑笑之。是以大兵一退。卽旋轉耕其田。處其地。數年生長積聚。仍爲州縣寇害。不少衰止。若使兵威震疊之後。從而計久長。開通十字道路。設縣所城池峙其中間。則立犄角之形。成蠶食之勢矣。日磨月化。今日寧復有黎乎。夫得黎無益於地方。處黎或周於計畫。謂不足州縣。置之可也。黎人居處。皆寬廣峒場。耕作皆膏腴田地。非得地不可耕而食。文昌縣斬脚峒等黎。瓊山縣南岐峒等黎。今悉輸賦聽役。與吾治地百姓無異。儋州七方峒。今亦習書句。能正語。以此例之。非得人不可畜而使。黎固方四百里地也。凡我兵征討。無一次不擣巢穴。無一次不收成功。故臣嘗以爲弘治十四年。開道立縣。可無嘉靖二十年大征。嘉靖二十年開道立縣。可無二

海 忠 介 公 集

十九年大征。大征後開道立縣。可無歲歲鵬剿。年年守戍。諉之曰。地土險惡。勞師無功。藉口聖王不治夷狄之說者。皆庸人苟祿偷安。不肯身為地方當事託詞也。往不可諫矣。今詎大征僅三歲。兵威之震懾於黎人尙存。遺黎之生聚猶寡。開道立縣。今日可及爲也。不然。數年後。必一大變。一大變。必用兵十餘萬。必費銀數十萬兩。必殘破地方。必毒痛赤子。功虧一簣。坐失事機。陛下將奚取哉。臣雖未嘗手操矢刃。地方變故。區處事宜。其習聞知矣。偷得專任其事。馳驅兵革之間。俾黎土盡爲治地。黎岐盡爲良民。臣亦能之。事如不効。請甘服上刑。以謝欺罔虛費兵糧之罪。第臣平昔濡染翰墨之人。一旦言及軍旅。似可駭聽。夫瓊固有兵備副使之設矣。于此不爲。是謂虛位。伏乞陛下。明勅群臣中。知識事機。力可大任。不貪富貴志在立功者。以之京兵備副使。以專治黎之任。瓊去京師萬里。當事請裁。或致遲誤。設縣立所。限其大槩。乘機審勢。聽其便宜。凡一切招民置軍。設里建學。遷創縣所。屯田巡司驛遞諸事。宜許撫按。臣等從中節制。許其調用西

土兵。廣東漢達官軍打手約四千人。值變故。許其調用約萬人。量撥一次大征銀糧之半以充其費。陛下二年考其成立之功。七年稽其變化之効。必得專任之柄。寬其行事。而又功少不完。不遷其官。事少不效。必重其罪。欲不盡心力而爲之。不可得也。永絕禍根。遺安萬代。省國家無己之費。紓陛下拊髀之憂。可計日見矣。經畧瓊州。計無有過於此者。諸臣無有一爲陛下言之。一爲陛下任之。臣每痛焉。伏望皇上采納臣言。勅兵部咨行兩廣撫鎮衙門。會同巡按守巡各官從長計處。則地方幸甚。生靈幸甚。

治安疏

戶部雲南清吏司主事臣海瑞謹奏。爲直言天下第一事。以正君道。明臣職。求萬世治安事。君者天下臣民萬物之主也。惟其爲天下臣民萬物之主。責任至重。凡民生利癘。一有所不聞。將一有所不得知而行。其任爲不稱。是故事君之道。宜無不備。而以其責寄臣工。使盡言焉。臣工盡言。而君道斯稱矣。昔之務爲容悅諛順曲從。致使實禍蔽塞。主不上聞焉。無足言矣。過

爲計者。則又曰君子危明主。憂治世。夫世則治矣。以不治憂之。主則明矣。以不明危之。毋乃使之反求眩瞶。失趨舍矣乎。非通論也。臣受國恩厚矣。請執有犯無隱之義。美曰美。不一毫虛美。過曰過。不一毫諱過。不容悅。不過計。披肝膽。爲陛下言之。漢賈誼陳政事於文帝曰。進言者皆曰天下已安已治矣。臣獨以爲未也。曰安且治者。非愚則諛。夫文帝。漢賢君也。賈誼非苛責僞也。文帝性仁類柔。慈恕恭儉。雖有近民之美。優游退遜。尙多怠廢之政。不究其弊所不免。槩以安且治當之。愚也。不究其才所不能。槩以安且治頌之。諛也。陛下自視於漢文帝何如。陛下天質英斷。睿識絕人。可爲堯舜。可爲禹湯文武。下之如漢宣帝之勵精。光武之大度。唐太宗之英武無敵。憲宗之志平僭亂。宋仁宗之仁恕。舉一節可取者。陛下優爲之。卽位初年。剷除積弊。煥然與天下更始。舉其畧。如箴敬一以養心。定冠履以辯分。除聖賢土木之像。奪宦官內外之權。元世祖毀不與祀。祀孔子推及所生。天下忻忻然以大有作爲仰之。識者謂輔相得人。太平指日可期。

海 忠 介 公 集

也。非虛語也。高漢文帝遠甚。然文帝能克其仁順之性。節用愛人。呂祖謙稱其能盡人之才力誠是也。一時天下。雖未可盡以治安予之。而貫朽粟陳。民盡康阜。三代下稱賢君焉。陛下則銳精未久。妄念牽之而去矣。反剛明而錯用之。謂選舉可得。而一意立修。富有四海。不曰民之脂膏在是也。而侈興土木。二十餘年不視朝。綱紀弛矣。數行推廣事例。名爵濫矣。二王不相見。人以爲薄於父子。以猜疑誹謗。戮辱臣下。人以爲薄於君臣。樂西苑而不返宮。人以爲薄於夫婦。天下吏貪將弱。民不聊生。水旱靡時。盜賊滋熾。自陛下登極初年。亦有之而未甚也。今賦役增常。萬方則效。陛下破產禮佛。日甚。室如懸磬。十餘年來極矣。天下因即陛下改元之號。而臆之曰。嘉靖者。言家家皆淨而無財用也。邇者嚴嵩罷黜。世蕃極刑。差快人意。一時稱清明焉。然嚴嵩罷相之後。猶之嚴嵩未相之先而已。非大清明世界也。不及漢文帝遠甚。天下之人。不直陛下久矣。內外臣工之所知也。知之不可謂愚。詩云。交職有闕。惟仲山甫補之。今日所賴以弼彘匡救格非而歸之正

諸臣責也。今乃建醮修齋。相率進香。天桃天藥。相率表賀。建造宮室。工部極力經營。取香竟寶。戶部差求四出。陛下誤舉。諸臣誤順。無一人爲陛下正言焉。都俞吁咈之風。陳善閉邪之義。邈無聞矣。諛之甚也。然愧心餒氣。退有後言以從陛下。昧沒本心。以歌頌陛下。欺君之罪何如。夫天下者。陛下之家也。人未有不顧其家者。內外臣工。其官守。其言責。皆所以奠陛下之家而磐石之也。一意立修。是陛下心之惑也。過於苛斷。是陛下情之偏也。而謂陛下不顧其家。人情乎。諸臣顧身念重。得一官。多以欺敗。職敗。不事事敗。有不足以當陛下之心者。其不然者。君心臣心。偶不相值也。遂謂陛下爲賤薄臣工。諸臣正心之學微。所言或不免已私。或失詳審。誠如胡寅撓亂政事之說。有不足以當陛下之心者。其不然者。君意臣言。偶不相值也。遂謂陛下爲是已拒諫。執陛下二事不當之形迹。臆陛下千百事之盡然。陷陛下誤終不復。諸臣欺君之罪大矣。記曰。上人疑。則百姓惑。下難知。則君長勞。今日之謂也。爲身家心與權心合。臣職不明。臣

海忠介公集

既爲諸臣解之矣。求長生心與惑心合。君道不正。臣請再爲陛下聞之。陛下之誤多矣。大端在修醮。修醮所以求長生也。自古聖賢。止說修身立命。止說順受其正。蓋天地賦予於人而爲性命者。此盡之矣。堯舜禹湯文武之君。聖之盛也。未能久世不終。下之亦未見方外士。漢唐宋存至今日。使陛下得以訪其術者陶仲文。陛下以師呼之。仲文則既死矣。仲文不能長生。而陛下獨何求之。至謂天賜僊桃藥丸。怪妄尤甚。昔伏羲氏王天下。龍馬出河。因則其文以畫八卦。禹治水時。神龜負文而列於背。因而第之以成九疇。河圖洛書。實有此瑞物。洩此萬古不傳之秘。天不愛道。而顯之聖人。藉聖人以開示天下。猶之日月星辰之布列。而歷數成焉。非虛妄事也。宋真宗獲天書於乾佑。山孫奭進曰。天何言哉。豈有書也。桃言采而得。藥以人工搗合而成者也。無因而至。桃藥有足行耶。天賜之者。有手執而付之耶。陛下立修多年矣。一無所得。至今日左右姦人。逆揣陛下懸思妄念區區桃藥中之長生。理之所無。而立修之無益。可知矣。陛下又將謂懸刑賞以督

率臣下。分理有人。天下無不可治。而玄修無害矣乎。夫人幼而學。無致君澤民異事之學。壯而行。亦無致君澤民殊用之心。太甲曰。有言逆於汝心。必求諸道。有言遜於汝志。必求諸非道。言順者之未必爲道也。卽近事觀。嚴嵩有一不順陛下者乎。昔爲貪竊。今爲逆本。梁材守官守道。陛下以爲逆者也。歷任有聲。官戶部者。至今首稱之。雖近日嚴嵩抄沒。百官有惕心焉。無用於積賄求遷。稍自洗滌。然嚴嵩罷相之後。猶嚴嵩未相之先而已。諸臣爲嚴嵩之順。不爲梁材之執。今甚者貪求。未甚者挨白。見稱於人者亦廊廟山林。交戰熱中。鸚突依違。苟舉故事潔已格物。任天下重。使社稷靈長終必賴之者。未見其人焉。得非有所牽掣其心。未能純然精白使然乎。陛下欲諸臣惟予行而莫逆也。而責之效忠。付之以翼爲明聽也。又欲其順吾玄修土木之誤。是股肱耳目不爲腹心衛也。而自爲視聽持行之用。有臣如儀衍焉。可以成得志與民由之之業。無是理也。陛下誠知玄修無益。臣之改行。民之效尤。天下之不安不治由之。翻然悔悟。日視正朝。與

海忠介公集

宰輔九卿侍從言官。講求天下利害。洗數十年君道之誤。置其身於堯舜禹湯文武之上。使其臣亦得洗數十年阿君之耻。置身與臯夔伊傅相後先。明良喜起。都俞吁咈。內之宦官宦妾。外之光祿寺厨役錦衣衛恩廕諸衙門帶俸。舉凡無事而官亦多矣。上之內倉內庫。下之戶工部光祿寺諸廠藏段絹糧料珠寶器用木材諸物。多而積於無用。用之非所宜用亦多矣。諸臣必有爲陛下言者矣。諸臣言之。陛下行之。此則在陛下。一節省間而已。京師之一金。田野之百金也。一節省。而國有餘用。民有蓋藏。不知其幾也。而陛下何不爲之。官有職掌。先年職守之正。職守之全。而未之行。今日職守之廢。職守之苟且因循。不認真。不盡法。而自以爲是。敦本行以端士習。止上納以清仕途。久任吏將以責成功。練選軍士以免召募。驅縉黃遊食。使歸四民。責府州縣。兼舉富教。使成禮俗。復屯鹽本色。以裕邊儲。均田賦丁差。以蘇困敝。舉天下官之侵漁。將之怯懦。吏之爲奸。刑之無少姑息焉。必世之仁。博厚高明悠遠之業。諸臣必有爲陛下言者。諸臣言之。陛下行

海忠介公集

之。此則在陛下一振作間而已。一振作而百廢具舉。百弊剷絕。唐虞三代之治。粲然復興矣。而陛下何不爲之。節省之。振作之。又非有所勞於陛下也。九卿總其綱。百職分其緒。撫按科道。糾率肅清於其間。陛下持大綱。稽治要而責成焉。勞於求賢。逸於任用。如天運於上。而四時六氣。各得其序。恭己無爲之道也。天地萬物爲一體。固有之性也。民物熙浹。薰爲太和。而陛下性分中有真樂矣。可以贊天地之化育。則可以與天地參。道與天通。命由我立。而陛下性分中有真壽矣。此理之所有。可旋至而立。有效者也。若夫厭食不終之藥。遙輿輕舉。理之所無者也。理所無。而切切然散爵祿。竦精神。立修求之。懸思鑿想。繁風捕影。終其身如斯而已矣。求之其可得乎。君道不正。臣職不明。此天下第一事也。於此不言。更復何言。大臣持祿而外爲諛。小臣畏罪而面爲順。陛下誠有不得知而改之行之者。臣每恨焉。是以昧死。竭惓惓爲陛下一言之。一反情易向之間。而天下之治與不治。民物之安與不安。於焉決焉。伏惟陛下留神。宗社幸甚。天下幸甚。

乞正赦款疏

尙寶司司丞臣海瑞謹奏。爲懇乞勅諭各部。條正赦款。以廣天恩。以全民命事。臣向自僭言朝廷重務。干冒先帝威顏。罪在莫贖。法在不赦。臣萬死不辭矣。當是之時。即蒙陛下念臣一點赤忱。雖冒出位妄言之罪。實存忠君報國之心。特命左右侍臣。傳諭刑部。及錦衣衛官。毋加重刑。留臣後用。以至微軀得全。殘生幸免。是萬死之中。得一生也。此時先帝既崩。陛下登位。他務未遑。庶政未舉。獨先赦臣。復臣爵位。是臣今日之生。皆既死之年。而陛下之所特賜者也。賜之以既死之年。則報之以免死之事。固臣之所甘心而樂爲也。況當今日政治清明之際。臣亦安敢自棄其生。不思有以圖報乎。古人求養其身以有待。今臣之所以當死而不即死者。正養其身以有待之謂也。然臣有當死之罪。而陛下獨生之。臣犯不赦之法。而陛下獨宥之。在臣一人。固萬萬幸矣。然天下有罪之人。皆陛下之赤子也。雖一時無知而犯罪。猶赤子無知而入井。陛下今日改元建極。上法堯舜之仁。以建唐

虞之業。將使天下之民。一洗而更新之。則凡各府州縣監禁有罪之人。皆倒懸望解久矣。何不以赦臣之赦赦天下。而獨赦臣之厚乎。先帝在位四十五年。惟初年頒赦二次。續後數年。又赦一次。至今已二十餘年。不見赦於天下。有罪之人。所仰望於陛下者。何啻如饑之望食。渴之望飲者乎。屢年天雨不調。寒暑不均。皆積獄積怨之所致也。臣罪犯在不赦。尙蒙曠世厚恩。視在監有罪之人。中間另有拖犯受冤者。獨不蒙陛下視之仁乎。臣向在獄中。每見獄中稱冤者。臣卽有冒死上陳之念。而時不可行。正有待於今日也。蓋臣所見者。在京一處監耳。在京如此。天下可知也。一處如此。處處可知也。邇者三三大臣。雖奉聖諭議陳款。殊未仰承聖意。善體聖心。致陛下洪恩厚澤。阻抑而不遠施。狹隘而不得遠布也。詔開十惡及強盜重罪。不赦可也。至於左道、逆富、貪酷、枉法、指稱誑騙者。犯罪甚輕者。均之不赦乎。且此等俱係在京之事。與在外府州縣有何預。亦混頒於天下乎。此責在刑部之官。宜勅之條正者也。詔開侵匿漕運京庫錢糧。不赦可也。在外

海 忠 介 公 集

小民。侵收錢糧入官給主者。皆可宥之。至列於漕運之不赦乎。且此等皆撫按官所當量行曲處者。何不盡宥之。以蘇民困乎。此責在戶部之官。宜勅之條正者也。吏部有當官吏。宜量免其數。宥其罪愆。禮部有完室之犯罪者。除謀反外。悉宜赦宥。工部有無益之置造。除婚祭外。盡宜罷免。皆當勅之條正者也。蓋陛下有愛民無窮之念。而二三大臣。無仰承善體之忠。不惟不能施恩澤於民。而且不能盡革故鼎新之美。使臣又默而不言。則陛下寬仁厚澤。又何以自達於天下哉。詔內開款。又皆狐疑不決。句多兩可之說。近自遠方來京者。皆云府州縣貪暴苛尅之官。每每堅執詔內開款。凡一切在監有罪之人。少有干於條內。皆不釋放。甚至一府州縣。不得開一二十人者。良可惜也。臣雖自體陛下獨厚之仁以宥免。而不能使天下之人皆如臣之宥免。以體陛下之仁。亦何以一日安寧於朝廷之上乎。使天下後世稱陛下有洪恩於臣。而不能廣施恩於萬民。豈非一二大臣之罪哉。臣亦預有責也。四月前。刑部尙書黃到監審。錄罪人等。免一二釋放。皆大聲號哭。

死罪不赦。遂有哭泣之詞。重罪不赦。遽興怨恨之嘆。所以然者。祇由前詔開款未明。抑且狹窄不寬故也。願陛下總臣所奏。卽賜勅諭各部。預陳條款。逐一開明。使天下之民。得以盡宥。大開悔過遷善之門。則臣亦安受陛下再生之恩矣。而天下之民。皆得如臣之宥免。而仰荷陛下千萬世無窮之恩矣。

辨黨邪疏

大理寺右寺丞臣海瑞謹奏。爲懇乞聖明。賜乾斷。重治黨邪言官。以定國是。以正人心。以扶宗社事。古昔聖王。謂天子君臨天下。一已聞見不能及遠。以其責寄之臺諫之臣。故臺諫之臣。爲天子耳目。夫人一身。必目而後能視。必耳而後能聽。官名耳目。重任也。切任也。臺諫膺此重任切任。是以苟有論列。必隨天下公議。公議所是。臺諫亦是之。非天下之公是不敢是也。公議所非。臺諫亦非之。非天下之公非不敢非也。廣東道試監察御史齊康正。皇上耳目所寄也。其論輔臣徐階。備載龔穢實跡。中外傳聞。人人

海忠介公集

駭異。夫徐階輔弼先帝十五年。無能改於先帝神仙土木之誤。律之大臣以道事君之義。階誠歉然矣。然階與惡嵩同相十一年。嵩以其貪。階以其廉。嵩以其邪。階以其正。惡嵩父子。迄不加害。罷黜惡嵩以來。階爲首相。天下駸駸然有向治之漸。謂非徐階翼贊之力不可也。今以老臣復相陛下。陛下信而任之。其才與德。諒亦昭然莫逃於聖鑒下矣。孟子第人臣品類。謂有事是君。則爲容悅者。有安社稷臣者。以安社稷爲悅者也。徐階心在社稷。是雖畏威保位間。不免於容悅順從。而隨事調和。是小補於天下。且其不招權。不納賄。素所親厚。事在當斥。而不爲之容。素所怨惡。事在可取。而不爲斥逐。古之所謂休休有容。克伐怨怒不行焉。階亦有之。有臣如階者。天民大人。品題不及。謂非一時之選。社稷之衛也哉。臣之所言。中外公議。徐階一大公斷案也。齊康身爲御史。仕陛下耳目之寄。乃敢不顧公是公非。捏架無影。虛詞汙辱宰輔。次相李春芳。清勤慎守。保惜名節。均之可必其爲善不爲惡人也。康奏連及焉。善人君子。齊康一網打之矣。康將以其狡

海 忠 介 公 集

且兇如高拱者。謂有才力。而遺之以輔陛下禍天下乎。盜賊資性兇強。刀矢慣熟。故殺人劫財。無所不至。小人非才不能動人。小人非才不能亂國。今天下動極而疲。正宜崇惇。大養利平。續一綫之脉。以躋之生全之區。其汲汲也。復付兇醫。再施毒劑。識者知其不可。康乃以是爲非。以非爲是。欲陛下斥階而用拱焉。臣不知康之心何心也。惡如高拱。誠不可一日使居輔弼。以當鈞軸。備在南北科道十三疏中。中外共知。臣不必贅論。所可恨者。齊康甘爲鷹犬。受高拱指使。搏噬善類。願一已爵祿。不顧天下安危。罪浮於拱矣。宋楊甲試邑有聲。部使者以不降意誣劾之。時有猫噬鸚鵡。罪無可想之說。康職爲御史。不昨如鼠高拱。反噬鸚鵡徐階。情可想乎。伏望皇上細加體察。如果臣言不謬。速賜乾斷。罷斥高拱。將齊康重加刑治。以爲人臣黨邪不忠之戒。庶階春芳得以安位行志。朝無小人。君子道長。天下幸甚。宗社幸甚。

改折祿米倉糧疏

海 忠 介 公 集

欽差總理糧儲。提督軍務。廉巡撫應天等處地方都察院。右僉都御史。臣海端謹題。爲懇乞皇恩。賜改折。以蘇節被災傷地方事。臣奉命巡撫江南各州縣。被災所在甚多。分數應題請者。臣照例題請。已蒙皇上覃敷洪恩。賜之改折。賜之蠲免。小民歡忻鼓舞。感恩無窮極矣。臣復何言。但今年水災實是異常。往年霖雨爲害。霜降後水漸涸。今大不然。江南氣濕熱。冬至後不能播麥。種播亦不生。今距冬至九日耳。常年播麥之地。尙十有五六。滄深水中。來夏麥秋頓絕。望於今日矣。且災止一方。猶有轉輸可望。今則北之淮揚徐邳。南而浙東西。西而應天太平廣德等府州。莫非水災之地。旁郡無可轉輸。本地無可借貸。香得嘉靖四十年水災。先皇帝准將五府六部等衙門米。悉與改折。止論水災。則嘉靖四十年稍甚。若論近冬至。水不消涸。來年二麥缺收。則比嘉靖四十年之災又過之。今除內府白熟米。係上用所需。臣不敢言矣。其祿米倉諸臣隨朝米。井更役。監生。樂舞生。天文生。醫生。儒士月米。伏乞皇上軫念江南今歲之窮。比照嘉靖四十年例。勅

下該部覆議。盡與改折。其折銀即部運官。同白熟米齊解。留米以濟江南之饑。折銀以濟諸員役之用。况祿米倉。每歲約該米五萬九千石上下。大約每歲支放五萬四千餘五千。嘉靖四十四年。總督倉場侍郎張守直題。奉欽依照漕糧一尖。一平收。兩平放。又加耗米三升爲七升。除去三升脚米。尙有四升祿米。隨收隨放。與漕糧久貯。有消耗不同。以羨餘之積。合支銷之存。計今五年矣。約可再足一年支放。皇上雖與盡折一年。舊米將盡。新米又登。又非缺然無米可兼支也。事無窒礙可行。民切饑苦當恤。緣係懇乞皇恩。賜改折。以蘇節被災傷地方事理。未敢擅便。爲此具本。專差承差齎捧。謹題

開吳松江疏

題爲修復水利。以濟迫切饑民事。禹貢稱三江既入。震澤底定。三吳水利。當濬之使人入於海。從古而然也。婁江東江。係是入海小道。惟吳淞江盡洩太湖之水。由黃浦入海。事起近年以來。水利臣曠職不修。撫按亦不留

海 忠 介 公 集

心。惟此督責日至。潮泥日有積累。日月繼嗣。通道填淤。雖曰水勢就下。而無下可爲就矣。時遭久潦。震蕩太湖。因之奔湧四溢。勢所必至。爲害之大。滄沒禾畝。如嘉靖四十年。今隆慶三年是也。而小爲滄沒之患。亦時有之。是吳淞江一水。國計所需。民生攸賴。修之舉之。不可一日緩也。臣於舊歲十二月。巡歷上海縣。親行相視。旋委上海縣知縣張嶺。率領沿江住居父老。按行故道。量得淤塞當濬地。長該一萬四千三百三十七丈三尺。江面闊三十丈。今議開十五丈。計該用工銀七萬六千一百二兩二錢九分。今以水荒。缺秋收。兼之二麥未佈。時方春正月之初。米每石價銀已捌錢伍分矣。饑民動以千百。告求賑濟。臣已計將節年導河夫銀。臣本衙門贓罪銀兩。各倉儲米穀。并溧陽縣鄉官太僕寺少卿史際義出賑濟穀貳萬石。率此告濟饑民。按工給與銀米。於今正月初二日。按江故道。興工挑濬。委松江府同知黃成樂。督率上海縣知縣張嶺。嘉定縣知縣邵一本。分理興工之中。兼行賑濟。千萬饑民。稍安戢矣。但工程浩大。銀兩不

歉。饑饉頻仍。變故叵測。官儲民積。計至二月間盡矣。江南四面皆荒。湖廣江西有收成。府縣又執行閉糴。無從取米。伏望皇上軫念民饑。當恤吳淞江水道。國計所關。勅下該部酌議。量留蘇松常三府漕糧二十萬石。准照前旨銀數改折。凡應天等十一府州縣庫貯。不拘各院道諸臣。項下無礙贖罰銀兩。聽臣調用。浙江杭嘉湖三府。與蘇松常三府。共此太湖之水。吳松江開。則六府均蒙其利。塞則六府同受其害。其庫藏銀。亦如應天等府。一例取用。彼處饑民。亦聽上工就食。吳淞借饑民之力。而故道可通。民借銀米之需。而荒歉有濟。一舉兩利。地方不勝幸甚。

開白卯河疏

題爲再濬常熟縣入海河道。兼行賑濟饑民事。臣於正月初二日。開挑吳淞江。已經題請外。臣於二十七日。巡歷常熟縣。地方父老鄉官舉監生員人等。紛紛告稱本縣白卯河道。雖經隆慶三年開挑。止是一線之路。是以隆慶三年。水患不能流洩。三吳靠北一帶縣分。均受其害。常熟去吳淞江。尙有

海 忠 介 公 集

四日之程。饑民之能赴工於吳淞者。十之一二而已。若是興工之中。兼行賑濟。一舉兩利。當開白茆。臣旋於二十八日。親行相視丈驗。闢者不過四丈。水深不過四尺。狹者不及二丈。水深不及三尺。果然淺狹。考之三吳水利。禹貢稱三江既入。震澤底定。今三吳入海之道。南止吳淞江。北止白茆河。劉家河居其中。三處而已。劉家河原通達無滯。若止開吳松。而不開挑白茆。誠爲缺事。難免水患。臣又酌計臣先所題請吳松江工銀。尙有餘剩。可充他用。吳松江河。因饑民雲集。計在二月二十日前後。告成決矣。青黃不接。饑民尙苦無處趨食。官發銀米賑濟。勢之所必然也。臣思與其空行濟饑。而無益於後。不若仍照吳松江事例。興工之中。兼行賑濟。既有利於目前之饑民。河道開通。且有望今秋之成熟。臣已責令署縣事常州府通判姜國華丈量。約長該五千七丈七尺。因舊河道廣狹淺深不一。通融塗搭。計該用人夫一百六十四萬九千五百三十六工。計該用工銀四萬一千二百三十八兩四錢。一照吳松江例。不取之民。不捐之官。止以倉庫之積給之。尙

可成此一河道也。饑民告濟不散不止。臣已行令縣丞夏佐。典史鍾應亨。各分工專督。通判姜國華總行稽察。於二月初九日興工矣。伏望皇上軫念饑民當賑。水利當興。勅下該部覆議。俯賜俞允。地方不勝幸甚。

處補練兵銀疏

題爲河工告成。乞賜處補錢糧。兼圖後效事。臣於舊歲十二月。巡歷上海縣。勘得吳松江。淤爲平地。約有八十餘里。三吳水利。此爲第一。各縣民告饑甚急。臣思昔人興工救荒。旋於今正月初三日。破土起工。實自切八日以後人工方集。二月二十日後漸收工。二十九日告成。臣親行相視。量得開深該一丈六尺。面闊十五丈。下闊七丈五尺。前估計題請該工食銀七萬六千一百二兩。止用過銀六萬八千三百九十七兩。東西二埧未開。并近埧一里內。再議開深三尺。以受埧外渾泥。并管工犒賞開埧造橋等項。共再用一千餘金可完事。工成之速。工費銀不盡用其估計之數。人夫以饑趨事。連月不雨。有天幸也。又勘得內出之水。係清流。外入之潮湧帶泥土。若內水

海 忠 介 公 集

急流。則足以衡蕩潮泥。免於淤塞。父老皆稱太湖水道。節有攔壅。計有嘉定縣。夏家口。吳江縣長橋。長洲縣寶帶橋。吳縣胥橋等處。行委同知黃成樂。吳宗吉踏勘。凡可通流入吳松江去處。逐爲疏濬。畢後方行開填。又臣於正月二十七日巡歷常熟縣。勘得白茆一河。果是淺狹。亦於二月初九日興工。估計該工銀四萬一千二百三十八兩。該縣於三月初報完工陸分。計至二十以後。亦可漸次收工。完工不過月盡矣。其吳松江工。候旨未下。臣權宜借發松江府。蘇州府。練兵銀各一萬兩。鎮江府銀二萬兩。白茆河借發常州府練兵銀一萬兩。蘇州府銀四千兩。先因各方水災。臣令徧修圩岸塘浦支河堰埝賑濟。原查導河贓罰銀兩。聽各該府縣充用。是以解至吳松江白茆者。其數不多。今松江府銀一萬兩補足。餘四萬四千兩未補。伏望皇上將臣二次題請。俯賜俞允。借發木補銀兩。容接任撫。臣如數調取補足。白茆河未完工。并夏家口。長橋。寶帶等處。及四府圩岸塘浦支河等項。巡鹽御史吳從憲見在巡。率約至三月盡可成功矣。大事責善始。尤當善

終。若使先年時加修繕。吳松白茆。豈至淤塞。自臣到任之後。查得水利官。皆分管別事別差。委問之水利。茫然無知。水利之事。與己若不關涉。上司不以爲曠官。本官不以爲失職。水利不興。其所由來久矣。伏望皇上勅下該部。凡河道圩岸塘浦等處。着令時加修理。撫按以此殿最府縣。部院以此殿最撫按。庶乎旱澇有備。年穀豐登。民獲秋收之利。而國計亦有攸賴矣。

革募兵疏

題爲復兵制。以省冗費。安地方事。自古聖賢論兵。止是言教之坐作進退之方。教之親上死長之義。自此之外。無他道也。以故寓兵於農。田獵講武。我祖宗初設旗軍。繼後復設民壯。即古遺意爲之。不知起自何時。流弊至今。專行招募。夫本地兵。今人呼爲主兵。自他招募呼客兵。亦旣明知其有主客之別矣。而爲主人。未有不顧其家者。賓客忽然來。忽然去。視今所主之家。固傳舍也。其長。其上。其將領部。率傳舍中主人也。一朝一夕可以使

海忠介公集

之親之於平時。可以使之死之於有事乎。出力以養軍。出力以養民壯。加之餉兵。今告病矣。賦歛於民。日增日重。害在百姓之身。未足言也。二三十年以來。廣閩漸直之變。大抵生自募兵。召之則爲兵。散兵則爲賊。再有召募。又不過即此前日之賊應之。往往來來。外援內間。當事諸臣。亦非盡暗其莫可測度之心不之知也。爲是小民。偷逸成習。一僉爲兵。載塗怨讟。驅之守戰。事有難爲之者。轉之召募。苟應目前。不講之祖宗之初。不設爲今日之法。則誠誤矣。處中秉鈞軸者。亦不以其所爲之爲誤。此一誤也。關係地方。非小誤也。臣奉巡撫江南。披閱冊籍。募兵千千萬萬。不可謂無禦侮人矣。然不求之本家之主。而資之他方之客。二心之人。入我堂室。有兵之憂。過於無兵。臣已行各省。發原給路費回籍。一應關要。原把守地方僉軍旗民壯頂補。家自爲守。人自爲戰。責之彼地居民保甲保長。夫平時無養兵之用。則一時所費犒賞行糧。無多事也。倉穀可給。紙贖銀可支。其先年蘇松常鎮軍餉。及應天等府協濟銀。每年計該銀一十八萬九千四百

海 忠 介 公 集

二十八兩有奇。并徽州府協濟近給本地方用充兵費。計每年一萬一千六百一十八兩有奇。民以爲厲。有損於民。而無絲毫補益者。合無候命下之日。自隆慶三年起。一併停免。永不徵派。剪絕禍亂之萌。一紓餉兵之困。此民之幸。一方之利。亦國家之利也。然臣所言者。係是江南事勢。通之天下。事當改行。今亦如是。臣籍瓊山縣。親見兩廣兵事。年四十入官。歷福建浙江江西南直隸等處。正當寇亂時節。聞之識者。聽之道路。未有不稱募兵貽害地方。亦未有不稱養兵之費。有損無益者。人心同然。祖制當復。伏望皇上勅下該部。凡臣所言。及其他地方事體。類臣所言。一併覆議。速與施行。若謂俟我兵練成。然後漸去招募。二十年前曾有此議。迄今未見練成一兵。未見去一應募。一言截斷。而事定矣。事定而祖宗之制。千載一日矣。支吾之說。臣不敢爲皇上道。亦不願該部復作此等議論也。

乞終養疏

尚寶司司丞臣海瑞謹奏。爲懇乞天恩。容令終養事。臣原廣東海南衛。籍番

海 忠 介 公 集

禹縣人。甫四歲。父瀚不幸早世。時母謝氏。年二十八。誓自礪守。勉針黹紡績。資之育臣教臣。至有今日。原父止生臣一人。別無以次兄弟。母念父嗣如綫。愛臣尤篤。臣嘉靖二十八年舉人。三十二年閏三月內。授南平縣儒學教諭。三十七年五月內。陞淳安縣知縣。四十一年十二月內。調興國縣知縣。三任十一年。母皆隨祿就養。母之待臣。雖年當強仕。日夕相依。不殊襁褓。後因寒嗽成衰。自憂不堪北地寒苦。是以四十年十月內。臣當朝覲。陞戶部主事。臣母涕泣別臣。回鄉調疾。四十四年十月內。臣以建言。值先帝震怒。臣母風聞臣罪必誅。痛臣念臣。前病轉劇。後法司擬臣罪取決。上請先帝。留中不下。旋於四十五年十二月十五日。遺詔復職。此出臣母望外。以爲必死。而今日復得生之想也。先帝厚恩。出臣望外。伏讀蓋愆成美。端仗後賢之詔。則今日亮采獻納捐軀圖報於陛下以爲先帝報。猶恐萬分之一未有濟也。陛下新服厥政之初。正勵精求助之日。遂欲求去。可言之乎。忍言之乎。但臣所值。有甚不得已者。臣母今年七十八矣。臣年五

十有四。正李密盡臣節之日長。報劉之日短之謂。長者可以補酬。短者不容於多得。況臣家現瓊山縣。去京師九千四百九十里。旁無兄弟。以調母疾。下無男嗣。以紓母懷。止是一母一子。而母思子。懸心天涯之北。子思母。懸心天涯之南。憂思衰病。百端攻心。老人風前燭也。氣血幾何。可堪此苦。我祖宗以孝治天下。大明令。凡官員父母年七十。果無以次人丁。自願離職就養者聽。伏望皇上憐臣母子孤苦之情。察臣今日不得不歸之故。勅下該部。照例放臣回籍。奉侍老母。俟母養獲終。臣照舊赴部供職。則臣母子未死之年。皆陛下所賜也。臣感恩益深。圖報益切。致身捐命。所甘心矣。臣心懇切。干冒天威。無任惶恐戰慄之至。

被諭自陳不職疏

奏爲自陳不職。懇乞天恩。亟賜罪斥。別選賢能。以當重任事。臣於今三月初二日。見邸報該吏科給事中戴鳳翔。論臣沽名亂政。大乖憲體。臣卽所計開。逐一思省。無一字是臣本心。無一事是臣所行事跡。言官誣妄。臣

海 忠 介 公 集

請爲皇上陳之。蘇松常鎮四府。路當衝要。府縣官。日以迎送過客爲事。小民冤抑。雖有欲爲分理之心。而日無暇時。往往棄置不理。事涉鄉官舉監。又憚勢豪。寢閣不行。臣聞之久矣。臣到任之後。所准狀。果是比前任撫臣。爲多通民隱。抑強橫也。江南民風刁僞。每放告日。狀動以三四千計。臣所准行。二十分中之一而已。循舊規。月以初二十六二日放告。非無日期也。惟人命強盜貪官不拘日抱牌訴。然三五日。約止准一二狀。盡批府縣。情重解審。非臣自問。自十一月以後。則告人減前。所准極少。惟巡歷所至縣分。准多如前。謂越訴不答有之。誣告未嘗不加重刑。駁允拘卷。歷可查考。種肥田不如告瘦狀。蘇松常鎮有此民謠久矣。府縣官招呈。往往兩可調停。誣告擬罪。輒曰姑念貧民愚民改輕。擬詰之。各官則曰一向如此。江南民刁奸勝。非此不能解爭而息訟。臣披先年招卷。果若所言。謂非法也。曾援肥田瘦狀之說。刊告示以禁之。臣探先日民謠。以禁府縣。鳳翔乃捏謂民爲臣與謠。臣列爲告示。乃自彰其過。使鳳翔今日得爲借口耶。五年

海 忠 介 公 集

田土。祖宗之制。謂實有斷賣文契也。蘇松四府。鄉官賢者。固多其人。厲民致富者。誠不爲少。爲富不仁。爲仁不富。自然之理也。果有實賣文契耶。臣於他府縣告。係白奪之狀。間行一二。惟華亭縣告鄉官狀。所准頗多。蓋華亭鄉官。田宅之多。奴僕之衆。小民詈怨而恨。兩京十二省無有也。臣於十二月內。巡歷松江。告鄉官奪產者幾萬人。向府縣官問故。羣舉而告曰。夫民今而後得反之也。向諸生員問故。則又群聲而曰。民今而後得反之也。鄉官之賢者。亦對臣言曰。二十年以來。府縣官偏聽鄉官舉監囑事。民產漸消。鄉官漸富。再後狀不受理。民亦畏不告訴。日積月累。致有今日。事可恨嘆。先年土風不如是也。爲富不仁。人心同憤。乃鳳翔係嘉興府人。嘉湖與蘇松接壤。婚姻交際。如一府一縣之人。然鄉官富橫。則既知之素矣。鳳翔果有爲民爲國之心。不私親故。舉而聞之皇上。無不可也。今本內隱下鄉官不說。止說壯民。隱下實賣契書不說。止說五年。巧爲言說。爲鄉官立一赤幟。不爲小民伸理。多年莫訴冤抑。可以爲言官

海 忠 介 公 集

哉。鄉官自行清退田宅。松江府申報數冊到。臣見在天理人心不容泯滅。鳳翔獨無是心耶。鳳翔不考其初。據今日論。謂民爲虎。鄉官爲肉。不知鄉官二十餘年爲虎。小民二十餘年爲肉。今日鄉官之肉。乃小民原有之肉。先奪之。今還之。原非鄉官之肉。况先奪其十百。今償其一。所償無幾。情見乎詞。臣竊恐鳳翔居鄉。亦是此等鄉官也。祖宗設有軍士民壯。今日別行召募。成法之壞久矣。臣於到任之後。與各該管兵官計議。除去土兵。福浙兵數不多。散之不難。水行者送至定海關。陸行者送至杭州。方給路費。娶妻置產者。原議不散。謂其與土著無異也。又革去供過客吹手護送。并拘解犯人脆弱不堪敵寇之民壯。以存兵補之。原議如此。案卷具在。賴各官計議停妥。是以散兵雖多。了無言說。聞報之日。排入都院。賴湯兵備權宜救解。不知鳳翔何聞何據也。原練兵銀。十一府州。歲共二十萬兩。奉旨留五萬兩。每十兩內計免其三。徵其一。十一府州。俱如此派。奉旨如是。非各府署不理也。十一府州。一體而行。何謂徧累。止照旨共派五

萬兩。何謂兵糧仍派加。有如派徵之民輸之官。臣必行文府縣。必有案卷。臣能隱之耶。鳳翔捏無作有。不知何故。連結倭寇。攻陷城池。誓血爲盟。劫庫斬關。行旅不通。煙火斷絕。事干地方。非小小也。臣欲自爲遮蓋。巡按御史張問明。巡鹽御史吳從憲。巡江御史李紹先。時常巡歷蘇松四府。與有責焉。縱重任在臣。若彼不言。爲罪不小。肯爲臣遮蓋耶。鳳翔欲陷臣。而捏爲危言。以欺皇上。鳳翔之罪大矣。蘇松四府。水荒爲甚。是以臣議開吳松江白茆楊家濱等河。各州縣徧修圩岸塘浦支河。興工賑濟。江北之荒。比蘇松尤甚。劫掠之多。其經奏聞屢矣。謂亦募兵所致耶。建德縣原無驛遞。非正路也。二十年來。行者憚江西驛傳道。九江兵備道二衙門。掛號裁革。其路始通。臣聞之久矣。臣初到任。即行池州府查議。并移文江西九江道。申復相同。彼不愛彼江西之民。而反欲臣行之耶。府縣官稟說今年水災。富家欲照往例取利。佃戶稱無收拖。賴臣令之酌量災數。一家均認。苟矣富人。哀此燹獨。又當再酌口說如此。未有禁示。先年糧長。往往於

收糧時。先除還自己平日私債。後算官數。富家亦乘出米之時。同逼償債。公私並舉。錢糧難完。臣告示禁革。謂待完糧後。方私下取償。非禁不許還債也。臣官南通政日。妾死於七月十三夜。係自縊。妻病死於二十四夜。妾死於十一日之先。妻死於十一日之後。無妻先妾後。妾毆妻一日致死之事。臣未嘗差人越境擊人。討船之辱。臣所未諭皂隸說事。少者五十金。多者百金。出金何人。禍且立至。何人被害。狎慢士夫。何官爵。何名姓。其他事端。臣不敢一一煩瑣。以瀆天聽。鳳翔論臣。捏有指實。謂臣自德州而下。用夫一百名。則驛遞有循環簿。謂臣柴燭取足本鄉有司。則番禺二縣有用度數。欺天玩聖。臣查所准狀。并問之府縣。絕無此語。招案皆在。陞任同知李世藩。被皂隸索二十金。李世藩見任南戶部員外。王司業被皂隸索二十金放免。王錫爵見轉北司業。擡轎直入。二司中道致害。夫皂擊責二十。臣當時所遇二司。今熊汝達。張尙夫。周舜岳。羅元禎。見官廣西。雲南。廣東。人口可問者。臣不能箝其口使不言。文卷在官者。臣不能滅其跡。使無徵驗。

海忠介公集

臣所以謂無一字是臣本心。無一事是臣所行事跡。臣誠查省之久。非敢上欺聖明。強爲辯說也。皇上勅下該部。逐一查勘。可以知鳳翔之妄矣。然鳳翔論臣。每言其小。愚臣負國。其罪實大。夫總理提督。皇上畀之重權。行無不可。而足以有爲矣。賢能當之二三月。而治化改觀。無難事也。蘇松常鎮。賦役不均。是第一事。臣任九箇月矣。而賦役未見均平。次是軍務。而軍兵未聞強壯。禁誣告而刁訟未息。禁浮靡而侈僭如初。謂扶弱被浸奪。而貧者自貧。謂抑強肆侵奪。而富者自富。有臣如此。負國之罪。可勝言哉。可勝言哉。鳳翔論臣。誣捏其小。遺忘其大。是非不明。則政事惑亂。近日科道諸臣。奉公建言者。固有其人。其不公者。往往逞已邪思。點汗善類。不爲鷹鷂以報國。過爲蠅口以行私。營營止焚。人增懼憚。閣部臣明知其非。亦兩可議覆。而曰畏其口之繼也。窩蜂難犯。不得不然。臣竊謂畏其口之公則可。畏其口之不公則不可。是非淆亂。則國家之理亂因之。三四年來。公私並行。議論騰沸。賢否莫辨。人無定趨。有識者曰。詩人之譽譽滄滄也。臣願

質虛實。以明國是。兩可敗正。死不願聞。伏望皇上亟奪臣官。別選英賢。以代其任。而又大舒乾斷。別白是非。微臣負國。鳳翔欺君。兩不寬貸。詩云君子如怒。亂庶盪沮。宗社幸甚。臣不勝幸甚。

告養病疏

奏爲衰病不能供職。懇恩曲賜歸田。以延殘喘事。科臣載鳳劄論臣沽名亂政。大乖憲體。臣近見邸報。皇上不加罪責。着臣以原官總督糧儲。皇恩廣大。無可報矣。臣復何言。臣嘗謂今諸臣。全犯一因循苟且之病。皇上雖有銳然望治之心。群臣絕無毅然當事之念。互爲掣肘。互爲排獎。而又動自諛曰。時勢則然。哲人通變。人無奮志。治功不興。國俗民風。日就頹敝。臣二經論劾。衆口嗷嗷。臣尙執已爲是。臣實見得是也。孔子謂施於有政。是亦爲政。總督巡撫。惟行之大小不同。而施於有政。事功則一。臣尙欲以身爲障。回既倒之狂瀾。以身爲標。開復古之門路。蘇軾有言曰。破庸人之論。開功名之門。而後天下可爲。臣日夕念之。職任所到。執臣而行。補報吾

皇。或可萬分一二也。但任事在君臣孚契。猶在年力精強。臣氣體原弱。從來疾病相仍。古人稱五十始衰。臣今年五十七。去六十僅三年耳。天道一周。人身亦一變。新春增年。又覺衰態。目今痰氣交作。血氣益虛。每一動發。昏迷半日。勉強視事。不知臣者。謂臣未衰。臣之自視。外強中德。衰弱爲甚。況臣母今年八十一。一向隨仕。視事之餘。得以左右侍養。而老人樂所自生。日念鄉井。臣報君事母。交戰胸中。論臣衰年。義當奉母。伏望皇上察臣苦情。臣前自陳俯伏。俟罪萬一。皇上寬恩。不加罪譴。賜臣回籍。永終田里。臣廣東瓊山縣人。瓊山萬里京師。微臣忠悃。無日可違。臣再有一言焉。臣叨任巡撫。凡所施爲。竭盡心力。一皆採訪民言。考求成法。民利與興。民害與除。不可易也。伏願皇上仍勅新任撫臣。勿以臣受謗而輕改臣事。忠信之事。蠻貊可行。勿謂鄉官過客。口大難犯。不可不原。小民口小。不得上聞而不加恤。仍勅閣部大小臣工。不得如前虛應故事。不得如前挨日待選。必求仰副皇上求治之心。毋負平生學古之志。不求合

俗。事必認真。九分之真。一分放過。不謂之真。况半真半假者乎。閣部臣之志定。而言官之是非公矣。閣部臣如不以臣言爲然。自以徇人爲是。是庸臣也。是不以堯舜之道事皇上者也。宰相奉行。臺諫風旨。多議論。少成功。遂階宋室不兢之禍。我皇上何賴焉。胡銓之諫孝宗曰。詩云勿聽婦人之言。今舉朝之士。皆婦人也。皇上勿聽之可也。宗社幸甚。愚臣幸甚。

集 公 介 忠 海

卷 之 一
委 疏

四 十

海忠介公集卷之二

治黎策

天下之事。圖之固貴於有其法。而尤在於得其人。何謂法。經畫而條理之。卓有成可考者。法之謂也。何謂人。所以經畫而條理之。卓以成績自許者。人之謂也。得其人。而不得其法。則事必不能行。得其法。而不得其人。則法必不能濟。人法兼資。而天下之治成。則夫今之瓊黎。其處置之法。固所當講。而以身任事之人。又非瓊人之所深望者乎。夫執事之問。革心宣化之圖。山川夷險之勢。叛服得失之由。愚生固曰。得其人之爲貴。何也。誠見夫蠢茲有衆。可以一鼓而擒。而直爲是虞虞者。亦曰地險不可以馳驅。兵強不可以禦敵。不知自古及今之寇。未嘗不據險以爲強。自古及今之師。亦未嘗畏險而長寇。苟我不弱。天下無強兵。苟我術周。天下無險地。瓊崖衛所之兵。自丘文莊奏不許征調以來。今日已如驕子。其不足以應敵也明矣。故前

即溫之敗。皆未戰。怯聞千里。臨敵先期於敗爲之也。先哨去而後哨改。彼欲進而此欲退爲之也。今日之禍。雖有以激之使然。然猖獗二年。崖民死徙將盡。未有能勦絕而安輯之者。尙得謂之有人乎。今王命赫然。舉兵誅之。夫以萬全之力。視此直狐兔耳。其束身繫頸。計日可待也。然愚生之所憂者。元至元屯田立學。復起文河之憂。毛伏羌提師壓境。不開十字之道。欲爲目前苟安之圖。不思萬世無窮之利。林株之不拔。則未必後日之不如今也。夫瓊黎中處。環海州縣。譬之人則心腹之疾也。失今不治。後將浸淫四潰。而爲四肢之患。皇甫規所謂虺蛇入室。不可一日安焉者也。故愚生以爲今日之計。不過堅持開十字道之心。固執立州縣之計而已。自此之外。雖議之之盡其方。處之之盡其術。皆下策也。何者。昔之議者。謂盡殺黎類爲忍。而究其所以爲說。不過曰禁商人之貿易。則黎無以爲矢刃之資。夫利之所在。人共趨之。雖死有所不顧。而況於鐵首其戎者乎。是奸商雖不可不禁。而有不容於盡禁者矣。不過曰禁軍民之逃亡。則黎無以深

劫奪之毒。夫徭役不擾。俯仰是資。固有樂之者。況於州縣復爲之敲乎。是逃亡雖不可不禁。而有不容於終禁者矣。不過曰治土酋之刻削。則黎無以爲變亂之激。夫讀書知禮義者。浚剝良民。雖廉耻有所不顧。而況於土酋之無知者乎。是貪酋雖不可不懲。而有不容盡懲者矣。始終悞宋者。在一和字。姑爲一時撫綏之計。不可以策黎也。革心宣化。效且遲於百年。官吏之遷陟不常。人性之貪暴不一。以一人之身。而思以一德化之。不可以策黎也。所宜乘今日大軍之勢。首惡既平之後。開通十字大路。州縣所之可移者移之。屯田之可徙者徙之。遷良民之無田者佃其中。其不宜剽滅者徙之於外。夫然後爲百年之計。而瓊民享無窮之福矣。不然。今日赫然之舉。復如前日收兵之速。剽除雖盡。於小民無所益也。又安知後日之不如今而復爲民害乎。又不然。而徒曰革心宣化云者。吾未見州縣之不立。十道之未通。而可以革心宣化也。嗚呼。此所以得其人之爲難。而非得其法之爲難也。愚生之所憂者。如此已矣。而其所以策於執事者。亦不通如此而已。

若夫山川夷險之勢。叛服得失之由。瓊志歷歷如照。愚生欲語而未暇焉。狂瞽之見。惟執事進而教之。

訓諭

訓諸子

二三子之從遊吾者。何爲哉。天之生此人也。而百責萃焉。古之人所謂通天
地人曰儒。大學之八條目。知所先後。其事也。人非生而知之者。孰能了此
無惑。故從其先得者而問焉。其不免日程課於文藝者。蓋有司須此以責士。
發揮而涵泳之。於此與有力也。其售不售不與焉。今之從事於學。有以聖
賢自許者乎。而決狀元進士於科第者。人恒壯之。此學奚自而來哉。瑞於諸
子有一日之雅。於經授或未盡焉。而飭躬勵行。人之模範。敢侈然自謂足以
當之而無歉者。然學求以復其良而已。操心治心。此不師而師之嚴切者。諸
子謂無以過我而師焉。或可稽之經傳。質之子史。反之清夜瑩靈之氣。而徒

曰吾惟師之從。要亦蔽焉而已。聖賢以識真誨人。其說備在方冊。踴躍於諷咏。而不能以自己。直欲身體而力行之。此日新之地也。行之而牽於俗。不免有怯心焉。則志立而氣不充也。仲由不耻緇袍之立。孟軻藐大人。伯夷之敢於非聖人而不顧。時舉而服之心胸之間。往來不置。或者克養之有機乎。不然。徒綴酸文。識陳語。爲後日富貴故鄉之計。視百責於我何如。縱其一舉而進於卿相之列。吾爲三三子醜之矣。夫求富貴利達。而妻妾之羞泣從焉。真心也。施施而驕其妻妾。失其初焉者也。孔子得子路而有惡聲不入於耳之幸。事師無犯無隱。究其所以誰能若此乎。君子之無耻。色忿而詞忤焉。聖人不計也。三三子何以復我。

叅評

知縣叅評

知縣。知一縣之事。一夫不獲誰辜。二民失所余咎。所以入單父之野。而見

棄魚之俗。則知子賤之政矣。腹中牟之境。而見雉馴之休。則知魯恭之政矣。爲政不同。而要不外乎敬天勤民之念。且災異上。則減膳撤樂。謹告上則蠲租求言。凡膺斯民之責者。體上天之意。而噢咻之。堯獨必哀。饑寒必恤。不飭一法。不私一錢。肺石下無梧邱鬼。覆盆中鮮鵠亭冤。爲民開必得之門。明必死之路。而鴈聲不哀。鼠牙無訟。則政簡而刑清矣。此豈家有治縣之譜哉。良由萬物一體之懷而誠求之也。乃今則異是矣。一旦縉紳通得一邑。遂沾然色喜。埋沒真心。不惜廉耻。多方掙尅。以克囊橐。酸生民之膏。填溪壑之欲。甚至有鍾乳三千。胡椒八百之譜。而不顧者。嗚呼。縣則有矣。官能清乎。槐根瘠矣。馬骨高乎。貪酷若此。殊不知上而朝廷吾父母。中而撫按藩臬僚屬過客鄉士夫。吾長兄弟。下而吏書里老百姓人等吾子姓。遇之各有正道。若謂止可潔己。不可潔人。潔人生謗。謂所行不可認真。認真生怨取禍。不顧朝廷之背否。以鄉愿之道待其身。以鄉愿之道待吾子吾長兄弟。浮沉取名。竊取官爵。非知縣也。本縣初意。直欲以聖賢

之所已言者據守行之。白謂效可還至。迄今四載。中夜返思。日日催徵。小民賣妻鬻子。未有完事之日。時時聽訟。小民爭門趨利。未有息訟之期。感孚之道薄而民不化。燭奸之智淺而弊猶存。徒有其心。未行其事。徒有其事。未見其功。誦法孔孟幼學之。壯行之。期月而可。三年有成。有深愧焉。俗吏非所以語我。若曰稱知縣職。則全未也。

縣丞叅評

官以縣丞名。蓋謂一縣事官。與知縣和衷協濟。承流而宣化之也。誠靖共爾位。無忝厥職。好官自我爲之。安知不與鳴琴而治者。大展雷封之畧哉。是縣丞之事。亦知縣之事。知縣之責。亦縣丞之責也。如未入官門。先營家計。爵祿賄賂。奪魄動心。國病民冤。如聾如啞。縣丞之謂耶。瑞自下車日。竊心鄙之。詎我寮列備官而未之講耶。每見時可共言。爲之卷舌。事可獨任。爲之却步。有如韓退之所謂涉筆占位署。惟謹惟長官之聽。漫不可否事。治縣之績。無一足紀。是上人子惠元元之意。不能承而宣之也。非縣丞也。

主簿參評

主簿者。掌一縣簿書之事也。雖位有崇卑。職有詳要。夫人莫不有真性。率真而行之。卽古所謂僅得一官亦可小試。苟不盡分稱職。金玉其外。而敗絮其內也。卽陟巍科。登臚仕。徒玷官常耳。餘無容襯縷。如錢穀一書。宜出入明允無悖。孔子會計當之說。苟勾稽錯亂。追呼矇朧。有錢則寬徵。無錢則急比。且計糧數之多寡而繭絲之。有大封小封以爲常規之入焉。是憑家兄爲驅使了。不能以自主。徒老死於簿書間也。又何異於王恂輩。唯唯諾諾。僅供公之喜怒也哉。非主簿也。

典史參評

典史。掌巡捕民間盜賊爭賊微事盡屬之。所當小心翼翼。晝夜情勤。棲僅一枝。飲惟蒲腹而已。若位卑而言高。祿微而謀大。黑白出於唇吻。曲直任其心胸。指良爲盜。爲已毆利。欺肺石之無言。棘林之哭置不恤焉。何以

爲民長上哉。况屈一夫。冤一婦。天之霜旱隨之。爲民上者。可不緣此爲兢。兢歟。中又徧聽衙蠹。相助股削。盜賊分其贓。爭門罰之紙。不幾乎祥符之五鬼乎。非典史也。

教官參評

教官。掌一邑之教。一邑之臃腫薄質。俱賴其陶成。况門下俊傑之秀乎。所事事比俗吏簿書詞訟不同。雖不能如尼父設教洙泗人三千。王通演教河汾士八百。卽淳邑簪纓濟濟不爲少矣。掌學教者。謂可安閒以自曠乎。應將經書性理子史諸集。與羣弟子朝夕講習。月日會課。切磋琢磨。使之義理明。而心性醇。異日登之仕路。文章由道德發出。事功從學問做來。有裨於國家。有濟於生民。亦以見學優則仕之明驗也。瑞仕淳邑。一載有奇矣。見諸生唱飲呼盧。逐羶蠅營則有之。所謂經義治事齋。忠臣孝子錄。懜然罔聞也。是誰之過與。若寄空名於諸士子之上。典籍無傳。模範不端。虛糜歲月。爲身謀。爲家計。初入學則索其贊見之儀。既入學。則需其送節之

禮。於諸士子無毫末補焉。亦何以克稱廣文之職也哉。非教官也。

陰陽官參評

陰陽官。測日晷星候。別昏曉雨暘早晚氣節。以占一邑之機祥。而決趨避焉。故有平子之推算。而後渾天之說行。有蘇子容激水轉輪之智。而後星辰之躔次。故陽德主遂。陰德主閉。調而變之。無愆陰。無伏陽。人無災厲。物無天札。此陰陽所爲福國也。苦今則不然矣。古有男巫掌望祀。望衍授號。巫女掌歲時被除釁浴。春官司厥政焉。近因周禮久廢。今陰陽官納銀充之。希圖罔利。每於朔望月蝕。大旱。舞雩時。而需索夫巫氏焉。問以陰陽之理。懵如也。不幾與古陰陽之設大逕庭哉。以是而稱陰陽。是假陰陽不測之術。而行籠絡巫氏之計也。非陰陽也。

醫官參評

醫者。業軒岐之業。心天地之心。察病症脉理。識藥性以利一邑之病。故起

海 忠 介 公 集

太子於暴蹶之頃。識堅子於膏肓之際。以之醫國可。醫人可。醫龍麟。醫虎口。有何不可。乃今之所謂醫者。不識標本。不諳經絡。取人之病而妄治之。幸遇病魔稍退舍。則揚然自誇曰。真不龜手也。迨久之病竊發。請復之。或菘洪。或沉瀆。懵然無下手。而鼯鼠之技窮矣。更爲之詭其計曰。備諸籠中。得之無不效。但皆值龍宮物。因而索價之高也。而病如故也。夫非求醫者有心。爲醫者無恆哉。以是醫人。是以既死之心。醫未死之人也。然則夫人之天札。反不如南陽甘谷中之老歟。非醫官也。

老人參評

古有虎溪三老。香山九老。此老而無與於民也。聖製老人之設。一鄉之事。皆老人之事也。於民最親。於耳目最近。誰善誰惡。洞悉之矣。尤擇一醇謹端亮者爲之。以年則老。識則老。而諳練時務則又老。因構一亭書之曰申明亭。朔望登之以從事焉。是不計仇非。不避親。毋任口雌黃。不憑臆曲直。善則旌之。惡則簡之。此亦轉移風俗之大機括。而鄉落無夜舞之緜繭矣。乃今

老人。以錢神爲使鬼。希圖差勘。瞞官作弊。以肥私囊。間有投訴。此行酒食曰。吾飽吾腹矣。彼私賄賂曰。吾豐吾袖矣。至兩詞俱備。狐疑莫決。徬徨四顧。不能出一語以相正焉。嗣是公道不昭。貞邪莫辨。嗟夫人也。以位則居老之名。而智則反落辱口詔齡下也。非老人也。

里長參評

古有五家爲軌。十軌爲里。里中有長。此里長。與比長鄰長五等之長並建。登之版籍。以供賦稅之入也。我朝規制。立一都圖。即有十老里戶。而甲戶幫之里與甲。有甘苦與共之情焉。有臂指相使之勢焉。誰貧富。誰困苦。誰迹流。誰人錢糧多寡。誰人丁口消長。彼盡知之。諸凡差役。一總其數於里長。而爲之徵輸焉。若果不好錢。不刻剝。無私向。有公心。里旣無索瘢洗垢之苛。甲自無醫瘡剝肉之慘。甲內之老稚。皆得本老之里而長養之矣。好縣官。孰能如之者乎。則里長之設。當如周之里宰黨正。體國奉公者。爲之可也。倘憑勢作威。當大役而有壯丁之重派。應卯酉而有連累之誅求。或

混扶甲首。以顯售其奸詭之謀。或妄開甲幹。以陰行其賄賂之術。有錢者徧爲回護。善柔者不行扶持。事兼利已。則同甲首作弊以欺府縣。事止利已。則假府縣名色而剝甲首。百計取錢。無心撫恤。致使村野蕭條。甲首流離。剝其子以原其身。竭澤而漁。明年尙有魚乎。非里長也。

生員參評

我國家群士覺官。導之師儒。優之廩祿。復其身及其宗族。待之不爲不厚矣。至求士之可以潤澤生民。還報天子者。則鮮其人焉。何士之人意在得賢。而士之所希在榮利也。夫天地所以生一物。即所以生萬物之理。故一人之身。而萬物之理備焉。萬物之理備於一人。故萬物之責。亦萃於一人。君子之仕也。彼萬物之責身有之。故身求以盡之。如饑之必食。渴之必飲。有負而必求其酬。有約而必求其踐。不得已而然也。今人不以行義視君子之仕。以榮身及親當之。意向一差。是以百端施用。無一而可。昔人謂士非不脩之家也。至應舉入官。耽利祿。慕榮途。患得患失。靡所不至。不

海 忠 介 公 集

能不壞焉。夫如柳子河間傳。則士脩之始。壞之終。間亦有之。然大槩不美之士。不必獻身天子之庭。然後人可得而知之。講之不明。守之不固。窮居之所以自脩自養。有彰彰然著者。試舉一二。今上人之鼓舞諸士子者。盡聲勢也。細推論之。多不協義。士子遂羣然而曰。是能作興我輩人也。是待士之原人也。然則入官之後。其聲勢更有大焉。將無慕之乎。上而朝廷待士之恩。下而有司義起之典。如補增廩。如優免如途費。非士子所宜與也。今越分而求。且紛紛焉。比之播間之乞。相去何如。然則入官之後。其爲利更有大焉。將無乞之乎。謂義則與衆舉之。助之成事可也。而今凡事有與於秀才者。不論是非可否。輒群起而曰護我類焉。習戰國背公死黨之風。更不知孔門不比不同之義。小人學道則易使。秀才學道。今人願以惟難管目之。然則入官之後。其徇私。其植黨。更有利焉。將無胥朋比以壞國事乎。施於有政。是亦爲政。今士子之施於家者。叙倫理。治恩義。若之何也。議者比秀才爲閨女。孟子人有不爲。後可有爲意也。今之秀才。不爲處女。而爲淫

婦亦多矣。以若所爲。求若所欲。負天地生人之義。孤朝廷作養之恩。非生員也。

吏書參評

昔人謂一介之士。苟存心於利物。於人必有所濟。吏書主書寫文移。掌簿籍。預縣事。古稱庶人之在官者。果有美意。則及人之惠。比之一介之士。遠矣。何今之爲吏者。每以得利爲誇。惟以得利爲誇。故百端作弊。無所不至。時以狗吏呼之。賤之也。一爲吏。而天之所以生人仁義禮智之道同於聖賢者。喪之盡矣。非吏書也。

申文

申海南道陳雙山文

福建延平府。南平縣儒學。爲區處兵後地方。以絕後患。圖久安事。緣本職會試未第。曾具奏。蒙兵部奉聖旨。行撫按守巡道。從公計議後授今職。母

老在堂。便道歸省。且冀得一至臺奏所未盡。并不可先言者。一一誦之。事或可成也。時臺下往雷州府。候清軍察院旋瓊。與本職起日相值。不得已更日求見。奈門者拒之咫尺間。候二日不得一接。恐憑過期。始渡海北上。中途每思及此。深用憮然。今已至任。未得言者。請爲臺下言之。夫瓊州府。州縣外旋。黎岐中處。正皇甫規所謂虺蛇入室焉者。臺下試思天下有此等心腹疾。而能一日安者耶。無黎則三州十縣可寧謐。去二三萬黎人。安五六十萬百姓。加五七年功。成千萬年逸。臺下試思天下有此等用力少。獲利多事。而可舍不爲者耶。黎潰。則三州十縣舉受禍。然以三州十縣制黎。則又千谿萬徑。皆可施功。五裂四分。柄執在我。臺下試思天下有此等反掌易事。而可曰不可能者耶。然自國初至今日。竟無一人擔當此者何。其故有四。全無志者不必論。大約今人官居類傳舍。至任未久。遷擢競心。影響間見黎岐難處。遂終以難視。慕榮途之速心。蔽遲難之一見。先入爲主。一也。詢訪未的。妄信人言。謂黎岐地方。關山嶺峻。林木茂密。通之爲難。妄信人

海 忠 介 公 集

言。謂黎人出沒。千百爲群。敵之爲難。英雄豪傑。當先爲而不爲。二也。平素攻舉子業。未嘗留心經畧民事。區處猶難。況兵戈危險。不知其易。妄意其難。思及存亡呼吸。心膽喪矣。不復爲謀。三也。其有思得其方。志立功業者。又慮黎平我去後。萬一事出不虞。邀功起釁。人將置我何地。目前成功。後當顯禍。四也。自國初以至今日。言者屢矣。迄無能取信上人者何。其故有三。雷同平黎之說。懵然不識地利險阻。致上人以白面書生笑之。一也。津津然說平黎易。究竟所以見其一。不見其二。說東遠了西。說南差了北。上人因其二。盡疑其一二也。誌書歷載諸人議論。然其亦有可爲地步。言之不行。毋乃議事易。處事難。致上人以紙上空談視之。三也。二者皆非矣。臺下誠能以必爲爲志。於本職奏疏上。兵部圖說治黎策一道。少致意焉。且於不可信之三。求其必執此說之故。於不擔當之四。深求衆不擔當之由。彼此參互。不用其二。借三以壯吾膽。鄙笑其四。借四以深吾謀。將見反掌事。炯然臺下目中矣。夫一時之爵。孰與千萬年功名。

一世之榮。孰與千萬年廟食。臺下欲不爲之。得耶。本職言盡矣。然尙疑臺下有憚心焉。寧非謂提督府不與我以他方兵糧乎。夫本職云調廣西土兵。廣東漢達官軍。量撥一次大征銀糧之半。此據人皆可行言耳。若臺下兵備之權則不然。蓋瓊民游蕩。并無衣食。棄爲盜賊者甚多。練集五六月。可成精兵。借州縣民壯工食。權宜區處給其始。資黎地米山貨木價給其終。兵行糧隨。殊無難事。又寧無謂兵事一舉。存亡呼吸。誰則料之乎。夫本職云用兵。良亦以勢不在我。或生奸人玩侮之念。大約此舉。先易後難。隨機鼓舞。止用一撫字。自可了事。本職思之日久。歷之日深。間之日多。事決可成。成無後患。臺下請壯膽行之。本職初官。遽不得上人意。這等世界。究竟做成甚事業。母老在堂。歸期指日。中有言未盡者。俟到臺日悉焉。

稟帖

稟鄜都揭帖

嚴州府淳安縣知縣海瑞謹稟。伏讀臺下劄付云。凡有益於鹽政者。我三司并府運州縣等官。具帖詳報。又云素性簡朴。不喜承迎。凡飲食供帳。俱宜儉朴爲尙。毋得過爲華侈靡費里甲。又云方今民窮盡。寬一分。則民受一分之賜。務宜體亮。諄諄然不一而止。仰知臺下爲民爲國。言出由中。非虛設也。第今時風俗。喜諛惡直。今時居官人。利害得喪動其心。因一人疑千百人。樂於爲諛。不樂於爲直。臺下奉命南下。浙之前路探聽者。皆云各處皆有酒席。每席費銀三四百兩。金花、金段、一道。湯一進。下程則山禽野獸。人不能致者備焉。供帳極華麗。雖溺器亦銀爲之。與臺下頒行條約大悖戾。夫都院出理鹽政。我祖宗以來未之有。亦希闢事也。事出希闢。則疾苦者。望軍駕而赴訴。貪酷者望軍駕而改心。百姓得希闢之遇焉可也。乃今府縣恐以不周致罪。極意買辦。里甲憚於出財。怨口嗷嗷。百姓不沾希闢之恩。反苦希闢之費。是毋乃官屬、承奉臺下樂爲諛。不樂爲直。誤認

臺下之心歟。卑職先任福建南平縣教諭時。阮軍門道經南平。供奉過盛。函峯駭之。鄉官進禮敬軍門之說。函峯答云。此極是害我爾鹽法通滯。卑職知其端。未知其悉。不敢妄爲之說。獨此一事。耳聞目見。嘗私謂縱使臺下日後不收受。然物旣買辦。必有花消。里甲咨怨。誰則當之。官屬以今時俗例度臺下。竊恐臺下又苦官屬利貢諛。不利執守禮法。而悔無及也。害有甚於鹽法之滯者。是以致塌區區。爲台下誦之。爲此具稟

告示

勸賑貸告示

賑貸之事。古行之矣。吳有申叔儀之請。魯有臧孫氏之告。無非急病意也。故周民之急者。如救焚溺焉。揖讓救焚。徐行救溺。無及矣。今本縣細訪得各都圖。富積穀粟之家。每每幸荒歲。勒索貧民質物典當。倍約利息。其貧甚。慮無可償者。雖倍約亦固吝不與。夫當凶歲。小民菜色羸形。妻啼子號。

甚者顛仆路衢。輾轉溝壑。少有人心者。見之有不能爲情者。爾輩獨無惻隱之心。至是耶。貧民富民均一天地所生之民也。一偶而富。一不偶而貧。假使以爾等處貧者之地。貧者處爾等地步。亦如爾等坐視待汝。畧不加恤。爾等無從取食。亦將怨之否耶。恨之否耶。人皆有不忍人之心。爾輩偶以利心蔽真心。故令里老人等。將本縣言意。勸諭爾等。量將所積穀粟。借貸貧民。不許取利。積厚德以遺爾子孫。其有念人之急。不取其利。亦不取其本。而真與之者。本縣以尙義名目書扁鼓樂獎之。列名縣誌。如仍前畧無惻隱。倍稱取利。許貧民指告。以憑重治。夫積財而不能散者。昔人以守財奴鄙之。爾等將爲尙義之美。抑將爲守財奴之陋。財積無用。德積慶及子孫。爾等念之。

禁章積弊告示

吏部侍郎海爲禁革積弊事。據通政司送到西營街人陸武告狀。審之。初執票六張。後西營、崇禮、長安、三街人等。又送出票。兵馬司自行八十九

海 忠 介 公 集

張。爲各衙門行者二百二十張。曰此隅未繳送兵馬司者。是其先日繳還者。尙不知其幾何幾何也。以五城之人、當千百官大小事用度之害。侵用甲里。朝廷歷歷明禁。今兵馬司官小做了一個狼之貪。虎之猛。以小民膏血奉迎合千上官。又做了一個過送贖私的積年。此與侵用里甲何異何異。合行禁革。兵部夫役事宜有刻本。各衙門自有官定皂隸等役。又加之。此非也。然猶一說可通。姑聽之。今後如有部議之外。仍前票擾者。雖小費一分一文。不及先日萬分之一。亦不姑恕。三考役滿辦事。想祖宗初亦進士觀政舉監生歷事之類流。今日而上銀於官。曰罰班、曰納辦。一部之官。上而下。正用、私用、妄用、在焉。出何典故。出何年律令。自今以後。俱停止不許收。已收者自五月初一日及今給還。在四月內不給。蓋已費用給各人役領。不可追也。其本衙家火諸件。除上手流傳下之外。出此銀辦者退出。必用不可無者。一一以本俸薪銀給還。一如原辦價。分文不短。是雖價值之多。罷官之日。賣可。送人可。留後人用作已小惠可。又不然。

海忠介公集

一船之便載備。前途不足換米換柴賣充路費。可爲官人不貧。況至侍郎。本不至是。有激而憤戲談之。其伺候諸人原領此銀充工食。聽其自散。必用而不可無者。一如家火物件。以已銀給。冢宰統百官。豈有吏部不能令行一兵馬司。聽之借口科道。各街人如若仍前被害。可自放胆來告。做百姓不可做刁頑不聽法度的百姓。亦不可做軟弱、聽人打、聽人殺。而不言的百姓。不言自苦。苦何日止。或欄街、或叫門、不禁狀上。必明說通政司畏忌。若干次告、不准送字樣、上下有體。豈有堂官不能出令一司屬官乎。北吏部此等銀、年有三千餘兩之多。輦轂之下。不禁我不知也。執事官吏、今後爲有司所迫。不出此銀。而禍隨之。許登堂叫訴。又本職上任先後日。各衙門諸公。往往贈有禮物。曰交際。先日規也。夫今日做了朝廷官。便與家居之私不同。嘗謂孟子之寬大。不如萬章之嚴小。獵較猶可。況受其賜。孟子亦誤說也。彼酬此答。殊是虛繁。卻不爲已甚。合行告止。前二件。後附一件。共三件。皆朝廷法度中事。今非違道以干百姓之譽。非借此討人之

短。赤子如在水火深熱中。如將入井。部事本尙書主、侍郎輔、候丘尙書自久不至。居一日官。盡一日職。故不自嫌疑。突此嚴示。

示府縣嚴治刁訟

撫院海示。照得江南刁訟太甚。本院已約府縣官無憚煩瑣。不爲姑息。正欲變刁訟之風。爲淳睦之俗也。近見各府縣申到招詞。往往兩可調停。含糊姑息。本院不能備言。大抵狀詞准行。則便得利。俗有種肥田不如告瘦狀之說。誠哉言也。乃知刁訟盛行。皆府縣官號而召之。至論民情土俗。則又以健訟爲說何故。爲此仰各府縣官。曉諭各百姓。今後告狀。須從實致詞。不得一語架空。自取重罪。其各官今後斷訟。除非已自訟事。迫不得已。陷不知者。與之量情議罪。並吏書作害。告及官府。乃官府不能鈴束之過。鄉官安靜。族人家人作害。其實皆是倚靠鄉官名色。不可執以誣告論之。外此絕無相干生端波及。一一執律擬罪。如仍前兩可姑息。如狀求追銀。則曰念彼貧難。姑量。追人命。不會下手。亦招量給埋葬之類者定。以故出入

人。參論不恕。

示府縣狀不受理

撫院海示。照得刁訟。惟江南爲甚。畧無上事。百端架誣。蓋不啻十狀而九也。本院已諭令各府縣官。始無憚煩。終無姑息。痛之使畏。庶乎事可衰止。迄今反坐招詳。尙有姑念貧民愚民之說。各官徒知一念之差。情可矜恤。不知矜此一人。壞千萬人。不能治一人之誣。必召千萬人之訟。其間身有穢跡。畏彼刁評。飾之曰。姑念貧民愚民亦有之。刁訟日盛。非府縣官召之而使之來也耶。又告狀人往往稱府縣官。告不受理。軍民、赤子。府州縣官、父母也。凡爭鬪戶婚。雖是小節。當爲剖分。衣食等項。當爲處理。若先億其誣捏。十狀九誣。棄九人之誣。而一人之實亦與其中矣。況十人中。或不止一人之實。十人中一人爲冤。千萬人積之。冤以百以十計矣。不能執我嚴法。使誣者懼之不來。乃併實者棄之。使含冤之人不得伸雪。可以爲民父母哉。情者不肯受理。懦者不能執法。其事均不可通。爲此再行曉諭。今後

凡民間小訟。州縣官、俱要一一與之問理。若果無情盡辭、雖小必治。甚則監之、枷之、百端苦之。如有仍前寬縱、復爲姑念之說、與不受理者、一併治罪。若曰多之不可勝理也。夫人有痛之而不知畏者乎。始不免於多。終當享其逸。若置之不理。年年月月。止是如此多而已矣。民怨且詈。防民之口。甚於防川。府縣能一日逸於民上耶。始無憚頰。終無姑息。本院的見得民情官法。恰是如此。各官信之行之。毋自貽悔。

禁印書籍

撫院海示。訪得各撫院、按院、臨將復命。往往牌行府縣印刷書籍、爲入京封帕。用費以數十兩計。至數百兩亦有之。合各府縣算。不啻數百兩矣。有假稱動支本院贓罰、有不動贓罰、借稱無碍官銀者。此等皆是府縣剝民充之。縱是贓罰。原無可作此用之理。朝廷原無許作此用之法。憲司官犯法。法由叅究。念是俗套相沿。辦送在外。使之辦而送之者、致之在內。私人私事。其來已久。爲此稟仰某府官吏。即行各州縣官。但有各院道刷印書籍。

海 忠 介 公 集

并取送鄉官長夫禮物等項。全抄本院前後禁約。將原取牌面申繳。其有一意阿奉、不恤民難。不顧國法者。定行究治。此等事在內謂之禮。在外執律論之便是贓。府州縣官識之。

保甲告示

察院近行保甲之法。止論居止人戶。年至十五以上。盡行開報。爲保爲甲。不論原管都圖冊籍。蓋原該管都圖人戶。今有遷徙。又有他方來此爲工、爲商、雇工流寓之人。故又立爲保甲之法。以訐奸細。聯渙散。使爾等出入相友。急難相救。亦即古者井隣里邑、比閭族黨之意也。爾等可照發去式樣。依照居止次序編甲。若街道狹窄去處。則編東一戶爲第一。西一戶爲第二。又東一戶爲第三。西一戶爲第四。若居止星散參差。難以齊一者。各隨其居相近者爲一甲。多或十餘戶。少或不及十戶。但取守望之便。不必分拆割補。拘定數目。多者接紙、再填四五戶於十戶之後。遇有寺觀去處。即儘其寺觀內之人爲一戶。甲內有新來人戶。增入新去人戶開除。旬日雇

工人。止覺察來歷。不書論年月。雇工人書入。去則除人。各戶人丁年貌有冊。牌上止書花名。一甲。擇一有行止才力爲人信服之人，爲甲長。三甲或四五甲。擇有行止才力爲人信服之人，爲保長。日輪一人領牌。覺察各戶動靜。遇有面生可疑之人。蹤跡可疑之事。即便舉覺。一戶每三丁。出一人巡夜。戶有二丁，亦出一人巡夜。戶止二丁者免。領牌巡夜之人。於是日是夜外出。則輪及別人。其人回日行補。一戶每三丁出一壯丁爲鄉兵。餘人才力稍劣。雖時常習武。不克鄉兵。如止一丁二丁。願爲兵弁。本縣自行選僉該圖自行保薦者。不在此限。每人隨便各備好堅利器械。甚至貧不能備者。亦備堅好木混。遇有警。各甲或鳴梆。或擊鑼。每三丁，出一壯丁，救援追捕。戶止一二人者。止於自戶門首聲援。莫遠出。其巡夜領牌之人。各里遞總甲。自於格眼上算一月三十日。某戶該某日填寫。即是一戶一人一日、一戶二人三人一夜也。保甲之法大畧如此。其間或有本縣思慮不及。窒礙不可行者。則在承委人自爲通融。惟安常懶惰。不僉報。不舉行。則

不合式。若實心舉行。甲有聯絡。戶有利兵。領牌有人。巡夜有人。酌量多寡。人無不均之願。則無有不合式矣。里遞保長人等。仍於稍暇。召各人戶。各鄉兵。習學武藝。本縣到圖。試有武藝志肯向前者給賞。去縣不及三里者。調到縣。同在市鄉兵操習。凡到縣操試者。日給米一升。日中給果餅。充午飯。實有武藝志肯向前者。給賞。再念保甲之法。令爾等互相親愛。互相保守身家。聯屬渙散。敦行禮義。甚美意也。爾等如或冥頑。不聽曉諭。不依約束。惟欲日下偷安。不體諒上司爲爾計圖長久。有隱瞞一人不報官登冊。里遞總甲。并所隱人員。編甲之後。有警不出救援。并保甲長不率領救援者。各治重罪。爾等試思。無自外保障。自貽罪悔。

保甲法再示

保甲之法。令爾相親愛。相保守身家。甚美意也。不差遣。不煩擾。於爾等一無不利。聞爾衆多不樂爲。一僉爲兵。輒難色怨言。爾衆果冥頑不靈如是耶。爾意豈不以一經爲甲。則有覺察。有巡夜。不得如舊閑逸。近六都一圖。

三十一都三圖。被礦徒劫掠。爲鑿不遠。若先事防禦。豈至如是。二里之人。悔之無及。爾衆又鑿之。爾衆冥頑不靈。惟圖目前。不思遠大。此其一也。又豈不以一僉鄉兵。則有患必我爲敵。如倭寇。如礦徒。皆舍死之人也。我則欲生。焉能敵之。夫倭寇礦徒。爲衣食計而來也。爲圖生計。何云舍死。惟我兵望風先奔。彼得直行衝突。勢若不顧生死而前者。若我氣壯直前。彼必退避。易地則皆然。直前則彼死我生。退避則彼生我死。此必然之勢。平時不慮。僉兵臨寇。望風奔潰。爾衆冥頑不靈。惟圖目前。不思遠大。此又其一也。其間向敵亦致死者。正因保甲之法不行。故單身被害。若果互相救援。則擊首尾應。擊尾首應。擊其中。首尾俱應。誰能我傷。不幸而死。上爲朝廷保地方。忠臣也。下爲鄉鄰救難。義士也。死無愧心。遠有芳譽。視之懦夫怯士。愧色強辭。苟生人世者。相去何如。自古皆有死。而無信不立。知惜死不知取義。爾衆冥頑不靈。圖眼前。不圖遠大。此又其一也。姑以一事譬之。淳俗喜訟好爭。其來久矣。至今毫髮爭忿。服毒自縊。比

比有之。小亦犯刑憲。破家業而不悔。忿爭閑氣。比之禦侮。出之禮義之勇者何如。乃礦徒臨門。束手伏死。倭寇經縣。遠近逃竄。爭訟氣何其壯。遇寇氣何其餒。反而用之。功業過人遠矣。由今不變。甘爲無名枉死。甘爲健訟刁民。本職嘗試思爾等訟爭之壯氣。遇賊之懦氣。倒行可怪。逆施可惜。爾衆冥頑不靈。圖目前不顧遠大。此又其一也。正謂爾等偷安日久。蔽翳不明。故再以禮義論。再以遠大之計爲爾辯說。若仍前不聽。報甲隱下。壯丁僉兵。臨危退縮。必以法律從事。前日礦徒窮民。計圖衣食。情猶可恕。今劫村殺人。罪不容誅矣。爾等可一心力防捕拒捕者。隨即殺之。不死於敵。必死於法。死敵爲忠義士。死法爲愚頑民。爾等試思。毋貽罪悔。

議者謂王陽明。行保甲法。至宸濠之變。又徵募客兵當之。謂此口可立爲法。不可驗之行事。利於自守。不利遠攻。夫良法遲。久而後驗。習俗偷生。苟安。已非一朝一夕之故矣。浹肌膚。淪骨髓。歲月焉能驟變。我法未成。他患適至。勢急不得不別計應之。同井之制。已矣乎。不可復見矣。取

其稍近古意。還淳朴。修爲和睦。便益禦侮。法莫有良於是者。必若以迂闊視之。則客兵之害。甚於盜賊者。何時而已。王道之所謂出入相友。守望相助。疾病相扶持者。何時而成耶。是不可見其末。遂不深探其本。計目前之功。不思尙有遠大之利。而謂保甲之法爲不足行也。

謂保甲法於禦侮有大益者。蓋此法行。則人各有親愛隣里之心。知進退攻擊之法。平時相親愛。臨難必相救援。假使倭寇至一縣。則一縣足以禦之。至一圖。則一圖足以禦之。至一村。則一村之人又足以禦之矣。家自爲守。人自爲戰。何事客兵。無饋餉之煩費。無過兵之騷害。韓退之謂徵兵滿萬。不若召募數千。法誠莫有良焉者。但人情偷安日久。不能責效於三五年間耳。若謂此法是不可行。則古昔居爲比閭黨族州鄉。出爲伍兩卒旅師軍者。亦迂闊事耶。同井法驗於前。保甲法無不驗於後之理也。

招撫逃民告示

海 忠 介 公 集

淳安縣知縣海示諭。各都圖逃流他方人等知悉。爾等割舍鄉土。遠離了平日所聚會的親戚交游。遠離了平日遇時節所標掛的祖宗丘塚者。非獨無天性不忍之心與人殊也。蓋因不能賠墊錢糧。些小產業。賤賣與富家者。再無可賣。或本身。或男女。寫作奴婢於富家者。再無可寫。衣食不充。錢糧何出。妻啼子號。苦惱萬端。而里遞多科尙未已。官府刑徵猶不息。致小民不願有斗酒彘肩之賜。惟願無催稅打門之聲。不願有連篇累牘之詔。惟願無放黃催白之文。奈人願不從。籲天無路。所以忍割天性之愛。含淚迹流他方。以求衣食。以避繁刑。非事稍可已而爾等爲之也。雖然。竊爲爾等籌之。泣碩鼠而適樂園。愛得我直矣。萬一不測。賦杖杜者。呼昆弟而不見恤。歌采芣者。依婚姻而不見收。空擲百年夜室。致使樵童躑躅其下。此時懸想故都。寧無脊令之嘆乎。歲時伏臘。寧無故舊之思乎。迨至回首山陽。荒烟野蔓。走燐飛螢。種種凄其。寧無廬墓之悲乎。雖云人心去漢。孔明扶之不足。若本縣與爾百姓。不啻子父視之也。我實爲父。而使他人之子吾

子。吾無忍矣。我實有子。而向他人之父爲父。爾百姓寧忍之乎。言念及此。遄歸之志。應有不遑脂車者矣。今本縣仗量田山。必有一畝收成者。方與一畝差稅。無則除豁。自此以後。無賠墊。無虛錢糧。爾等可回還原籍。赴縣告查。迷占產業取贖。男女無業者。本縣將荒田給助工力。與爾開墾。區處住屋牛種。與爾安生。不能耕作者。照鄉例日給銀貳分。或用充答。應使客夫役。或用充脩理夫役。各隨所能使用。凡爾所回之人。給與執照。待三年之後。生理充足。然後科派。爾等本身身後。多方區處。如是。則室家相保。上下相安。此亦淳安再造之天日也。爾宜體之諒之。毋疑遲貽悔。

條例

鄉飲酒禮

堯舜之道。孝弟而已。鄉飲酒禮。尊重年德。正爲政首事也。縱與席之人。未必的然德行有可師法。亦當愛禮有羊。買死馬骨。致千里馬以隆聖治可也。

今當事之人。每每忽畧。於是禮非不行。而意念所隆不在是焉。民不與行。風俗不美。由不知堯舜之道故也。又生員多係年少後生。邈然不知讓道。眇視高年長者。以故事視鄉飲。凡進酒供湯饌。禮貌衰慢。夫鄉老。雖愚拙。父兄也。生員。凡民之秀。縱狀元進士唾手可得。亦子弟也。隨行侍食。禮所當然。聖賢開口便說孝弟。推其極。如唐虞事功。亦以孝弟當之。精神命脉。實相關涉。非迂說也。世俗浮薄。不知此趣。蓋不特鄉飲禮幾成虛設。而當事諸人。傲慢一念。去堯舜之道遠矣。居家出仕。無一而可。亦奚怪哉。

杜絕送迎

聞之閩人魏立峯。(名一恭)見任布政。便道往返。皆自僱人夫民船。不馳驛。今居官有若人焉。當事者欲獻慇懃。情何所施。粵人譚次川(名大初)任江西驛傳道。凡使客過往。痛加裁抑。江右以此省費。今當事有若人焉。過客縱欲需求。毒何所用。二者得其一焉。過往有一峯。可動當事執法之

思。當事有次川。可動使客守法之念。民疾或少瘳也。而二者均之不可得也。此民之所以日就困憊、與死爲憐哉。

聽訟

各衙門日日聽訟。迄不能止訟者何。失其本也。考之龔黃卓魯。專以德禮勸諭。魯父子訟者。而孔子繫之三月。豈以孔子而不能別其情哉。求其心也。虞芮爭田。文王決之。鼠牙雀角。召伯辯之。聖賢未嘗不聽訟也。其轉移化導之機。則別有所在。而不在於是。今上司每以未完責下。下屬惟求完事以避責。感化之意微。了事之情切。獄訟日繁而不可止。不有由哉。今時風俗健訟。若聖賢當於其間。當必有止訟之方。而不徒聽訟之爲尙也。

開礦

按礦乃天地自然之利。官開以應朝廷諸用。軍門不得已之費。減省吾民一二利之所在。人必趨之。且免盜掘接濟之害。不亦可乎。說者謂官開則必

立官。設衙門。取掘礦夫役種種費用。十倍礦利。礦利盡日。且必併其賦。於吾民寧受盜開之害。不可受官開無窮之苦。瑞瓊人也。遯思採珠之苦。誠若議者之言。年年戍守珠池。防盜探。臨探、照丁照畝起珠。夫起供給官府諸費。大約民間每珠。銀一兩可買者。計採珠并進珠、交珠之費。有二十餘兩之數。官開誠不可也。寶產於地。反不得取之以濟國用。少紓吾民。天地自然之利。反生劫奪接濟。重爲民害。私開爲盜。盜開爲害。官開爲正。正開亦爲害。廊廟上當事諸公。不知何一無所建明。一無所處置。至棄此天地自然之利。使民不蒙其利。反受其害也。

集 公 介 忠 海

卷 之 二
條 條

三 八

海忠介公集卷之三

壽南瀛吳公八十一序

南瀛先生吳公。家郭南。自幼以忠信之美聞於黨里。雖溺於世俗華靡之中。不安於世俗華靡之習。谷神不死。謂天地根。莊老發之。世之言養生者宗焉。公得天之美。不期近似。己而業郡庠。賓上國。交及天下。貌古心實。識者器之。藏其虛寂之體。而不能顯其因應之用。師莊老而失焉。世有之矣。嬰兒未孩。玄關完固。然區區內守。無補於人。無裨於天下國家。君子無取焉。弱志强骨。莊老非爲養生計也。養生之秘率。不外是存養立命。言其功。還虛久視。推其效。無二說也。公壯年學問。本原於孔孟。發揮充拓。執古爲貞宅。御今爲應塵。實由莊老。歷仕歸田。中道若性。瑞嘗掇其始末。秀才事業。無傳於人。不必言矣。世宗皇帝。銳然有爲。初年志趣超三邁五。雖土木一役。亦罕有以是當簡在者。公晉甲科。郎署工部。適承其會。鮮我方

海 忠 介 公 集

將。經營四方。進四品留用。駸駸然世宗之視公大用指日矣。念彼共人。取途權要。公上答天子。下揖相公。凝神抱一。執此而往。泊如也。以此罷歸。亦竟以此自信。雖享有田園之奉。而胸次悠然。實超然於富貴之表。怡怡闔里。將若終身。且日規日勸。謀與鄉人同歸於道。事之苟陷不明。則亦已矣。一有明焉。子姓至親。法不爲諱。昔張公鑿以九世聞。無能改於武后之非。而重高宗隱忍之過。君子尤焉。公不爲無忍。不爲百忍。白日青天。其心其事。大率如此。用能滌除玄覽。開闔天門。歛藏於專氣致柔之淵。迅通於沖用不窮之會。惟公得天。惟天壽公。不偶然矣。瑞公門弟子。所願百歲師公。今癸酉二月八日。公八十一誕辰也。鄉父老子弟。謂予知公。徵一言爲公頌。先得我心。樂共此舉。鄉人之言又曰。公父復庵。唐尙書。諱賢秀。爲瓊始祖。公繩祖武。發祥有在。復其見天地之心乎。天下之道。蔽於是矣。凝神立命。無越於此。復庵獨觀於復。惟公以復得天。源蓄流長。父作子述。詩云樂只君子。胡不黃耇。樂只君子。保艾爾後。公父子以之。并書以頌。予傷

公之未究厥用也。載營魄抱一言公。言其心也。榮公之壽。本於復庵。原其自也。道其實也。唐尙書公世遠事湮。言可畧云。

壽王堯山六十一序

堯山自幼與予同師友。爲學業。其神氣之靈。冠諸童稚中。識者異之。予亦歎然。於予謂得天之美。不堯山若。稍長。業舉子文論。文宗進大家。盛有稱許。清逸之氣。不混塵俗。而別爲一局。其文類之。以故不能俯就時調。決科第。科第之文。非堯山所不能攻。堯山所不屑事也。經世論今事。不平之憤有發焉。亦古人好靜無爲上一層意也。隆慶庚午。予罷官歸。別堯山念年矣。塲屋中堯山終不得一捷。晚充歲貢生。又棄去不就。家居萬山之中。卽此採山釣水。風浴咏歸。隨地而樂。夫一歲貢生。亦庠序士途窮。而不得不安於小就者。堯山棄之。惟我所願。我則行之古之人。在混茫之中與一世而得淡漠焉。傍花隨柳。鸞飛魚躍。堯山有焉。每聞人說及堯山在萬山中。木石居。鹿豕遊。愴然有脫去世故。凌雲氣。遊天地間意。唐人之咏懷有

海 忠 介 公 集

曰。方同戰勝者、去剪北山薇。予去堯山居三百里許。夢想神交。方醉堯山之樂。意堯山載營魄抱其一靜之徐清形。可長生也。今丁丑九月十有一日。爲堯山再甲子誕辰。且室人同生、一堂借老、宗黨戚里、爭持酒幣走賀。謂冀缺梁鴻麗鹿門、天作之合、於今罕有、因問頌言於予。予惟堯山先年下帷、經史百家、其學博。作爲文章。包羅萬象。其氣豪。談今不平。疾苦其志。憤經畧人間世、曲暢旁通。其識精。今時命大謬。反之身而謀之神者。回視前日之所有事者。又若無有焉。專氣致柔。與魚鳥花木、忘其形於天壤之內。古之得道術者蓋如此。心與天遊。天爲培之。夫豈曰不知其雄守其雌。聚埃積塊之守。豈曰以期年耆。而無經緯本末。無以先人也哉。夫婦值今六十又一。平格伊始而衆心戴焉。詩云、令終有俶。公尸嘉告。用是不辭其懇。備及堯山自幼而今。天眷之隆。不偶然也。書爲堯山千百歲壽。

壽顧母何氏八十三序

天地間。和氣致祥。乖氣爲異。此理之必然也。然和氣孰爲大。曰孝於親爲

海忠介公集

大。人能孝弟。則其心和順。卽此和順之心。洞然八荒。皆在我闔。一和之所感召。而天下之能事畢矣。嘗以弘宇顧君家庭事觀之。其和氣之大。萃於一門者乎。弘宇母何氏。相夫事姑。克盡婦道。先自益和於身矣。天地間和氣之祥。固有事適其幸。心迹並之。其不然。則惟心之和而迹不與焉。何也。心可以言和。心不必於其迹。迹亦可以言和。而不能以兼乎其心也。韓昌黎謂歐陽詹。生捨朝夕之養。而來京師。其心將以有得於是。爲父母榮。雖其父母之心亦然。詹在側。雖無離憂。其心不樂也。詹在京師。雖有離憂。其心樂也。太孺人始就建安之養。母和於上。子和於下。不必言矣。先官浙庠。今澄邑令。子宦遊數千里外。母留安成。乖違若無甚於此矣。然太孺人願子道濟四方。不願子爲兒女溫清膝下。母剝民。母利己。上無負君。下無負學。母以老婦爲念之訓。願君朝朝夕夕。周旋以之。視無形。聽無聲。恍若母氏日臨在上。己身日臨母氏之旁。若是慈訓。和順興焉。用爲澄民一邑之利。有子如此。母心誠不能無快於是也。古稱父母俱存。俯仰不

愧。爲君子三樂之要。心契心感。融融洩洩。雖隔千萬里外。如目見之矣。天下之和。有大於是者乎。澄邑士民僚屬。謂弘宇君爲祥於茲。有自來矣。萬歷甲戌春正九日。太孺人八十二誕辰也。先期乞予言。以紀一時之盛。予母太恭人。今八十四。一則以喜。一則以懼。聞言不覺色動。平治天下。舍我其誰。孟子之志。未能或之先矣。所養所發。不過守先王之道。出弟入孝。以待後之學者。親親長長而天下平。道無越於是矣。予日侍老母。與顧君同衰病林泉。無復爲天下念。風自火出。容保無彊。舉於顧君屬之。

賀兵憲見庵陳公榮膺三朝錫命序

先王有至德要道以順天下。所敬者寡。所悅者衆。我祖宗因之。萬歷初。天子率祖攸行。加惠宇內。爰命內外臣工。得封父母如己官。而及其配先。時黜陟幽明。大計群吏。其無功德。忝官常者不與也。見庵陳公。至是蓋榮膺三朝之命矣。公世。閩長樂人。封君太夫人。又奉璽書。峨豸曳繡。族戚稱觴以慶。國人遙爲見庵公榮之。衛指揮某。某日以其事爲予誦祈言以賀。

海忠介公集

予惟士君子立身天地間。孰不欲其親偕老一時。金章紫綬。荷天寵光也哉。願德不足以使媚於天子。因之我不足以悅於其親。裕後昭先。孝子不匱。已則然也。公由進士服官。所至有聞於人。嘗閱李三州初稿。所爲贈公之文。公平生行業。恍如見之。公能於其官。不待今日之贊矣。令終有俶。其亮功熙載。休揚於世。以顯父母。有可爲公言者。東坡氏謂才滿於天下。而事不立。天下之所少者。非才也。氣也。氣之所加。無大無小。無往不濟。茲公兵備我瓊。入境之初。正寇酋肆行之際。恃撫而驕。禍幾巨測。人衆以此觀公。然尙以秀才之。虛文無膽。千人一律疑公也。公叱咤間。群豪喪膽。俯首約束。置洶洶水火之人。而措之衽席之上。公何以得此稱異於人哉。人徒以其見畏寇如虎。公以才。以其氣已大。物小不見其爲虎也。天下而無大事也。天下而有大事。非其氣之過人者。誰則辦之。詩云。孝德引翼。四方爲則。然則公之所以荷總百祿。顯揚二親。以承王休。率此措之。內則謙心。外無掩襲。其所及寧可涯哉。國人數其事而稱之。如革驛傳丁糧民壯。反初日

之不均者。與民均之。民之利也。予獨區區於海酋之一言。誌其大也。率海之濱。衛所布列。寇無畏焉。氣不足以守其才。坐是爲累。若公所爲。鮮不爲則矣。用是書之以爲賀。

賀衛所趙侯軍政視篆兼督屯序

軍政例。五年一推。萬歷三年冬。忽報衛趙侯思梅。如前軍政。軍餘人色喜。欣欣舉賀侯之文。詣予爲問。夫事無係於君國。無係於州若縣地方。不之言可也。祖宗列土而官。無能舉於其職。有甚於今日之武人者乎。弧矢之利以威天下。無武。難乎其國矣。黑子孤懸。內黎外海。窺覷有人。燕雀處堂。中無倚賴。有甚於此三千里地。十一所而衛者乎。由瓊而北。十三布政。京師濟濟布列。有難言矣。特於思梅一武人言之。言之何如時也。流弊也。文武衣冠。誠自別於祖宗之舊矣。不有天之與我。三代直道。求自得師。在人者乎。今天下事由書生矣。豈無有天理人心。振古可恃。又豈無有天之與我。聖則聖。賢則賢。在我而已。可死可辱。彼書生無得而奪之者乎。戰國

海 忠 介 公 集

爭雄。孟子有二者天也之說。師文王。大五小七。有幹而旋之矣。一王法度。衛使司其品三。所其品五。俯首聽命。有扁斯石。典章律例。曾有之乎。前無所聞。尙當自我知。能如百草。結實吐華。酬生造化。且前人不有清水王。我輩武人立之標。焉可以望而趨之者乎。瑞平生仰止一人而已。師王而行。惟恐不及。名宦鄉賢。時人無出清水之右。其襲職署印。在武宗皇帝初年。武人未至今日之衰。而衰之始也。清水能之於先。曾幾何時。今日乃不可能之於後。孟子謂挾太山以超北海。是誠不能。清水行義。峻絕風采。無一時俗氣矣。要之只是一塵不染。一私無容。聞其政暇。便觀書史。絕不爲今武人酒食嬉群之習。詩文無一傳示於人。善讀書者也。無搜摘章句之勞。坦然自得。其往情之正。謂之非人能也。可乎哉。一時屯政軍行。無一不當人心之舉。一人倡率。十一所肅如也。雖以之天下。無不可者。詩云。雖無德與女。式歌且舞。由前信後。思梅之惠。人歌舞之矣。予之所取於侯者。則願侯如清水。收盛美之功。不願侯於無義戰中。存煦煦之德。侯固

握篆而總十一所事矣。勢不得舍侯他屬。况侯沉靜。優閑質美。可上由清水而入聖。舍侯無可以爲望者乎。用是勉之以爲賀。人有元氣下陷。立死亡矣。苟非烏附毒劑。無以達之。今者希闢之言。類是烏附。實則和扁參苓。延年久視。非烏附也。天下事亦爲之而已。思梅勿以爲訝。

賀太尹趙三山榮獎序

有仕於此。承上交下。動見尤怨。諉之曰。時勢之不可宜者。非也。夫士患無萬物一體之心爾。萬物一體之心。人皆有之。以我之心。將無不協之心。衆人之母。解衣推食。無逆於人。不必言矣。大而刑罪之加。小而阿譴之及。風雨霜露。莫非同人於道意也。同人於道。有不得於人者乎。孟子曰。以善服人。未有能服人者也。以善養人。然後能服天下。三山趙君令瓊。今日月計三季。代巡楊燕山公不及章薦。馳檄獎之。三尹張子奉文行事。揖予乞一言以張其美。先無是例。而張子心欲之。二百年來。無令尹言之。不可以已也。夫三尹與丞同稱佐貳。韓退之所云漫不可否事。爲長官之是聽。今

海忠介公集

日體貌。大都然也。三山縣百務。一以家有長兄無二上。自與宜乎同寅協恭之意。微尊沓背憎之風熾也。乃三尹倦倦然道三山美。不啻口出。蓋三山誓不貪泉改心。養之既有素矣。志在厚民生。使民服化從義。哀哀赤子。呼冤案前。因彼競爭。諭之禮義。由慰日勤。罔不勤或戒。且農桑風化。日諄諄焉心實實政。細大兼舉。俗吏視迂闊事。三山直前爲之。此何心哉。萬物一體之仁。不得而已也。百蠹攸除。百利與興。見之於行。莫非萬物一體之仁。蓋由蓄之中藏。莫非萬物一體之義。不獲乎上。竟之上之人與其共。不獲乎下。竟之下之人仰其澤。士子喁喁以凱梯頌張尹。大道爲公。淵源有自。家聲見於是矣。而實則三山心感心使之也。面謀象恭。不如是也。然則曰難乎免於今之世矣。不已之求。而人之責。其得爲論心之當也哉。雖然。三山政尙節。氣言冲和。尙減分數。天地萬物吾一體。有得于光明正大之功。無得於和融渾純之用。大之似矣。而未始融之也。入人心則如此矣。又此而上。其爲感將如之何。三山勉之哉。天地萬物爲一體。仁道也。成

已治人。道無上於是矣。書之復張二尹意。爲三山賀勉。

賀李東城榮獎序

今世官於其地者。治下人往往粉飾詞說。借貴人爲文。架無爲有。增細以巨。裂綵書其然進之。諛風行。而天下無公議矣。事之可以己其一也。然亦有出於人心之公。情不容己者。出於公。則不出於諛。或德在人心。遠邇同及。或饑食渴飲。臨深爲高。目前之功。身後千百世之澤。大小不同。德之不忘於人一也。且頌德之中。監戒存焉。益於其人。因以益於其民。情在是。義又有大焉。予於東城李君見之。言之不可以己已。東城隆慶六年冬。任臨高縣。代巡楊燕山信東城初政。循例弊之。時未及期月也。耆老王廷器吳應第等。造予徵言爲賀。其言曰。臨稱富饒邑。先後令以富饒利之。今日之臨又一臨。而非昔日矣。我國家官民財法有界限。官自爲官俸祿柴馬。民自爲民蓋藏衣粟。柴馬俸祿外。毫髮屬民。枉法不枉法。其爲賊一也。賊在官者。法無赦。今也不然。我民日就肢削見俛。生不見甦息。盡由於此。郡

海 忠 介 公 集

有守。邑有令。聖天子以牧養寄之。如保赤子。義也。設官分職。不爲不多。有以其子視其民者乎。見尹而感。天下然也。而臨遠方爲甚。東城李侯百有爲爲民爲之。惟搖賦。惟出納聽斷。視若切已事。一有不協。痾瘵在身。一旦夕不能安也。燕山之樊侯曰。督攢造。冊籍爲之一清。增城垣。捍禦爲之永賴。侯心無不盡之心。事無不宜於民之事。燕山之所未及知者。事視城冊。大率相等埒。民頌其才。去冬計今期月日矣。暮夜入衙。未之有聞也。審冊不言常例。聽訟不入鍰金。民予其節。居官之道。清慎勤三者。東城兼而有之。邑人有樂利之歡。念東城爲樂利之德。然則是贈也。得非情不可已。出於公。不爲諛者乎。二老又卽先後尹比方今日。曰其人往矣。政聲穢跡。播人心口。若今日事。侯與先賢。列難其人。而今有之。解倒懸。就衽席。民之不能忘也。瘴其惡。而章其善。二老之言。凜凜然監戒存焉。常目在之。如臨師保。裨於其人。因以裨於其民。誠在是矣。情在是。義又有大焉。詩云高朗令終。令終有淑。用是予其請書之綵以爲賀。

賀景竹王千兵榮膺軍政序

聖天子分天下職下都司衛而立之所焉。所與州縣錯置。蓋五品秩也。兵以千一百計。餘人倍蓰之。所管轄。有戎務。有屯糧訟獄。是其以衛封圉。翼我聖明之治。實兼牧養。允釐係焉。行道遂志。視州縣有大者。今守令下民莫敢仰視。人視之不勝其崇且榮。所則不然。其故起於秩。夔父祖。不由問學。於官守義。懵無所識。且其無理德以和心氣也。動輒猛悍殘厲。以凌剝其下。擬按藩臬用是從而抑之。抑之誠是也。沿以成習。遂以坐受爵冕致斥。顯顯然中秩之崇。反出文雜流下。居之者恒亦愀然不樂。曰、此奴隸冠裳爾。其間志有所倚者。竟亦以莫可奈何付之。莫知所以致此之由。去此之道。夫人之參其身於天地中者。豈必人之榮我。而後能立哉。執義以往。天下有莫能禦者。况五品之秩。森然明也。吾得執國制以爲倚。公理之在人心未嘗泯也。勢之亟重有甚焉者。吾得以執人心之公而反之理。可以張屈抑之勢。制足以振品爵之崇。故愚嘗以爲今日之武。受抑於文者十一。我

之莫能自立十九也。且其所取以自範者。繆戾尤甚。既以威莫如州縣諉嘆矣。乃日剝媚之行。州縣固名文士也。我何人斯。而獨不然。撫按潘臬之我督者。固偉然名進士。斷斷然天下望也。彼亦州縣之爲爾。我何人斯。而獨不然。效殖貨利以求容媚。方以爲庶或可申一二。不然計之外也。孟子曰。小國師大國。而耻受命焉。是猶弟子而耻受命於先師也。然則武秩之邈乎其卑。而謂盡由於文士之抑者。其然乎。其不然乎。如耻之。莫若師文王。爲今之策。亦曰執制以自守。據義以行制而已。毅然不誘於莫如之微。斬然不牽於剝媚之習。則吾固參天地人也。彼之並且上乎我者。將唾穢而奴視之矣。吁獨與之角也與哉。獨求不我抑也與哉。千兵景竹。亦有志而付嘆者。撫按請於廷。而軍政及焉。反此而遂有由矣。愚懼其莫知所執也。因軍士之請。用是書之。以賀天下事亦爲之而已矣。景竹尙勉之。

賀屈元禮生子序

屈子年三十餘矣。仲秋之夕。得嘉夢覺而生子。衆咸欣欣於餘慶之說。相率

海 忠 介 公 集

徵予言以賀焉。予曰：人生而無以嗣於其身者能幾。言之抑可以已也。或者教以成子之貴乎。然今之教者。於聖賢之道則戾。蓋自門左之懸久廢。馬援之遺。王和柳玘之誠。特書於司馬氏者。與鄉愿之習符節。遂膾炙焉。夫天地四方之事。舉而屬之男丁之身矣。其負荷若之何也。是故孟子善養浩然之氣。正以爲天地四方之射也。漢人因有生男如虎。猶恐其鼠之說。予非敢以漢人爲適中見也。第中人之性。振其氣而挽之中也易。抑其氣而企中則難。中行不得。惟過中之狂士屬心焉。仲尼之所以善於造就也。矧今所取當於天下之教者何如哉。愛其子而深爲之計。願以守雌之道進焉。以水濟水。血肉雖可保永於世。而德義之有於身者。去賢聖或邈矣。謂之能成其子也。然乎哉。疏少傳不以財遺。自謂爲子孫念。光奕史冊矣。而犯者屢焉。矧說之見頌於君實。而世又率以爲是者。誰則挽之。諸友聳然曰。元禮少學禮。知此義者也。予亦欣欣然慶餘慶焉。幸天地四方事於此子乎。攸寄也。用是次之以爲賀。

贈廖錦臺膺首薦序

天下事如斯而已。謂今無經學士，大有爲於天下哉。國朝以經術造士。士非此，無以進其身。迨得官，則又有今時應官之道。經術之在聖人，芻狗矣。有儒官焉。薄收而薄出之。人無望焉。而奔走奉迎。故事虛文。視熱衙門。無異人之所以責官。人之所以責士。判然兩途矣。然天下有稱善讀書者。又不如是。吾省新會錦臺廖先生。富有經學。文翰擅名於時。即彼小試瓊山而言。丁丑落第乙榜。而瓊非今人爲貧之仕。借此自暇逸。上下所不深責者乎。錦臺自做秀才。攻墳典。比今仕有職掌。寒暑燈窓無殊。先日非乾乾惕若。中有實趣者不能。課士子不廢文論。爲時制也。孝弟禮義。尤所課中諄切之急。道有本末。教有後先。譽髦士於鳶魚得所之中。一不見其崖岸自居。旱麓之三章。心有天游之聖也。錦臺會之矣。然即此而論。不過即事論事。得錦臺之小。尙無得於內蘊之多。所以爲他日設施之大。嘗自督府凌洋山公之薦言之。錦臺蓋繭絲牛毛之學。天高海闊之心矣。簡編之在今日。蓋前

海 忠 介 公 集

百千萬年事也。前百千萬年事。莫不有於方寸之中。舉此而措今日之應酬。莫非已往之成效。措之而有不當焉者乎。夫士子讀經爲文。乃入仕則背而馳。若戴聖祝欽明之流。謂其初不過假此以爲階祿之地。真心本不如此。錦臺不變塞於今日之官矣。不變於既閑且逸。人不深責之官。變之於遺難投大。人所屬心之日乎。又不然。若荆公以一執拗。得之始。敗之終。錦臺溫如玉。不然也。然則錦臺非如心之經學。有用之文章也乎。洋山意欲廊廟上。大用錦臺。使得盡展底蘊。不負初學。言其大。畧其小。蓋經學文章。其精神心術之蘊。今日舉行教事。其精神心術中小小之餘也。老子謂樸散而爲器。故大制不割。今日與其言錦臺於一官一事之中。孰若論之於不出戶知天下之上。洋山之見。有大焉者矣。外有薦章之美。大行其志。機會也。庠弟子欣欣有此。相與問言於余。余養疴。簡人事。有聞見。不盡有聞見。衍而文章。因人言也。若其當不當。則非余之所及矣。書爲贈。

贈高將軍陞指揮使序

海 忠 介 公 集

指揮同知高前江。死於儻之神尖三載矣。死以王事。天子卹焉。加其子一級。指揮使世襲。衛僚屬某某謂天恩所及。生死光榮也。問言於余。爲今肇南君贈。余惟神尖之役。前江迫於兵。巡道不得已。而非其本心。子加之級何。將在外。君命有所不受。史方齋不知有此陷前江。爲不知彼己之死前江。冤矣。然兵發有期。方齋至儻。前江不至。前江得當而後進。非畏死也。方齋不諒其心。然方齋滅此後食之心。其急如火。初非有讐於前江。前江知之。小不勝天。而以二小舟突二十七舟。前江不愛其死。至此欲以平生不顧身家心事。爲後人計白之。史方齋也。寇未到。股慄先之。不能前發一矢者比比。萬一不然。亦大抵顧有身家之心。無死綏封疆之念。雖盧和高手。飲之烏附數百。未易起其陷下氣也。前江度越此等百千萬倍。余嘗謂使方翁若能少諒以心。謀勇兼資。前江非徒死者無神。尖事得不死。將不爲虎豹在山之壯乎。外海內黎。方齋之功尤大。前江原領兵前進。方齋迫不爲無因。君命不受。將終執之於義。或可今日始知獄吏之貴乎不可爲也。有此二難。

海忠介公集

前江受迫。卽死之輕志。無異先日慮勝死綏之愼心。卒之李賊破膽。俯首聽招。一死而地方之受益多矣。前江之勇。於是可見。時以其事上聞。隱此不及。其實前江白日青天心。當厚典無歉。夫厚旣死之身。可子可否。其父未見也。何以及之。天下有有其父。子不如其父者乎。一血脈之親。而又氣習風聲之近。子不如其父千百之一。從古而然。以目所見言。千戶崇昇。能無懼而已。驍雄之將也。今其子名維績者。氣槩大抵近之。今高將軍夫苟無能如績。近似其父。夫獨非前江之子耶。古稱父作子述。子不如其父。人以不肖子呼之。今高將軍得階一級。聖天子亦以有其父。有其子也。得天之榮。當思所以保有其榮。孟子曰。事親若曾子。則可謂能養其志。保榮之道也。市井人一時之忿。有甘以其身償人之死不顧者。職分內事不盡。國法鄉評奈之何。獨無忿心猛烈。而死之人氣之壯者也。其精爽英靈。常存天地間。一氣子孫。實有依附。昔人自責。何面目見先人於地下。高將軍苟無識朝廷加今官之意。能見前江於依附之間也哉。家有祠堂。郊有墟墓。隨入隨

海 忠 介 公 集

出。可愴可感。父倡子和。天機有必然者。僚屬贈言之乞。有聞者莫不興起。況於親炙之近焉。故不辭而爲之說。言長矣。一言以蔽之曰。肇南今將軍。是則前江之子而已。書爲贈。

贈東梧馬侯榮獎序

聖天子曰爲天下求才。官惟其備矣。事不立於天下者。才之不足於天下哉。古人言才於德。今人舍去本心。別自爲才。以不才言才。應天子。還治其人之身。不於其入之道。天下坐是爲害。甚矣哉。世習之謬。道術爲裂。而中流之砥。難乎其入矣。隆慶三年秋。予自北歸海上。鄉人曰有東梧侯之譽。謂侯秋毫無染。鈎鉅操切。機事可用。而侯不爲。與侯之德。又若不滿於侯之才。予心異之。然猶未卜侯中心之願何如也。今既四載於茲矣。所得於侯月且評者日詳。日益有驗。乃知侯獨見本心。不狃於俗。立異於一時。求名於一事。非所以言侯也。今今下士。動關佛老。日流於機械變詐。而莫之反。純白不備。神生不定。又佛老之所差稱。陋之而不爲者。侯先立其大。獨認本

海 忠 介 公 集

心。與俗見迥異。人誤以無用於世認之。侯蒞事臨民。應於其心。有規爲。有揮霍。講信修睦。息民爭而不示之僞。則佛老之心。而吾儒家法也。內藏其渾純真一之體。而外不失其因應變化之用。至誠臨下。潔已格物。古先聖王合內通外。紀綱造化。經理人物。有其心不肯於用。侯庶幾焉。居今之世。有人如侯者。其可以易而得之也哉。天地萬物。性分足焉。舉此措之。天下之事畢矣。詩云。誰將西歸。懷之好音。予嘗欲擴充分量以盡其才。持侯本真。破天下僞。應天子求才意。歸老山林。獎侯而進之。未能也。燕山楊公奉命旌侯。知侯之才。未盡於侯之德。用因學師生請。微顯闡幽。爲侯贈。且以堅侯復古之念云。

贈趙三山德政序

天下官。於民稱父母。自縣令始。其切近於民。稱官。則一邑之人春溫。不稱官。則一邑之人秋殺。亦自縣令。今天下令何以哉。下民易虐。取脂膏而囊橐之。盜跖四知。口雖不明其然。心實視之爲當然。事其不然者。狃於世俗

海忠介公集

行已清濁間、於今爲利之說。執而行之。上司、過客、鄉士夫、有私厚焉。秀才一介儒生。無勢而有低昂口舌。厚學校士。又今人謂居官第一事也。上下渾成一團私意。心與口居之不疑。又視爲當然而行之矣。貪者此其彌縫。不盡然者此爲要譽遷擢完全之計。今之仕也爲己。曾有念及吾民。不暇及其他者乎。我太祖視民如傷。執周書如保赤子之義。毫髮侵漁者加慘刑。數十年民得安生樂業。千載一時之盛也。今也不然。變而雜犯其視之爲當然。己非一朝一夕之害矣。况瓊去京師萬里。貪泉易心。毀譽淆雜。予方悲豪傑之士無所待於人而興者。無其人也。萬歷天子登極之秋。三山趙君以奉化邑傳任瓊令。旬日間一邑欣欣向榮。百凡改人視聽。父老謂世道一新。二百年來。無此縣官也。瓊今日得有機會。饑食渴飲。德教流行。交會之間。說者之言。有所感發而然。非虛美也。三山政績見紀瓊治錄刻本。其未詳者。諄諄然禮義忠信。桑綿麻豆。日爲小民諭勸。相質爲奴之俗。用柳柳州方計。移之里甲。絕其費用紙贖捐之與民。隨事而應。無非民教民養。先聖賢有行

海 忠 介 公 集

之法。三山直方豈弟。實政實心待小民。溫然可掬。赤子慈母。不是過矣。僚屬吏胥。豪家奸黨。先日借之爲虛譽。視爲當然。三山一以朝廷明罰勅法行之。一時人快。其峻目之曰。趙御史愛三山者。持不獲乎上民不可得而治矣之說。三山曰。獲乎上有道。舍誠明而得之上。吾不知之也。吾不爲之也。三山氣剛行峻。知有民不知其他。大率如此。用能脫小民於水火之中。而不免置奸豪於夏日秋霜人所不堪之地。謗言明興。願公之去。良有自矣。昔人不得民難爲子產病。無得於勢豪敗類。世俗之見。曾足以爲三山累乎。學校有知識士無私計者。忿然不平。司訓馮先生率之乞一言。爲贈以釋。且曰。請有規焉。士習以贈文市利。予方病之。今日不得其平而鳴。視舊例遷獎。則舉有大焉。言之不可以已也。爲是不辭其請。專攻之六章曰。不失其馳。舍矢如破。并歌之應師生意。若曰大剛則折。不講於太和元氣。區區鬱火強陽是務去焉。庸醫也。持鄉愿易血氣。予不敢爲三山願之矣。

贈顧肖坡榮獎序

昔李平廖立。諸葛武侯論法廢之。終身垂念武侯。沒世如在。素有恩貸及已者。不至是也。武侯何以得此於人哉。習鑿齒謂武侯永鑑無私。觀武侯者。蓋不必求之恢復之心。開濟之業。卽武侯之不忘於人者。而武侯王佐之才盡之矣。天下凡章程號令。或可以聲音笑貌爲於一時。以心感心。不待吾言。而自能曉吾意者。不可強也。肖坡顧君。以隆慶六年冬尹文昌。閱月。卽有興工築城之役。張生世望。以別丁糧爭。不得於尹。土築三月完工。一時撫按司道。以城工信肖坡初政。交獎之。人心同然。張生一日將郡邑士夫意。乞片言爲贈。夫二代而下。人心私憾攻訐。愛憎毀譽。有言而不足爲言之信久矣。張生曰肖坡毫髮於民無染。百應迎刃而解。庖丁新發於硯。不_是過也。惟性氣高急。興築事。用法惟峻。民不可與慮始。如是耳。過此。則慈祥愷弟。沛然如初政矣。庭無留事。民享深仁。肖坡之政。不一而足。大都不出廉明果斷三者。與予所聞知。及諸士夫意無異。成陽君窮處於齊。秦

太后爲弟魏再計收窮翕心。王聽之。卒之五國之成。賴以不廢。七雄時。事務成功。尙權變。不足道也。肖坡氣剛守定。百凡抑強扶弱。豪家群然撓之。不恤也。強項破柱。則有素矣。寧曰一介儒生。能持口舌短長。謬恭敬得其心耶。肖坡不然也。張君讀書爲儒。不然也。大抵肖坡之得此於生、有本焉。武侯有淡泊寧靜之學。是以有李平廖立之感。李平廖立之感於其心。不於其事也。以心感心。是以能終武侯之身。不忘其德。生之誦尹、必曰秋毫無犯。然則肖坡之心服於生。謂不有由哉。乾陽坎水。相背而行。遂有天淵之隔。肖坡需有孚、張生復即命安貞其大。則顧君之仁。一邑之人。有永賴焉。言之不可以已。用是書其事以爲贈。

贈鍾從吾晉灌陽掌教序

長汀鍾君從吾。文昌邑司訓也。官四年。得晉今之灌隆掌教。門下士某某謀所以贈其行者。謂非文不可。詣予徵言。予懇辭之。諸門下復曰。鍾師必欲得子之文。慕子者也。予辭不得。因言之。記稱仕而優則學。學而優則仕。

海 忠 介 公 集

仕學融會。孔門亦嘗廢仕。亦未嘗專言學。胡安定有得於是經義。治事、並舉之。爲蘇湖之教。夫古之經典。今之人事。索之經典。天下之事。具於是矣。而別於治事之中求之。蓋經典言事中之理。而未能一盡及事中之變。事中之變。百千萬端。君子之應如之。譬之醫者隨症用藥。因革損益。本末先後。輕重緩急。淺深長短。廣狹盈縮。有劑量焉。毫釐之差。千里爲謬。苟不知其變之所以然。而應之以其理之所當然。于以用之。其不至敗乃公事鮮矣。傳稱執一理。貫天下之事。人非生知之聖。平日無講明融會之功。則所謂寂然不動之中。而萬象森然已具之體。昏如矣。抑何通之。故予嘗謂聖天子爲天下擇官。地無缺官。天下不見官爲天下利。獨見官爲天下擾。大端在不曉於官民義利之辨。先無以洗其心。身家在念。貪取毒焉。下及其日應之政。則又先事而講明之。未有得也。夫從事經典。而日求之紙上之文事之義理而已。若夫有其事。而又有其事之變。則必於經典所及之內加深求焉。於經典所不及之外加深求焉。而後可以盡其故。蘇湖教法。至今稱之。正以

其門下人用之而效者。以其能預講之未用之先。而其所以講之者盡變也。我國家設有府縣藩臬百司庶府。士得此謂之仕。內國學。外府縣庠官。亦謂之仕。國學府縣庠謂之仕。仕焉而兼乎其學者也。鍾君司訓文昌。經義治事。兼有之矣。署定安縣事一年。再署文昌縣計七月。庠序治事之後。又得以履於其事而爲之。夫引而伸。觸類而長之。天下之事畢矣。天下事豈能一一身親見之哉。然身親之所備。嘗與口耳之所談說。意趣各別。以躬行之所自。見之於事。示之於人。真切有味。爲從爲悅必然矣。鍾君之於一邑。不徒遐邇仰其獨清之高。而且隨在有從事獨賢之頌。身教言教。灌陽士子。今而後特無多幸乎哉。教成十人。爲國家造十方之福。教成百人。爲國家造百方之福。諸門下以鍾師且無得於府縣之秩。爲銓司不知人不滿。庸詎知以人事君。鍾君所得多矣乎。况今天子在上。求賢若饑渴。而銓司又能上體聖心。教官顯陟。邸報選選有之。又安知公道之不可掩。如吾從吾亦有以得之乎。由小而大。由閑散而之權要。予於鍾君拭目俟之矣。昔人謂錙錙而較

之。至石必差。寸寸而度之。至丈必溢。石稱丈量。徑而寡失。陸象山謂此可爲觀人之法。言大節可以兼乎其小也。予於鍾君。則錙錙寸寸且從而得之矣。何疑乎。書爲贈。

贈參戎以吾晏公改官西海序

瓊、獨居一海中。外通閩廣。接諸番。諸不逞之徒。便風帆。一息輒抵。州縣城下。鹵民。業加毒之。民倉卒不及爲計。萬歷改元。參戎以吾晏公。奉命書。督其事。專區保護。隨變便宜。瓊人幸之。無幾。惠潮寇徒巢而出。不安於東。圖復起事於西。洋洋風濤倭幢。如舊依倚聲援。勢必然也。督府石汀殷公。計度身堪多故。望洋而勇其人。上請天子。俞之。洋海以西。付公調度。海南衛指揮某某。千戶某等。念惟北駐陽江。不免於歲月之間也。乞言爲贈。予惟諸君之意言之。曰夫自倭夷之爲梗也。我中國不逞之徒因之。蓋自嘉靖中嘗試台寧。突如其來。志滿氣得。三十年矣。天子之靈。中國之大。迄無一人立功爲庸。揚氛海上。其故起於戀官鍾俗。中外同風。內無許

海 忠 介 公 集

國不二之忠。臨變應兵。又不曉於司馬孫吳虛實避趨之法。死生利鈍。吾有命焉。自諉於武人而莫之講也。瓦合結私。冒權借譽。外此。未之有聞矣。三年來。予接以吾之貌。聽以吾之言矣。然非公稱心作用。不足爲公言之也。先者從事浙中。督府趙劍門。張侍御。惟公屬意聞之上曰。敬慎謀畧。沉毅才猷。事實心以求濟。務要全勝之謀。敵果敢以爭先。不爲觀望之計。素諳夷情。熟閑水戰。忠信足以動人。恩威而能得士。吁。參錯於數公之言觀之。而見其微於公矣。詩云。匪直也人。乘心淵塞。然則殄滅妖祥。救寧海岱。指今日之危而注意焉。匪公屬。誰屬哉。人苟不以死生利鈍入心。心澄氣勁。義集。而天下無不可爲矣。人患有其外。無其內。質有其內。事從其欺。不然。用是書此。以爲贈極諸衛所官意。

贈定安博莫君署澄邑事膺保薦序

澄邑。去郡城陸拾里。瓊萬里京師。三州十邑。同一荒遠僻地。澄土瘠民貧。好爭喜訟。尤稱難治。貪泉易心。尹難其人。而士民亦鮮有以尹之賢而聲稱

之者。萬歷三年，缺尹。以定安縣教諭莫君署其事。士民翕然與之。代巡柳坡馬公兼政教事。薦君於上。謂君異才。當不次用。協士民意。相率徵予一言以贈。予問其所以。則又同聲而曰。自莫君握篆之後。詞訟清。而村落無追拘之擾。催科緩。而事事存撫恤之恩。事無稽留。人無緣獎。里甲省約。一邑晏然。究君之心。蓋仁人長者之心。其不爲貪暴苛刻之爲。終身之遠。亦可以占之一日之近。夫澄訟事。獨多於他方。無實之詞。最小民之情所難平者。今首以清訟頌莫君。且莫君於澄暫署其事耳。今人凡暫署官府之事。稱權官。百凡姑應先日之爲。隨人之後。初非創立規則。垂久遠也。乃上得撫按藩臬之稱。下不失撫綏之譽。數月之間。當疲敝難爲之時。惟士惟民。聲稱如一。君何以得此於人哉。蓋君有立己講學之功。體立用行。是以出之。自能爲宜士宜民之政。先自定安學諭。督府石汀殷公首薦之矣。政與孔門弟子言偃。出武城而有絃歌之效。子賤不下堂而單父稱治。道相近似。然則今士子一入官。遽以簿書禮節。苛暴因循。各就其資之近。而自許已蹶

其本矣。天下只此人心天理。而曰某方之民易治。某方之民難治。可信也哉。旱麓之詩云。豈弟君子。遐不作人。莫君之教定邑以之。洄酌之詩云。豈弟君子。民之父母。莫君之署事於澄以之。莫君無愧二詩。用是廢之。復士民請。若夫前途事業。方興未艾。此特其發軔之初耳。大都於此可見。未詳及云。

贈顧弘宇榮獎序

曾子謂君子愛人以德。細人之愛人以姑息。華晬之箴。有取於大夫之言。無取於日易之說。石猶生我疢之美者。其毒滋多。君子之愛人。君子之自愛。道蓋如此。弘宇顧君。以鄉薦。繼改令澄邑僅期。代巡燕山楊公。馳檄獎之。謂弘宇能於其官也。者氏某某等循例乞言以贈。仁養義教。所以稱說弘宇君不一而足。澄民有言。弘宇君則誠無愧於今日之令矣。宋儒謂伊呂之道。得一縣亦可小試。言君曰父母。天下守令父母。一區大小不同。其責一也。一人有罪。我陷之。一人饑寒。我饑寒之。是其可以易稱也哉。況今

海 忠 介 公 集

天下士舍其行道立志之義。幸應舉爲家圖。慶得官爲己利。曰要做官。則不得不隨此俗套。聖賢入官之道。即一日也做不得。以借口事之無害於義。從俗可也。吁今之所謂從俗。寧古之所謂從俗哉。士而入官。舉止語默。動與民關。舉止語默。動爲民累。其事其心。蓋不止於未仕之前。失已而已。而於人無與焉者也。柴馬俸祿外。以一毫充已用。以一毫市己私。不免即此一毫爲親民殃。門皂胥吏外。以一人充已役。以一人市己私。不免即此一人爲部民害。僅一人一毫。已非居官之正。仁民之道矣。況日積一毫。積一毫成千百毫。積一人成千萬人哉。文王視民如傷。望道而未之見。治岐之政。天下無有也。古今無有也。且以如傷爲視下。視岐政不及一二者。視之又當何如。聖賢之道。因人自考。方人有言。居吾身自方之半。今也是非倒置。其間自以爲是。而不可以入堯舜之道。借六藝。文姦言。亂正失真。何可勝紀。聽之使人眩瞶出入。反不若信吾本心之真。信我聖賢之道之爲得也。荆公執拗。謂人言不足恤。居今之世。當有取焉。弘字君志出伊呂之上。小試

澄邑。方以行志爲幸。余亦幸聖賢之道。率是有明於今也。文王視民望道。公且遜頌牘而不居。弘宇君其法焉。東萊請狼臠之烈。豈僕僕乞憐而求人之譽者哉。子於顧君亦云。君子愛人以德。特書其可規者以爲贈焉。

贈丁敬字父封君壽誕序

夫天下有親如父子者乎。一氣脉而流傳之。形雖二。而不可以二言父子也。況日夕家庭。又有風聲氣習之近。蘇氏謂稱人之善。必本其父兄師友。夫豈以子弟故爲父兄隱。如直在其中之爲厚也哉。子不如父。人以不肖子呼之。謂子必其父也。子必如其父。乃其父先如其子爲之矣。其不盡然。萬一不至。瞽瞍丹朱。則言動易入。天下有不陷親爲不義之子。天下有陷身不義之父乎。百端言之。未有子賢父不賢者。今封君七十有一之老。敬字丁君之父也。余於封君一無聞焉。於敬字余則嘗聞之。敬字之於句容何如哉。大抵百度具舉。滿腔子盡是惻隱政。又足以發越之而無遺其才也。一塵不染。六年一日。其節也。目見耳聞。一時循良。聲稱天下。未有若此尹者。然人

海 忠 介 公 集

之賢不賢。亦有自來。余意度之。苟非先有封君。然後得有敬字。則必敬字有執而行。父子情親。封君順之。一端之中。苟處一焉。君子曰。父之能賢也。猶有可言者。今之時何時哉。子得一官之榮。又望子滿爲足家之計。財帛世界。見可欲而心無止足焉。又富家習氣也。若曾子則可謂能養志。亦未有棄口體不爲父母計者。敬字六年之中。人一不見其有內累於家意氣。吁。非封君之能賢。敬字能若是乎。余於敬字完美於六年之中。見封君近有義方之大。封君於是乎大非時俗人物矣。時禮於人父母有生之辰。一則以喜。同其子而慶之。今已卯孟秋之日。封君七十初度之辰也。夫亦誠可爲敬字慶矣。然一人有向隅之泣。滿堂燕笑。不能爲心。況居官則有民責。明有百姓之非。幽則有吾心無能於職之愧。封君父子。能爲敬字一日安之乎。不安於是。日用三牲之養。不能樂矣。得子敬字。人人頌尹之賢。六年之久。甘雨和氣。邑無異議。是今日斑彩之衣。莫非一邑懽娛之色。持觴慶祿。百拜稽首。子爲之。亦一邑之人爲之也。天地和氣。萃於一門。吁盛矣。文

林封誥。錫之天子。七十有一之壽。平格自天。夫豈偶然之故哉。人間樂事。無越於此。用是不辭其僚屬師生請。書所以可慶之實爲之贈。

贈郡侯肖野郭公膺保薦序

君子之於天下。立已治人而已矣。立已治人。孰爲之。心爲之。心爲之心自知之。得若失。心自致之。雖天下之理。無微不彰。而人之視我。終不若我之自視。無遁形者之爲的。不取信於我所自知之真。取決於人不盡我知之迹。失之矣。肖野郭公。登壬戌進士。守瓊。代巡柳坡馬公剡薦於上。聽銓司不次之用。光及寮屬。三府趙侯。四府劉侯。因希余言以贈。將舉柳坡之言。發明肖野平生之素。夫肖野平生之素。侯於柳坡始發明之耶。肖野修已學業。侯於人言之及乃致其力。人不我與。撤而不復前耶。性分無待於外。有待於外而爲之。非性分也。肖野公之心。吾嘗有以得之郡。百凡迎刃而解。言一知府。無難事矣。而日夕皇皇。常若不給。今人有未能而事。與之共同官之義。尙當獎而進之。況在肖野望治之勤。日之

海忠介公集

升。川之至。西土恬冒。文王視若有傷。光武中興。兩漢中賢主也。以百姓怨氣滿腹。誰欺誰責。彼余一人。處心如是。言今日事。三州十邑。能處之無不如其則。環海而爲民。能使之無不被聖明之澤矣乎。一之爲累。承流宣化之職缺如矣。省野能安之乎。我無安於是。人譽我於是。譽我於形骸之外。孰如我自責於幽獨之中。君子戒自欺。求自慊。二侯今日相與聚會精神一堂之上。共而爲之真機實際。猶恐無能自改於其職。民已家國。猶歉然也。又況分之。以毀譽得喪之私。瀆於耳。因以滑於內。內無純心。安得外有純政。夫吾心則有定。若乃毀譽得喪。則亦何常之有。御史持憲。爲天下公。柳坡言之矣。今日言省野之心。今日成省野之美。姑置之。所願二侯上體省野寅恭之心。以同寅協恭爲己責耳。呂祖謙謂狼曠之烈。豈僕僕乞憐而求人之譽者哉。余於省野公亦云。區區真有以見公以傷視民之心。於青天白日之下而無間。知必不以余之言非美盛德之頌也。夢中呼其人之名。人則應之。呼他人之名。則不應。以其真也。二侯曰然。書爲贈。

贈郡節推大東劉侯膺榮獎序

今之人官而仕者。庠序學古之人也。然往往不滿於識者之意。天下之人。不見官人之利。特見官人之擾者。豈其人之初。盡不賢則然哉。未仕學古。既仕。則參之今日仕人之論。平生之學不盡用之。今人之論。正今人居官之利。是故其說易以溺人。始有今古之岐。終入從今之謬。大抵以正入者。以邪出矣。萬歷三年二月。大東劉侯。自邑博。擢推吾郡。視事之初。抗然有執已守法。不混於俗之意。是雖未能事事中則。由其事逆其心。胸中若有特操。有俗指爲薄。侯行之者。有俗指爲膠固。侯行之者。道在是也。今人誤認爲膠爲薄。於此有特見焉。我自行之。出入於風靡波蕩之中。欲自比於屹立中流之柱。侯能久安於是矣乎。秀才初官。移其心而左。移其心而右。未可知也。詩云。誰將西歸。懷之好音。常欲小申已說。勉侯未至。堅侯已然。一旦代巡柳坡馬公檄旌所屬。意有大者。侯與焉。僚屬師弟子因以贈侯之言爲問。余欲有進於侯未及行。而意不爲頌諸。君子有愛人之德存於中。

是以今日有贈言之舉於外。夫感我而厚。必有受其薄者矣。受其薄者怨之矣。有德惠我之爲通。莫爲膠者矣。通大抵在財貨禮貌。今日出之自己。亦先日取之自民。變通圓活。官有時譽。民之不當其害。無有也。聖天子爲民設官。今人入官。於可以爲千名進階之助。則庸心焉。爲民之心。而置之計毀譽得喪之外。失之矣。然則欲侯節推佐郡。舉於其職。寧復有過於薄爲厚。膠爲通。勉所未至。堅所已然。擴充之以盡其大。無自畫於發見之初者乎。失職分。則失道矣。失道。失心矣。無一可者。用是特書先日之意。復諸君。請持上爲贈侯。根本在是。擴充終始之。而節目無不周矣。柳坡旌侯。止於節目。不詳及云。

贈句容貳尹吳頤菴序

頤菴吳子貳尹句容。三年矣。其親友人某某。自京行別以至於今日。有思慕。思慕何。謂意氣不時人物也。入官有年。不失初意。又敬字丁進士爲之長官。賢而知賢。可有顯擢。乞余遙致一言以見其愛。頤菴於余親故時有

海 忠 介 公 集

會語。曾以一二言一二事高之謁選。將行巡崖。邂逅托馬鞍於余同舟之上。日久不復詳其時酬答所以。大槩指今官而有得醜狀戲之供一笑也。頤菴變聲色而曰。公人品高矣。乃允賢決則不然。有友同行曰。顯顯戲談。回言如是。友人亦雷同余許之。而終以爲愚。犯熱滯之病。不可官。吁非也。言念頤菴。土芥青紫。自幼而志有大焉。不得一遂。一旦曠典恩貢。人意必頤菴之得果然。然候選天官。所授不過縣尹。事有堂長主之。而爲其貳。南都。上下京師瓊人。必由且止之地也。句容去之不遠。鄉人一接頤菴而歸曰。衛中空空如也。柴馬俸錢外。無從有毫釐之入。事自堂長付之。彼盡心如法而行。不貪不酷。不自巧諛。不自爲情。無殊先日秀才時事。貳尹於今罕有。人有同言。余信之有不盡然於余心者。頤菴在句容。今三啓於予矣。大抵卑抑無聊之情。因之有懷鄉掛冠之想。夫吾年日有取於頤菴。取於氣之直也。直氣即孟子知言養氣之氣。行則懔心之功。乃其有事勿忘之驗。氣之所加。無大無小。無不榮。無不逸。乘田委吏。孔孟無一日爲歸與之興。行道

海 忠 介 公 集

之氣充如。不暇爲心也。頤菴三書於余。向家如切。大抵見小官之亦有榮。又見還鄉之反爲適。不能遂。不能退。是以三思蘇氏發明憐心之驗。曰卒然遇之。王公失其貴。王公失所貴之常心。服於吾可見之氣心。服其所本然之理也。今由歲貢而出之人。偶授知縣府判推。猶有向前氣概。降此而下。自視小矣。所由如是。侍之諸進士大官之下。譬之雲泥。縱使出群其才。誰則我與泰山壓卵。因而頽廢。頤菴歸心。或亦然矣。夫人豈其盡無仁義之良哉。吾能不見官之爲小。養成此氣。由中發外。而天下人首肯之矣。謂世無不好諛之人。諛幸少安。夫豈其不然。然而鞭策不前。十人而十。予以爲其說。皆是做成。今天下有其事。無立事之人。天下靡靡。國家無賴。人不能重己。以致無人、有之。已不能自重。至人輕己、有之。在彼在此。均當分任其咎。使吾職掌無缺。不愛一文。其心好諛之人。彼亦人爾。絕無一服義心哉。不然矣。何容堂長丁敬字之賢也。有知於頤菴。必不以堂長崖岸繩頤菴。不繩之。必能揚之。至此而頤菴無不可爲之丞矣。雖然。吾人浩然

之氣。不因物而亡。有不依形而立。吾執其是。彼峻其權。鸛鵲蚊虻相過乎前也。浩然於天地之間。其大無外。聖賢論在我。不論在人。道又如此。頤菴素有方直之氣。入仕途。不免動其心於榮辱得喪之來。轉步移身。余憂之。君子愛人。防所未見。書爲贈。世尙圓活。圓活、私意之所自起也。敗盡天下。頤菴能如先日之執滯。而天下無不可爲矣。頤菴勉之。

海忠介公集卷之四

贈陵水尹吳秋塘德政序

學爲己。仕爲人。其義不講久矣。以故天下之人。坐受任人之害。瓊州。號爲嶺南百粵益南之遠地。陵邑連崖州。山海貨比郡治下爲勝。其地又居郡城之盡。有仕於此。爲貪爲肆。可爲己百方文飾。自非介石之守。豪傑自命。未有不以地變者。浮梁秋塘吳侯。由恩貢國子生授萬州判。判爲州守之貳。韓昌黎謂漫不可否事者。無得自見其才。雖有識者。亦無不曰其有不爲。有制之爾。三載考績。得晉其州屬陵水。言陵尹。則無有出尹之上矣。其貪其肆。有制之。而不得逞乎。乃候履任又二載奇矣。無意於香仔。無索於海舶。里甲紙牘徵收火耗。有事於官。而無暮夜之入。其非已所有不爲。已入不必言矣。雖出村至府。飯食供需。前人無不求辦於里甲中者。候亦不然。其清節有過人者。以言其才。則昔日漫不可否。今則可者可。否者否。有

猷有爲。毅然身獨當之。勤事厲精。吏胥無能爲弊。行鄉約辨爭訟。百凡有爲。民則便之。利無不興。弊無不革。曾不得已捐俸二十金充蛋戶額課。雖謂之滿腔子惻隱之心可也。然皆未足爲異事也。白面書生。出人意料。牛嶺劫奪。非百年來前尹以爲無如何事哉。招撫勸諭。誠信有以服其心。營堡屯戍。先入踞險。又有以屈其力。小則深田歸心。大則萬州龍吟峒二十餘村。雄桀不受控馭。亦惟候所指。無不如意。洋賊林道乾楊帆擄掠。非犯則無敵者哉。防禦有方。士氣百倍。打水六七人先試。而侯衆突擒其一。道乾反以畏途視陵。轉洋他去。侯蓋不特牧民有政才。課士子有文事。內黎外海。四百里內民蛋。仗侯武事而安。亦先年諸尹之上人也。大抵天下人。內有涵養。然後外有施設。侯任能爲人。侯學能爲己。爲之若侯者。其可以今日仕途中人物視之哉。予杜門謝事。如前所云。大抵多出一時耳。聞予歷世故多。於人情亦熟。嘗謂人心不古。毀譽難信。然酌量於彼此公私之間。參之以尙書聽詞於差之法。百與而百無失矣。況今巡道錫崖舒

公日時廉訪。尤加之意者。府州縣正官也。激濁揚清。於侯許與民牧。若侯也。而又何疑乎。雖然。州縣親民。瑣屑曖昧日雜。然尹前府及巡撫按。千百端其難爲。亦付州縣草創。十室之邑。自昔難之。侯果能曲當於應學優外。無歉然不滿吾當官之懷哉。反吾歉而求之。分盡於所求之中矣。用是因士民圖侯撫黎事。并德政大端。乞言以彰其美。據所說。附已意。書爲贈焉。

贈恒所劉侯膺榮獎序

天子在上。舉天下無一物無不欲其入我生全之中。按撫藩憲。海內外統之。既有其人矣。郡爲守。邑爲令。有其人。必有其人之選者。以任其生人之責。經野設官。用爲民極。日久法縱。而入官之人。計身家言利矣。我瓊萬里京師。天子生生下流之恩。壅滯尤甚。據劉侯入境之初。一週年矣。言念劉侯。溫其如玉。識者知其以仁心消厄運。無負天子生遠民意。由一。日至期年。節用愛人。果如識者之料。督府石汀殷公采民風。獎之曰。安詳處事。平易近民。聽斷無冤。催科亦善。品藻如見。弟子員幸焉。詣余徵言以贈。夫諸弟子

海 忠 介 公 集

治於侯。皆其所以望生全於侯者也。望侯以爲生者深。責侯以爲生者必備。一有不及。而生全之道缺如矣。請言之。朱晦翁謂具此生理。自然便有惻怛慈愛之意。人於人無不愛矣。況又有今日治人之責。愛人其職者乎。然官於人。得喪毀譽。機在人動。心於人則我之心。不我作主。固有惟上之聽。惟人之徇。百姓不欲於我之所爲而爲之矣。無問大小顯微如一。果能如父母之於子。以其滿腔子。盡是惻隱而施之者乎。今有暮夜受人之金。人指而疵之矣。柴馬俸錢。過此皆法之所不宥也。常例里甲上下相安。何所據而行之。聖賢義利之辨。士子一入官而昏心焉。俗論也。官一郡者。以一郡事爲任。官一縣者。以一縣事爲任。初無大小難易之別。今人曰不明之罪。有之而無不公。子太叔問政于子產。子產曰。政如農功。日夜以思之。思其始而圖其終。如農之有畔。如之何無能明之。不公不明。其罪不大相遠。職在是。罪亦在是。甚矣小之爲害也。況又有積小成大。甚矣一之爲害也。況又有失於一。害不止於其一者乎。昔人得官而仕。於縣令獨有取焉。

言親民也。吳臨川謂禹稷伊尹之志。得縣可試。公孤守命。大小別焉。仁道在中。事行則一。舍伊傳。言縣官。一縣之人。有一不被堯舜之澤。皆苟道也。劉侯志安天下。發軔瓊山。內重而見外之爲輕。舍侯無足與有爲者。學師弟子愛侯以德。詩云。庶幾夙夜。以永終譽。今之謂矣。用是推言之。用爲贈。

贈養齋蔡太守撫黎序

國初至今。言官瓊者。必以治黎人爲一急事。然卒未有以得黎人之治者。孟子曰。至誠而不動。未之有也。龔遂得之以安渤海。張綱得之以說張嬰。卒之有以服其心。而戢其禍。况在黎岐。質文機變。吾中國不知其幾更易也。自有天地至今。尙存太古風致。然諾信義。死而不移。天性之眞。獨有存焉者乎。動以弓刃相向。自昔記之。蓋以弓刃爲雪讐之具。不能自至守令之庭。曲曲直直。勢使之然。無他意也。苟有以開導其心。剖其不平。彼無不聽。余嘗謂恃有人心。小則息爭。大則開通十道。地爲郡邑。人入版圖。百千

海 忠 介 公 集

萬年。無不可者。所恨知此道者之難其人也。而又賦役繁難。官吏刻削。彼自爲誠。我自爲詐。有以灰其心而激其志。至誠之爲難乎其爲動矣。微啓其端。謂可見之行事者。吾於養齋蔡侯見之。嘗跡蔡侯。澄海先聲。崖州初政。大抵事從其真。由其質。有其內。學於誠。而欲求其至。比之俗吏矯飾外貌。學於詐。而務爲名高者不類也。有是涵養。有是作用。方抱宥四村饑殺。旁村效尤。禍變事機。浸浸滋蔓。正侯渣任未久之日也。單車往諭。侯信侯之心。士民未之有許者。乃侯爲之。近不曰叵測之爲凶。遠不曰嵐瘴之爲毒。心何心哉。曲曲而直直之。不過數語。卒有以得其心。平其夙忿。解怨爲歡。村村如故事。與張綱龔遂後先無異。然則不曰己之無誠也。誠不足爲動也。而曰獷悍者不可爲馴。古昔則然。可信也哉。即小推大。則州縣中苟有以遂彼之願。無碍其生。版籍而郡縣之。無難事也。余嘗以爲黎人之不我向也。乃我之無以致其向。其爲亂。則始事於州縣之民長。養成就於無良之吏。黎勢固不能以至州縣言曲直者。無以剖別其不平之端。而僅欲使之

海忠介公集

不爲不得其平則鳴之舉。嘉靖間二勳王師。余未敢曰師出之爲名也。此則太守不能處分之罪。非其人之過也。嘗欲執侯今日之功。破先後黎議之謬。爲開道郡邑之漸。一日崖士民以贈言問。余曰吾意也。雖未爲千萬世之功。而心情啓達。向化可兆於是矣。中孚豚魚。吉九二之象曰。其子和之。中心願也。信在言前。不言而信。變詐之世。而得在如侯者。黎人得以舒發本真。士民寧適其可以易而得之也哉。苟朝廷之上。薄賦輕徭。承宣之吏。還淳返朴。舉蔡侯而爲之。無不可矣。單車諭。侯得爲而爲之矣。承宣之任。權不在侯。而侯侯之勢也。劉安之諫伐閩越曰。以十萬之師。爲一使之任。蔡侯以一使之任。當十萬之師。回視庚子己酉大師兩及。荆棘生焉。崖至今生氣未完復也。何如哉。何如哉。曲突徙薪之功。誠能動物之道。蔡侯胥得之。用是不辭而爲之序。

贈總督府凝齋劉公平八寨序

蕭望之謂民莫不有仁義欲利之心。雖桀在上。不能去民好義之心。道之不

海 忠 介 公 集

可不慎。粵東西萬中山生聚之衆。倚險作寄。其人習氣。亦如其山之險。然同函陰陽之氣。得生天地。非他類也。遠人不服。夫子以修文德以來之爲策。夫亦無以來之而已。祖宗兼設文武重臣。控制其衆。後又革去征蠻將軍之任。總其事于都御史一人。吾天子意也。列聖奉運二百年餘矣。不見文德之修。日尋用兵之害。何故。夫自其不服王化。恃有山以自雄。誠橫矣。然北仰九重曰天朝。知有天子如天之尊。謂督府天朝選擇而來。天下人也。視如神明。望爲標準。羈縻去留。大抵督府之命惟聽。威畏朝廷。威畏及督府。先後坐開府不一其人。督府日在政令仁義之言。不絕人耳。可謂曰賢。然言仁義者。十之一事。不在仁義在利欲者。十之九。軍門得以便宜行事。天下謂握權重。故宦囊特多。兩廣貪泉其多。又居天下之一。夫止此柴馬。止此俸錢。出此之外。一文一分。賊証也。經曰懷惡而討。雖死不服。軍門罪我。劫掠。軍門劫掠。猶我山中之言也。非瑞經行蒼梧等處數十年前。耳。聞者乎。流至今日。其言尙存。標準之地。先自壞之。欲持之以服山中之人。

海 忠 介 公 集

難言之矣。臣子之權。有重於軍門者乎。榮身及親。一時稱最。答恩報主。當亦無過於軍門。湖湘凝齋劉公。當風靡波蕩之中。超然千人一律之外。百事如新。姑卽其切近之小者言之。督府兼在巡撫。兵事其急。故曰軍門決勝千里。大抵身不親行。藉總參而下。將領於外。運用晚唐債師。宋南渡而下。殖私財以自結於私人。今日踵之行焉。自痿痺其手足之用。予不知其所謂公下車初政。突然反之。賄門不開。將領生氣。所在有李光弼八營。調發間精采百倍之象。八寨之舉。瑞時以先事之端倪。占後事之成就。師不愆期。臬爾捷奏。天顏有喜。遠近歡聲。先公而行。如公之舉有之。而紙筆間功級不同也。先事一方用兵。百方枯骨。府州縣民牧。不得安於其牧矣。一將功成。瓊州府知府唐可封。同知楊繼文。通判黎九臯。懇一言以志今日之喜。夫天下有清其心。不能以清於事者乎。天下有養成此氣。不能以駕馭一時。遊其刃於天下者乎。萬古人心。又有雖之蠻貊。無能行之者乎。不圖今日復見威儀。書爲贈。

贈羅近雲代丈定安田序

東坡蘇子有言。古之所謂從衆者。非從其衆多之口。從其所同然之心。古今有不曰井田之爲美法者乎。漢初限民名田。今日廊廟有人。遍舉均糧新例。是雖貧無立錫。猶可以已一時飛詭之痛。千百而取其一。是亦井田之遺也。發令之初。家之田連阡陌。亦曰此一均平美事。貧富心口同然。予喜之。謂事行可立見也。遲而今日。則又大謬不然。部題有曰以國初流水魚鱗老冊爲主。名曰流水魚鱗。蓋有其義。今不講此。而別臆爲之。開端既差。末流之弊。莫可禁止。東扶西傾。朝更暮改。百病之所由生。獨臨高會同文昌人。以彼善於此分之。文昌者。近雲先生今晉欽州太守舊治也。文昌丈事方畢。上官知美才。復付爲定安之丈。近雲不辭。委於始。不昏懈於終。大抵事本易簡。古稱治亂絲有法。有田則丈。顯顯條緒。非亂絲也。近雲坐得易簡之道。是以得之。定安之事。予未之有聞也。然觀其彼善於文昌。可以卜於定安亦必有善。心力不能以兩見。任人爲而理其緒。聞其後一得間親行核

奸匿不丈之家二十有一。准之改補完報。雖曰安知其無尙有出於二十一家之外。而近雲精明果毅之才。亦可見矣。近雲才大過人。愛人之仁。一介之操。又足以鎮之。排難解勞。乃其餘緒。道有出於丈田之上。不可以其一盡者。是宜乎朱尹忠齋神服而樂與之也。忠齋必予言爲近雲贈。秦穆之誓曰。人之有技。若己有之。忠齋有焉。均之義不得辭。書之贈。

贈文昌大尹羅近雲入覲序

易冒天下之道。圖從中起。中起。言心也。天下未有一物一事出心之外者。心何以得。曰得之寡欲。聖天子思得寡欲之才。與天下共宵旰。尤切。文昌地濱海。獨稱磽瘠。貢役之繁。反甚其他州縣。碩鼠食苗。天子需才。才不我顧。亦惟文昌爲劇。以今時事言之。蓋非大過人之才。不足以爲大過棟橈之濟也。自昔宦遊瓊土。惟江右人士。民則宜之。然資稟近民。求如豐城伯輔之涂。天下堅無不可破。深無不可入。又不可得。近雲羅君。來自宜黃。一時邂逅。予猶妄意君一江右之才而已矣。任事無幾。絕無之中。得僅有之。

海忠介公集

見邑人遠邇不約同頌。究其所以。則曰當年里甲罪緩。及一切非縣官所可有者。時呼常例。前人未有秋毫無犯之者。侯獨不然。質之天日。無愧心。無赧色。羅侯也。夫文昌非人窮而詐。百年來鼠穴不可詰。不可止者乎。君懲一儆百之餘。意氣所加。一朝如洗。大抵惟民之利。君無不見。亦無不興。惟民之孽。君無不見。亦無不革。乃留更僕。未可悉數。君何以得此於民哉。君之心爲之也。集義所生。是非義襲而取。以故可大可小。可常可變。一里之城。切近清瀾等。方剽寇往來之藪。非前人付之無可奈何。急則抱印而付者乎。君無所不盡之心。戰守得地。林道乾所向無敵。視之若無有焉。遠近恃爲無恐。一邑安堵。大抵近雲侯一人之力。民苦衣食。轉徙他資。空存籍版名戶。亦既有年歲矣。識微君子。不能無日後子遺之慮。非過慮也。前人亦非不曰當務爲急。招來有文。復業無一。近而三年之內。告歸於故土者。源源可計。久當何如。天下事。心感心應者。有原有機。毫髮掩襲之而不可得。鴻雁于飛。集于中澤。言尹如君。吁賢矣哉。君趨庚辰壬正之觀。

以己卯八月去任。急王事也。邑人不能朝夕去君。邑庠教諭某。訓導某。生員某。將其意懇一言爲贈。述職者。述所職也。守令六事對場上休。君無愧矣。雖然。無非事者。而今視爲故事矣。反以書帕之禮。用爲入京之急。內京謂之禮。外京謂之賍。君行之乎。書爲贈。用爲君省。

贈李太守母七十壽誕序

天下有親如子於父母者乎。念其子。念及父母。情之不得已也。通之天下皆然。清江檢齋李先生。起官桐廬。己卯夏。奉命晉任萬州太守。月日無幾。一州一縣。是雖山谷以爲居者。亦無不有德守之心焉。人無異心。守何以得此後人哉。德守之深。日夕思所以爲守報。庚辰王正二十又七。其母七十初度之辰。運周而始。人子一則以喜之日也。庠士某某。將郡士夫師生意。乞言望清江之滌。拜雲端以致其孝。報守也。報守而止於世類之係言之。誇張而不當其實。母子一氣。有待而成事。言必其事。請爲諸人士言之。今聖天子代天理物。設有百官。官必其備。無一而非爲斯民地也。士讀書

海 忠 介 公 集

文。入式而後。授之以官。謂言如是。行不然哉。初不然。終則大謬不然。大抵牽於外。持之不堅。不免變於中也。牽外變中。孟子以三可已不已當之。此在父母之際難。母又難之難之。閨門人見俗尙如是。謂義理恰是如是。子之受親命也。不可解於心。李侯亦當乎難而難矣。萬以香藤、板葛、栝柳、海舶利、爲小民衣食之資。耕蠶不足以供。不得已而賴之者也。他方之人。一官此方。不知其方愁苦。十人九人滿載而北。惟侯、今日蓋不止曰、於事應事。自惻隱中發之。見德於人。已也退食委蛇。羔羊之皮。又一州一縣之人。老老少少。談不絕口。有從容自得之美。無牽掣難心之態。非先得其母脫然於財帛之中。能得有脫然無累之子出世俗外。吳隱之之心。其心也哉。詩有不遑將母。四牡之使。父母何嘗羽搗之臣。一時里仁爲美。家庭之中。不止一陟岵之母。不恤其緯之婺。可以想見然。春秋而上人物。無足異也。今此何時。桑桑之篇曰。其何能淑。載胥及溺。有母如此。吁不賢而能之乎。先有母氏之賢。然後從子之後。頌母之美。有言不爲虛涉。

言之可矣。猶有進於是者。養生家。謂怡恬爲保。元和上壽之自。家不入民怨之錢。歐陽詹生雖有離憂。親心樂也。母和於清江之原矣。民怨錢不以養母。朱晦庵謂日用三牲。不足以爲孝。子心樂也。子和於今日牧民之堂矣。聚州縣之懽聲。將望雲之喜意。孟子曰。父母俱存。俯仰不愧。二者之樂。李氏一門以之。爲此春酒。以介眉壽。酒之可以爲介也。和氣也。天地和氣。萃於一人。吁盛矣。用是不辭。人士之請。書之以爲贈。若夫行道揚名。召伯甘棠。勿剪伐拜。孝大而遠。俟他日與侯記之。不先及云。

贈霜柏陳先生得獎勸序

士子入官曰教官。人則卑之。何卑。吏部亦一資格而已。這資格格了許多賢者。使不上遷。格了許多不賢者。亦有進步。人心排下進上。資格限焉。而氣困之。孔門在得之戒。爲戒無有也。御史懷川龔公。百年波蕩之後。屹然執焉。曰。敎職有初。周元公朝廷正。天下治。之言。敎官之所自來也。非誣也。正名正義。關係不小。三論之文。行於一十七條之外。論敎官。較府縣特詳。

海 忠 介 公 集

責教官。較府縣獨切。責之詳。人之聽之或不及至。乃歲貢出三任。不脫於儒。吾郡霜栢先生。上肩鄉科之士。獎薦亦有與焉。諸弟子謂此希闊遇也。乞一言爲先生慶。吾觀霜栢於未得獎薦之先。究霜栢於既得獎薦之後。大抵即霜栢之言貌。可以得霜栢之心胸。古人指閃倏狡獪之輩。不可方物曰小人。霜栢內雖文理有別。外則寬易舒夷。口不伐功。行如其口。苟非養素之正。定靜之衷。當不及此。諸弟子之言曰。事師三年。一經幫補入學矣。不一見有計利言色。先後進生。自行束脩以上。均此誨心待之。輕重厚薄聽之人。我無與其間。其心清矣。內有清心。外自有清應。教官無府縣吏事之繁。習讀考課外。無幾也。霜栢之素行之。而有不_至乎。人各有師。霜栢初謂不可攬人就我。來不拒。不來不迫。錫崖舒公條約既行之後。一概取必。若與己異。而霜栢奉行之謹。不啻己出。已不誇名。是以人亦不見其有事之跡。今士人日有成就。錫崖振刷之功。抑亦霜栢奉行之力也。不見物我之分。霜栢之賢。於是爲大。予故曰苟非其養素之至。亦必其生質之美。

夫師取模範弟子已矣。道不在於言語文字之粗。在於身心性情之際。古人有行之者。霜栢如之。虛而往。實而歸。模範有過之者乎。雖然。一先生事。都人士賴之矣。其他何有不脫吏部資格之外。積次程功。霜栢可一縣尹。劉方未有他異。吏民同聲謂之不煩。霜栢事也。過此以往。得志以鳴國家之盛。未敢言矣。何也。吏部有三途並用之言。終實不然。僅此復弟子愛師之意。借之贈。

贈黃村趙先生陞靖安大尹序

黃村趙先生。楚之棗陽人也。以己未歲中乙榜。署淳學教事。始至。進謁於予。視其貌。忠信溫裕。若有道然。頃接言議。又欣然若以是官爲幸者。未教官。則呵從不足。祿人不豐。徒寄空名於諸士子之上。一切紀綱程約。不克自樹立。且嚴戢。時俗薄之。師嚴道尊之實義。善人多。朝廷正。天下治。之實功。世不知有此久矣。先生獨欣欣然者加榮焉。自非心有獨是其行之也。將舉百餘年既廢之緒而直任之也。能之乎。心竊異之。閱數月。見其模範

海 忠 介 公 集

端嚴。程約整戢。道德爲師。文課不廢。凡一言一動。足爲士子楷法。士習稍稍丕變。計至壬戌。二歲有奇矣。先生之教。無怠於始。弟子服先生之化。不岐於初。教用有成。卒如予所料。人心同然。先後巡按際岩周公、羅君哀公、春州崔公。均以志向高潔。模範嚴整。獎之。蓋先生忠信純一。則行之外。必能如其中。先生以此職爲榮。則知此職之不小。其行之也。必能盡此職之爲大。師道立。而善人多。於淳有成效矣。正朝廷。治天下。方日望焉。先生歸自會試銓部。以績最。薦進靖安縣令。天子俞之。夫令控有一邑。祿入稍裕。剛從塞途。經百凡出納。苟效鼠狗計行之。可以厚囊橐。誇耀閭里。即所當事。巧便史書。習於欺謾。苛暴勇猛。操切百姓。違道干名。雷同上下。上府每每右之。將有顯擢。故凡職列於教者。人恒以不可以府縣。以藩臬。以風紀。幾務短之。蓋謂所司之繁簡異事。所理之巧直異功。有司事在巧迎善伺。時沉而沉。時浮而浮。與司教者之迂然禮義抱守。區區相懸也。時俗之薄於教。君榮之矣。有司過峻厲。誇聲勢。父母斯民之道。幼學壯行之

海 忠 介 公 集

守。邈乎未之有聞也。世俗榮焉。君知反而爲之乎。孔子之藩。以恭敬。以信。忠信而寬。明察以斷。爲子路頌。夫治蒲三善。非俗人所以榮令者。聖賢每加意焉。先生忠信統一。溫裕不苛。即所肅諸士子推之。則其見效於不倫不擾者。特餘事耳。見禮知政。時俗所榮。先生弗爲之必矣。雖然。道一而已矣。道行於教者。道之分量淺淺。在於能充。君子之守。亦一而已。守貞於教者。守之分量小小。貴於能執。令。萃有百責。大抵刑教十之一。理財十之九。百職惟令。臨財惟瑣惟多。民之結者。訟訟必求勝。窺罅隙以投所好。靡攸弗至。先生能持於始。能無變於終乎。今日而上。而下。而旁。交。百凡垂涎於令。小不如意。輒怪言怒色。墜淵之計行焉。得喪利害。李少卿謂腸一日而九迴有之。先生無恐於一二。能恐於十百千萬其人乎。真西山、大儒也。劉平國謂與余景瞻並用。必有可觀。縣事簿書山積。獄訟叢委。奸人倚以變化爲利。鼠穴其間。望於此。則通於彼。市狻挾公符以暴於鄉。豪橫胥朋比以威剝於良善。一不加意。民有不得伸籲而死者。先生能勤察於幽。

且險剛斷。其禍福於民者。與其可禍福於己乎。擴充未至。則道之分量有不盡。執持未堅。則守之分量有不充。世俗之所薄所榮。終將出入於其間矣。吁道云乎哉。吁守云乎哉。余於先生宦游於淳。見善相示。聞過相告。舊矣。故於諸弟子之需一言以爲先生贈也。竊効顏由二子之相與贈處也。備述縣教難易以爲先生誦。

贈瓊山尹林東臯考績序

余於東臯先生。均業儒友也。然東臯令瓊山。計七年於此矣。實有大夫義焉。古之人有曰。君子居是邦不非其大夫。自斯言之出也。故凡有滄於人者。雖心暫淑慝。紀事執春秋筆焉。其顯誦於人。裂采而贈之者。必淹咎爲美。增細以巨。雖以龔黃召杜。顯顯然擬之者。實反出嚴來下。用是善惡。詆冒。莫可憑倚。君子習見其然。故凡采而書之。颺歌而休頌之者。皆將曰。此不非其大夫義也。雖歷歷可按者莫之聽焉。夫以善惡之相冒若此。莫能白之。今欲侈言以爲東臯贈也。亦奚益哉。是故東臯惠澤著於人心。政聲播

海忠介公集

於行日。績業留於郡邑之志。瑞不必多爲之贊。然東臯此以奏績行也。行將擢而之他郡。陟而之科之道。其統賴有大於瓊山者。統賴大。則其績之所奏隨之。東臯以其迎刃而解之才。乘迎刃而解之力。隨職業之所到。執平日之所學者。毅然行之。罔狗身以忘國。毋私已而棄民。小之瓊山。大之天下。則聞譽達于遐邇。功烈著於不刊。循良憲諍。映耀今古。余得以從而鼓舞於其後矣。吁。豈不盛哉。豈不快哉。昔子路去魯。謂顏淵曰。何以贈我。曰。吾聞之也。去國則哭於墓而後行。反其國不哭。展墓而入。謂子路曰。何以處我。子路曰。吾聞之也。過墓則式。過祀則下。儒有兄善以相示者。東臯先生何以復我。

贈喻邃川得撫按獎勸序

聖天子作天下君師。勢所不及。外設府州縣官共而理之。府州縣於民曰父母官。天子之君道天下也。於凡民之俊秀。則不曰父母。改稱提調別之。言提調者立之標焉。禮義廉耻。日提撕而調度之。如人之愛其子。必思勞其

海 忠 介 公 集

子。期之遠大。進之聖賢。天子之師道天下也。師天下與君天下。而徒衣食之聽之由。不強使之知不同。今府縣官、有顧父母提調之名。而思其義者乎。模不模、範不範。言提調失官。則百來年視父母爲甚。起於厚學校之爲私。謬於借士譽之爲累。事之牢不可破。余以爲終焉已矣。天下以虛器視學校。天下之提調爲之。壬午春初。忽一日澄士揖余而曰。今有賢尹遂川喩公。得撫按獎。願言爲今獲上有道之贈。先是老幼亦同此請。而余言之矣。遂川新政。大槩具舉。學校事、未詳得也。諸人士之言師之狀。則曰今縣視先年有異。鄉先生投刺之難。非公事。未嘗至於偃之室也。此子羽之自守則然。今有欲至之而不能。先日囑託之風。今日消絕。夫曰投刺。曰出入請托。非人所帶芥。人士有口。不爲逆而聽之者乎。履任之初。遂川特自爲執。提撕調度。握其大綱。而夫子教我正矣。陸九淵謂丈度石量。徑而寡失。可爲論人之法。然則有賢遂川待士執之矣。其他小者而不能執乎。仁父母不能爲提調之嚴有之。提調稱官不能父母之仁無有。雖然、執之是也。道有出

於有執之上。不得不足以執。耆老未及。人士能道其詳。請再言之。夫瓊事出十年之近。人稱破家亡身。莫得伸籲。非強盜拔扯事乎。蓋官中以得盜爲功。奇貨可居。富戶也。遂川初任。特忿然曰。盜人何心有自拔其黨乎。置不問。上人先日風旨不顧也。未幾別得實有贓物。眞犯十人。脫然無累。蘇子瞻謂孫君介夫剛者也。不仁而能以一言。脫十二人於必死乎。余於遂川亦云。夫執今人所不執。過此而往。何所不執。明今時人所不明。過此而往。何所不明。先之明。成就其執。後之執。完美其明。父母提調。入何間言。且事若薄士。而士反歸之曰厚。大夫士能相與以有成也。皆可書也。用是不辭其請書之贈。

贈毛帶江陸天台大尹序

古之君子。急欲得君而仕之。廣土衆民。中定天下。孟軻氏之言君子意也。夫天下有聲色臭味焉。無屑欲也。必此而後欲之。天下有聲色臭味焉。無屑樂也。必此而後樂之。今之君子。急得君。與古同意。所自來。則古異今。

出身之途三。言舉人無從於下第後教官例矣。今之將仕者。顧曰歷事後亦有例。縱使卑之。不失減縣正官之數。如之何去終身之熱。就一世之冷。蘇東坡出守河東。其詩有酒肉淋漓渾舍喜之句。此正冷熱之別也。士君子性分內事何事。初登仕路。便孜孜然此念橫耶。帶江毛先生。近古風味。吾取焉。帶江長於文學。豈科甲躡步人哉。落名丁丑。遂忻如於樂會之就。四年冷官。安之一日。周元公師道之立。會之心矣。感恩七里之民。素不習爲官府逢迎之事。不遠千里之難。而有今日保留之再。君子之善覘人物者。石量丈度之。而亦有以盡帶江之概矣。萬歷辛巳之秋。吏部特以帶江擬長天台之缺。天語俞允。先導有感恩。今日之天台。熟路也。世有談天台山水。其幽邃清絕之勝者。言之如畫。人人有凌空欲去之意。謀野則獲。帶江坐而得之。士子問余一言。爲今日之行賀。信若四年履歷之狀。遙指他日山光水色之胸情。雖列之竹帛。而非誇言矣。然余有僅見古心之許。不盡什然。然吾聞諸葛孔明之言曰。學以廣才。一邑天下之小也。斗以廣言之乎。

人之相去若九牛毛。先儒以天地江海。鍾鼎斗筲別之。象山不取。天台大於二邑。天台而上。十百千萬。有大於天台。人有改行。而非其先日者。許邵每月更爲題品。名之曰月旦評。一人之身。後先異譚。無負熱冷之初心。學與日新。廓是二邑之小試。余於帶江日有望焉。若火之始然。泉之始達。感恩樂會縣。往事也。苟能充之不能充之。天台今日而上。後事也。用是畧諸弟子之詳。詳他日望中不及見事。書之贈。

贈臨高尹陳侯丈畝成功序

萬歷八年。邵筮天下有司徹田爲糧。再舉洪武三年。令典也。天子有均平之旨。天下同然。誠擇公正書。算於木事之先。畫里界田。誦於將事之際。約日起手。冊日一報。流水魚鱗。縣官秉有公廉勤慎四道。行之一里。公正書算之人。了一里歸號歸糧之數。至簡而亦至詳。初無事難。計之。雖久不出三月四月外之功。而今也三年行之。行之三年。百姓以爲三年之害。獨臨高一縣不然。蓋有治法。先須治人。臨高一縣不然。有由然也。夫曰公。雖鄉士

海 忠 介 公 集

夫亦不敢干之謂。夫曰廉。富人亦不能賄之謂。曰勤。時時田里之中。曰慎。一字不入吏書手目也。他州縣。曾有之乎。而振源陳侯。自入臨而來。則已然矣。今丈田爲國家之重典。民事之急務。四道之有於身。日益加篤。一縣之人。得有千百年均平之美。有其田。力有其糧。舉賴於侯刻骨之感。忽一日耆老吳應朝。士子林士直。謝尙賓輩。將合縣意求言贈。余辭焉。辭之者。謂衰老之年。而文又素非所能也。既而又自思曰。聖天子宵旰之初。付之州縣。不得覩有成功。有甚於今者乎。自初官迄丈田事。視國如家。民若子。區區獎勵。焉能爲有亡哉。帥弟子遽欲援之爲賀。夫亦大非陳侯素所期待。而小視侯矣。余辭焉。帥弟子曰。瓊去君門萬里。毀譽淆惑。陳侯期月得之。自今亦可以爲陳侯行道之兆。夫謂之兆。而有待於外也哉。士君子受天地之中以生。動作禮義威儀之則以定命。大行不能爲我加。窮居不能爲我損也。天下國家。舉賴於君子一人之身。道無待於外。一恒人譽之。自以爲喜。一恒人毀之。自以爲不足。失之矣。失之者。縱使得官。亦大失。

海 忠 介 公 集

已之謂。楊龜山云假饒外邊，立得功與業。與聖賢所用處。終是天地懸絕人。有天地之身。堯舜同性。懸絕聖賢。功業何用。今日之所以願於侯者。萬物一體之義。養之深矣。望其益深。中流砥柱之心。守之固矣。望其益固。兆足以行。伊傅周召。我自任之。兆足以行矣而又不行。公伯寮愬子路。豈人有臧倉者沮君。自我安之。其任之者。任我之不能加。其安之者。安已之不可損。非陳侯其人乎。漢司馬遷歷覽天下之勝。說者說史筆之奇。山川爲助。龔黃卓魯。彼其四逸致聲。亦此得之好。是懿德之心。不可謂獨太史公當有也。匪風之詩曰。誰將西歸。懷之好音。陳侯之在今日。能西歸矣。於此不言。他尙何言。用是改辭書爲侯贈。

贈喻遂川得按院獎勸序

言有出於一人之秋。可信爲天下之公者。澄邁大尹遂川喻先生。任甫五月。按院凝初公有獎。耆老洪以讓雷一誠辛巳季冬之朔。揖予而曰。我尹二以不獲上有今日。今得之矣。得上有道。先自得民而來。造福於澄。當不至如

富陽建安。年月不多指屈也。願得一言、將闔縣人意志其喜。言若止於二人之私矣。澄去瓊山不遠。余簡出、亦有所聞。尙不能無私意結民。民爲之惑。姑詰之曰。縣官日與百姓親。古稱此之謂民之父母。子之於父母。寒求衣。饑求食。苟有不得求。致子於不得其所之地。父母之責缺如矣。一老之言曰。徭差之均當。聽斷之公明。稱收先後之弊。無有也。先時吏胥作奸。今茲無有。待民接士。法不廢。而以仁禮濟之。蓋無一不當人心之舉。有尹如喻。可以無愧牧堂之上。而吾民福矣。舉澄邁事、言語錯亂而說尹之賢。終不離口。漢人謂處士純盜虛聲。夫處士無事可見。名則可盜。縣官日與民親。日與民酬應。乃其本職。有一事。則有及一人之恩。有千百事。則有及千百人之恩。亦有一事而千百人受恩者。安得以一人之言。掩一縣人之見。二老之言。皆蓬川日日行事的。正蘇老泉某也賢、以某事知其賢。某也能。以某事知其能之謂。蓋不得一縣人意。言實不實。卽一一行事之據。可信其爲一縣人意。而非私矣。洪武二十一年。定八十貫贓絞罪之律。我太祖愛民

海忠介公集

之深。蓋亦使人士觀典刑而有憚心。嚴之於先。全之於後。刑期無刑也。自託欽定事例。改雜犯。失初意。而刑法繁。民不蒙惠矣。瑞自出仕至今。往返所到。大抵唐人寇來尙可。尹來殺我之怨。此禍。瓊爲甚。澄憲治不附郭。又甚。寇來言劫財也。遂川能不爲劫財之政。當祖法廢弛之後。且不遠遺。得非無待猶興之傑。與莊生謂嗜欲深。天機淺。遂川無今仕爲已之心。清本源。而心在民矣。天下未有貪鄙之心。能假爲在民之事。亦未有心在民。由中可見之迹。民不宜之。正本而萬事出焉。余於是益信二老之言。爲一縣之公言。而非妄言矣。雖然。君子之德。必本於父兄帥友。余巡撫應天十一府州。俗之美朴近古。惟太平晴江。公自歷官而巡撫南贛。政聲在人。過庭詩禮。風聲氣習。宜遂川之有今日也。政宜民。而一縣人宜之。其安乎。一二人之言。可信爲天下之公。是可書也。書之。

贈蒙生德範還遺金序

今天下何世哉。予筮仕得遊中都。歷天下。既歸鄉閭。嘆世君子。每有財帛

海 忠 介 公 集

世界。今不如昔之說。予始聞而疑之。以爲此特市井小人。自爲風俗。性中只有箇仁義禮知。我輩讀書。知禮義。辯別素明。天光煥發。當不如此。已而交與益衆。更歷既多。乃知我輩出沒於聲色貨利之場。奔走於富貴利達之際。老死不休。蟻之附腥膻。蛾之投燭火。無以異也。視市井輩。反爲過之。古昔公道大同。利無彼己。下此小康。此人漸澆漓。叔世季世。利糴便奪。發塚詩書。詩云。曾是培克。曾是在位。此直叔季之下者耳。講明於讀書窮理之時。不自欺心於暗室屋漏之際。難乎其入。又不必言矣。攘攘利往。天下皆然也。而誰與易之。予之誦此言。久矣。一旦鄉龍岐父老抵予舍。揖而言曰。村蒙生端。字意範。縣庠弟子員也。素有行義。問厥所以。則曰。先辛未三月。海寇犯村。舉村挈家奔散。家用百凡。無暇爲顧。余達妻持持句。祇裹銀肆拾兩。及餘物。忽忽失之。生後至。左右前後。無有見焉。生亦不知得之者遠近間物也。數日。得失主人氏。當官衆完壁歸之。包祇內藏。纖芥無失。先是張氏訟官。疑似扳指。官追爲急。乃生心事。白日青天。有是舉

也。不徒決疑獄於一朝。而因得以脫周隆張衡鬥爭不已之患。不爲利己。不爲禍人。分金酬復。生視之若將浼焉。余達之懇求。村衆之德懣。生原非我有。原無此義之言。又若義利之辨。有以豫明於先。取舍之分。不待今日慮之而得之者。吁賢矣。生居家以禮。孝友無間。姑勿悉。只今財帛世界。居財帛世界之中。獨能自脫於財帛世界之外。義利之辨別不爽。屋漏之昭監如見。世不復有斯人也。而今或有之。詩云。誰將西歸。懷之好音。因鄉父老請。不辭而爲之序。府縣獎生喻義。學憲王公進生廩膳生。加優禮。生志趣遠大。舉此措之。何所不可。區區見與於人。生之初心。不如是也。不詳及云。

贈史方齋陞浙藩大參序 爲鄉士夫作

瓊去京師萬里而遙。國初以憲臣遙制。至憲宗純皇帝。始令分巡道兼飭兵坐按。識者以權重勢專。補按軺之所不及。民之幸也。然賢者藉是權以安民。不肖者則藉是權便己。甚者不必言矣。賢者。不免大抵雜雅俗。半真

海 忠 介 公 集

假。行已清濁。有養望待遷之心。而無毅然有爲之念。官則利矣。民無利焉。至今我生不辰。田里嗟怨。人思國初之安。不見今日之利。敕諭事理。天顏咫尺。瑞米之有聞也。閩晉江史公。以嘉靖乙丑守瓊。旋晉兵備。今七載。不貪一節。已出土民望外矣。其政事。則又井井條理。胥吏不得援爲奸蠹。省徭費。清符牒。詳訟獄。寬桎楚。三州十邑之人。前所不便。及所願欲而不得。宜天下。并宜於瓊者。公先後皆罷行之。大者文詳。小者立變。瓊內黎外海。寇亂頻仍。民自視無一日寧矣。當事者動以開城退守爲策。殘野飽食去來聽之。平時無保障之功。際變無禦敵之勇。幾不知兵備道爲何職矣。今昔異位。公獨毅然以身迎敵。爲士衆先。昔之驕子兒戲。盡法律之與。守瓊日。持法不阿無異。雖經敗衄。不易初心。士之不以成敗論人者。知公認真之心。而奉行勅諭庶幾矣。士論謂周殿山之方正。方松崖之才守。胡嶺泉之峭直。胡南山之和易。公節有之。勤訓練。似顧洞陽。志平寇亂。似涂伯輔。今晉秩叅浙藩政。願得一言以贈。夫公昔以宜天下者宜瓊矣。以宜瓊者

行之。雖天下可也。何有於浙。昭昭政績。具在口碑。不爲悉焉可也。所願於公者。無替克脩之功。益廣涵弘之度。無私黨矣。行之有未至。率直道矣。擴之有未周。皆性分中不滿足也。詩云如彼飛蟲。時亦弋獲。用書以贈。

贈黃廣臺思親百詠序

孟子以善養浩然之氣自許。集義慊心。以入則孝、出則弟、守先王之道、以待後之學者自任。修此孝弟。養成此浩然。泰山岩岩。塞於天地。孟子之所以克滿於其身者。不徒然矣。斯道也。堯舜開之。史臣約之。曰惟精惟一。允執厥中。舜以徽典繼堯。孟子以養氣上接堯舜。無以異也。然一典隱而不發。知言養氣憤激人心。以孟子爲之擴其指焉。韓愈氏嘗推導孟氏以爲功不在禹下。以此而已。自是而後。上之人無數譽髦斯士。每以士氣言之。鼓舞誘掖。言氣不言義。配道與義。而義存乎其中矣。義氣節氣之說。大抵宗旨孟子以浩然之氣養士。以繼往開來之責、道德性命之微。屬之士也。聖君賢相。百爾有作。得士爲功。而今之七。下應上求。則有大謬不然者。誦

海 忠 介 公 集

孟子養氣之言。不知求之人則孝出則弟之義。職在庠序。朝廷官之。曰弟子師。弟子師云者。無能可否於諸士子之間。建空名於諸士子之上。弟子行之。師和之。去孟子粹然仁義道德之言。別爲一種。無謙遜。無長上。競利鬥狠。世俗之氣。唐代肅而下。大學生醜行無賴。今日如之。商賈之心。屠儉之行。乃留更僕。未可言也。其最高焉者。決狀元進士於科第之榮。而亦不出於貪饗富貴之念。有秀才之名。無士氣之實。顯昂蹇驕。較之孟子。雖若毫釐之差。義利邪正。較之孟子。不啻千里之謬。過大學之門而不敢踴顧。尙何能仰視其學徒者哉。濟濟多士。瑞嘗日擊一方。反之天下。思及天下。驗之一方。同流合轍。爲我國家二百年養士痛。而曰浩然之氣。將絕響於今日也。安得孝弟之人。語之以師長之職。一旦廣臺黃先生。執思親詠刻示予。更祈彙括以爲弁。曰。將執之令諸弟子見其端。知其悉。循循善誘。有依據也。先生教長沙。長陵水。名人士皆有端範。貞教之頌。先聲有在。非苟祿建空名於諸士子上人也。身言兼之。迴道術於既倒。返士氣之方頽。師道

立。善人多。朝廷正。而天下治有望矣。用是不辭而爲之序。詩云。孝子不匱。永錫爾類。廣臺錫之。真正大英雄。却於戰戰兢兢、臨深履薄得之。晦庵之說。得統孟子。諸士子慎毋以予言爲不然云。

贈王朋江陞寧波府太守序

自秦而下。天子奉天撫有天下。內公卿。外守令。殷輔參陪。官惟備矣。君子謂惟守令爲重。蓋先王以其不能獨理者。付之諸侯。今以其不能獨理者。付之守令。今之守令。古之諸侯也。我祖宗待守令加隆。繩守令之法。亦加嚴。悉日久法玩。皇上御宇。吏治一新。銓部諸臣。拳拳然守令爲念。然迄無如孔門由偃。漢世卓魯龔黃。應上求者。起於官爲傳舍。不如私士子人之專。入仕之初。有異心矣。而又聖賢之言。不足以破世俗好官之論。患失得爲初心。善承迎爲完計。理不勝欲。而卒之民之於守。漠然無相關矣。君子一體萬物。不以時而加損。率性而行。不因人爲作輟。是故立本於田宅樹畜之先。和心於庠序孝弟之後。文爲經論。武以保障。仁興利。明詰奸。隨事

而應。應於其方。莫非爲民計也。亦莫非自性而來也。彼居然世俗之論。無忤於撫按。無忤於鄉士大夫。而又欲無拂於民。簿書催科。儀文獄訟。富與教無聞焉。性中曾有是來乎。傳曰、心誠求之。雖不中不遠矣。言保民也。保民而分所保之念。於干譽之人。此時此心。爲誠爲僞。心誠某之。自性而求之也。性無是來。君子率性。是故上欲官之。執此以往。同所性於人。上不欲官之。執此以歸。守所性於己。聖賢之道也。道自聖賢。參於天地。故愚嘗以爲據孔孟之說而行之。官之善也。別爲一種巧宦之說。圓變自今。不自古昔。不善官者也。而未易與俗人言也。隆慶三年春、寧波守缺。銓部以朋江請。天子俞之。朋江能於性者也。乃浙瀕女貪詐之風。淫靡游食之俗。今得以改於其舊。一人標準。而世俗之論破矣。用是因同鄉輩欲爲贈。忻然書之。若夫縣令之政。御史之真。君子曰、青蘿先生爲不亡者。古人愛人。不以頌。而以規。言可畧也。

海 忠 介 公 集

贈史方齋陞浙藩大參序

爲兩學師生作

瓊、古珠崖郡。今儋區矣。貨饒之名。尙在人耳。有吏於此。後視今。今視昔。未涉鯨波。先營囊橐。甚者蓄貨積實。如餓豺狼。上率下法。貪濟貪。而民日居割剝吞噬中矣。且地去京師萬里。按詔不及。毀譽易淆。甚哉。賢者之難也。莫能久於其位。而貪者酷者。焉能有無者比比。巧彌縫。蒙私庇。無利於民。有悅於上。謝令去不顧。上官不我顧也。中人值此干譽動心。百計逢迎。無恤人已。暮夜無知。瓜子海物。不可得而言矣。奪諸波以予此。且惟藉譽口。則申媚之。士子鄉官之奉。一需之民。而民愈難乎其爲生矣。遐陬肆意。貪泉負心。嗟嗟遠民。蘇息何日。閩方齋史公。來自晉江守瓊。旋晉兵備。七載一日。如節省民費。嚴勅吏胥。謂民冤之所及也。珠瓊之名。人所祈得公。習覩之矣。餽遠先例。公無犯焉。士貨民財。不入胸次。脫於其俗。愜人心矣。燕喜課士訓。先仁禮。得一善。惓惓然獎而納之。惟法所至。則又小民同公。下士故異。愛民愛士。有權衡焉。其持法不持私。後先政事。大率

如此。書曰，罔遠道以千百之譽。罔哂百姓以從己之欲。公其有焉。以此益民。民得蘇息。先時，兒戲論兵。公身先士卒。寇來迎敵，退蹤。士驕將慢。不奉上命舊矣。公一以法律之爭。有誅之不可勝誅者。不得已存化行以漸之心。而實執孫武官嬪之法。屢經取。益厲初心。士之不以成敗論人者。反公重焉。知公也。誌紀黎亂。屬之塗炭之才。與志十字郡邑。公日夕未忘也。外寇方殷。業未暇及。可謂其有志矣。士論上周柳塘殿山。次及公。言兵。則謂公發揮之。可與塗上下。今晉叅浙政。乞言以頌。夫公奉職。不恤身執法。不爲黨淡泊。養心不見貨利。是道也。普之天下可也。何有於浙。士心鏡善惡。無係於私。可念也。用是不辭其請。且使後公者。知有士論公。曾及有日。亦思爲瓊計云。儒有高不臨深。言無忌也。今日私恩。明日公法。漢人行之。母替發揚之功。益廣兼包之度。一體萬物。蕩蕩平平。又諸士終惟厥初之望。頌不忘規意也。併書以贈。

贈陳元山任古田司訓序

海忠介公集

聖天子壽考作人。付其事於國子學。在外付之府州縣庠。成周九繫民。師兩用賢。儒用道。我朝因之。重選也。近年也以來。學校官、無可爲諸弟子範者。諸弟子自爲就師。特營舉業。希科第。執簿呼名。一吏足矣。三五員費民祿食。共而爲之。銓司視是空名無補、輕之。不與權顯遷次。士子得此。因亦自薄。一官終身。素餐爲事。見今日之非。不求之先日之是。藉口爲貧而仕。習非不可破也。而祖宗設官初意。無可言矣。元山陳先生。幼負大志。一旦以資年應貢。授古田學訓。拜命天庭。充然無卑貶其官之意。口語人曰。君子性定於天。官爵不與。胡安定教授蘇湖。今如見也。特非人爲之耶。吳沈諸賢。相繼卿相。我朝有初。志剛所邁。予聞而嘉之。願一言爲元山助。元山之所已知者。不必言之矣。夫君子講道於讀書窮理之時。而不能不移易於外與物交之際。是則世俗之論天下。皆迷牽之而已。浩然之氣。原自天與。惟孟子發之。後世因之。有士氣之論。夫士威武不能屈。富貴貧賤不能移。任以天下。誠非復養浩然。長河東。注百折。而不回焉。不足與有爲也。

以氣養士。無遺說矣。然孟子義慊以生。今人爭克助之長。一切利則趨。勢則競。無長上。無謙遜。莫能由孟字之浩然。會堯舜之精一。小人而無忌憚也。皆以士氣言之。俗謂秀才爲難管。言氣之無有於道也。學校官不能止其用氣之邪。反或和其用邪之爲。當相率爲膠。周惇頤曰。師道立。則善人多。善人多。則朝廷正。而天下治矣。其能之乎。差若毫釐。謬以千里。是無惑乎聖天子臣無克艱之思。心膂恒難共寄之嘆。皇皇當寧。若無一臣。可爲倚賴也。朱晦翁告陳同父曰。真正大英雄。却於戰戰兢兢臨深履薄得之。若氣血粗豪一點。使不着也。與孟子浩然之氣正相發。元山正氣人也。予慮其或牲於世俗之說也。用是卽士氣之直養無害、配道義者、以爲贈。元山之所已知者少有過焉。吾氣正而相說以解矣。不必言矣。

海 忠 介 公 集

贈顧懷東晉京兆丞序

天子奉天子民。我祖宗臨御。在外以其事付之府州縣市政。使統之。兩京、二十府、直隸六部。順天應天。不以直隸稱。秩三品。體貌與部寺。一根本重

海 忠 介 公 集

地。天子所寄以奉若天道。父母吾民。尹若丞。其選也。王化首被。四方瞻仰。故凡爵位服命。望司府特崇重焉。列聖率由。未之有改。至今晉秩。往往六卿之亞。布政使無及焉。人榮且崇之。亦未之有改。問職分事。庶富教無聞焉。素祿曠官。視外司府爲甚。彼其人之自視。初不曰食浮所事人也。銓部亦初不曰職業不脩人也。其弊起於仰望待遷之說。謂官列九卿。不應復爾細務。又畿甸法。工部理街渠。御史分五城。巡察厥衛廉奸犯。近侍董國威拱衛宮闕。奠一人。府縣事。無侵及也。今也不然。有侵而爲之者。四者權力。與府尹丞抗。彼侵之。從而與之。事可自行者。謂體貌隆重。不當爲侵有於人者。謂先例於是。不能反祖制無是也。而今自失之。順應之。民休戚於尹丞。不相關涉尹若丞。今日人猶榮且崇之。吾誠不知所以爲崇。不知其所以爲榮矣。懷東先生壬辰登進士第。任給事。疏大禮大獄諸臣恩宥。與先皇帝爭是非。忠心義膽。爭光日月。三十年危且賤。安心處之。無幾微見顏面。誠知吾職所至。而義與之俱。未有守道而失官者。毫髮詭隨。不

爲也。志氣旣起塞於天地。舉而措之。無不可也。今春以銀臺忝陟丞京兆。詩云。商邑翼翼。四方之極。聖天子化行。先於懷東乎屬之矣。北上有日。執贈處義。懇即氣節積事功。占小於大。忻然書此以復。非爲佞也。若夫味虞廷協恭之義。漫不可否事。占筆涉位畧惟謹。如韓退之所譏者。又不必爲懷東言之矣。

贈黃體齋陞南京國子監助教序

感恩掌學事黃生仁甫。別號體齋。余署教南平之日。門下人也。自幼苦心文學。而行己亦自謹飭。不風氣自苟。余素謂是亦科第人數也。顧屢試無幸。揆賁得分新淦之教。後三年。晉掌瓊之感恩。三州十邑之中。感恩。邑之至小者也。弟子員數。計亦諸州邑之後。鄉薦寥寥。百年不一人與。若不足爲人師中留意者。仁甫以丁丑年夏任。特憤憤而起曰。孔子不誣十室也。存乎其人焉耳。雖小有大。諸凡庠序規件。祖宗先年之定。日尋綱目。提數十生耳而新之。不責貨於歲時拜見之間。意實志懇。師道無愧焉。有賢御史

海忠介公集

曰懷川先生。巴蜀內江之傑也。千載一時。聲倡於上。仁甫亦克千載一時和之。然諸人聯翩有年。而仁甫助教之請。則今壬午五年後事也。士之素重仁甫者。曰吏部三途。借口之言。今見行事之實。色喜。微文言贈。夫贈之誠是也。亦知京帥之所爲美觀而四方極乎。兩京天子之耿光。今之流弊名利風生。而詭隨因循之病叢如矣。馮道胡廣之區。蘇味道婁師德之地。崔亮。裴光庭一切輩。會而合之之鄉井家室也。雖今振作有人。進之寸而退之尺。途轍岐惑。往北京而南行。終身無到北京之日矣。新淦感恩。初脫非中之見。錯之科甲濟濟之間。愛仁甫者爲仁甫喜之。能執之乎。無能執之乎。有師道如身。書曰矧曰其有能稽謀自天。誦誦之爲行色之壯。

贈瓊州守周柳塘入覲序

善言仁者。莫如伊川。伊川之言曰。仁者以天地萬物爲一體。天地萬物爲人性所必有。天地萬物爲人道所當行。仁人性也。少有不盡之分。而生人之道缺矣。我祖宗設官。分布寰宇。待守令至隆。律守令亦急。而峻夫其特於

海 忠 介 公 集

守令加之意者。蓋天地萬物之性。於守令也體之專。天地萬物之性。於守令也行之切。廣土衆民。君子欲之。欲我性也。是故寒爲之衣。饑爲之食。爭奪焉與之貞。有倫理焉講明。使之知所趨。事爲之制。曲爲之防。猶之吾身。言身則疴痒呼吸之必調。言道則起居食息之惟慎。是故守率守之職。令率令之職。而性道行乎其間矣。慨自性學不明。國法日久弛玩。謀家利己之念勝。彼萬物一體之初。不曰官所以行吾性也。而曰資之以榮吾家也。操筆而儒者。操戈而盜。蘇老泉言未若遠之可憂。萬里京師之瓊寶當之。閭閻疾苦之情。顛頽之狀。生靈之命。懸於守令。不懸於天子。尤有難乎其爲言者矣。柳塘周公。今二月泣瓊。一以聖賢中正之道行之。卽所行政。若宴僚屬。清符牒。懲惡勸善。節用愛人。和平之中。嚴毅濟之。宛然顏賜由宓諸人矩度。下車之日。百利隨興。百弊隨革。無所不罄其心矣。諄諄焉教化先之。舉斯民同歸於善。公用道學。飭吏治。龔黃卓魯。不足爲公言矣。不徒從事於簿書獄訟之間。而直探斯氏心心相感之妙。用聖賢準獲。收聖賢治功。

窮谷深山。莫不翕然有去惡惟公是從之心。莫不忻然以前無有也爲公頌。若不屬已。自與已不相干。前後之守則然也。公認得爲已。何所不至。二百年來民情。今日始洩。二百年來民心。今日始安。秋八月藩司擬公入覲。遵王制也。瓊民幸公之來。悲公入覲。於公又不免一歲之隔。赤子慈母。可朝夕離乎。士大夫之情。與民同之。徵予一言爲公贈。予嗟吏治。不貪則俗。古君子不可復見於世也。於柳塘見之。忻然書此以贈。且以從公覲事畢。而來歸速。慰民望焉。

崖州太守蔡養齋致仕序

蔡養齋知崖州事。二年矣。一旦有旨勒令致仕。出崖州士民意慮之外。庠弟子員不遠千里。懇府道留之。不獲。詣予言曰。瓊去京師萬里。崖在府南千里之外。爲中國盡地。昔稱荒險山草。州縣大兵。兩及之後。海寇蹂之。只一太守孤臣孽子。小得生意。而猶欲奪之耶。詩云。昊天不備。降此鞠凶。乞一言以爲之籲。先生圖之。余惟蔡侯。擢自澄海而來。時萬歷二年十一月

海 忠 介 公 集

也。崖老少逃亡十百。先日二十年矣。今寇盜小戢。然一面黎。三面海。屯兵千百。又未可。曰來則備之。保障在太守。無憂也。事未有定。復業爲難。煦育招徠。侯無所不竭其焦勞之思。而亦無所不極其綜理之計。無耕田之人。存先日之稅。候緩其二。用其一。事之不得自由者。應公恤下。百凡調停。類多如此。百姓倚仗而安。施雲霓於大旱之後。民之悅之。非偶然也。其尤偉者。四村仇激。徑自抵其巢而諭之。曲突徙薪。一州寧適。庚子巳酉。大師十萬。有其功而亦有其害。未足爲侯言之矣。一時嵐瘴之憂。駕爲疾不堪事之痼。以此爲民。以此得謗。君子信纔。何冤如之。民士憤不得其平而言。然民士念自爲生之苦。剝牀以膚。激發於侯。宋蘇洵衡論。重遠一篇。曰遠方之民。雖使盜跖爲之郡守。檣杵饕餮爲之縣令。而上不之覺。然則今有襲黃魯卓。民聲稱之。能覺之乎。勢使然也。不幸生爲遠方之民。無計出脫遠方之勢。繼自今復有如蔡侯之冤。如蔡侯之冤。而甚可勝憤乎。爲蔡侯憤。不能使日後受如蔡侯之澤。小人剝廬。憤之何益。小弁之詩曰。君子不

惠。不舒究之。巧言之詩曰。君子如怒。亂庶遄沮。出位狂談。嘗以爲官於人。而人不之賢者。縱使衆口交攻。亦當視同賢能久任以觀其定。曰無容播惡。朝聞而夕斥焉。是不講於毀譽愛憎之變。而又不曉於懲一警百之道也。我太祖得天下。起自側微。未受天命。以儆官邪。三十一年之中。重典峻法。正巧言沮亂之方。而君子之怒也。人有畏心。天下安乂。狐疑驟急於始。姑息優容於後。而今坐是爲累。用小弁之舒。行國初之法。上握審勢之權。下有吏習而民安之。蓋遠方憔悴。聖天子瞻言百里之中。潤澤而出脫之矣。此在廊廟諸君子加之意。因蔡太守有深感焉。僭書以竢及之。

汴水尋源卷序

汴梁杞邑之屈。蓋自始祖讓至今。凡十有二世矣。無慮數百人。汴稱瓜爬巨族。雖親盡戚單。而崇古修睦。伏臘祭祀。婚喪酒食。以時會焉。一本之情。未之有改也。夫人情聚則樂。樂則心繫之。四海之內。一旦而聚於道途之間。初非先日之親。歲月論交之故也。燕談笑傲。有樂之者。况在同宗之系。

自厥初至今。一體骨肉。有以聯而屬之者乎。詩云。燕笑語兮。是以有譽處兮。情也。而亦勢也。屈自襄垣公。洪武中謫戍於瓊。杞邑之屈。至是分而爲二。蘇老泉自叙其宗之譜曰。服盡則親盡。親盡則情盡。途人也。吾所以相視如途人者。其初兄弟也。兄弟其初一人之身也。夫以眉山一地之聚。長公有勢。無如何之曠矣。況事殊勢別。分而爲二。而又隔之以萬里之途。難乎其爲情者哉。雖然。天下所得而間之者。事也。心則曠百世而相通。所得而別之者。迹也。氣則跨百里而相合。屈勿軒以庠序之英。心篤禮義。生長於瓊。妻孥俱焉。子姓有人。而汴水之北。杞夏之墟。切切在念。其心其氣。祖先宗戚。則既無間然矣。一日作而思曰。神交夢與者之爲同。不若見形聽聲者之爲切。吾心所存。吾氣所發。尙恨無以爲依據之地也。念茲厥初。忽忽行色。祀先合族。今日得以不徒爲想像之託。有期日矣。士友輩相與義之。遂歌矢詩海門爲別。因問弁首之言於予。予之心。亦士友輩之心也。孔子云。君子篤於親。則民興於仁。勿軒昔日之同於宗也。以心。今日之

同於宗也。又得以不悖於其跡。事有依據。其道光矣。本斯行也。而孝弟之心。有不油然而生者乎。時例宗人從戎。其不從戎者。置軍庄焉。往返行囊。須此爲贈。厚道也。而利在焉。勿軒孝弟。充於中。發於外。不在是也。用是不辭而爲之說。且以爲杞人告焉。

註唐詩鼓吹序

古先王成就人才。由今考之。大抵六經並行。詩教爲首。夫教以言行。詩亦言爾。何以益人而先之若是。蓋人稟天地之精。言語文字之間。天地精神之發也。約而爲詩。不多言。而內見蘊藉。外著風韻。天地精神。以詩而騁騁。則動物感人。變化因之。史稱人聲在上。長嘯中宵。敵騎因之而北有矣。詩能與人。往往而是。游藝之道。百世以俟聖人。不可易也。錦臺廬先生有得於是。丁丑會試中乙榜。來署瓊山學事。課弟子員。因出所註唐詩鼓吹八卷示之。前人之註鼓吹多矣。章詮句解。究其事之所自來。探其意之所含。較錦臺不及爲甚。雖然。錦臺新會人。昔公甫陳先生。講學白沙。天下企

海 忠 介 公 集

仰。其品題以前詩人。曰。子美詩之聖。堯夫有別傳。向來稱作者二妙。罕能兼。唐而下。學詩匪杜。人畢其詩。未有許可及康節者。乃公甫又若於康節獨推焉。少陵愛君憂國。兼之于野之獲夢之。視彼流連光景。漫無邑居爲據。誠一人矣。吟哦浩歌。胸中造化。一動一靜之間。天地人之妙也。少陵能之乎。蓋不特文彩動君之誇。隨塵冷灰。不用爲愧。一二不足道。拳拳君國之念。堯夫亦奴僕而命之矣。宋進士許洞詩會九僧。約以山水風雲竹石花草雲霜禽鳥日星。無犯其一。九僧閣筆。夫天光物色。抑亦一時之觸爾。本真在我。因觸而悅。故亦因觸而詩。假若周朱張程有洞之約。性真之悅出之矣。無待於外。能困之乎。子美除却君國諸作。一時曳白。料必九僧同之。可聖取哉。嚴滄浪說詩方之妙。悟禪道曰。詩有別材。非關書也。詩有別趣。非關理也。羚羊掛角。萬履庵鄙焉。夫水月鏡象。言若荒誕。水誠有不可執着之月。鏡誠有不可執著之象。而非誕也。文泥矣。以詩之曲暢旁通。隨樂而興。濟之文之妙也。履庵直據文理。或則古詩人同物之趣。無深會

海 忠 介 公 集

乎。伊川程子指穿花點水之句。閑言無用。惜工部一生之心。自少而老。止有二詩絕句。是亦履庵之見也。余嘗謂唐宋詩人。均爾一知半解之悟。孰爲唐高。孰爲宋下。欲定說於滄浪履庵之間。彷彿二妙。合去取焉。而未之及。荆川唐子履庵之師也。履庵嘗以其意附劉因於邵子之後。謂天資學力若未足。然已爲莊陳權輿矣。吁禮義無窮。人心有覺。況賡歌風雅頌。詩法在焉。自是而後。又安知無有兼莊陳靜修出。且入二妙而上之者乎。余時以註白沙言。近叩之錦臺。錦臺謙曰無得也。夫錦臺生長新會。時去白沙無幾。有得於白沙。權輿後學有在矣。權輿於白沙鼓吹。又不必言矣。透徹之悟。錦臺其尙求之。

海 忠 介 公 集

卷
之
四
序

五二

海忠介公集卷之五

脩學宮記

宮室一手一足之力也哉。民日從事於官府造作之中。傷其力。不能不傷其財。其害孰要於是。俗有與人不睦。勸人蓋屋之說。受天子之民而牧之外者。願其智不俗人若哉。目謂供遊觀之麗也。心謂不爲出己之財也。南華之經有曰。大林丘山之善於人也。亦神者不勝。余意欲持上古茅茨土階之道。不失赤子之心。化今人心。然天下事亦有必不可已。雖大舜生今之世。不能己之者。取譬近事以例其餘。府學之爲官五。瓊山三。一官一舍。僅有其一。人間世有不同之人情乎。出納盈縮之權。今非有司官。不能官舍。美不美不同。未見其一人不得居止之安六。訓導獨無所有。祖宗九經治天下。體羣臣。則士之報禮重。初不如此。不可一日安之事。一三十年人安之。太守敬寧唐公。渣任之次年。書院中有危閣。改公館而日封鎖之。何補也。轉之府

海 忠 介 公 集

學後山之麓。事非創新爲之。通風日於文莊石室之中。板其周圍上下。尊經貯從古經史。石室貯文莊公著述。世史、正綱、學的、遺稿。會稿墨板。猶有存焉。貯其板啓聖祠。地址湫隘。更之前右爽塏之所。合訓導宇而時一新之。材力不至。於此創成其一。其五期漸圖之。堪輿家有白虎昂頭之忌。復門樞星之左。見龍於東。敵西方之口。前南城麓坡陀。草昧之象也。闢而廣之。城壁立。而廓然文明矣。士子前瞻鴈塔。後眺尊經。風光物麗。不可謂非身心性情一助也。置省牲有所儲。祭品有庫。先有今墜。先人未有行之者。今則爲之。後先錯舉。皆萬歷七年八月年月日之事。其修整栽植。一瓦一木。補葺罅陋。亦事之不可已。而非其大者不計。一心在民。亦不啻一日一心在士。其功如此。士類感法之深。向余毋吝一言。紀事之盛。夫今日可以茅茨土階言之乎。非其時也。勢有不行。因之士有天下國家之志。不能待舜聖人之時。毋失舜聖人之心。庶可小補之爾。敬亭公太守當日之事。愛民必其俗之改。愛士必其習之正。不覺聲色之峻。俗士言不便矣。

不以今之所謂厚悅其口。傷民財力悅其目乎。日舉與作之中。不忘與民休息之意。造士之功。於是允見其大。貳守賓湖楊侯。別駕鶴峰黎侯。以調去任。刑廳大東劉侯。與有贊成之力。於義得書。雖然。古人謂文人紙費梓文曰災木。今災石矣。茅茨土階。是亦不可以已乎。并爲之記。

樂耕亭記

始予未接西林先生。意一參養之人云爾。獲交數歲。見其誦砥行廉隅之士。欣欣然羨焉。若有企望弗及之意。嗚呼休哉。茲世祿之難也。交益久。見其聞仁篤檢約之行。欣欣然羨焉。行且欽崇勅厥躬。詩禮訓厥子。敗度維欲。敗禮維縱。將深愧弗爲焉。呼鳴休哉。茲世祿之尤難也。嘉靖甲辰之歲。于瞻玉堂遺址之西墨畧村。構樂耕亭於上。將以統率僕佃之耕。非徒取名於此也。一旦以其事爲予誦。予訝且喜曰。賢哉。先生樂耕之意乎。而尤之者。則曰不此之葺。而顧彼營焉裕祖之蠱。非孝也。予意不然。賈子稱一夫不耕。或受之饑。一女不織。或受之寒。今之爲民者五。曰士農工商軍。士以明

道。軍以衛國、農以生九穀、工以利器用。商賈通焉而資於天下。身不居一於此。謂之游惰之民。游惰之民。君子之所不齒也。世咸以異端游手目之。而不知儒生貴族特甚。先生以文莊嫡裔。居寶丞之榮。使自棄於游惰之域。以逞無疆之欲。則凡可侈可淫之物。罔一不備。其爲園夫紅女之蠹。可勝痛哉。視異端游手之害十百矣。維亭有作爲耕也。且以樂名。推此意也。必不忍腹若飲食爲穀粟之靡。必不忍皖若衣服爲布帛之蠹。又必不忍厚若聲色之娛。妄若貨賄之聚。爲厥生傷。年彌邵。德彌崇。舉凡淫侈小物爲世祿子所有者。咸芟夷蘊崇之漸盡矣。嗚呼不賢而能之乎。仁篤儉約。親親之行。義節之羨。行且期於反官之日矣。亭扁樂耕。豈曰小補哉。若夫流連光景。假此亭爲游聚之地。瞻玉堂有述。亦殃也。烏乎孝。始而士。今而農。不爲五民之蠹。詩曰。孝子不匱。永錫爾類。其先生之謂乎。嗚呼賢矣哉。先生曰。茲吾志也。敬持以爲記。

海 忠 介 公 集

誌銘

黃恭人林氏墓誌銘

余與瞰江公共籍瓊山。居址去不十里許。恭人林氏之賢。聞之矣。而門內朝夕事。不及言其細。日月有時將葬。其嗣燕石君以狀付余。乞從先人故事爲誌。子辭不獲。據狀敘之。感今稽昔。按恭人。瞰江公同東岸里居高士林翁女也。燕石祖主事豹島公。與林交莫逆。一日出瞰江公見翁奇之。口言恭人矢與爲配。意與其母馮氏不合。蓋馮不欲以己富家之女女貧士。且夕進有沮言。乃翁執初不易。毋論豐約。恭人逆知父意之有大也。言歸黃門之後。雖處貧則難。未嘗以毫末缺。爲夫君向學內岐其心之累。脫富而貧。有亡甦勉。蓋自八門來。而婦人從夫之義。無歉然矣。萱堂有姑。峭厲其性。而恭人朝朝夕夕。反得吳太安人之心。啜菽飲水。饑仍之。歲有之。太安人見婦有色笑焉。蓋恭人婦禮無失。深愛之下。又婉愉而有感動也。瞰江得

海 忠 介 公 集

有恭人之後。不徒外有親師取友之資。抑且內無高堂奉養之缺。年二十五領鄉薦。歷六科。第進士。蓋又十有九年。彼一時也。士風儉嗇。無異其先。譽中之日也。而恭人安之。第進士又四年。乃授西曹主事。西曹無外差。京城衣食難於給。而恭人安之。安之於不得之日易。安之於妻妾之奉。改心他圖之日難。我入自外。室人交徧譎我。恭人不爲也。儼江不變塞於舉人進士之初。豫養澹泊之心。爲他日有爲之地。恭人成之。其尤可言者。儼江以嘉靖二十九年部郎資。及得推臨汝刺史二千石。一遷銜而諸不同矣。恭人方且不自爲逸。隨官僕蔬藝績紡。尤之者曰。秀才小家。照舊如是。不自逸於太守恭人之日。反逸於其他焉乎。恭人惟儉惟勤。初終一心。雖百十年之久。可以占知於知府一官之日。何也。俗言得官。喜其享有一官之入。享入而盛內。外員不親民。莫知府若也。儼江不幸嘉靖癸丑歲內艱。服闋則赴部。例也法也。而恭人意獨不然。枕席之言。若於古人知足知止。先幾而退。有默得之。今士誇功名。大指又在富貴。鐘鳴漏盡。行猶不休多之矣。日

海 忠 介 公 集

無見聞聞守之女。反有出於日有見聞士人者之上有之乎。宦海波濤。瞰江補池陽。晉憲副。望荆襄而戒心焉。上疏請歸田。恭人不行一着。爲先導也。歸田之後。夫婦如賓。若加先日。恭人之爲瞰江公敬。有自來矣。吁賢矣哉。大抵瞰江性達曠。恭人性深沉。達曠矣。而非得深沉者加之收肅。終不免於水以濟水。琴瑟專一之失。黃氏厥子若孫。於瓊稱盛。經史精微。瞰江之力。而朝夕檢約。自童孩以至今日。弗使納邪。而由之正。恭人之助居其多也。言念恭人。妻道婦道母道。無不可紀。奉先筵賓。酒漿應對。內外宜之。家下人不失恩顧。事事訓討。則小不遺。葭莩之中。有急則周。少或漸染流俗。不以一失不勤節諭。瞰江晚年。益自疎放。恭人又自嚴整過前。持其家及身。內外斬斬。微無不謹。可否相成。以一婦人。而天資近道有如此。燕石謂家有嚴君。父母之謂。竝瞰江公而稱之。誠得恭人之所爲恭人矣。恭人生於弘治癸亥十二月二十二日。卒於萬歷乙亥九月十二日。享年七十有三。先嘉靖甲辰。以夫貴封安人。後嘉靖甲辰。以子貴封恭人。以丁丑年

十二月十七日。合葬于金鷄嶺瞰江公塋之左。恭人有是全德。天與全福。銘曰。

亦有先幾之見。又不止於爲婦女之仁。翼夫廸子。奉姑及身。小無不及。惟大有倫。利牝馬之貞。往元亨也。齊驅士人。振聲今日。正家而定。蓋自有因。御窮持富。莫與之臻。齡年命服。羽彘趾麟。勿替而引。命自天申。金鷄之兆。卜者曰氣固而悠。益久益伸。百千萬年。倚歟恭人。式德如新。

龍南令雁峯吳公墓誌銘

龍南令吳公之捐館舍。星霜屢易矣。其鄉所撰行狀。則鄱陽令王子汝爲也。公之季嗣覺。以誌銘久未有屬。爲缺典。乃持狀詣予。泣然願有以請也。予爲公晚輩。蓋素辱公教者。不敢以不文辭。謹按狀識之。公諱誠。字明卿。雁峯其別號也。南湖之西。有峯名雁塔。公居瀕之。因號焉。其先閩之延平人。世居永安之貢川。大父諱本。字淵泉。娶羅氏。生子二。長大用。次繼祖。

海忠介公集

以避景泰癸酉兵亂。攜繼祖入瓊。續娶滕氏。生女榮姐。滕氏卒。本擬歸閩。以繼祖與榮姐留瓊。畢其婚嫁而歸。更繼祖名俊。字子賢。娶周氏。有賢行。生公。公幼穎悟過人。稍長嗜學不倦。年十五遊邑庠。踰年考妣先後繼喪。公哀毀如不欲生。葬祭盡禮。姑氏榮先適李舉人。明年二十四而孀。無子。矢志不二。歸吳撫公如己子。爲之聘娶。教戒諄切。公獲勵志舉子業。無內顧之憂。正德丁丑。姑辭世。公哀慟如喪厥妣。殫力葬服。喪三年。痛人義之。具請于郡旌焉。時桐鄉王公佐。西洲唐公胄。會脩郡志。載之孝義傳。附錄諸名公詩章以美之。庸以風世也。已卯公領鄉薦。嘉靖癸未試禮闈弗第。遂就諭柳城。時按院謝公。督學唐公。雅重公文學。檄統八桂書院五經師事。尋委修柳州志。咸以成績蒙旌。丁亥擢掌教贛州。督府唐公復命修都臺志。凡諸諫草詩文多屬焉。其以才識見推於上如此。公在柳時。唐公密遺缺膳百金。公固辭至再。唐公爲之愧服。在贛有指揮某罹法當刑。以公受知督府。密遺二百金求免。公揮而卻之。唐公聞知。深加歎賞。其以廉

海 忠 介 公 集

介見重於上如此。乙未擢令龍南。首釐宿弊四十餘條。嚴禁令。絕苞苴。獎善化惡。植弱鋤強。民賴以安。有龍南書生馮堯者。以強盜株連繫獄。公力辨其冤釋之。遠近稱明。縣與龍川和平接壤。流賊肆劫難制。初督府陽明王公勦三泖。招二酋謝鉞李鑑者。給以冠帶。使戢羣賊。至是縱黨爲殃。公乃建議當險置舍。巡守緝捕。遂持軍門檄。入賊巢相地。二酋恐誅出迎。公廉得其情。因設議以賊滅賊。密遣武士檄二酋。期日擒斬諸賊。解功行賞。如期無功。先加滅戮。二酋悚息受命。會沙頭賊徐守沐等。僭號倡亂。鉞鑑伏兵擒捕。上功軍門。悉平餘黨。境內晏然。其以勤能効勞於上如此。縣中巨猾陳休徐良輩。素黨群賊。以賊破尤公。適小民詣縣告攸。并占田土。公明正其罪。攸怨益深。遂與泉賄囑泰和刁犯蕭福。捏詞誣公。公直之。當道得其狀。寘之獄。公復視事。因浩然歎曰。道不可行矣。遂懇乞休致。丁酉冬。解組南歸。閩邑士民攀留無計。臥轍挽舟者斥江路。有遠送至數百里者。咸戀戀不忍別。蓋公能愛民如子。故民愛之不啻慈母。然歸則寓樂烟

海 忠 介 公 集

霞。絕迹城市。靜坐一室。左右圖書。布衣蔬食。晏如也。公古貌古心。孝友篤至。蚤夫怙恃。每遇春秋誕忌日。輒興風木之悲。姊年八十無依。迎養不怠。沒則以雁塔地葬焉。性尤好義樂施。有稱貸者。罄囊與之。不計其償。課子講學。從者雲集。教人以立心無妄爲本。樂道人善。口不言人過。鄉人咸信而慕之。凡有私鬪。皆就質平。因叅酌藍田鄉約。朔望會衆舉行。期以反淳敦薄。至今賴焉。晚養靜湖南。疎闊世事。當道有司。每延訪加重。時有廖安者。以人命誣訟公。兵憲嶺泉胡公詰之曰。此非郡志所載孝義者乎。立置訟者於法。明晨命車就拜。對語移時。因四顧垣屋歎曰。眞清白吏家風也。小洛何公按部至。聞公名。造其廬而禮焉。郡推徐侯邦佐。以鄉飲累請。公不至。躬率諸生。詣門敦請。始一爲之出。其恬靜。足以激貪懦。大率類此。生平觸景興懷。動必形諸吟詠。所著有雁峯集詩。晚年自錄。共文集凡若干卷。藏於家塾。歲戊午泊庚申。寢疾者二年。絕絀歷四餘旬。而精明不眩。乃屬其二子曰。汝曹知邈本源乎。予大父淵泉翁。豁達溫雅。常以琴

書自適。至瓊以賈爲業。有布絹遺金者。既去。候其還而返之。予父純和府君。端恪謙遜。與人無競。鄰有屋垣侵其址。僕輩直之。輒戒止曰。彼所侵咫尺耳。何以較爲。尤輕財好義。有債負。則焚券示之。吾所以有今日者。祖父積德不可忘也。公享年八十有二。可謂以德致壽者矣。公卒於嘉靖庚申年。卜葬于白水塘那壇之原。蓋鬱鬱佳城也。復爲之銘曰。

於惟吳葉。延浦發祥。生此哲人。衰然瓊陽。吏隱南湖。既壽而臧。斧屋之封。精靈永藏。有穀以貽。變世其昌。令名不朽。湖山蒼蒼。

梁端懿先生墓誌銘

番禺梁端懿先生。宋大夫也。當南渡時。不因官爵而變學守。惟以道德而範鄉邦。世皆以先生稱之。瑞亦番禺人也。隸籍瓊南。追憶昔年旋里。過沙菱。問舊故。經葛麻岡。獲禮先生墓。讀前學士黃公諫。誌其墓甚詳。後與先生裔孫建柱臣輩。同學省城禺山書院。其院乃先生講學舊址。祀先生其中。瞻仰德徽。親依靈爽。非一日矣。茲庚申夏。建等重修先墳。遣使遠至淳安。

海忠介公集

具狀。乞余一言誌墓。予辱交賢裔。夙慕高風。敢以不文辭。按狀。先生諱百揆。字宗盛。其先閩之晉江人。贈太師越國公格之後。大父文領翁。由雄州入廣。居桂林鄉。父諱仲欽。博究群書。尤邃性命之學。以真知實踐爲事。真西山稱爲純儒。丘文莊追表其墓。先生少謹厚。苦志力學。登嘉泰甲子省元。嘉定丁丑進士。初授太學。錄晉符璽郎。歷奉議大夫。立朝侃侃。雖職非言路。而屢疏條議國政。直諫有聲。後值廢立。抱病休歸。隱處禺山。關異端。明正誼。有功名教。學者稱爲端謏先生。生卒詳載譜乘。娶沙灣何氏。封宜人。子四。靖厚智彪。厥後分居南順。多以文章德業顯。予謂宋室當憂疑之日。使先生得行其道。言正言。行正行。維挽安全。綱舉目張。百弊剗絕。天下共享昇平之福。豈不甚善。不知先生斯時不爾也。常聞人臣以道。格君而化之。上也。以德匡君而輔之。次也。以是諫非而痛之。下也。夫人臣亦何樂居其下。以諫得名哉。然國家誤用小人。顛倒是非。綱常倫紀。蕩掃於青天白日之下。舉朝皆貪位保祿。巧媚諂佞之徒。而於直言敢諫

之士。排誹怨謗。有不殺其身不止。嗟嗟。時不我爲。勢不我與。端謄先生所以抱病休歸。退隱禺山。明道見志也。先生沒今三百餘年矣。而先生直聲亮節。百世不朽也。景仰先生。當何如哉。因爲之銘。

時而可行。批鱗逆耳。時而可止。明道正誼。珍藏葛山。名垂國史。奕世流徽。德音罔已。宜爾後人。介以繁祉。

贊

贊蕭氏一門二節

予讀東州李太僕所爲雙節傳。觀二母寡於華年。依孫子爲命。歷三四紀。而念夫之心。迄如其始。矢心天日。苦志絲枲。未嘗不壯其競於守。而可爲頑懦者。寓激勸也。嗟夫。人之自立於天地間。能以其身爲天地萬物之依者。其道有五焉。五教貫三才而爲一。君子重之。然聖王制世御俗。所急而且先者。惟臣之良。婦之節。崇顯褒異。拳拳然持此以爲天下勸者。是則何故。蓋

海忠介公集

以義合者。而能不悖其心。可以改醮而他從者。顧終守於一志一行。類無往非其自立之地焉矣。況夫遇有常變。君子覘人。恒於久近間求之。昔人謂慷慨殺身易。從容就義難。久近之謂也。是故夫亡則無所爲矣。無所爲而一從不移。雖金石之堅。未能遠過。彼夫存之。備婦順而家理。寧未足爲難矣。士之從事於上。多者計三四十歲。少者亦不下十餘歲。承於顯。或悖於幽。毅然誓不以所職負吾君者。競於始。或渝于後。歷年所而心一焉。彼殉君於日月。未足爲難矣。藩宣不悖。可以見臣義之終。婦守克堅。足以辯婦行之備。故君子論人。廷之效忠。閨之著節。無軒輊焉。而厲世振俗。獨於此拳拳焉者。亦以其久且大者身有之。五教于斯貫焉故爾。雖然。彼士嘗學問。知禮義。以應上求者。親師友以去蔽。酌古今以達疑。謂能盡所事焉而也。閨中之見。視此何若。列士之布列在位。考其所以受人策命之寄。而不貳乃心者。則或鮮焉。易於閨門女子之間。難於多士講學之際。二貞並萃。獨非君子之所欲揚而不容自己者乎。孟子曰。百世之下。聞者莫不興起。

也。況於親炙之者。竊慨臣義之衰。節操之壞。有如三才所藉以立者。而僅於二婦焉寄之。則夫祇念母氏不改之心。奮臣子不悖之義。侍御公之造福南粵。有必然矣。予粵人也。鼓舞之懷。不能自己。用是書之以頌。

書簡

啓劉石圃誠意伯

承教多矣。以冗事未能奉復。種種事。須往巡歷應天面及之。平生愛公念公。非有所忘也。散兵頗多。寂無轉盜之事。或有浮言。置之不聞可也。吳中刁訟。略無分毫事情。而駕爲天大之說。誠可駭畏。生亦未嘗不重處也。除發府縣外。衙門前嘗不絕七八人。柳號候月滿發驛充徒。曾有解審二三起。俱原告中途脫逃。解人告稱。聞此重處聲也。生心喜之。謂可以消息刁訟矣。公訪問可知其故。楮未所諭。曾無萌孽。公留念及感此。感。容別日更有相煩也。人回。謹此奉復。惟台鑒。

啓譚次川侍郎

聞公日有歸念。誠意伯人至。復領求退不獲之說。漢張楷之謂樊英曰。以子之出。能輔是君也。濟是民也。公負重望。而起人之許公。公之自許何如也。如斯而已。而遂歸耶。北來人詢及倉事。公勵精過人。殊爲欣慰。戶部錯認做箇錢糧收頭。猶之工部錯認做箇木匠頭。公今所事錢糧收頭外。戶口樹畜。有進步耶。等而上之。大臣以道事君。疏通民情。成就君德。薦引人賢。無不可者。如此而歸。公於初心有慊然耶。心有不慊。必以初出爲悔。以初出爲悔。何不即此一出行之。俾我心慊。老成典刑外。公無可望者。天地萬物。原君子本身上事。見難而退。自附於知止知足之說。曰旣明且哲。以保其身。誤矣。公今日只欲如漢二疏而已耶。賢哉二大夫。俗論也。謬說也。不敢爲公願也。

復郭夢菊

旋衛歸田之日。承尊意矣。卒然不報。遂至今日。豈無使人閉門少有交接。

有行人。而生又不知也。然其心之勤。未必若書之怠。分守道王用吾有言。官階四品。十外年宦途。而歸日租屋。清操可知。是也是也。有賢如兄。况是鄉年之雅。握手平生。心胸如見。可一日而不仰思之乎。所恨鄉井同。而有一千里之遙。回念京都月日之會。反不可得。然數年間。日所發揮。亦得區區見平生之素矣。此心何尤。山林人又有山林作用。碩人之寬。料不至求田間舍而已矣。如月旦之爲評也。前十年能守。後十年變節不能。願惟高明堅之。遙望飛鴻。附永矢爲門下。進小刻五冊呈覽。便中亦有可教。不吝金玉。願也幸也。不宜。

復史雁峯大僕少卿

禮以積財能散。爲賢者中行之行。生二十年前。會試經南都。聞翁名稱。誠哉居廊廟濟天下。處鄉黨濟及一方。仁之爲道。無施不可也。近望沙公備及。與今昔耳聞不謬。正欲達之左右。望翁成終成始。施於有政。適華札下及。使歸。特此申候。致私念。仁道不大行而加。不小施而損。惟留意。感

公嘉惠。段絹槩不敢領。酒果拜賜矣。并附謝。

啓史方齋瓊知府

三月間。聞舟次上新河口。令人探之。則已發帆數日矣。咫尺間。不得一瞻顏範。可恨可恨。仰惟我公守己冰蘖。視民若傷。誠百年內未有太守也。環海感戴。何可言盡。南來人因問而說云。自公一身言。公無可議矣。然貪酷未免肆行。吏胥如舊爲害。里甲用度。搖平加徵。未見其改革過前日也。纖微曲折。照察不及。終爲不滿之分。此則在公加之意而已。水清無魚。治去太甚。別是一道。盡以爲據而施之政事焉。不可也。生自入仕至今。未南歸。俸金所入。僅僅足用。餘無分文。可債可貨。田業止祖遺糧一石二斗外。未增一畝一升。有以二事呼瑞銜進狀者。皆詐僞也。乞臺下一查治之。勿少假貸。上碧崖。下縣屬。并乞轉此相諭。人便。特此申候。兼致願私。萬惟留意。瑞南望滄溟。惓惓無任。

復葉立齋陳熙齋諸年丈

海 忠 介 公 集

貴府事。生習聞之矣。與今華翰。種種說無一參謬。爲虺弗摧。釀至今日。以千萬人之命論之。前人之罪。不勝誅矣。今日坐視之人。能逃責乎。天假賢守。才足堪。謀足濟。直前擔當。直出數十年郡守之上。生爲諸年丈地方慶幸久矣。而當事者嘖嘖有言焉。可怪也。凡百事可以盡心。得以竭力。無不爲諸年丈少効一二。以期無負。但核兵尅糧。言執法可矣。論情則處之亦未盡是。用其力而不滿其食。亦人心之所以不服也。虛數虛糧。事非一朝一夕。特非情所不便。而不可行者歟。將相和調。則士豫附。成天下之事。而以乖戾之氣行之。彼我文武。區以別焉。不可也。侯守不久大用。始終造福於潮。諸公鑿所聞見。左右贊襄。侯守益勵初心。宜通而通。宜執而執。則區區至願耳。諸事不及盡者。付回。人口數年。殊缺候問。不便也。統惟台鑒。

復熊鏡湖軍門

王道長至。拜領華翰。諄諄然地方爲念。仰知海濱有賴。十年巨寇。一掃而

平不難矣。從前軍門。每每不能立有實功實業。其病有二。第一是怕自己死。第二是怕士卒敗。憧憧二念。而其所謂勇往直前者。索然餒矣。能有濟乎。廣中用兵。見敵便敗。全坐士不用命一句。譚二華前後迄無能執孫子斬宮嬪。法尉繚子半殺士卒行之。正以兒戲將官。驕予士卒。故非一日。實一約束加焉。激而他變。成敗觀人。百謗隨之。是亦畏敗之類也。今日之事。果能不蹈前轍矣乎。士卒必用吾命。執事能了了然信之乎。如其不然。良法勝算。無所用之。營仲連論田軍所以破燕曰。將軍有死之心。士卒無生之氣。夫古人豈欲其死與敗哉。道如是也。機如是也。黃惟留意。今日之事。惟此爲急。若其設伏用間。伐謀擊虛。目下船所造宜。兵所宜募。地利寇情。事之不可遙度者。此則先立乎其大之後。一經綸之而已。無難事也。朝廷公念。桑梓私懷。瑞臨權不勝惓惓。

啓熊鏡湖軍門

君子成天下事。類皆虛已樂聽爲之。生非其人。感公虛已下問。且自念他山

海 忠 介 公 集

之石。可以攻玉。王道長捧華札。據愚見隨付莫員外奉復矣。料公自有成算。刻日見功。不必更爲贅論。醫道多端。急則治其標。緩急皆當固其本。廣寇大都起於民窮。民窮之故多端。大抵官不得其人。爲第一之害。掃平之後。願惟別加之意。使元陽得有底定之所焉。斯爲可耳。瑞嘗謂興利莫如久任。除害莫如募兵。自以爲切中今事。區區致望於公。此而已。不然。止絕於今。禍將復起於後。我兵中大半賊人。雖一掃而盡。宴樂太平。生不敢以功頌也。生叨轉贍黃。老母年八十矣。不堪奔走。不得已北上。荆婦柩歸。狐死丘首。道途多故。欲乞一鈞牌。以保無虞。若於事體無妨。惟公憲之。夫馬廩給。妨百姓。煩驛遞。不敢求也。

復周柳塘瓊州知府

生於公原未有聞識也。舊歲入京。會虞坡。問及坡翁。稱正爲海外求此人。物。時不勝喜忭。窮荒僻壤。得此大賢爲之。困者蘇。疲者息矣。何幸何幸。下問地方事。及居官矩度。此等具人心。布方冊。舉而行之而已。本無俟於

人言。況在執事高明之見。尤不俟人有言遵而行之者耶。今人每謂做官人有套子。比做秀才不同。不可苦依死本。俗人俗見。謬妄之甚。區區惟願。明公執我經書死本行之而已。如此不執。雖熟人情。老世故。百凡通融。失已失人。全無用處。士夫如通判寥平菴。年高識遠。生自幼業師也。可就問。餘事散見奉去數帙中。茲不備悉。明公寄二千里之命。誠不可草草爲之。昔人謂伊周之道。得一縣亦可小試。況一府耶。瑞不勝惓惓。

復趙大洲閣老

政府新命。聞之忻忭百倍。公任以天下。爲天下蒼生。不覺過喜幸也。今既數月矣。施爲次第。在公自有劑量。伊周事業。具人心。布方冊。寧待諱之人而後知也哉。今人事權在手。每每不滿意。病在借口時勢難行。因循遷就。公勿以此自安。斯高出人人之上。而天下與有幸矣。承諭散兵事。已處之停妥矣。人之訛言。勿聽之可也。荒歲無從得米。事機甚是可慮。議濬吳淞江。兼行賑濟。乞留米二十萬石。亦計無所出。不得已而懇之君父之前。

也。惟公力爲主張。使得成事。條約二冊呈覽。更祈加意詳教。

再啓閣部高中玄諸公

海 忠 介 公 集

區區竭盡心力。正欲爲江南立千百年基業。酬主恩。報知己也。紛紛口舌。何自而起。且如散兵一節。此豈小事。瑞亦日夕拳拳。私訪公問。科本先後事。絕無影響。可怪可怪。此事從古有之。不平之恨。一笑而散矣。但生百疾。舉發。是實不能再當官事。林下何曾見一人。日夕念之。家鄉萬里。老母年八十一。能將之而去。又能將之而來耶。是以一向不敢言疾。今則萬萬不得已矣。懇之君父。惟明公少加贊成。人情世態。天下事亦止是如此而已矣。能有成乎。母子天性。熙熙山林。舍此不然。而日與羣小較量是非。萬求一濟。何益何益。生去意已決。惟公成就。本內別有餘說。諸事垂成中止。不得其平而言。非悻悻見顏面也。惟公勿以爲訝。意不宣。

復淳安大尹鄭

諱應齡

使至。承惠高篇。邇流窮源。曲盡今日利病。令人仰服。展省館書疏。義氣凜

凜如見。乃知淵源有自。非偶然也。伊周之道。得一縣亦可小試。亦淳安人今日之幸矣。江西錢糧。俱入二條。鞭法小民。既知一定之數。官亦得通融緩急。應解兩便。尊議獨少此耳。餘皆至當無疵駁。棒誦再三。因知拙刻濫稱政事。舊令尹之政。必以告新令尹者。尙缺然未備也。時事近。稍清明人。尙苦節。交際之禮。指爲賄賂。比之先年賄賂之私。借名交際不同。自今期與公高下議論。有見。輒盡意附便相示。彼此有益。若儀物分毫。不必見賜。亦彼此心安也。恨與公相得晚。特此惓惓致私願。并侯與居。心誠求之。雖不中。不遠矣。諸不及者。惟台鑒。

復侯星吾潮州知府

生性苦直率。好賢如渴。見一善必曲爲調護。加意申獎。汲汲然恐其不得貫通顯明達之天下也。況在執事。人中尤不易得。神交氣合。先有一日之雅者耶。中心臧之。何日忘。非浪說也。生前歲以人言歸。入境訪問。得不微錢糧。違言平譽。說。又得舖遞保狀。借名於人。出執事筆之說。此皆上人

海忠介公集

口語。若士民則頌德如一。較在南都日無異聞矣。夫士君子立已行政。寧必人之我譽哉。邦家無怨。不過因人自考。道之一端爾。非以無怨之言。盡人之道也。推其極。不如鄉人之善者好之。不善者惡之。亦曰視皆好皆惡。則不知於此爾。亦非曰善者好惡者惡。自考之道。盡於是也。守已万人。孔門自有成法。恤人言亦不恤人言。君子盡其在我。人言不足入吾心。無輕重明矣。但今士大夫。皆奔走仕途人物。洗心不清。百凡舉止。願毀譽。計得喪。間雜私意。論德理。日月至焉而已矣。官則尊矣。身心何益。況假不勝真。終必爲累。執事朗朗烈烈人也。此不足爲執事言之矣。詩云。他山之石。可以攻玉。借人所言。反觀省察。勉其未周。防其或誤。未必非師保進德養心之一助也耶。恩平王呂博。瓊會同人也。僕人賚華札及厚貺旋焉。謹此附謝。并致願私。惟台鑒。

復史方齋瓊分巡道

執事造福於瓊。計七載矣。一旦言別。人情之常。雖不容不戀戀不滿之意。

海 忠 介 公 集

士君子期在啓發。成德、濟天下事。不在是也。贈文二首。承乏爲之。不足以揄揚美政。則既知之矣。誦公將來之病。未竟之憂。保留既去之語。不覺大加感歎。夫士君子職分所到。萬物一體之義俱之。若必傳舍職掌。秦越天下。去則過矣而不留焉。有仁人之心者忍之乎。人之知己。莫若己之自知。人之責我。莫若我之自責。克去任性之偏。大加涵泳之力。充所未周。勉所未及。廣業崇功。潤澤天下。萬物一體之下。瓊人與焉。則又在公發揚之而已。推廣之而已。瓊海萬里京師。較之中土地方。情態爲別。尊駕渡海之後。吏治民情。駭人觀聽。保留於既去之後。又第一義也。何以計之乎。處之乎。區區言別。不敢更爲寒暄夸毗說也。謹復。

復徐繼齋尙寶少卿

紀綱法度。今被此老壞盡。其說蓋謂織造查盤。自改先日之詔。宦官溫旨。今日作俑爲之。不能執禮處己。不能執禮處人也。此等處大是差步。人人不滿。小人欲行私意。必卽公議爲之。意雖不善。其所指則正義嚴辭。不可

破也。黨與卽此抑揚。遂有用無用之說。所幸遺詔切深。寡不敵衆。彼爲奸橫。識者不之與耳。易六五童蒙吉。正其時也。無故驚疑。自稱沮抑。然則必俟君爲堯舜。然後可以行吾志耶。竊意投幾之會。當卽出視事。一則身爲障蔽。得以迴狂勢於方倒之初。一則反爲擔當。得以善補過於方壞之始。得君則有時。首事則有權。人心歸向。扶者尙衆。功烈一入焉。一出焉。孟子云不爲也。非不能也。今之謂矣。首權在我。我乃避人。獨非怯乎。畏首畏尾。自動中官之懼。獨非惑乎。事由中發。尊翁動以調停國手自許。然調停處得之者少。調停處失之者多。人情好諛。憚不爲直。況在首相門下耶。諛人滿前。不分所長。別所短。伊傅周召。動而譽之。內自生疑不能執。外不聞過無由改。有由然矣。今日奸人。得有借口。吾與之借。復何咎哉。復何咎哉。區區憤懣不平。言語竭盡。乞一一達之。有別說。毋吝封示尤幸。

啓譚次川侍郎

生得北通政。自謂職掌閑寂。無多事。且晚得趨門下。傾教益也。如願未幾。

睽違繼之。新命外補。樂可圖報。然失良師友。遠誨益。未始不悵然恨焉。事之不能兩全。類如此。生今日巡撫江南。言涉有爲。第掀掃爬斗羅篩。不收板席量。減歇家。闢子通關諸費。節爲裁革。乃生管倉日所行。非今日也。雖板榜初定。熙齋筆峯。不見允行。然生亦未嘗不委曲區處。從省減焉。江南糧長十人。而九人破家。仁人君子之所隱也。如榜所行。置之無用之地。及官攢侵用之需。何益何益。尤不可通者。舊例小米用細席。以其漏也。大米用方席。細席比方席。價增五倍。祿米亦大米也。乃用細席。漕糧歇家壹兩貳錢。祿米乃壹兩五錢。祿米加蘿與篩。皆工價高者。漕糧半折色。半本色。厥無磚鋪。本色足用。祿米全用本色。寬一分。民受一分之賜。生先日已略行之。非今日官于其地。而始私之也。惟公諒之。外余同麓封誥文未就。統祈留意。

啓劉帶川兩廣軍門

魯仲連論田單所以破燕。曰。將軍有死之心。士卒無生之氣。兵法又云。人

海 忠 介 公 集

皆欲將勇。不知將勇特兵法中千百之一。言相反。而實相通。皆是也。兩廣韓襄毅王陽明外。獨推二華。二華不能親戎馬。冒矢石。公騎射絕人。直前倡士。先浙後閩。倭燄熾天。身自當之。經難多。慮患熟。是公又高出二華之上。十餘年巨寇一掃而平。無難事矣。地方何幸。地方何幸。撥亂世而反之正。誠非公無能也。但君子論事。在探其本。君子行事。在養其原。昔人謂元氣一虛。百邪襲之。今日之寇。百邪中之一。若不調攝元陽。壯基固本。外邪今日去。明日又來。今日一邪去。明日別有一邪又至。去邪用發散劑。每發散。元氣不免少隨發散而動。發散之功日多。真元之氣日薄。醫經稱急則治其標。然治標之時。未嘗不參一二味固本之劑。縱陽氣下陷。立可死亡。烏頭附子。全治標矣。氣甦後。又未嘗不汲汲日用和平丸散。解酷毒。鎮元陽也。今日果可蕩平。土著吾兵。土著吾民。嚴食吏法。起倡率風。除害安民。急事也。竊謂疾急治標。疾緩疾急。皆當固本。用兵安民。竝行不悖。如其不然。今年曰急以治標。明年亦曰急以治標。日日發散。其冷真

元之氣何如哉。騎射絕人。直前倡士。撥亂世而反之正。璫不敢爲公許之矣。范雲忽感寒疾。恐不預凡錫之慶。徐文伯診視。不得已如雲言治之。翌日果瘳。雲喜甚。文伯曰。不足喜也。政恐後不復起耳。越二年果卒。區區意。願公爲地方立千百年業。不願公爲一時赫赫功。聖人復起。固本還元。不可易也。

啓殷石汀兩廣軍門

瓊一十年來至今。接有海寇之患。百姓苦之。心訟口詈。已謂官司不能抵民一保障矣。然害止瀕海地方。日甚一日。年甚一年。今正月突有船先後分入攻圍臨高定安萬州等城。破文昌樂會治。尤據於中。來來往往。殺掠村市。如入無人之境。任彼所爲。其慘其害。從前以來無有也。平時養兵。迄與不養之時無異。曩遊擊來援。亦旣月餘矣。如斯而已矣。賊夥數雖多。各夥人數則寡。繼後至者。將何以禦之耶。昔人稱爲匹夫匹婦復讎。今日之讎。今日之讎。屢矣。大矣。復之不可已矣。明公身當復讎之任。苟尙因仍兒

海 忠 介 公 集

戲。瓊民如水益深。如火益熱。瑞恐日久。謂府縣城池。尙未可保。我民當盡魚肉於賊。似此景象。非言過億。明公念及前後。一加重民。權足爲。才足濟。無所施而不可矣。瓊民延頸需援。不能一日。若止前之爲焉。有兵以萬。無益也。縱有小濟。兵退而寇又復來矣。急則治其標。今日所言。所望標中之標事也。標中之標且不能矣。他尙何望。史方齋號稱膽不怯賊。事期必行。日者海旁失事。咫尺間耳。已受欺誑。法復寬縱。賊知虛實。官兵效尤。況明公坐鎮蒼梧。遠瓊二千里地耶。縱寇驕兵。萬方一轍。一誅賞之立而起。而人自不行耳。作用不同。取效自異。不可一槩談也。緩則治其本。古法遺意。家自爲守。人自爲戰。道有在焉。本中之本。休養生息。又在守令。明公控制三省。艱虞殘破。非一地也。時人之論。必曰難爲顧彼顧此。不免急東則緩西矣。宰相鹽梅舟楫。應四面。初非身歷其地爲之。普天下之下。有行之者。況廣之東。廣之西。區區耶。詩云依其在京。侵自阮疆。惟別留念。地方不勝幸甚。

復胡杞泉都掌科

罪罟中屢承垂念。鄙人自揣。何以克當。周急有義。卻爲不恭。是以未敢踴躍然闕尊意也。拜辱之餘。感德何已。今日之事。大抵無至誠惻怛之心。不知忠告善道之義。罪在己。不在君。若果異法兼濟。不激不疎。言當其事。而不爲招訐患。指所必至。而不爲遠言。推己及君。切中情事。而又同心同道。多其人焉。天理人情。安知其無濟於事耶。委之曰。吾皇之不我受。言之損而無益。是亦借口而已矣。此在諸公深思亟圖之也。安否關宗社。利害在生民。與邈可姑待。事在得己者不同。若以併死無益一語蓋之。進退兩無所據。瑞不敢以諸公之言爲然矣。承愛甚。致私念附謝。高明以爲何如。

復歐陽栢菴掌科

承諭。聖人無近功速化。今日行之。明日見效。皆伯者詐術之私而已。此說似矣。實非。孔子言必世後仁。至三十年遲矣。然爲魯司寇。男女別途。豚羔

不飾價。子貢謂立之斯立。道之斯行。綏之斯來。動之斯和。又未有若此速者。是則何爲。聖人即此道法。即此至誠惻怛之心。爲之可以見效於數十年之後。亦可以收效於俄頃之前。必世後仁之中。自有綏來動和之妙。不言其速。而自無不速。猶之男耕女織。數月而後得衣食。遲矣。然自此以後。陳陳相因。有餘粟。有餘布。無遠無邇而不得。此以其初言。法制未備。聖人亦必有以處之。非坐死待至數月也。縱商賈備功。場圃夫脚。嗣往興來。莫非王道。亦莫非孔門事業。今人每鄙書生迂腐無用。正以書生知王道之遲。不知王道之速也。假如于今賊臨城臨村。破滅呼吸。乃曰候我去做務農講武之法來。其可乎。醫家急則治其標。治標亦醫家正道。而非旁門邪術也。治標與綏來動和作用不同。姑就速化一端言之。富國強兵。陋爲伯術。儒者不屑。聖人不富國強兵耶。什一而徹。田獵講武。富國強兵。聖人之於天下。莫是過也。謂聖人言義不言利。兵非得已。天下寧有若是不通時務之聖人耶。自謂我爲天德。爲王道。一謀畫。一施行。大大小小。求之而不可

海忠介公集

得。說爲矣。而又不見勉以爲之。苟且因循。日俟一日。惟是徐徐有待。不可速做。藉口答人。此天下所以厭儒術迂腐無用。而尊孫吳管晏也。伯以速道誤天下。儒以遲道誤天下。其害一而已矣。伯術猶可支持目前。腐儒目前日久。俱無用之。世主樂就功利。厭仁義之談。厭腐儒也。無所倚仗。不得不然也。今日有真聖人出焉。速過孫吳千百世。主無不樂之。樂之非真知德義可尊而貴也。樂其遠在孫吳之上。富國強兵。見目前也。許魯齋謂學以養生爲本。或者以不知道譏之。借口養生。爲富積計。則謬矣。朝聞道夕死可矣。天下之人死矣亡矣。而後可以爲人乎。賜不受命貨殖。顏子庶乎屢空。未聞顏子聽其饑死。不爲生道計也。儒者迂遠而闊於事情。無所用之。有賊臨城。一簣不展。抱守忠義。俯首就戮者。聖人原無此等道理。原無此等忠義也。呂祖謙謂莫速於聖人。莫遲於申韓。莫利於聖人。莫鈍於申韓。此道此意。知道君子。自可得之。於其速。不於其遲。伯道也。爲其遲。亦爲其速。王道也。天德也。公區區說。不免毫釐之差。謬以千里。敬布所見。

求正。非敢爲辯也。

奉二守陳南川書

邇者們寇猖獗。中外惴恐。未嘗頃刻寧息。厚祿官軍。無分毫用處。無許承宣二百餘兵。城池倉庫。舉以授賊矣。糧餉之薄。所以無怨心怠志者。料素稱愛民練事如執事者。歸府之日。有厚賜也。牛酒之出。市井欣欣。咸謂黎兵敵愾當百倍前日。然鄉兵打手。黎兵人多物少。而奉行左右。又失執事美意。無勞者攜肉歸城。而黎兵所得。有名無實。一腿之肉。聞其衆嗷嗷口語。非徒無益。反生怨心。宋以羊羹喪師。衛以使鶴辱國。此何等時節。而猶吝嗇壅蔽若斯耶。財者上之所輕。命者民之所重。惜所輕。而欲民舍所重。衛我焉。不可得也。恤死勵生。正今日用人之訣。黎兵死於澄邁之戰。身享殮祭。妻子厚賜。周縣丞良有見矣。生員鄭德賁之死。非可盡以輕生例之也。居民皆若人焉。海寇寧能揚揚入村落。窺城市乎。志士不忘在溝壑。勇士不忘喪其元。孔子取焉。官軍間能操戈向賊。皆德賁罵詈所致。曾射傷

海寇。脫軍士數人。正所謂一介之士。苟存心於利物。於人必有所濟也。執事不聞有哀恤之意。將何以勵死難之士哉。執事運籌于中。俞慮江介胄於外。諒有大爲瓊氏保障者。兵聚白沙。而他所多缺。我師遲久無爲。賊衆猖熾益甚。中外疑焉。似此二事。尤爲不當人心。可以坐生呼吸之變者。伏惟執事執爲匹夫匹婦復仇之心。周詳謀畫。毋以一郡生靈。付武人。身任其勞。勿以緊急事禮。委庸吏。再調黎兵以布要區。廣募勇士以乘戰勢。毋稽遲以失事機。毋疑畏以餒士氣。則總戎之能。與愛民之政。并著於時。而瓊民感功報德千億萬斯年矣。瑞不勝幸甚幸甚。

與瓊鄉諸先生書

瑞頓首再拜。敬質之諸老先生大人執事。竊惟婦人處人世。其大不幸者。夫亡勢不得與夫偕亡。而抱守區區孀處也。故婦人之喪其夫而寡者。古以未亡人稱之。然至朝廷旌慶。官司榮獎。誦書知禮道。苟以世教爲身荷者。褒賞之。傳列之。舉呈而進之有司。冀達於上。惓惓汲汲。則必孀守之婦加

焉何故。蓋忠臣烈士。貞婦孝子。上植天地之紀。中揭人道之大。下立世道之標。均處人道之難。而彼婦人無師友開明之功。匿名義驅役之故。獨絕情感。哀念夫子於數十年之後。心堅金石。行信四時。處心積行。所關係感發。尤非淺小故也。瑞甫四歲喪父。時母謝氏年二十八。承父志。勵節確守。經今三十有四春秋矣。一終之行。無毫釐玷穢。古稱陶嬰共姜輩。直可以相上下而無愧焉者。蓋母幼蠶織書史。語瑞少學。口授孝經學庸等篇。質稟近剛。一父性警敏不羈。不事家人生業。相勵護持。能使內外不致乏絕。先後苦針裁。營衣食。節費資。督瑞學。日夜同瑞寢處。訪詢戚近。惓惓然舉而托之嚴明之師。以琢以磨。兼有父道。瑞今日稍知禮義。勉自慎飭。若非冲年背父者。盡母氏諄諄開我力也。持家有紀法。教子有義方。律身以正義。喪父之日。有所親以日者推算進。母舉焚之。誓不再醮。如日者語。執之今日不變。夫豈偶然。夫士君子行善。取快於心。非徒取華於其名。婦人潔飭乃身。凡以畢天之與我而已。是安足置齒牙間者。假而上獲旌閭之榮。

海 忠 介 公 集

下獲紀述之美。於節行亦何所增加也。瑞願區區舉而頌之人者。是是非非之公。本無擇於途人父母。而綱常之義。守貞爲重。昔子厚遊岐郿間。必廣詢秀實逸事狀色。爲韓太史上。矧瑞荷恩罔極。知之實真。見之實詳且辯者。願乃掩匿而不公之乎世。有言及族戚。君子恒不以信承之者。蓋謬執諱親之私。其習久固。經曰。其先祖無美而稱之。誣親也。孔子直父子之隱。孟軻宜周公之過。垂訓之文不少矣。於父母祖先獨略焉。寧揚善特於親親避哉。然則聖賢不以褒貶之權假其親。蓋可見矣。又其淺固有妄揚親行。竊寵榮稱孝者。遂致人得以詰所揚而反疵之。言議紛紛不已。誣親之善。顯親之惡也亦多矣。而瑞獨何以用心。獨念吾瓊先輩。師法如曾白潭。亦其彰彰著者。徒以莫爲之名。經久不與鄉祀。其他著卓行而負屈稱。加美名於敗類時不少焉。況閨中事迹。罕可得而著聞者。獨非君子之所宜盡心乎。公議不行。俗將無以爲勸。桐江一節。漢鼎賴之。瑞非臞瘠之身。有不能自己者。故縷縷爲諸賢者誦。若夫行之可褒。與其言之可信與否。則惟下執事以

所聞見參之。事在清議。非敢以一毫私意爲母辱圖也。瑞不勝屏切。頓首再拜、

復巡按龔懷川

廬陵邂逅。至今神采器度。猶如見之。以過可化。以綏可來。區區東粵。下及禽魚草木。有沾被矣。地方何幸。地方何幸。天下惟患無其志。有志如翁其人。又以代天巡守之權。濟而行之。尙有不盡之分。無能滿慰一方之望。有之耶。十府雲霓。可預爲賀。古人有博訪之說。又有五聽之法。五聽所以廣博訪計也。先民有言。詢于芻蕘。訪之而其人止是屬官。止託查盤官訪之。詳而非博。然此特明照中。不及分數十而有一。不足爲翁言者。筆至姑及之。瑞平生有濟世之念。而人不與。庚午告歸。展布萬分。無能及一。此非怨天尤人之念。終已一生。止此還天。不能不自爲歉也。區區泉石。有夢不在周公。忽覩雲章。魄營猶動。孟子謂廣土衆民。君子欲之。中定四海。君子之樂。有此施爲之本懷。以故有此樂欲之情色。天下惟俗見久之。能遮蔽

人本然之明。俗說紛紜。立有根腳者。亦或牽之而去。苟其不然。性分天地。感之而應。決江河矣。事有俟人言而後可行。有不俟人言。行而無不當者。今何人哉。唐以聲詩取士。二百年之中。杜審言天下之狂也。反席未安之前。尙有不見代人之恨。今請以台翁當之。瑞臨楮倦倦。無任。

復總督凌洋山

羅旁爲門庭之寇。二百年矣。開府至公。乃能使之入我版圖。一鼓而擒。永絕其害。詩云。方叔元老。克壯其猷。蓋必如此。而後可云猷之壯也。日者灣中竊有大憶於公。自今言之。可謂能中愚者一得。所恨學疎才窘。忝作有司賀文。惟公運用之妙。揄揚萬分。無得其一。爲歉爲歉。誤蒙垂惠。稽首升受。慙感并之。差官回。謹致謝私。附轉上。瓊人不幸。二次大舉。不遇如公其人。尺寸無得。正尊疏中捐其險以與賊之謂。賊今日亦殺之矣。報盡未盡之賊兵。退而歸。大征何用。夫黎岐中處。而州縣環之。天下事有易於瓊州事者乎。部議及丘文莊。要將五指山開十字路。廊廟之上。亦有心公之心。

者矣。今日得如先年涂兵備名業者其人。不請一兵。指日指月。版圖黎岐。初非難事。何也。威之也。化之也。蠶食之也。可縣可所。卽縣之所之。如今日羅旁事也。天下事。不可無故發難端。亦不可當幾自失其會。瑞桑梓切情。并附告。

與博白大尹林仲和

北都一面。未幾時而泉石安吾身矣。知子博白之行。乃黃生來任感恩之日。先夜陞刑曹主事入夢。吾無心也。何以來之。回思子平日節槩。癡人說夢。尙是鴻漸於干而已。無足爲異。有此人。有此天機。夫豈偶然之故哉。日月之間。料必有驗。今吏部止是一箇資格。這資格格了許多賢者不得出頭。格了許多不賢者使不退步。誠如極地之說。然吾人出處之小。係國家氣運之大。有握其幾。不必在念。所恨山修海阻。不得朝夕。仲和視是今日。割鷄之功。可否伊呂小試之道。君子曰。軒冕者物之儻來也。寄也。今人以寄爲果。毀譽得喪。官階所係。我心隨之。做官累心。做官何用。仲和試驗之。

念頭如動。是何景象。比之不動。此念時分何若。自知之矣。聖賢無間時之達不達。盡其在我。自有無限受用。此正莊子寄在樂。不爲荒寄去。未嘗不樂之謂。何大小高下遷不遷足言哉。區區所望仲和。不過如此而已。祖宗初原無資格。吏部無端作俑而行。不知遵何訓令。沿襲不改。歲貢五遷六遷之官。乃進士出門卑而不授之職。進寸進尺。借之口曰。今日三途竝用矣。吏部局人也。我亦隨吏部之鄙而鄙吾心耶。不可也。不可也。子官七品。尙非與爾鄰里時節。遠來絹段。不得已受之矣。餘未開封。付回人。返璧。新刻奉覽。并照人。

復分守道王用吾

泉石間報有貴人書。便空谷足音。誠有不勝蹙然之喜者矣。何幸何幸。再及開緘捧讀。誦之玩之。則又百姓地方。拳拳在念。有真切之情。有真切之辭。此其今時交接中所易得有者乎。喜復何如。今天下了矣。不特不蒙做官人之福。而又反當做官人之害。正以徒有其言。鸚鵡從人有其言。未必有其心。

也。即言見心。有如翁其人者。生可無一言以爲復乎。今時視做官爲戲場事。口曰認真。而心實不然。昧沒本心。此其一也。其中似是之非。襲古之謬。又且日羣群然見矣。居之不疑。妨民病國。可不扼腕而歎者。又非可以一言盡也。敬以先刻八冊。居官職分。大槩散見於其中者。呈覽瑜矣。或亦不免於瑕有之乎。高明幸自擇之。續集完刻。日容再致。使人回。謹此附意。諸所不及者。祈台鑒。統旁及之。

議論

嚴師教戒

嘗讀至論。謂尊崇正學在君師。紹明絕學在宗師。至發蒙後學而提督之。又有教師職焉。此歐陽永叔祖韓昌黎之嚴謹而宗風之者。師固足重也。若人能攻我之病。我又能受人之攻。非義友耶。故尼父以善爲芝蘭。臧孫以惡爲藥石。君子能降師親父。則霧掃空澄。纖毫不苟。浩然之氣。塞乎蒼冥。

海 忠 介 公 集

果何至是。得力於師友者良多也。夫人外無師友之益。而欲所行之協於道。亦難矣。瑞爲此懼。一旦召神立胫子下。誨之曰。瑞女知女之得生於天地之間者乎。有此生。必求無忝此生而後可。無忝者。聖人我師。一一放而行之。非今所競躋巍科陟臚仕之謂也。女今亦小寓於其間矣。入府縣而得錢。易易焉。宮室妻妾。無寧一動其心於此乎。昔有所操。今或爲惱惱者一易之乎。財帛世界。無能屹中流之砥乎。將言者而不能行。抑行則愧影。寢則愧衾。徒對人口語以自雄乎。質冕裳而有媚心焉。無能以義自亢乎。參之衣狐貉而有恥心焉。忘我之爲重乎。或疲中而氣餒焉。不能長江大河。若浩浩然而莫禦矣乎。小有得則矜能。在人而忌。前有利達。不能無競心乎。諱己之疾。凡百所事。不免於私己乎。窮天地亘古今而不顧者。終亦不然乎。夫人非無賄之患。而無令德之難。於此有一焉。下虧爾影。上辱爾先矣。天以完節付女。而女不能以全體將之。亦奚顏以立于天地間耶。俯首索氣。縱其一舉。而終已於卿相之列。天下爲之奔趨焉。無足齒也。嗚呼。瑞有一

於此。不如速死。三復斯言。凜若巖師。丁寧夏楚之督爾上。紛如直友箴規。嗚呼之諍爾旁。

海忠介公集卷之六

出處

君子處世。昔人皆以不仕則隱。出處二道。對待言之。謂不得於君。則當處而隱逸。性分之樂。一彼一此。皆是也。其說定於孔子邦有道則仕。邦無道則隱之辨。然孔子有身言。孔子終身事業。謂之隱。謂之仕。春秋之時。是亦無道而極者矣。齊魯蔡宋之郊。流行轍環。日不舍置。其時以時而隱。若丈人。若荷簣長沮桀溺微生畝。至以果哉末難。潔已亂倫罪之。夫子之道。則又何在。夫人生天地。有是耳目口鼻之形。付之以天地萬物之性。天地以生物爲心。生人之理。盡生意也。天地間盡此生意。是故君子出而仕人。不負天與。性在是。道在是。人皆可爲堯舜亦在於是。丈人荷簣。耳目口鼻之形。而不知萬物一體之義。葆真抱一。饑則食。渴則飲。保之何益。見孺子將入於井。而無怵惕惻隱之心。非人矣。余嘗仰之賦與。卽之孔子。

海 忠 介 公 集

終身之事。其云有道之仕。有定仕也。其云無道之隱。無定隱也。意有所在。截然對待之辭。不可因之遂謂爲截然對待之道。出處二字。不可竝論。去就二字。亦不可竝論。就者君子仕人之正。去不得已爲之。出者君子立身之正。處不得已爲之。天下只是一道。舍此則失道。失道失性矣。是以所就三。所去三。君子雖計較於毫釐禮節之間。而萬物一體。天之與我。則不以一時而輟。天地間生生不息。真機活潑。自不得而已之也。曾子云。仁以爲己任。死而後已。解者以一息尙存。此志不容少懈言之。仁卽天地生物之仁。志卽孟子得志與民由之。不得志獨行其道之志。宋儒謂人君聯屬天下。以成其身。自有位之顯言之耳。自天子至於庶人。德性賦予。其得之天一也。當理而無私。一身一心。曾子已任之仁。如斯而已耶。孔子無道則隱。其隱也。皇皇然有道則見之心。孔子舍之則藏。其藏也。惓惓然用之則行之念。雖有用舍行藏之判。而舍之則藏。卽具於用之則行之中。有定出。無定處。非二道也。只一萬物一體之仁。故亦只一出而仕人之義。說者

海 忠 介 公 集

又謂。聖人則可。在賢人則不可。其說尤不可曉。堯讓天下於許由。而市道小人。爭半錢之利。九牛一毛之論。誠有之矣。實則人生之後。人自逆天。人自爲異。謂靡不有初。而又謂有不可於後。有之哉。子路執無道而隱之言。何必公山氏之說。夫子曉之曰。吾豈匏瓜也哉。焉能繫而不食。孔子之身。門弟子之法也。聖賢君子之別。大抵只是安利困勉判如於其間。如孔子答哀公爲政之問。及其成功一也而已矣。春秋之時。武城絃歌。夫子喜之。漆雕開斯之未信。夫子使之仕。謂有不可。聖賢之別耶。然天下一君。四海一國。不得於一。將無可入之二矣。若之何。孟子曰。予然後浩然有歸志。雖然。王如用予。伊尹欲速其功。五就湯。五就桀。一人之身。一念一事。今日明日。別有悔悟。君子得志。與民由之。不得志。獨行其道。得不得。時也。志念如一。志與時旋。時其人不可而去。時其人之可。而聖賢之志又轉之矣。此正是有定仕無定隱之道。大中至正。通天下。合人已。孔子不遇。終其身六經垂憲。七篇仁義。孟子自許取法後王。春秋戰國

之身。尙欲置之爲後千萬世之任。身當其時。恬然隱處。秦越天下。爲一身不爲天下計。孔孟不爲之矣。曰出處去就。截然對待之道。君子思不出其位。舍性命。言時勢。宇宙無窮。誰當負荷。言長沮桀溺。不言孔孟。吾不信也。

嚴光

橫足加帝腹。天下視爲奇事。桐江一絲。以古而今。亦無不爲子陵高而賢之矣。然高則高矣。高而不實。奇則奇矣。奇而不中。人生天地間。只是一性分。是所固有。見之日用。只是一職分。惟所當爲。舍性分言高奇。未見其能高能奇矣。性分何在。天地萬物。本同一體。自天子以至途人一也。性在是。職分在是。自天子以至途人。作用一也。故天地萬物。舉而屬之我一人之身。舉而任之。爲我一人日用常行之道。人不我用。然後退而守之。雖退而守之。而萬物一體之心。則未嘗一日息也。從古聖賢。道蓋如此。孟子曰。中天下而立。定四海之民。君子樂之。子陵果如光武相助爲理之

海忠介公集

念。則光武之所立而定。明良相逢。治具畢張。是即子陵之所立而定也。眞機實際。子陵何故不樂爲之。孔子生于春秋。流行轍環。日不舍置。荷簣丈人。知不可而不爲之矣。夫子罪之。相對累日。因共偃仰。由古而來。迭爲賓主。二女九男。情分無間。未之過也。可以謂之不可爲不爲之耶。孔子於荷簣責其果。於微生責其固。於丈人責其潔身亂倫。就子陵言之。其爲果而固。有甚之矣。有君無臣。吾悲其爲君。苟有天下國家之志。光武之時。不爲孔子孟軻之出。可勝悲乎。一時後世。獨於子陵賢之。祠祭咏揚。不一而足。是所謂高而奇也。三代而下。蟬蛻汗穢之中。以浮游塵埃之外。權位名利。若敝屣也。誰其人哉。誰其人哉。苟可得之。無所不至。有扁斯石。宦官宮妾。甘其心而履之矣。况天子之尊。故人之厚。彼自求之。不與得之。獨非人間世一希闢事。千仞之上。翔之者乎。甚矣人之好怪也。又况足橫帝復。古無有也。今無有也。天下後世無有也。駭人聞聽。然君子之於天下。求盡其在我而已。不必其高。不必其不高。不高而得我所性。乃

海 忠 介 公 集

所以爲高。無裨於性。高之何益。寒不可衣。饑不可食。爲珠玉寶器。不爲布帛菽粟。子陵之高之謂矣。且子陵不得於高卑而言之。於此亦自可見。蘇東坡謂魏晉梁得之。文王而終身不得。皆吾之所輕者也。大舜袵衣鼓琴。若固有之。君子內重而見外爲輕。蓋如此。有諸內形諸外。不能飾也。子陵苟有所得。將富貴貧賤。視之一也。故人而故人之矣。天子卿相。浮雲景色。何所爲而高下視之。昔日故人則就之。今日天子則不之就耶。見王侯卿士而媚之。俗心也。見王侯卿士而輕之。亦俗心也。清濁不同。見在人不見在己。內輕而見外之爲重則一。光武稱狂奴故態。無乃子陵只是一味薄天子而不爲之狂。出此之外。更無他長耶。君子得志。與民由之。不得志。獨行其道。不得志之志。即得志之志。苟有其志。故人如光武。不與行之。未之有也。子陵無其志。是以無其具。無其具。是以只就平日之狂。成一个是。後之詠釣臺者。出脫子陵中。侯霸朱浮僅免歸。韓歆戴涉終見殺。云胡君房畱不住。無乃平日窺其微。夫有是臣。則有是君。自建武中三十年論之。

海忠介公集

中興事業。止此而已。尙不如子陵順真抱一。不爲之高。百姓怨氣滿腹。羊裘懶散江湖。無能優劣。固也。然子陵實有伊傅周召之器。不能輔成光武。天下得有禹湯文武之澤耶。事屬後日。如果言不聽。諫之不從。如不我得於先。亦不我力於後。故人有其名無其實。從而去之。未晚也。謹信如光武。中興如光武。奈之何預逆其不可。先自絕之。伊尹之於湯。傳說之於高宗。傾蓋如故。子陵之於光武。貴賤易交。白頭而新言一人之交。二人同心。如蘭斷金。未可言也。輔世而長天下之民。可言之乎。老子謂修之身其德乃真。修之天下其德乃普。身心天下。德之在我爲之。區區然桐江煙水。富春風月。有一節之偏。缺全體之正。可以言德之真也哉。范文正謂子陵之風。山高水長。山則高矣。無草木。水則長矣。不能水氣上興雲雨。無取焉。狂奴故態。子陵之論定於是矣。而天下之人。獨於子陵稱賢。是則好高好奇之過。絕無之中。僅有其一醒人耳目也。

朱陸

海 忠 介 公 集

朱陸之論定久矣。何自而辨之。辨之以吾之心而已。維天之命。其在人則爲性。而具於心。古今共之。聖愚同之。得此而先。堯舜禹有危微精一允執厥中之傳。得此而後。孟子有求放心先立乎其天之論。未有舍去本心別求之外。而曰聖人之道者。軻之死不得其傳。而人心之天則在也。孟子曰。大人者。不失其赤子之心者也。恃有赤子之心。故雖出之千百載之前。其事千百載之下。可以一言而定。陸子門人問陸子學以何進。曰得之孟子。則精一執中之旨。陸子得之矣。乃朱子其學則異於是。大學致知在格物。借之爲誠意正心之用也。猶之惟精乃惟一之功。明善乃誠身之功。功在格致。道在誠正。朱子篤信大學。年生欲讀盡天下之書。議盡天下之事。引而伸之、觸類而長之。天下之事畢矣。天下之書可得而盡讀之乎。事可得而盡議之乎。韓退之原道。言誠正不及格致。朱子指爲無頭學問。是以格物致知爲大學頭一事矣。入門一差。是以終身只做得大學先之之功。不盡得大學後之之益。無得於心。所知反限。王陽明謂晦翁氣魄極大。合下便要繼往開來。

少年已著了許多書。然則此非其誤認之故。毫釐之差。而爲千里之謬者乎。夫顏子曾有一著述乎。聖人以其躬行心得之餘。出之於威儀文辭之末。富於中。見於外。不可強。而亦不得而飾也。心齋坐忘。不遷不貳。顏子之著述大矣。舍去本心。日從事於古本冊子章章句句之。好勝之私心。好名之爲累。據此發念之初。已不可以入堯舜之道矣。聖人不廢學以爲涵養。是以中庸有尊德性而道問學之說。賢人而下。不廢學以求復初。是以孟子有學問之道。求其放心之說。子思孟子傳自堯舜。陸子識之。然陸子不免應舉子業。卽其語錄文集年譜。可見餘力學文。尙不如是也。自傳心之法視之。猶俗學也。朱子反謂其專務踐履。盡廢講學。論對五筓。言涵心性。乃自其所心知者出之。如孔子答哀公修道誠身。孟子告齊宣仁義孝弟。亦推本之論也。朱子答之書而戲之云。這些子。恐是葱嶺帶得來。天下之人。只一性命。而事物在焉。朱子只要人讀書講說。研究於外子。不知朱子之所謂矣。儒學禪宗。其判不啻千里。而要其初。只是毫忽。儒道寂守。其心中

海 忠 介 公 集

涵事物。有天下國家之用。禪宗廢棄百應。徒爲空虛寂滅之養。朱子指陸爲禪。然則將不講其心。就外爲天下國家之用。呻吟其咕嗶。而曰某章某句如此。某章某句如彼。然後爲能學歟。顏子終日不違如愚。夫子以道統寄之。生于朱子之時。言論相及。不知其如之何而爲禪之詆矣。陸子不免少溺於俗。然心知其然。平日拳拳以求放心。先立其大爲教。聞彼也。自聞而已。見彼也。自見而已。猶有得之。朱子則楚辭除符參同契韓文。皆其年年月月訓詁之冊。不知此一訓詁。何日而已也。末年之悔。謂令此心全體都奔在冊子上。若有得矣。而先入之深。讀書爲主。而待其餘。未見其真能脫去舊習。收功一原也。危疾一日前。猶解誠意章。在溺於誦說。沒身不復。聖人六經躬行心得之餘爲之養。盛之充。因著其用。朱子則先意於此。讀書爲先。求心反爲後。繭絲牛毛。識者以集大成歸之。謂擇諸家之訓。而纂其長。則亦可矣。謂道在是。則周元公或可。而朱不然矣。說者又謂朱子羽翼六經。嘉惠後學。其功不淺。夫朱子自少至老。無一日不在經

書子史間。平生精力。盡於訓詁。而其所訓。又多聖人之經。賢人之傳也。夫豈得無功於後。聖真以此破碎。道一由此支離。又不能不爲後人之誤。功過并之。而使人繁於枝葉。昧厥本原。其過爲大。三代而後。學之陷溺如朱者。比比然也。朱子欲以其學爲天下宗。天下亦以此信宗於朱子。故予不及其他。獨指朱子爲過。陸子謂此老平生志向。不汨於利祿。當今誠難其匹。夫朱子豈不知心之爲大。而求之心哉。誤認格致爲入門。指著述爲功業。途轍旣乖。所得隨之。韓退之因文以見道。而非明道以爲文。日月至焉而已矣。無乃朱子過歟。欲往京師。心識國都之所在。行遠自邇。計日可到。權於定向。執途之人而訊之。歧路之中。又有岐焉。訊之所不及。失之矣。大抵天下得意忘言。區區於文義講說之間。真趣薄矣。深造自得者當見之。顏子默契道體。孔子予欲無言。天淵禪學。而其致虛之篤。一而已矣。然則朱子無乃得言而自薄於其意歟。自得之。則有居之安。資之深之益。日從事於故紙堆中。外強中乾。呂東萊謂銖銖而折之。寸寸而較之。無復有詩

海 忠 介 公 集

矣。朱子之謂矣。朱子平生。誤在認格物爲入門。而不知大學之道。誠正乃其實地。以故一意解書。其解書。其論人。心術見焉。謂司馬溫公。只恁行將去。無致知一段。朱子曰。日經史。其不滿於實心實事。無私無黨。有餘力而後學文之君實。無足怪矣。大凡人言語文字。皆心爲之。陽明致良知。其什經不取朱子之說者。多說在心性上。朱子什經全說。在多學而識上。陽明鶻突其說誠有之。然猶不失爲本原之養也。猶第一義也。朱子則落而下之。離而去之矣。道問學之功。爲其尊德性而設。正與孟子學問求放心同義。朱子解之曰。非存心無以致知。而存心者又不可以不致知。崇禮中庸。行也。以屬之知。姑勿論。所云致知。非程子進學則在致知。根心著己之知。亦姑勿論。乃其意則全重致知矣。細玩尊德性而道問學。曾有此口氣乎。存疑錄謂朱子平生所得在是。所失亦在是。見非於陸子靜亦在是。得之矣。其訓中庸分章分句爲相屬。明費隱天道人道。小德大德。分中分。和道不可離。此言素位。此言不願。太極通書。此言陽之動。此言陰之靜。

海忠介公集

支離爲甚。默而識之。言知之於心。平聲字。朱子作去聲。解音志。謂記之於心。不以聖賢說聖賢。以己之所誤說之。能說之耶。得人之得。適人之適。難言之矣。自得其得。自適其適。天機之觀。不言之喻。將能之也哉。然又非止言語文字之間。鵝湖白鹿往返議論之差而已。荆公祠記千百年。大公案也。學問偏枯。識見昏昧之故。其誣之不遺餘力。與初之指爲禪會無異。今世之儒士。自謂得正心誠意之學者。皆風痺不知痛癢之人也。舉一世安於君父之大仇。而方且揚眉拱手以談性命。不知何者謂之性命乎。正諸儒入膏肓之病也。使在周邵聞之。喜過而樂與之矣。孝弟忠信。常不足以應天下之變。而才術辨智。常不足以定天下之經。亦此意也。朱子遺嫠人書。乃謂諸君子聚頭磕額。理會何事。乃致有此等怪論少見。朱唐交惡錄。齊則失矣。楚亦未爲得也。光風霽月。灑落襟懷。有如周元公邵康節其人者。寧有此言說舉措耶。情見乎辭。行如其心。涵養未融。克伐爲崇。晦菴不能無大不滿於後學之意矣。後人爲朱陸之議。聶雙江以黨同伐異。

挾勝崇私言之。然當其時門弟子則已然矣。豈非朱子身自作則。一時門下習氣。而又因以貽之後乎。自宋至今。五百餘年。是朱非陸。所在羣如也。正雙江黨伐挾崇之謂。陽明之所稱。今之尊信晦翁。無異於戰國之尊信楊墨也。抑何從而辨之乎。孟子曰。是非之心。人皆有之。請以是爲朱陸之辨。

太伯論上

太王剪商之志。金仁山胡雙湖辯之詳矣。愚竊謂太王實有是志。太伯去之。夫子亦不當以至德許之。夫太王當祖甲之時。去高宗中興未遠。後一百有餘年。殷始亡。則當太王時。乃商家盛強之末。衰弱之始。其天命人心。尙完固未動。所謂剪商。亦言乎其志焉耳。非爰整其旅。如觀兵孟津。陳師牧野之爲也。泰伯無荆蠻之逃。則國屬之泰伯矣。屬之泰伯。而泰伯以不取爲心。則翦商之志。蓄於太王者。息之泰伯。季歷不得位。日後無武王事紂無滅亡之理。此其以天下讓商。更爲何如。太王欲傳位季歷。則翦商之

海忠介公集

志。季歷從之矣。太王啓於先。季歷從於後。父作子述。事必有可成無難者。君臣之義。秦伯不以此身維持其間。而托於採藥之去。我雖不殺伯仁。伯仁由我而死。充類至義之盡。秦伯其得爲有君也哉。且弑君天下大惡也。幸而成之。公議凜於斧鉞。不幸不成。大則身首異處。破壞家門。小則貶削投荒。流離終世。王述之子坦之。欲以女與桓溫。述怒。排坦之曰。汝真癡耶。乃欲以女與兵。坦之是以不與桓溫之禍。竊以爲秦伯之愛太王。不如述之愛其子矣。聖賢之論曰。君有過。三諫而不聽。則逃之。父有過。三諫而不聽。則號泣而隨之。夫子臣異道。非止謂其天合人合。義當如此也。子之於父。一體而生。比之異姓君臣。情分有別。以光明正大之義。投一氣相通之親。婉順號泣。至三至再。無不可以感通而挽回心者。父有諍子。則身不陷于不義。無君一念。此其事爲何如。可逆料其不可。反而遂逃之耶。仁傑周旋于則天之朝。雙陸不勝之兆。姑姪子母之言。且能動之。俾天下復爲唐有。太王固非昏暗之武后也。仁傑能行於異姓之婦人。秦伯不能行於

至親之父子。且朱子之論伯曰。德足以朝諸侯而有天下。夫足以朝諸侯有天下。而不能以大義回父心。吾不信之矣。以子事父。情有可爲而不爲。身爲世子。權有可爲而不爲。以事父言。則不孝。以事商言。則不忠。啓天下無君之禍。貽家門弑逆之羞。皆荆蠻一逃爲之也。夫子旁通事物之變。酌見義理之原。而顧以至德稱之哉。

秦伯論下

果如翦商說。則秦伯潔身而去。僅得與申生之恭爲類。質美未學。謂之德且不可矣。況可謂之至乎。蓋探藥一去。使太王果成翦商之事。則商家天下。不得於太王。當得於季歷。是秦伯不取商家之天下。而任父與弟取之也。春秋書趙盾弑其君。任父與弟取之。不以此身維持其間。繩以春秋法。秦伯罪不可逃矣。仁傑周旋于女主之朝。君子取焉。蓋君子期於成天下之事。而不必於明己之志。苟謂惟求無愧。直遂徑行。可以維持左右。使不至於成其逆者。皆不爲之。秦伯不得爲多賢矣。朱子以遂成吳國事。料太伯於商周

海忠介公集

之際。足以朝諸侯有天下。太王邑於岐山之下。從如歸市。不能以有天下乎。太王可有天下。而泰伯潔身去之。謂讓天下於商可乎。且朝諸侯有天下之說。尤不可曉。說者謂周之頑民。爲周忠臣。觀多方多士訓殷民者詳矣。必三紀而後風俗移易。牧野之師。雖殷民有倒戈之志。然猶有前途交戰之人。孟子曰。其故家遺俗。流風善政。猶有存者。是以難也。泰伯雖盛德。當不過于文王。文王值罪惡貫盈之紂。不能爲之。泰伯當祖甲世。去高宗中興未遠。又焉能朝諸侯有天下易易耶。三分有二。以服事殷。說者謂九州所以不遽叛者。皆小心翼翼延焉。夫紂猶有可延之勢。以泰伯不從之德。當祖甲盛時。爲天下倡率。民可知方。商室太山而四維之矣。朝諸侯有天下。此必無之事也。孟子曰。繼世而有天下者。天之所廢。必若桀紂。故益伊尹周公不有天下。適聖賢六七作之後。而天遽棄之耶。以德言。泰伯無取天下之理。以時言。泰伯無取天下之幾。徒見夫遂成吳國之迹。謂可以朝諸侯有天下。夫歸泰伯之人。正邠人從太王之人也。其心知有君臣之義。

海 忠 介 公 集

故見夫可君者。翕然歸之。又躋我于天下一君之上。恐知有仁人之人不如是也。歸市之太王。不能即遂翦商之心。遂成吳國之泰伯。能朝諸侯有天下乎。且推己之物以與人謂之讓。指商家未敗之天下。爲泰伯當得而不取之恩。是何以異於盜賊指所未劫之家。其所積爲已有。而姑讓與積財者所用耶。大禹太甲成王之天下。不可謂爲伊尹周公旦所讓。商之天下。不可謂爲泰伯所讓。尤可知矣。夫子之言。當不如是。朱子憑史記之語。而想像推之。於太王泰伯心事。皆不得其實。而其時其事。并夫子稱許之言。有相悖戾。不可強通者。不若止以讓國季歷說。武王終有天下。故以讓天下推許之爲得也。

孟子爲貧而仕議

人生天地間。曰士曰農曰工曰商。皆男子事也。其事雖一。然士在行道。天地間惟道最大。故士居四民首。士當斯世。既貧而無養矣。曰農曰工曰商。無非資身策也。此其事之在我者。一仕於人。則制於人。則不

得以自由。制於人而望於人者。惟祿焉。且云非出處之正。吁非其正者。而可以謂之出乎。以不正之出。懸望祿之恩。此其心爲何如也。君子之仕。所以行其義。臣子之義。分無彼此。而以言高行道自諉。失君子出仕義矣。天地間無可以生此身者。爲之祿可也。舍農工商之養自己出。區區於抱關擊析之祿。由人制者焉。大賢君子之所爲。寧若此哉。孔子平日進以禮。難於進也。退以義。易於退也。乘田委吏。安然受之而不辭。蓋亦順其舉授者。而無容心焉。亦且行道之端所係耳。事君敬其事而後其食。爲貧以進。寧復能後其食耶。孟子平日執不見諸侯之義。分庭抗禮。直若壁立萬仞之不可即者。莫非剛且大者爲之。斯言一出。吾恐氣體亦有所不充。集義所生者。或不能長江大河浩浩然而來矣。

周公使管叔監殷

周公之處管蔡。諸家皆以爲不忍逆探其兄之惡而棄之。愚竊謂不然。舜之處象。雖云封之有庫。而天子之吏實理。所以然者。正以全吾親愛之心。又

使之不得少肆其惡。其爲家國臣民之計。詳而密矣。人必有惻隱之心。惻隱之心於親切。人必有是非之心。是非之心於親真。謂之眞者。非獨詳於此也。且夕周旋。心術之善否。見事之明暗。才調之大與小。莫不畢照於我。而非若他人之日月一至。見其一二。而未見其千萬也。古稱知子莫若父。知弟子莫若師。群居終日。而以知友稱。亦以親比不離之故也。謂蔽於愛兄之心。然則舜何以不蔽四端。必有隨感異應。舉天下皆然。而周公獨何以得此失彼。大學稱莫知其子之惡。責溺愛者之不明也。古稱靜子爲賢子。教以義方爲賢父。胤子朱啓明。臣民稱焉。堯且以鬻訟棄之。見有真否之別也。將謂過惡未著。而其志其才。有可取者。知人則哲。維帝其艱。四凶不去於堯。而去於舜。人心之藏。不可測度。雖明聖亦有未能先爲之別者。奚必兄弟間而後然哉。立亡國之子。而求所以監之。此其關係若何。當何如以計之者。監以親親之兄。周公慮事之詳。亦可想矣。若夫日後之事。則所謂維帝之艱。聖人之不幸也。而其初之必使焉者。正其才志之可觀。

兄弟之真見。今觀金縢之冊。公之愛武王何若。恩斯勤斯之詠。公之愛成王何若。孩提之童。無不知愛其兄。在彼猶在此者。附仇人以背懿親。管所爲有出於天理人情之外者。而公安得逆知之。竊以爲監殷之舉。公必自慶以爲得安國之計矣。而寧意其後之至此耶。周公弟也。管叔兄也。周公之過。不亦宜乎。孟子意或如此。無取我子。鬻子之閔斯之言。哀而切。所謂垂涕泣而道之也。敗露之後。其親愛之情尙如此。鬪墻禦侮之親。而使之監我仇人焉。獨非聖人之至計也乎。天理人情。周公之所不能不過也。若謂蔽於愛兄。以至今日。稽之古今。反之人心。不能以強通矣。

使畢戰問井地

不井田而能致天下之治者。無是理也。何也。人必衣食有所資。然後爲善之心以生。日夕有所事。然後淫侈之念不作。井田者。衣食之資。日夕之事。返朴還淳之道。去盜絕訟之原。舉賴於此。故嘗以爲一井田。而天下之事畢矣。然自三代而下。垂數千載而莫之行者何。井田所以爲民。而亦兼以足

海 忠 介 公 集

國。自秦漢而下。其心於爲民者。能幾人哉。間有欲爲民隱之恤。久遠之計者。又苦於考究之不詳。變通之無法。彼見夫天下若此其大。奪富民之田以畀貧者。紛紛籍籍。無從下手。其講學之臣。多詞章記誦之士。議及井田。懵然不知所以行之之故。或見其莫已利也。因不舉之以爲君誦者。亦有舉之。世相安於因循之習。竟無經久之計。望治之思。膠柱鼓瑟。宜乎其率不可行也。考之後之稱稽古博識者。莫如端臨馬氏。其爲井田之議。謂後之君子。每慨歎世主不能復三代之法。以利其民。使豪強坐擅兼并之利。其說固正矣。至於斟酌古今。究竟利病。則莫老泉水心二公之論。最爲確實。其出二公之外。而爲之議者。必能備知閭里之利病詳悉。然後授受。可以無弊。然則自周而下。吏於民者。舉不欲知其利病也耶。不知民間之利病。用民之脂膏以奉之。何用設官分職。旁午而縱橫之者。何爲守令之遷除。其歲月有限。獨不可舉而久任之乎。汙吏黠胥。能舞文以亂簿書。田里之一一可覩。丈尺可憑。或不可亂。還授之姦黻無窮。今則然矣。井田既行之

海忠介公集

後。而民猶有無窮之弊耶。商君決裂井田。廢壞阡陌。以靜百姓之業。而一其志。果若斯言。則三代之貢助徹法。將不靜而一乎。不反其靜一之故。而見夫末流之弊。遂舉而棄之。不端其本。而齊於末。端臨于是爲失言矣。我朝丘文莊有取於蘇葉之論。而其言曰。可於國初人寡之時爲之。承平日久。生齒日繁之後。終歸於墮廢。程子謂天地間。決無人多地少之理。今之糜費五穀。計當數倍。吾民日夕之食。而猶可以取給。事可知矣。隨時制宜。而不失先王之制。歷舉貢助。以爲滕文誦。孟子之所云潤澤。不如此也。丁田相配。取效於數百年之後。井田以漸爲之。而俟其成。獨不可舉而行之乎。謂張載處之有術之言。惜其要。妙隱而未發。吁三代行之。其爲日若此其久也。地里舉目可見。量度反掌而行。寧能隱之耶。文莊之見。亦端臨之見也。誤之者蘇葉。而二公之言。尤自可笑。周禮遂人。凡治野夫間有遂。遂上有徑。十夫有溝。溝上有畛。百夫有洫。洫上有涂。千夫有澮。澮上有道。萬夫有川。川上有路。以達於畿。鄭康成謂此鄉遂用溝洫

海 忠 介 公 集

之法也。用之近郊。鄉遂匠人九夫爲井。井間廣四尺。深四尺。謂之溝。方十里爲成。成間廣八尺。深八尺。謂之洫。方百里爲同。同間廣一尋。深二仞。謂之涂。專達於川。康成以爲此都鄙用井田之法也。用之野外縣都。此蓋以平原曠野之地行助法。以山林陵麓之地行貢法。然非貢助一定於此而不易也。昔朱子論建國謂必依山川形勢。無截然可方之理。孟子若夫潤澤。正此意也。必若塞溪壑。平澗谷。夷丘陵。破墳墓。壞廬舍。徙城郭。易疆隴。而後可爲聖王之井田。將塞之平之夷之壞之易之而後爲之也耶。爲高必因丘陵。爲下必因川澤。謂聖人也。而所行之事。寧若此愚癡不通耶。必九百畝而後井。必方百里而後同。不足於九夫之地。百里之同。而可耕可植者。將棄之乎。隨田之廣狹。而爲多少之授。可井則井。不可井則一夫二夫當之。可同則同。不可同則百夫千夫當之。助不必野而行。賦不必國中而行。此聖人之法也。二氏以不通之見而議古法。難乎其爲古矣。所見之舛若此。則其謂井田成。而民之死其骨已朽。驅天下之人。竭天下之

海 忠 介 公 集

糧。窮數百年專力於此。不治他事。宜乎其然矣。井田者。井田之名也。人必有田。而不必於井者。井田之實也。觀野行助法。國中十一自賦。聖人變通之權。可想見矣。爲今之計。不必訪求故堰遺坡之已廢者。按今日之土田。隨地區畫。舉周禮大司徒所謂不易之地。家有畝。小司徒上地家七人。與夫大宰九職任萬民者。而酌用之。守宰縣令。一以井田爲事。其纖悉又屬之一里之長。不以今日紛紛之病。而沮其必行之心。必委曲以方行。而求爲久遠之計。既定之後。舉簿書以驗田土。度地不足。則吏胥之姦弊可稽正。不必慈祥如龔黃。精明如張趙。而亦可以濟斯世於虞周之盛。區斯民於樂樂利利之中矣。橫渠曰。世之病難行者。未始不以亟奪富人之田爲辭。蓋謂其或以召亂也。然天下富人多乎。貧人多乎。田井。而貧者得免奴佃富家之苦。吾知其欲從必矣。王者固有滅人之族。沒人之產。而束手聽者矣。夫有餘之田。而不奪其上下之養。彼亦安得而違之。竊以爲井田之決可復於後世者。諒夫有同然之心。正宜審視其衆多之口。反覆曉諭。委

海 忠 介 公 集

曲變通。必無召亂之理。可收利數世之後。而其子孫衆多。不可以死徙無出鄉之法行之者若何。曰物之不齊。物之情也。自夏后以至八百年之久。其間獨無若此者乎。然要在必有田宅。而不失所養。化裁變通之而已。要之不能以一一如意而較之。田不井授。一通災旱。而民之輾轉溝壑。白骨遍野。平時則奸僞朋興。有故則群橫寇盜。其相去萬萬矣。愚故以爲斷然必在可行而無疑也。按古今論井田之難者。惟強奪民田以召怨讟一語爲稍近似。舉今日吏胥無窮之弊。守宰遷徙不常之由。乃不揣其本。而齊其末之論。若夫執溝洫井同之法。而謂今日之地。非古昔平原之區者。以膠柱鼓瑟而論聖人。不通之甚者也。夫人貧富不相耀。以和其心。而後天下之治可定。今日太平之業。必世後仁之化。舉須於此。彼夫心所同然。而口之怨讟。固不必恤也。力而行之。而民可與樂成矣。然封建所以維持井田者也。田欲井授。亦將舉封建而行之乎。日久守宰之任。而一里之長長子孫於其中者。復爲之維持焉。井田之可行也必矣。制度一定。則心志一。習俗成。

海 忠 介 公 集

其所維持之者不難矣。然則奚必封建爲哉。

人皆以井田爲聖王之養。庠序爲聖王之教。養民於先。教民於後。有養而後有教。非若井田自爲養。庠序自爲教。不相涉矣。然易履卦象曰。君子以辯上下定民志。上下辯。民志定。教之成也。一夫百畝之田。百畝外。不能加毫末。五畝之宅。五畝外。不能加毫末。上下四旁。長短廣狹。彼此如一。而無不方。民志之定何如。程伊川傳履。歎後世自士庶至於公卿。日志於尊榮。農工商賈。日志於富侈。億兆之心。交騫於利。天下紛然。如之何其可一也。欲其不亂難矣。降至今日。較伊川言殆有甚焉。所稱名人賢士。口談道義者。皆不能絕去爲富不仁之心。小民持此爲觀法。借此爲口實。用是風俗日流。莫知紀極。法不能止。大抵皆厚田宅。豐衣食。美妻妾。一念使之。有此一念。又皆田宅無分界。人人得以自買自賣致焉。井田行。則民貧富不相耀。而心和矣。生長所習見。而志定矣。漢人以富人觀欲天下爲悲。止此田宅。更何欲可觀。漢人以彼民情見美則悅爲歎。止

海 忠 介 公 集

此田宅。更何美可悅。富者欲過。貧者欲企。雖有其心。而蓋無其由也。無其由。而過企之心滅矣。井田未嘗教民。而域民於教。教道之妙有若此。嘗謂井田立。而先王之教。斯過半矣。天下之治。井田爲之。學校不過輔翼之。先王之教。井田教於始。學校不過成教於終。一井田。而天下之事畢矣。後世紛紛然交驚於利。彼身當教化之責者。亦惟利是馳。制度非不詳。教戒非不切也。以言相禁。實則別以惠相傳。夫曰教之。夫曰教之云者。是非亦空言而已。天下如之何其能治耶。井田盡天下之事。與其竭力爲庠序。爲教約。百端鼓舞。民志不定。迄無成功。不若竭力爲一井田。以復唐虞三代之治。不可以王莽三田增紛擾借口也。

孟子道性善

孔子論性曰性相近。習相遠。雖未一一剖析。而天命氣質。實兼於中。程子所謂二之。則不是相近一言盡之矣。論性不論氣。無以見其生稟之異。論氣不論性。無以見夫義理之同。言性不可不析而爲二。無氣則此理無處安

海 忠 介 公 集

賴。曰理曰氣。無離合。無後先。性即在氣質中。非二物也。言性又不可不合而爲一。合之而未嘗不分。渾然之中。燦然者著焉。聖人之言妙矣。孟子論性。區區然執一性善之說。夫人之所以信服於人。服其心也。服其心者。彼亦有所驗之於心。証之天下也。程張生於戰國。一言而告子服矣。告子不爲孟子服者。實孟子言之執於一。辯之不能詳使之。非告子諸人故屢變以求勝也。說者謂孟子時當戰國。人欲橫流。不得不執性善之說矯焉。春秋時。俗較去戰國不遠。孔子稱性相近。繼之曰惟上智與下愚不移。周流不舍。孔子救世之心。亦均切矣。將不欲矯正之耶。不正言以屈其心。欲反言而矯其失。不可得而矯矣。告子所謂仁內義外。乃不知仁義二字字義所謂。非知仁義二字義。固欲反之。孟子不曰心之德愛之理謂之仁。心之制事之宜謂之義。區區執敬酌湯水之說。辯之不詳。亦徒多言而無益也。孟子有命也有性焉君子不謂命之說。於氣質之性既知之矣。答告子諸人獨不言及之。蓋孟子意欲伸此抑彼。如說夜氣。欲人知涵養此性。說四端。

說擴充。欲人知體認此性。充廣此性。諄諄然不一而止。無非爲性善謀也。孟子之功大矣。然理氣不相離而離之。知爲性善謀。不能使人信吾性善之說。是則孟子之過也。

鄉愿亂德

海 忠 介 公 集

從古未有言及養氣者。而孟子言之。古有詭隨上容之說。卽鄉愿意也。亦無有若孟子之論剴切痛快者。蓋鄉愿餒其浩然之氣以從俗。浩然之氣。孟子身有之。見鄉愿若爲身害。故言之詳。惡之痛。今天下惟鄉愿之致。入人最深。凡處已待人。事上治下。一以鄉愿道行之。世俗羣然稱僻性。稱所行大過者。多是中行之士。謂如此然後得中道。善處世。則必鄉愿之爲而已。所稱賢士大夫。不免正道鄉愿調停行之。鄉愿去大奸惡不甚遠。今人不爲大惡。必爲鄉愿。事在一時。毒流後世。鄉愿之害如此。說者謂孟子擴前聖所未發。指養氣言也。孟子之功。不在禹下。當以惡鄉愿爲第一。

其嗟也可去

天下孰爲重。德義爲重。德義孰有之。君子之身有之。合仁與人謂之道。有此身然後有此德義。是人身爲重。非人身之爲重。德義身有之之爲重。非德之德。非義之義。自視此身之爲輕。是不知有此身。而後有此德義。身之爲重。孔子曰。自古皆有死。民無信不立。身有輕焉者矣。孟子曰。取食之重。與禮之輕者而比之。奚翅食重。身有重焉者矣。去身言德義。德義當酌之。去德義言身。身當酌之。天下一德義而已。曰酌之酌之云者。言當用中而行。不可見一偏執。爲德義不顧其有甚焉者。身之爲重也。饑者不食。嗟來之食。黔敖從而謝焉。終不食而死。曾子曰。微與微言。小節細故得之矣。至謂嗟可去。謝可食。則又不然。夫人一身。宇宙內事其分。儒行言愛其死以有待。養其身以有爲。饑者之身何身。獨非天地之性人爲貴。宇宙分內事之身耶。身有重焉者矣。嗟來從謝。區區間於我何與。孟子云與禮之輕。禮非有輕。視會通以行之之謂禮。非德非義。而俗執之禮之爲輕。曾

海 忠 介 公 集

可得而與我天地之身一較量哉。誠不啻食之爲重也。毫釐之差。千里之認。此等處天淵懸遠。誠不可以其小加大者之上也。饑者之死。姑就其近易曉者言之。饑者獨無父母妻孥。吾非斯人之徒。而誰與者哉。一不食。死則死矣。亡矣。不復見矣。嗟不嗟。謝不謝。何所干係。自安溝壑。何心哉。何心哉。饑者父。則不念子。不慈之父。饑者子。則不念父。不孝之子。饑者爲夫。則不念其妻。不義之夫。此亦宇宙分中之事。謂之近淺。姑就常人孺子皆有不忍之心言之。常人孺子皆有不忍之心。饑者獨無大戕天地。近戕一身。饑者之操。無可言矣。易曰。苦節貞凶。其道窮也。聖人無取焉。此惟陳仲子井李三咽。柴子羔不竄入於室。尙全其生。可以當之。孔子謂子羔爲愚。饑者以愚而死。不得其貞。窮而凶之道也。一父母天地之身。生生不息。草木同仁。忍棄之耶。其故起於講之不明。知有一事之義。而不知有一身一心。天地與立之全。諳於其大。是以徒執於其小。苟有見焉。會有向爲身死不受之一端。又會有奚翅食重之大體。變而通之。與時宜之。輕

海 忠 介 公 集

其輕。重其重。嗟來食。頭風過耳。從而謝。浮雲觸目。其謝我。不感之以爲恩。其嗟我。不藏之以爲怨。時適凶荒。不食則死。出此入彼。我之身大焉。豈計其他。禋祀有日。偶失於防。牛羊抵觸。可以改卜。牛羊無知。可以廢祭乎哉。仲尼之徒。無道桓文之事者。管仲曾西之所不爲也。如其仁。如其仁。夫子與之。豈若匹夫匹婦之諒。一匡天下。民到於今受其賜之爲大也。夫子取其功。畧其陋。是一道也。造化生乎身之身。父母妻孥所仰望而終身也。七尺之軀。可忽乎哉。責人與責己不同。管仲無足取者。爲酌量大小之說借明之。疾固也。子無取於饑者之操。無改於謝則亦不食而死矣。曾子謝也可食之言。無取焉。雖然。人有不爲篤信之美。然後可以望他日有爲恢宏之大。饑者則誤矣。志趣胸曲。行一不義。殺一不辜。而得天下不爲。人物也。得聖人依歸之。此其最高者歟。後之乞璫當糞。奔趨勢利。日無休息。生不如死。母以饑者爲口實。

海 忠 介 公 集

卷之六 論

三六

詩案以下諸詩原集不載係從備忠堂補入

游蜂歎

日出蜂亂飛。花落春初歇。夜來風雨多。枝頭子初結。徘徊青山隅。群芳寧可損。欲向泥中求。猶恐蒙不潔。物態無終窮。天道有生滅。功成身乃退。何事中心熱。

立鶴篇

西塞歲去徂。獨立撫孤松。仰盼丹闕迴。□□立鶴恫。立鶴如訴言。感之惻余衷。冥鴻遠北渚。振鷺集西雝。飛揚各乘運。翩翩厲高空。潔身豈難羣。滄素乃無庸。再踪破苔綠。露滴懸朱紅。永嘆奮清夜。朗月何虛融。照此哀怨深。耿耿殊未窮。亨嘉多風遘。屯溺鮮英雄。形以落魄靡。長鳴向蒼穹。願祈回景光。恆與今日同。月不去天上。鶴不老樊中。

海 忠 介 公 集

此田宅。更何美可悅。富者欲過。貧者欲企。雖有其心。而蓋無其由也。無其由。而過企之心滅矣。井田未嘗教民。而域民於教。教道之妙有若此。嘗謂井田立。而先王之教。斯過半矣。天下之治。井田爲之。學校不過輔翼之。先王之教。井田教於始。學校不過成教於終。一井田。而天下之事畢矣。後世紛紛然交鶩於利。彼身當教化之責者。亦惟利是馳。制度非不詳。教戒非不切也。以言相禁。實則別以惠相傳。夫曰教之。夫曰教之云者。是亦空言而已。天下如之何其能治耶。井田盡天下之事。與其竭力爲庠序。爲教約。百端鼓舞。民志不定。迄無成功。不若竭力爲一井田。以復唐虞三代之治。不可以王莽三田增紛擾借口也。

孟子道性善

孔子論性曰性相近。習相遠。雖未一一剖析。而天命氣質。實兼於中。程子所謂二之。則不是相近一言盡之矣。論性不論氣。無以見其生稟之異。論氣不論性。無以見夫義理之同。言性不可不析而爲二。無氣則此理無處安

海 忠 介 公 集

頓。曰理曰氣。無離合。無後先。性即在氣質中。非二物也。言性又不可不合而爲一。合之而未嘗不分。渾然之中。燦然者著焉。聖人之言妙矣。孟子論性。區區然執一性善之說。夫人之所以信服於人。服其心也。服其心者。彼亦有所驗之於心。証之天下也。程張生於戰國。一言而告子服矣。告子不爲孟子服者。實孟子言之執於一。辯之不能詳使之。非告子諸人故屢變以求勝也。說者謂孟子時當戰國。人欲橫流。不得不執性善之說矯焉。春秋時。俗較去戰國不遠。孔子稱性相近。繼之曰惟上智與下愚不移。周流不舍。孔子救世之心。亦均切矣。將不欲矯正之耶。不正言以屈其心。欲反言而矯其失。不可得而矯矣。告子所謂仁內義外。乃不知仁義二字字義所謂。非知仁義二字義。固欲反之。孟子不曰心之德愛之理謂之仁。心之制事之宜謂之義。區區執敬酌湯水之說。辯之不詳。亦徒多言而無益也。孟子有命也有性焉君子不謂命之說。於氣質之性既知之矣。答告子諸人獨不言及之。蓋孟子意欲伸此抑彼。如說夜氣。欲人知涵養此性。說四端。

說擴充。欲人知體認此性。充廣此性。諄諄然不一而止。無非爲性善謀也。孟子之功大矣。然理氣不相離而離之。知爲性善謀。不能使人信吾性善之說。是則孟子之過也。

鄉愿亂德

從古未有言及養氣者。而孟子言之。古有詭隨上容之說。卽鄉愿意也。亦無有若孟子之論剴切痛快者。蓋鄉愿餒其浩然之氣以從俗。浩然之氣。孟子身有之。見鄉愿若爲身害。故言之詳。惡之痛。今天下惟鄉愿之教。入人最深。凡處已待人。事上治下。一以鄉愿道行之。世俗羣然稱僻性。稱所行大過者。多是中行之士。謂如此然後得中道。善處世。則必鄉愿之爲而已。所稱賢士大夫。不免正道鄉愿調停行之。鄉愿去大奸惡不甚遠。今人不爲大惡。必爲鄉愿。事在一時。毒流後世。鄉愿之害如此。說者謂孟子擴前聖所未發。指養氣言也。孟子之功。不在禹下。當以惡鄉愿爲第一。

其嗟也可去

天下孰爲重。德義爲重。德義孰有之。君子之身有之。合仁與人謂之道。有此身然後有此德義。是人身爲重。非人身之爲重。德義身有之之爲重。非德之德。非義之義。自視此身之爲輕。是不知有此身。而後有此德義。身之爲重。孔子曰。自古皆有死。民無信不立。身有輕焉者矣。孟子曰。取食之重。與禮之輕者而比之。奚翅食重。身有重焉者矣。去身言德義。德義當酌之。去德義言身。身當酌之。天下一德義而已。曰酌之酌之云者。言當用中而行。不可見一偏執。爲德義不顧其有甚焉者。身之爲重也。饑者不食。嗟來之食。黔敖從而謝焉。終不食而死。曾子曰。微與微言。小節細故得之矣。至謂嗟可去。謝可食。則又不然。夫人一身。宇宙內事其分。儒行言愛其死以有待。養其身以有爲。饑者之身何身。獨非天地之性人爲貴。宇宙分內事之身耶。身有重焉者矣。嗟來從謝。區區問於我何與。孟子云與禮之輕。禮非有輕。視會通以行之之謂禮。非德非義。而俗執之禮之爲輕。曾

海 忠 介 公 集

可得而與我天地之身一較量哉。誠不啻食之爲重也。毫釐之差。千里之謬。此等處天淵懸遠。誠不可以其小加之大者之上也。饑者之死。姑就其近易曉者言之。饑者獨無父母妻孥。吾非斯人之徒。而誰與者哉。一不食。死則死矣。亡矣。不復見矣。嗟不嗟。謝不謝。何所干係。自安溝壑。何心哉。何心哉。饑者父。則不念子。不慈之父。饑者子。則不念父。不孝之子。饑者爲夫。則不念其妻。不義之夫。此亦宇宙分中之事。謂之近淺。姑就常人孺子皆有不忍之心言之。常人孺子皆有不忍之心。饑者獨無大戕天地。近戕一身。饑者之操。無可言矣。易曰。苦節貞凶。其道窮也。聖人無取焉。此惟陳仲子并李三咽。柴子羔不竇入於室。尙全其生。可以當之。孔子謂子羔爲愚。饑者以愚而死。不得其貞。窮而凶之道也。一父母天地之身。生生不息。草木同仁。忍棄之耶。其故起於講之不明。知有一事之義。而不知有一身一心。天地與立之全。諳於其大。是以徒執於其小。苟有見焉。會有向爲身死不受之一端。又會有奚翅食重之大體。變而通之。與時宜之。輕

海 忠 介 公 集

其輕。重其重。嗟來食。頭風過耳。從而謝。浮雲觸目。其謝我。不感之以爲恩。其嗟我。不藏之以爲怨。時適凶荒。不食則死。出此入彼。我之身大焉。豈計其他。禋祀有日。偶失於防。牛羊抵觸。可以改卜。牛羊無知。可以廢祭乎哉。仲尼之徒。無道桓文之事者。管仲曾西之所不爲也。如其仁。如其仁。夫子與之。豈若匹夫匹婦之諒。一匡天下。民到於今受其賜之爲大也。夫子取其功。畧其陋。是一道也。造化生乎身之身。父母妻孥所仰望而終身也。七尺之軀。可忽乎哉。責人與責己不同。管仲無足取者。爲酌量大小之說。借明之。疾固也。子無取於饑者之操。無改於謝則亦不食而死矣。曾子謝也可食之言。無取焉。雖然。人不爲篤信之美。然後可以望他日有爲恢宏之大。饑者則誤矣。志趣胸曲。行一不義。殺一不辜。而得天下不爲。人物也。得聖人依歸之。此其最高者歟。後之乞糒當糞。奔趨勢利。日無休息。生不如死。母以饑者爲口實。

海 忠 介 公 集

卷之六
論

三六

詩

案以下諸詩原集不載係從備忘集補入

游蜂歎

日出蜂亂飛。花落春初歇。夜來風雨多。枝頭子初結。徘徊青山隅。群芳寧可掇。欲向泥中求。猶恐蒙不潔。物態無終窮。天道有生滅。功成身乃退。何事中腸熱。

立鶴篇

西臺歲去徂。獨立撫孤松。仰盼丹闕迴。□□立鶴恫。立鶴如訴言。感之惻余衷。冥鴻遵北渚。振鷺集西雝。飛揚各乘連。翩翩厲高空。潔身豈離羣。澹素乃無庸。畱踪破苔綠。露滴懸朱紅。永暝奮清夜。朗月何虛融。照此哀怨深。耿耿殊未窮。亨嘉多夙遘。屯溺鮮英雄。形以落魄隴。長鳴向蒼穹。願祈圓景光。恆與今日同。月不去天上。鶴不老樊中。

樵溪行送鄭一鵬給諫

溷泝水流雲霧中。江翻急浪奔長虹。君候覽之動高思。悠然若破馮夷宮。投鞭斷河洛。挂劍倚崆峒。松舟檜楫乘長風。棹歌依依明月小。帆影落落青天空。三山鄭子好狂者。夷游海內靡所同。羨君高雅。爲君和衷。百年意氣多豪雄。宓粟奏西響。喬寫度南鴻。飛飛野雉春桑中。君胡爲乎去歲朝京師於千里。拜舜華而九重。答蘭陵之嘉命。奏蒲長之膚功。扁舟信于邁。落日吾追蹤。萬山雲來意不極。一尊酒盡情無窮。君亦不能語。吾亦不能從。忽聞前峯戰雷雨。乍驚別浦吟蛟龍。瓊邪叟。漁陽童。群走江上呼明公。寇恂胡爲不吾借。天閣高叫誰能容。長辭竟爾此黎赤。使我聞之爲中激。民愚而神豈易得。傍更牽情者。楊柳依依漫垂碧。丈夫所志在經國。期使四海皆衽席。百里原非人賢居。鸞皇豈可終棲棘。汎三江。浮七澤。愛爾鸞騰萬里翮。吁嗟乎。別離可悲。長何足惜。

贈竹園隱者

寂寂江村路。何煩命駕過。羊求忘地速。松竹到門多。野外常無酒。田間別有歌。洗杯深酌處。落日在滄波。

七夕立秋值雨

尊前紅雨飛南山。坐隔牛女河之間。越歲佳期應自合。一望蕭瑟總虛還。螢垂碧草疎簾靜。燕入深紅畫棟間。漫指白雲浮故國。忽因清夢落朝班。

游滴水巖

露磴盤紆鬱萬岑。碧山飛映翠華臨。鼉飛玉棟浮雲爛。鵲隱瓊巖對雪深。石頂有泉時滴滴。洞門無日晝陰陰。簿書多暇偏乘興。潦倒尊中月滿簪。

送諸生小試遇雨

電掣雷鳴酣野戰。水吟龍嘯鬱雲興。山南月暗全無路。岸北沙明僅有燈。海內英雄今並起。江中波浪此憑陵。商霖□滿焦枯發。野色新添萬里青。

秋日 王龍津觀物園

碧苔山深草堂藟。王子情□野興悠。□竹烟霞凝玉□。萬松風露接清秋。放歌劇飲不盡意。落日出林還泛舟。山童載酒更呼酌。天畔雷鳴翻白鷗。

呂梁洪

呂梁之險亦奇觀。峭壁驚濤走萬灘。楚纜吳檣天上度。朔雲燕樹鏡中看。日黃山閣湖光皺。雪白江村草色寒。隔岸鞦韆喧不歇。桃花開遍曲闌干。

春日阻風部中限韻

白晝日黃天欲浮。燕城三月似高秋。濤生宮掖沙驚樹。花覆苑牆春隱樓。朝馬不嘶金勒斷。塞鴻無路到關愁。卻思豐沛有遺恨。猛士彫殘蔓草稠。

陳子達院中賞榴限韻

露冷天階銀燭清。絳榴飛影斗間橫。繁花媚已酬嘉節。多病愁兼劇世情。十里層臺齊月上。三城悲角繞雲生。與君未是清狂客。莫漫金尊盡夜傾。

晚霽謁張水南翰讀歸復簡此

宿雨不淹□□□。晚涼堪曳玉堂裾。朱簾靜度燕山色。碧構清涵太史書。傾蓋幾回瞻相業。虛襟終日對文儒。臨風漫省瑤華造。欲報瓊英愧不如。

聞警和顧心新三首

遼海風波偃將旗。狂奴操刃弄潢池。游魚釜熱應難久。縛虎籠深恨不支。營壘十年空節鉞。羽書千遍乞王師。請纓有志長沾臆。擊節終軍口爾爲。

百年遼左號精兵。負險誰知氣益橫。一鼓日中飛砲火。三軍帳下拔霓旌。不聞西賊憂韓老。猶自長沙哭賈生。近事大同姑勿論。往年甘肅悔行成。

六月王師曉出征。將軍李廣舊知名。燕然今去承推轂。天討由來是應兵。萬里若能褫逆膽。此生真不愧虛行。乘時勒石非難事。急爲長楊一請纓。

病中立秋

三伏初收展病扉。夜深風露漾霏微。碧梧已應金空落。大口新隨斗指飛。燕倦客思遠綠野。蓮知老至褪紅衣。玉簫萬里堪腸斷。何處滄洲映紫薇。

樂耕堂

源頭活水溢平川。桃色花香總自然。海上疑成真世界。人間誰信不神仙。棋驚宿鳥搖深竹。歌遏行雲入九天。良會莫教輕住別。每逢流水惜芳年。

倭犯鍾司徒墓雷震遁去

既歸三尺樂斯堂。況有金函玉匣藏。誰謂蓋棺古定事。猶遺赫怒庇重岡。丹忱貫石瑩俱古。赤電明心山亦蒼。千載智愚都幻化。到來賢哲自洋洋。案上二詩從府志補入

題峽山飛來寺

峽中奇勝擬蓬萊。想是當年欲建臺。天恐此方窮土木。故令神物特飛來。案此詩從粵東文獻補入

貞節周母莫孺人

寶鏡鸞分四十年。魂飛孤塚鎖雲煙。水霜節操共姜苦。鐵石肝腸令女堅。萬古綱常天地久。一生貞白鬼神憐。朝廷有意敦流俗。早晚褒書下九天。從文山周氏族譜補入

午日卓明堂議修築北冲河口

五指參天五嶽呈。四州導水四山傾。地脉不緣滄海斷。中原垂盡觀全瓊。特起崑崙浮浩瀼。居然福地擬蓬瀛。鴻荒世遠不可辨。唐虞聲教朔南拜。郡縣開疆始秦漢。輿圖一統歸皇明。王旨一從褒甸服。珠崖千古表神京。海濱絃誦追鄒魯。天上夔龍翊治平。鄉里衣冠今不乏。登高遠望幾含性。爰稽往牒紀圖讖。大魁五解須彙征。數過時考今則可。後有作者誰先鳴。北冲河口尙未塞。女媧補煉須經營。裁成輔相固有道。望景觀卜希前旌。弱齡荏苒今衰晚。去來吾黨欣逢迎。維時天中際佳節。嚶鳴求友羅羣英。蒲觴綵縷紛競勸。玄談四座俱高聲。就席探韻陳風雅。稽首神天爲主盟。卓明堂前一杯酒。上帝胥蠻一墻羹。肝

海忠介公集

膽鑄銘諧楚越。市義好德垂休名。從此山靈增氣色。風雲際會符嘉禎。
五百名世應時出。三千禮樂對縱橫。政善民安歌道泰。風調雨順號時
清。雍熙世擬華胥國。蠻荒時築受降城。逸史賡歌摘蘇句。載稱奇
絕冠平生。

集 公 介 忠 海

卷 之 六 詩

十

邱 海 合 集

有明丘海二公。以名儒爲名臣。經濟氣節文章。炳耀寰區。昭垂史策。其著作之富。四庫著錄。外間未有刊本。清初賈太守棠。焦觀察映漢。輯二公詩文。編爲合集。流傳二百餘年。其板今散佚不全。海南書局主人。覓原刊舊本。重加校訂圈點。印行於世。其表章先賢著作。嘉惠士林。甚盛舉也。二公文章。前賢李茶陵、葉福清、程墩篁、陳清端諸公。已有定論。不能再贊一詞。謹叙其顛末於後。俾後之讀二公合集者。其知所師法云。

民國十六年歲次丁卯同里後學王國憲敬跋

徵求海南前賢事畧遺像啓事

自路馬兩伏波開疆拓土。而瓊地始入版圖。自宋貫之李時亮蘇文忠諸公宦遊。而瓊人始知文化。迨至民國。已逾千年。其間宦于斯者之遺教善政。固代不乏人。而吾瓊名賢輩出。著作成家者。亦誠屬不少。苟不徵求事畧。表而出之。何由使後人有飲水思源。聞風興起之念。敝局有見及此。擬將守土之有功於吾瓊。及吾瓊名賢。生平事蹟。編爲「海南歷代名賢小史」。一藉資表彰。而盡厥職。特將此意商之王先生堯雲。堯雲先生留心海南文獻。網羅散失。已廿餘年。對於此舉。亦極贊同。允爲編輯。惟瓊匪延袤十三屬。事隔千餘年。恐前賢事畧。有非史志所能盡載者。素諗吾瓊關心文獻。景仰先哲者。必有其人。用特廣爲徵求。以免遺漏萬一。尙希前賢哲嗣。如有前賢事畧及遺像者。請於本年夏歷十二月以前。逕寄敝局出版部彙集。藉以補遺而資編輯。是爲至幸。專闕文獻。邦人君子。諒必與敝局表同情也。

瓊州海口海南書局謹啓

中華民國十六年十月

邱海合集全書三册

定價大洋二元四角

著者 邱文莊 海忠介兩公

原編輯者 賈棠 焦映漢

校訂者 王堯 雲 劉錦春

出版兼 瓊州 海南書局

印刷者 海口 海南書局

發行者 瓊城 海南書局

分售處 滬港 瓊 各 大 書 局

省 瓊 各 大 書 局

